


Jusiñamui uai:
Jusiñamui jito rafue
illa rabenico



New Testament in Huitoto, Murui (PE:huu:Huitoto, Murui)

Jusiñamui uai: Jusiñamui jito rafue illa rabenico **New Testament in Huitoto, Murui (PE:huu:Huitoto, Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022

145a1f66-dca1-5de3-9c00-4e533605e488

Contents

MATEO	1
MARCOS	65
LUCAS	104
JUAN	167
HECHOS	210
ROMANOS	262
1 CORINTIOS	286
2 CORINTIOS	314
GÁLATAS	329
EFESIOS	338
FILIPENSES	347
COLOSENSES	353
1 TESALONICENSES	359
2 TESALONCENSES	364
1 TIMOTEO	367
2 TIMOTEO	374
TITO	379
FILEMÓN	382
HEBREOS	384
SANTIAGO	405
1 PEDRO	411
2 PEDRO	418
1 JUAN	422
2 JUAN	428
3 JUAN	429
JÚDAS	430
APOCALIPSIS	433

MATEO JESUCRISTO ENIRUEMO ILLA RAFUE CUIAFUE

Jesucristo ie usumatiai
(Lc 3.23-38)

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. ² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. ³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. ⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. ⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. ⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñona ollena, David micori Urías micorina jobaimemo orede. Jobaimemo naimie fiodailla mei, naiñaiñona ote. ⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori. ⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori. ⁹ Uzías micori jitodi Jotam. Jotam micori jitodi Acáz. Acáz micori jitodi Ezequías micori. ¹⁰ Ezequías micori jitodi Manasés. Manasés micori jitodi Amón. Amón micori jitodi Josías. ¹¹ Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. ¹² Naie meinomo Jeconías micori Salatiel micorina comuitate. Salatiel micori jitodi Zorobabel micori. ¹³ Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. ¹⁴ Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. ¹⁵ Eliud micori jitodi Eleazar micori. Eleazar micori jitodi Matán. Matán micori jitodi Jacob micori. ¹⁶ Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

¹⁷ Abraham micori illa facaise mona David micori jeicia facaisemo Jesús ie catorce nanoramaci mameci jai ite. David micori facaise mona Babiloniamoo ite nairai anamo cai jaiagai illa facaisemo catorce nanoramaci mameci jai ite. Babiloniamoo ite nairai anamo cai jaiagai illa facaise mona Jesús jeicia facaisemo catorce nanoramaci mameci jai ite.

Jesús jeicia rafue
(Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiñona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñona uruesitate. ¹⁹ José micori maremie. María jai uruesillana naimie micori fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comequina facajanona, naiñaiñona

dotaacade. ²⁰ Naimie micori comecina iemo facaia, naimie micori nicaïrillanona, naimie micorimo Jusiñamui jaienici bairiano raite:

—José, David micori jito, Mariana jaciruiñeno ono, o aina illena. Jusiñamui Joreño naiñaiñona jai uruesitate. ²¹ Ìimana jocoite. Ie comini naimaci jeacinomona naimie jilloitajaiBILLA jira, Jesúna o jitalle naimie mamecidi —raite. ²² Bie rafue suide, Jusiñamuidi ie lloraima micori jaiel lotataga uaina suillena. ²³ Jaiel lotatate:

Ìimana uiñoñediñaiñomo comuite uruedi.

Ìimana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

²⁴ José micori casidemo, Jusiñamui jaienici lloga uaina finode. Mariana ote, ie aina illena; ²⁵ iadedi nai jitona naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jitate naimie mamecina Jesúna.

2

Monamo ite ramo comeциаina facauidino rafue

¹ Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeциаina facauidino naie facaiseconi Jerusalémo jitoma billafo dinena bitimaci. Jerusalémo itinomo jicanotimaci:

² —¿Ninomo como jeiciga omoi judíuai illaimadi? Jitoma bisoillafomo como bairede ucuduna cidicai. Naiemona naimie jeiciana jai uiñoticaï. Naimiemo iobillacinona fecallena biticai.

³ Herodes micoridi naicinona cacajanona, ie começi jarire ite. Jiaimie naimie meifomo illana jitañede. Jerusalémo itinodi jiai jarire itimaci. ⁴ Ie facaise Herodes micori judíuai illaicomínina uaiduanona, naimacimo Cristo raillamie jeiciana jicanote. ⁵ Uai otimaci:

—Judea railla eniruemo. Belémo. Iena Jusiñamui facaina micoridi jaiel cueba:

⁶ Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla comínina sedaite.

Iemona Belén nairai Judea illaicomíni baiñemo faite

cuega. ⁷ Iena cacaja mei, Herodes micoridi monamo ite ramo comeциаï facauidino bainino uaidote. Naie ucudu bairia facaise raise uiñollena jicanote. ⁸ Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiai fecaacadícue —llote.

—Jii —fairiotimaci. ⁹⁻¹⁰ Iena naimie micori llua mei, jaidimaci. Ucuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. ¹¹ Fo jaillano uruena, ie ei María diga, cidimaci. Naimiemo iobillacinona fecallena, cañici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caïmare sorirede rana jiai fecadimaci. ¹² Naimaci inia anamo naimaci nicaïrillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micori inia anamo nicairite. Nicairillanona, Jusiñamui jaenicidi naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide. ¹⁵ Herodes micori fiodaille dinori nainomo ite. Ie muidona Jusiñamui ie facaina lloraima micori llotataga uai jai suide. Jaie lloga: “Egiptomona cue Jitona jai uaidoticue”.

Mena años itisaiai dierisedena faia rafue

¹⁶ Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite isaiiai diese faetate. Belén ecimo itino uruiaina jai faetate. Naie ucudu mena años jaie nano bairena jira, mena años itisaiai dierisedena faetate. ¹⁷ Raquel micori jaie eia isoi, Belén itino birui eedimaci. Jeremías micori iena jaie cueda:

¹⁸ Ramá railla nairai dina Raquel micori eo eiana cacadicue.

Cai usuño Raquel micori eede.

Naiñaiño micori uruiiai micoríai facaina eede.

Jaie cominimona firaduacinona jitaiñede, naiñaiño uruiiai micoríai jai fiodailla jira.

¹⁹ Digarui illanona, Herodes micori fiodailla mei, Egiptomo José micori dane nicairillanona, Jusiñamui jaenici naimiemo bairede. ²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

²¹ Ie jira ie eniruemo naie urue diga, ie ei diga, abido jaide. ²² Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaicaiñede. José micori dane nicairillanona, Jusiñamuidi Galilea railla eniruemo naimie jaillana naimiemo llote. ²³ Nazaret railla nairai dine jaide, nainomo illena. Iemona Jusiñamui facaina lloraini micoríai jaie cuedafuiai jai suide. Cristona jaie cuetimaci: “Naimiedi Nazaret imie”.

3

Jofue iñenanomo Juan Bautista micori illa rafue

(Mr 1.1-8; Lc 3.1-9, 15-17; Jn 1.19-28)

¹ Diga años illanona, Juan Bautista raillamie micoridi jofue iñenanomo illanona, cominina dafaifia, Jusiñamui rafuena naimacina llofueuide.

² Comini naimie micori dine billanona, naimacimo llote:

—Omoi jeacinona fainonocaida, omoi comeciiai iuailai meido. Jusiñamui dibeimo omoi i. Naimie anamo omoi illana naimie jitailla jira, omoimo iena lloiticue —llote. ³ Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite. ⁴ Juan micoridi camello itiraiiai ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. ⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. ⁶ Jusiñamui naimaci jeacinona naimaci llua meino, naimacidi Juan micori bautizaga. ⁷ Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isidomoi. ¿Ñiese Jusiñamui riicaillifuemona jilloitomoi? Cue dine omoi billena, ¿bu omoimo llua? ⁸ Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticaí. Ie mei omoi bautizallomoi. ⁹ Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jai e raise nabaide. Abraham micori cai moo illamona, Jusiñamui riicaillifuemona jilloiticaí”. Ero, omoimo lloiticue: Cue llua isoi omoi finoñenia, naimie riicaillifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. ¹⁰ Ero, llisiñede riará tiedomoi. Tiaa mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoína jai duere finoacade. Ie riicaillafue anamo jai itomoi. Omoi comeciai iuai omoi meidoñenia, omoína duere finoite. ¹¹ Jusiñamui díbeimo omoi comeciai iuai omoi meidoia, jinui diga omoína bautizaiticue. Cue baiñemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie díbeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoína duere finoite. ¹² Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue

(Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite. ¹⁴ Juan dinena naimiemo llote:

—Bautizallena cuemo bitio; ia dama ite. Cuena o bautizaia, cuemona mare.

¹⁵ Jesús uai ote:

—Cuena mai o bautiza. Nana Jusiñamui jitailla rafue coco finoia, mare. Juan:

—Jee —raite. Ie facaise naimiena bautizade. ¹⁶ Jesús bautizaja mei, jinui mona bite. Mona bojodena cide. Jusiñamui Joreño, ucugi isoi, naimie emodomo ana billana cide. ¹⁷ Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

4

Jesúna Taiñe ramo faia rafue

(Mr 1.12-13; Lc 4.1-13)

¹ Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. ² Cuarenta digarui Jesús guiñede. Naie facaise fuilla mei, guiñeno illamona, aimetaite. ³ Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomeniconajaita”. ⁴ Jesús uai ote:

—Dama ite. O luana finoñeiticue. Jusiñamui facaina lloraíma micorí iena jaie cuega: “Jiaie rafuedi llomenico guilla baifemo faite. Dama guillemo começina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵ Ie mei Jerusalémo Jusiñamui jofu muidomo Taife Jesúna uite. ⁶ Raite:

—Jusiñamui Jitodiodena, eniruemo mai ana uai. David micorí ona jaie cuega:

Ona eenollena, Jusiñamuidi ie jaienisaímo lloite.

Eniruemo o uaiñellena, o abi bofedaiñellena, ona feiñoitimaci

cuega. Naie lloga uai suillena, bie jofu muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micorí jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamaí ebena naimiena facaciñeiticue. O luana finoñeiticue.

⁸ Ie mei a ite anedumo Taife naimiena uite, naie anedumona nana nairaiaina cioillena. Naie nairaiái eo ebire eruaiide. ⁹ Naimiemo llote:

—Nana bie nairaiái cue anamo birui illamona, cuena o sedaía, nana bie nairaiái omo iiticue. O caiñici ifodo ana rainada, cuemo iobillacino o fecallena.

¹⁰ Jesús uai ote:

—Dama ite. Ona sedañeiticue. Ie cominimo Moisés micorí jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai. ¹¹ —Ie facaise naimiemona Taife jaide. Naimie jailla mei, Jusiñamui jaienisaí Jesús dine bitimaci. Naimiena ecallena bitimaci.

Galileamo Jesús illa rafue

(Mr 1.14-15; Lc 4.14-15)

¹² Naie facaise Juan Bautista micorína Herodes gaitajana naimie fidiano, Galilea railla eniruemo Nazaretmo Jesús jaide. ¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiaí ite. ¹⁴ Nainomo Jesús jailla jira, Isaías micorí jaie cuegafuíaí jai suide. ¹⁵ Naimie micorí naie cominina jaie cuega:

Bie eniruemo diga nairai ite.

Zabulón ite. Neftalí ite.

Monailai fuemo nairai ite. Jordán ruicafebeímo nairai ite.

Galileamo nairai jiaí ite. Nainomo judíuainedino jai itimaci.

¹⁶ Jeacino anamo naimaci illamona, naga naie eniruemo ite cominí jitiredinomo itimaci isoidimaci

Jusiñamuina uiñoñeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenite

cuega. Jusiñamuina naimaci uiñoñena jira, naimacina iese cuega. Jesús nainomo birui llofuia jira, mare rafuena jai cacadimaci. ¹⁷ Galileamo rilla mei, Jesús llocana jaide. Llofueite:

—Jusiñamui dibeimo illena, omoi jeacinona fainonocaida, omoi comeciai iuaina meido. Ie cominina omoi jaillena birui jitaide.

Ie llofueoicaiganona jaillena, Jesúsdi nagaamagamiena fetua rafue
(Mr 1.16-20; Lc 5.1-11)

¹⁸ Jiairuido Galilea railla jorai fuemo Jesús macaritemo, menamiēna ciode. Naga ie ama iaimaiai. Damie Simón. Jiaici naimie mamecidi Pedro. Ie ama Andrés diga ite. Llojjina fairaīma iaimaiai. Iese jaca naie iaimaiaidi maijuiddiaimaiai. ¹⁹ Iaimaiaimo llote:

—Cue diga omico jaoicallena, cue diga mai bi. Cue llofueganona omico jaillena jitaidecūe. Lliciaīna birui ocabitomico; iadedi cominina oitomico, cue dibeimo naimaci illena.

²⁰ Iena cacajanona, ieconi iaimaiai llojjina fainonocaida, naimie diga jaidiaimaiai. Ie llofueganona jaillena, jaidiaimaiai. ²¹ Lliai bai Jesús jaidemo, jiaie menamiēna ciode. Naga ie ama iaimaiai. Damie Jacobo. Jiaimie Juan Iaimaiai moodi Zebedeo. Naimie diga botemo itiaimaiai. Llojjina sigaidimaci. Jesús iaimaiaīna uaidote, naimie llofueganona jaillena. ²² Ieconi iaimaiai moona fainonocaida, botemona ari billanona, Jesús diga jaidiaimaiai.

Jesús ailluena cominina llofuia rafue
(Lc 6.17-19)

²³ Nana Galileamo Jesús jaide. Judiaiai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciai iuaina meiduaana llofueite. Ie cominina naimaci illena llofueite. Naga isoide duicona duidinona jillotate. ²⁴ Iemona nana Siria railla eniruemo naimie mameci soride. Naie comini naga isoide duicona duidinona naimie dine atidimaci. Abi isiredinona atidimaci. Jananiai anamo illa cominina atidimaci. Naillidinona atidimaci. Niraīdanidinona atidimaci. Nana naimacina jillotate. ²⁵ Ailluena comini naimiēna racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

5

Anedumo naimie ia, Jesús lloga rafue
(Lc 6.20-23)

¹⁻² Ailluena cominina Jesúsna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote:

—Omoīna Jusiñamui ie cominina sedaacana rafuena ja llofueitecūe. Naimie anamo naimaci illena llofueitecūe. ³ Ero, Jusiñamui naimiēna jitaidinona sedaite. Comeciaīna facadimaci: “Naimie jitaillacinona dani finonidicai; ia naimie caina canuanona, iena finoiticai”. Naimie cominina naie isoidino illamona, naimie naimacina canoite. Iemona caimare iitimaci. ⁴ Jusiñamui sunaitinona sedaite. Ailluena comini jeacino finocana jaidimaci. Iena uiñuamona, damierie sunaitimaci. Naimie cominina naie isoidino illamona, Jusiñamui naimaci comeciaīna ocuñotaitaite. Iemona caimare iitimaci. ⁵ Jusiñamui abina iedoñedinona sedaite. Naimie cominina naie isoidino illamona, Jusiñamui nana

enirue naimacimo iite. Eniruego cominina ico cue sedaia, iese iite. Iemona caimare iitimaci. ⁶ Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci. ⁷ Jusiñamui cominina duenaitinona sedaite. Naimacina naimie duenaillamona, Jusiñamui naimacina ico duere finoñeite. Iemona caimare iitimaci. ⁸ Jusiñamui jeanide comeciredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci. ⁹ Jusiñamui naimie diga uri itinona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mamecirenitimaci. Iemona caimare iitimaci. ¹⁰ Jusiñamui jitaillacinona finuamona, damerie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaitimaci. Iemona caimare iitimaci. ¹¹ Cuesto omoi duia, duere sefuitomoi. Jiaie comini omoina jeare ñaitimaci. Omoina duere finoitimaci. Omoi joreñona tainona lloitimaci. Duere sefuitomoi; iadedi Jusiñamui omoina caimare itataite. ¹² Omoi isoi omoi jaiagaimona Jusiñamui facaina lloraini micoriai jai duere sefuidimaci. Iena omoi uñuamona, monamo Jusiñamuimona ailluena ibana ico omoi feñua jira, birui omoi duere sefua, iocire omoi jai.

Jesús comini illa rafue

(Mr 9.50; Lc 14.34-35)

¹³ Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai marañede. Iena rifaiñellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini marañede rafuena eo finoñedimaci. Sal ie caimano jai iñenia, ¿ñiese dane nibaiamona caimarenite? Jai marañede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoina duere finoite.

¹⁴ 'Cuesto omoi duilla jira, jiaie cominina Jusiñamuina omoi uñnotajamona, lligaiñora isoidomoi. Anedumo ite nairai jaca bairede. Ie illanona jaca uñnoticai. Jusiñamui jitailla isoi omoi illamona, jiaie comini naimiena uñnoitimaci. ¹⁵ Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena. ¹⁶ Ie isoide. Cue rafuena jamaiñeno; iadedi omoi marena illamona, cominina Jusiñamuina uñnota. Omoi marena illamona, comini omoi mare finoca rafuena uñnoitimaci. Iemona: "Jusiñamui maremiena" raitimaci.

Jesúdi Moisés micorina llofua rafue

¹⁷ Jesús llote:

—Jusiñamui ie cominina sedaacalle rafue nia llofueiticue. Iena cue llofua jira, omoimona damerie comecina facade: "Bimie Moisés micori lloga rafuedo jaiñede". Ero: "Moisés micori llogacinuai marañede" raiñedicue. "Jusiñamui facaina lloraini micoriai jai llogacinuai marañede" jiai raiñedicue; iadedi omoina naie llogacinaina raise uñnotaacaducue. ¹⁸ Biemo omoi comeciaina faca. Mona, enirue diga, nia ia, nana naie llogacinuai jaca suite. ¹⁹ Omoi einamacai raitimaci: "Dajerie llogacino jiaie llogacino baifemo faite". Cue raiticue: Naga llogacino omoi iñoñenia, naga omoi llofueñenia, nana Jusiñamui jitaillacinona finoñedomoi. ²⁰ Ero, Jusiñamui jitailla rafuedo judíuai illacomini baifemo omoi jaiñenia, Jusiñamui sedajanomo jaca iñeitomoi. Naimaci naie jai

llogacínuai uíñotímaci; iadedi naimaci comeciai Jusiñamui díbeimo íñedímaci.

Jusúdi iciriñena llofuia rafue

(Lc 12.57-59)

²¹ Jesús llote:

—Omoí llofueraínimona bie jai cacadomoi. Moisés micorí omoi ja-
iagaimo llote: “Comena meineñeno. Comena bu meineia, jeacino
jai finode. Naimie fiodaillena juez llua”. ²² Naie llogacínodo jai
jaicabidomoi. Omoímo birui jiaie rafue lloiticue. Jiaimie diga bu iciria,
jeacino jai finode. Naimie duere sefuillena, juez dine naimie uiga.
Jiaimiena bu jeare ñaia, jeacino jai finode. Naimie duere sefuillena,
illaicomíni dine naimie uiga. Jiaimiena bu faidoia, jeacino jai finode.
Jusiñamui naimiena duere finoite. Iraimo jaite.

²³⁻²⁴ Jerusalémo Jusiñamui jofomo omoi jeacino facaina naimiemo ra
fecallena omoi jaia, omoi comíni diga uri nano i. Jiaimie omoi diga
icirillana omoi ubiñoia, omoi ra fainonocaida, naimie dine nano mai jai.
Naie rafue raise finollena, naimie dine jai. Ie mei Jusiñamuimo omoi rana
feca.

²⁵ Omoína bu llogidoia, juez dine nia omoi riñenia, omoína llogidotímie
diga naie rafuena raise fino. Iena raise finoñenia, juez dine omoi ria,
nainomo duere sefuitomoi. Calabozomo omoína oretaite. ²⁶ Nana raise
ibañenia, juez llua isoi, jino jaiñeitomoi. Iese omoímo suiñellena, jiaimie
diga rafuena comuitaño. Jeacino finoñellena, jiaimie diga iciriñeno.

Jesúdi ima ie añede riño diga illa llua rafue

²⁷ Jesús llote:

—Omoí llofueraínimona bie jai cacadomoi. Moisés micorí jaie llote:
“Omoí añede riñoñiaí diga íñeno. Omoí iniñede iñiaí diga íñeno”. “Iena
bu finoia, jeacino jai finode” raitomoi. ²⁸ Jiaie rafue birui lloiticue. Ie
añede riño mo eruailamona naiñaiño bu nicidoia, naiñaiño diga jamai
iniacananona naimie comeci facajamona, jeacino jai finode. Naiñaiño
diga íñede; ia naiñaiño diga jamai iniacananona naimie comeci facaja-
mona, jeacino jai finode. ²⁹⁻³⁰ Biena ñaiticue. Nie isoide rafue omoína
jeacino finotaia, iemo eruaiño. Iena linoño. Iemo comecina fa-
caño. Omoí ciua rana jira, omoi jitaillamona jeacino finodomoi. Rana
omoi jetaja jira, omoi jitaillamona jeacino finodomoi. Omoí abina omoi
namatañenia, omoi uisina juicono. Omoí onolli jaita. Omoí comecina
ñaiticue. Omoí abina omoi raise namatallena, omoi comeci nano raise
fino. Jeacino omoi finoia, iraimo jaitomoi. Nana omoi abi diga iraimo
jaitomoi. Iraimo omoi jaiñellena, jeacino finoño.

Jesúdi ima ie aina dotaja llua rafue

(Mt 19.9; Mr 10.11-12; Lc 16.18)

³¹ Jesús llote:

—Omoí llofueraínimona bie jai cacadomoi. Moisés micorí jaie llote:
“Ie aina bu dotaacania, naiñaiño mo dotajacanabena fecaja”. Iedo jai
jaicabidomoi. Iena bu finoia, omoímona mare. ³² Jiaie rafue birui
lloiticue. Jiaimie diga naiñaiño íñenia, ie aina bu dotajia, marañede.
Jaiaruido jiaimie diga naiñaiño ia, nanodi ie ini muidona naiñaiño jeacino
jai finode. Dotaca riñoña ie aina illena bu ua mei, naimiedi jeacínona jai
finode. Jeacino finoñellena, aina dotaño.

Jesúdi Jusiñamui mameci jamai ebena linoñenana llua rafue

33-35 Jesús llote:

—Omoí llofuerañimona bie jai cacadomoi. Moisés micori omoi jaigaimo llote: “Taino lloñeno; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uiñollena, Jusiñamui mamecina llinotomoi. “Tena cai linoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi linoñenia, omoi lloga uai omoi finoñenia, omoimona mare. “Jusiñamui caina duere finoñeite” raitomoi. Iemona monamo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jiai llinotomoi. Jusiñamui mamecina jamai ebena linoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi linoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi linoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi linoia, Jerusalén naimie nairaina jira, naimie mamecina jiai llinotomoi. ³⁶ Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogi mameci jiai linoñeno. Dama Jusiñamui iena usere itataja jira, dama naimie iena jitire itataja jira, ifotirai mamecina omoi linoia, Jusiñamui mamecina jiai llinotomoi. ³⁷ Ie jira Jusiñamui mameci jamai ebena linoñeno. Jiaie ra mameci jamai ebena linoñeno; iadedi nie isoide rafuena omoi finoia, omoi lloga uaina taino lloñeno fino. Uanaicinona jaca llono. Uanaicinona omoi lloñenia, Taifemona omoi uaina otomoi.

Jesúdi iba oñenana llofuia rafue

(Lc 6.29-30)

³⁸ Jesús llote:

—Omoí llofuerañimona bie jai cacadomoi. Moisés micori jaiie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi; ³⁹ iadedi birui omoimo lloticue: Ibana oñeno. Marañede rafue finodimemona omoi abina riidoñeno. Omoi cacaina naimie dutaia, naimie diga iciriñeno. Enefebeimo omoi uieco dobaiño, enefebei omoina naimie dutallesa. Naimie omoina duere finoia, ibana oñeno. ⁴⁰ Omoi iniroi bairollena omoina bu llogidoia, juez nia omoimo lloñenia, naimie jitailla iniroi baifemo naimiemo feca. ⁴¹ Daje kilómetro naimaci raruia; omoina uillana illaicomini ocuia, iena uiño. Nibai omoi comeci jitañede; ia naimacina canollena, iena mena kilómetros uiño. Naimaci ocuilla baifemo uiño. ⁴² Omoimo ite rana bu jicaia, iena caidiñeno. Omoi rana bu jamai jicuano uia, abido atillena, iena caidiñeno feca.

Jesúdi omoina gaiñenano isiruillena llua rafue

(Lc 6.27-28, 32-36)

⁴³ Jesús llote:

—Omoí llofuerañimona bie jai cacadomoi. Llotimaci: “Omoi cominina isirui; iadedi omoi nairañedinona enoi”. Iedo jai jaicabidomoi. ⁴⁴ Omoimo birui lloticue: Omoi nairañedinona isirui. Omoi gaiñenanona

isirui. Omoina duere finodino facaina Jusiñamuimo jii. Naimaci começiai iuai meiduana naimiemo jicano. ⁴⁵ Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiai lligaiñotade. Maraiñedino dine noci deitate. Mareuidino dine jiai noci deitate. ⁴⁶ Naimie comini omoi illamona, nana comini daje isoi isirui. Omoina isiruitinona omoi isiruia, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini baiñefemo faiñedomoi. Naimaci isoi itomoi. ⁴⁷ Dani omoi cominina omoi uaidoia, mare; ia omoina gaiñenanona omoi uaidoñenia, naimaci baiñefemo faiñedomoi. Jusiñamuina inoñedino baiñefemo faiñedomoi. Naimaci isoi itomoi. ⁴⁸ Iena omoi uifnuamona, omoi Moo Jusiñamui finua isoi, mare rafuena finocana omoi jai.

6

Jesúdi mare rafue finuana llua rafue

¹ Jesús llote:

—Omoina nia llofueiticue. Jiaie comini iena cioillena, mare rafuena omoi finoiadedi, omoina: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue. ² Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci. ³ Dueredinomo rana omoi fecaia, jiaie cominimo iena lloñeno. ⁴ Iena bainino feca. Bainino iena omoi fecaia, Jusiñamui iena uifnote. Naimiemona ibana feiñoitomoi. Omoina: “Mare” raite.

Jesús Jusiñamuimo jii rafue

(Lc 11.2-4)

⁵ Jesús llote:

—Jusiñamuimo omoi jiiia, maredinona abi caitadino isoi omoi iñeno. Ofiracomo naimacina comini cioillena, marefodo jiidimaci. Jicabilla facaiseconi naisomo naimaci ia, naimacina comini cioillena, marefodo jiai jiidimaci. Naimacina: “Jusiñamuina eo sedadimaci” comini raillana jitaiddimaci. Cominimona iobillacinona birui jai feiñotimaci. ⁶ Omoi jiiacania, omoi jofomo fo jai. Nainomo Jusiñamuimo anado omoi jii. Iena Jusiñamui uifnuamona, omoi jicaca rafue naimiemona feiñoitomoi.

⁷ Jusiñamuimo omoi jiiia, naimiena inoñedino isoi jamaicinona ñaiñeno. Naimaci comecina facadimaci: “Daje jiracinona diga icaiño cai jiiia jira, ja muidomo cai Moo caina raise cacaite”. ⁸ Naimaci isoi iñeno. Nia omoi jicañenia, naimie omoi jitailla rafuena uifnote. ⁹ Naimiemo omoi jiiacania, iese jii:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata.

O jaienisa: o jitaillacinona finua isoi, cominina o jitaillacinona finota.

¹¹ Nagarui guille caimo itata.

12 Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

13 Caimo ramo bu faia, caina cano, iena cai iinoi raillano. Jeacinona finuamona caina jillota.

Iese omoi jii. 14 Omoina jiaie comini jeare finoia, iena omoi feitaia, omoi monamo ite Moo omoi jeacinona iena feitajanona, jiai oni dotaite; 15 iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesús guiñenaruina llua rafue

16 Jesús llote:

—Omoina nia llofueitice. Raitomoi: “Jusiñamuina eo raise cai sedajanona, birui cai guiñeitica. Iemona naimie caina eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci. 17 Ero, naimaci isoi omoi iñeno; iadedi omoi guiñenarui ia, omoi abiai raise fino. 18 Iemei cominidi omoi guiñenarui illana uiñoñeitimaci. Naimacimona iobillacinona feiñoñeitomoi. Dama Jusiñamui iena uiñoite. Bainino omoi finoca rafue naimie uiñua jira, naimiemona iba feiñoitomoi.

Jesúdi Jusiñamuimo comecina facaja rafue

(Lc 12.33-34)

19 Jesús llote:

—Omoi jofomo ailluena rana eenocana uiñeno. Giireco iena guicabite. Dajerie ra nemuide. Omoi jofomona jiaie comini iena fiacadimaci. Ailluena ra eenuamo omoi comeciaina facañeno; 20 iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Giirecuaimona, nemuillamona, firirainimona, iena nainomo faifiñeitomoi. 21 Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

Jesús cai comecina llua rafue

(Lc 11.34-36)

22-23 Jesús llote:

—Cai uisi diga rana cidica. Cai uisi marañenia, rana raise cioñedica. Ie isoide. Cai comeci marañenia, marañedicinona finocana jaidica. Jusiñamuina uiñoñedica. Ie rafuena jiai uiñoñedica. Naimiena nabaiñedica.

Jesús raruiaina llua rafue

(Lc 16.13)

24 Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie bai femo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruia olle mo comecina omoi eo facaia, Jusiñamui jitaillacinomo comecina raise facañeitomoi.

Jesúdi Jusiñamui cai sedajana llua rafue

(Lc 12.22-31)

²⁵ Jesús llote:

—Jusiñamui jitaillacinomo omoï começina facaia, omoï illamo omoï começina jarire facañeitomoi. Bue omoï guillemo jarire começina facañeno. Omoï jitalle iniroimo jarire começina facañeno. Jusiñamui omoïna itataja muidona, guille omoïmo iite. Naimie omoï abi finua muidona, iniroidi omoïmo iite. ²⁶ Silliñiaimo começina faca. Buena riñedimaci. Nie isoide guillena eenoñedimaci; iadedi omoï Moo Jusiñamui naimacina sedajamona, naimaci guille ite. Naimaci baifemo omoï faia jira, naimie omoïna canoite. ²⁷ Omoïmona, ¿bu ie começi jarire facajamona a sairite? Iese jaca buna a sairifede. Dama Jusiñamui omoïna a sairitarede. ²⁸ ¿Bue ñellena iniroimo jarire começina facadomoi? Safiamo omoï começina faca. ¿Niese sicodimaci? Maijiñedimaci. Iniroina tiferiñedimaci; ²⁹ iadedi Salomón micori naimaci isoi jaie iñede. Naimie illaïmana jira, naimie micori iniroi eo ebirede; iadedi safia naimie iniroi baifemo ebire eruaide. ³⁰ Jusiñamui safiana ebiretacabide. Dallu facaise illanona, safiadi duide. Safia baifemo omoï uaila jira, Jusiñamuidi iniroina omoïmo jaca iite. Safiana naimiedi ebiretaja muidona, omoïmo iniroidi jaca iite. Omoï ra omoïmo illena, naimiena ñino. ³¹ Omoï começi jarire finoñeno. “¿Buena guticai? ¿Buena jitaicai?” raiñeno. Iemo começiaina eo facañeno. ³² Jusiñamuina ñinoñedino iemo começina facacabidimaci. Nana omoï jitaillacinona omoï Moodi uiñua jira, naimaci isoi iñeno. ³³ Jusiñamui anamo raise omoï i. Naimie jitaillacinona finocana omoï jai. Naimiemo omoï começi facaia, omoï illamo omoï começina jarire facañeitomoi. Iemona guille omoïmo iite. Iniroi omoïmo iite. ³⁴ Jusiñamui omoï birui jitailla ra omoïmo iite. Iena uiñuamona, jiairuido sulle rafuemo jarire começina facañeno. Ico omoï jitailla ra omoïmo jiai iite.

7

Jesúdi jiaie cominina mameriñenana llua rafue

(Lc 6.37-38, 41-42)

¹ Jesús llote:

—Omoïna nia llofueiacadicue. Jiaie cominina mameriñeno. Jiaie cominina omoï mameria, omoïmo ite marañede rafue facaina Jusiñamui omoïna duere finoite. ² Jiaie cominina omoï mamerilla diese Jusiñamui omoïna duere finoite. ³ Omoï ecimo itimiemo janore marañedicino illana omoï uiñoia, iemo começina facañeno; iadedi omoïmo ailluena ite marañedicinomo nano omoï começina faca. ⁴ Omoïmo marañedicino illamona, ¿niese omoï ecimo itimiema mameritomoi? ⁵ Omoïmo ite marañedicinomo omoï começina facaacaiñena jira, maredinona abi caitadinodomoi. Omoï começiaina nano raise fino. Iemei omoï ecimo itimiema canorenitomoi. Naimie começina raise canorenitomoi.

⁶ 'Ero, eo mare rana omoï jiconiaimo fecañeno. Eo raifide rana omoï chanchuaimo fecañeno. Naimacimo omoï fecaiadedi, iena feiñoñeitimaci. Omoïna gaiñenamona, jiconiai omoïna ainítimaci. Chanchuai iena jamaillamona, iena saitaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoï llocabia, omoïna duere finoitimaci. Omoï rafuena jamaitimaci.

Jesúdi cai jitailla ra jicaja llua rafue

(Lc 6.31; 11.9-13)

7-8 Jesús llote:

—Daje ra omoi faifia, iena jenodomoí. Raise jenoia, iena bait-omoí. Damiëna omoi jenoia, naimie illanomo jaidomoí. Nainomo naimiëna baillamona, omoïna feiñoite. Ie isoide. Buena omoi jitaia, Jusiñamui jica. Iena omoi jicaja jira, iena naimie cacajamona, omoïmo iite. ⁹ Ero, omoïmona naimiëmo llomenicono ie moomo ie jito jicaia, noficina fecañede. ¹⁰ Lliciaina jicaia, jaiona fecañede. ¹¹ Jeacina finocabidomoí; iadedi mare ra omoi uruiaimo fecacabillana uiñoitomoí. Cai Moo Jusiñamuidi jaca mareuidimie. Cai baifemo naimie faite. Ie muidona naimiëmo jicanotinomo mare rana fecaite.

¹² Jusiñamui jitaillacinona omoi finuamona, jiaie cominina marena fino. Jiaie comini omoïna finuana omoi jitailla isoi, naimacina fino. Naimaci omoïna marena finuana omoi jitaia, naimacina marena fino. Naimaci omoïna maraiñeno finuana omoi jitaia, naimacina ie isoi maraiñeno fino. Moisés micori ie isoidicinona jaie llofuede. Jusiñamui facaina lloraini micoriai ie isoidicinona jaie jiai llofuetimaci.

Jesúdi Jusiñamui dine rille llua rafue

(Lc 13.24)

13-14 Jesús llote:

—Jusiñamui dine omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca iitimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue

(Lc 6.43-44)

15 Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoïna jifueiacadimaci. Naimaci llofuiacınodo omoi jiaia, Jusiñamui rafuedo raise jaiñeitomoí. ¹⁶ Naimaci lloga rafuemona naimaci Jusiñamui llorainiñenana uiñoitomoí. Ero, eecuaimona uvas railla riaro ñega. Eecuaimona higos railla riaro jiai ñega. ¹⁷ Mare riaromona mare llisilla comuide. Maraiñede riaromona maraiñede llisilla comuide. ¹⁸ Mare riaromona maraiñede llisilla comuiñede. Maraiñede riaromona mare llisilla comuiñede. ¹⁹ Mare llisilla comuitañena jira, naga maraiñede riaro jaitaca, iena jobaillena. ²⁰ Ie isoide. Naimaci finoca rafuemona nie isoide lloraini naimacina uiñoitomoí. Jusiñamui llorainidena uiñoitomoí. Jusiñamui lloraiñedinodena uiñoitomoí. Naimaci maraiñena jira, Jusina-mui naimacina duere finoite.

Jesúdi ie Moo ie comini sedajanomo ille llua rafue

(Lc 13.25-27)

21 Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite. ²² Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticai. O uaido jananiaina oni oredicai. O uai diga siño rafuena finodicai” lloitimaci. ²³ Uai oiticue: “Omoïna uiñoñedicue. Cue

cominiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

Jesúdi naimiēna iñnuana ñaia rafue

(Lc 6.47-49; Mr 1.22)

²⁴ Jesús llote:

—Cue lluana cacadomoi; iadedi omoi mona nana iñoñedomoi. Cue lluana iñnotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa ñinori eo ana raite. ²⁵ Noci deidemo, eo jinuidemo, jofomo ille toia, aifi bitemo, jofo raise finua jira, jofo goiñede. Iena faifiñede. Ie isoide. Cue lluana iñnotimie faifiñeite. ²⁶ Cue lluana iñoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana rañede. ²⁷ Noci deidemo, eo jinuidemo, jofomo ille toia, aifi bitemo, jofo goillamona, jai eo judaisite. Iena faifide. Ie isoide. Cue lluana iñoñedimie faifite —llote.

²⁸⁻²⁹ Moisés micori rafue uiñoraini isoi naimie llofueña jira, illaimamo ite uai itimie isoi naimie llofua jira, nainomo ite cominidi naimie lluari rajjicaidimaci.

8

Jesúdi efonaitimienajillotajarafue

(Mr 1.40-45; Lc 5.12-16)

¹ Naimie llofua mei, anedumona Jesús ie llofueoicaigano diga ana bite. Ailluena comini naimiēna racadimaci. ² Efonaitimie naimie ñine billanona, naimiēna raise uaiduamona, caiñici ifodo ana rainadate. Raite:

—Maestro, o jitaiadedi, cuena jillotaredio.

³ Jesús ie onolli naimiemo oni ñuitajanona, naimiēna jetade. Raite:

—Ona jillotaiacadie. Mai o jillo. —Iecon naimie jillode. ⁴ Jesús naimiemo llote:

—O jilluana bumo lloño; iadedi Jerusalémo, Jusiñamui jofomo, Jusiñamui diga ñairaima ñine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo feca. —Iemei Jesús oni jaie.

Jesúdi capitán mullaimanajillotajarafue

(Lc 7.1-10)

⁵ Capernaum railla ñairaimo Jesús ria, capitán raillaimie naimie ñine bite. Naie capitán Roma railla ñairai imie. Judíuñedimie. Billanona, duere llote:

⁶ —Maestro, cuena cano. Cue jofomo cue mullaima ite. Ie abina niraídanide. Naimie abi eo isirede. Naimiēna jillota.

⁷ Jesús uai ote:

—Naimie ñine jaiticue, naimiēna cue jilloitallena.

⁸ Naie capitán ñine llote:

—Jaiño. Jamai bue isoidicue. Iemo, ¿ñiese cue jofomo biitio? O uaido bene lluanona cue mullaima jilloite. ⁹ Jaiie illaicomini anamo iticue. Naimaci lloga uaina iñnoticue. Cue anamo jiaie soldaduai illanona, cue uaina iñnotimaci. Cue anamo cue mullaima illa jira, naimiedi cue uaina iñnote. O anamo ñaie duico illa jira, o uaina o lloia, cue mullaima jilloite.

¹⁰ Iena cacajanona, Jesús rajjicaide. Naimie diga jaidinomo llote:

—Bie isoi cue uaina #notimiena jaca baiñedicue. Cai judíuai cominimona biesedimiena jaca iñede. ¹¹ Ero, Jusiñamui ie cominina sedajanomo naimaci illena, diga judíuaiñedino cue llua uaina #noitimaci. Naga nairaiimona #noitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci. ¹² Ailluena judíuaiñedino #noitimaci. Jusiñamui ie cominina sedajanomo duillanodi omoi judíuai. Naimiena omoi #noñena jira, omoina oni dotaite. Dotaja mei, eo duere sefuillamona eetomoi.

¹³ Capitámo Jesús llote:

—Mai jai. Cue uai siñonana o #nua jira, o jitailla rafue omo jai suide. —Ieconí naimie mullaíma jillode.

Jesús Pedro jifaiñona jillotaja rafue

(Mr 1.29-31; Lc 4.38-39)

¹⁴ Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abí cuaride. ¹⁵ Naiñaiño ñine jaillanona, naiñaiñona jetade. Jetajamona ieconí naiñaiño jillode. Abí cuariñede. Naiñaiño naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mr 1.32-34; Lc 4.40-41)

¹⁶ Naie naiona naimie ñine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. ¹⁷ Naimacina Jesús jillotajamona, Isaías micori jaie ciegafuiai iese jai suide. Naimie micori jaie cueba: “Caina jilloitajana, cai duicono oni oretate”.

Jesús ie llofuegamiena damie jaillana ie rafue

(Lc 9.57-62)

¹⁸ Ailluena comini naimie ecimo illana Jesús cianona, ie llofueoicaiganomo ruica ñine jaillena llote. ¹⁹ Ieconí Moisés micori rafue llofueraíma naimie ñine billanona, llote:

—Maestro, o jaillinomo o diga jaiacadícue. O llofuegamiena jaiacadícue.

²⁰ Jesús uai ote:

—Janorede ocainaiaidi joforedimaci. Silliñiai jillainaiaredimaci; iadedi jofonidícue. Monamona billanona, imana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeitio. Iemo o comecina raise faca.

²¹ Ie facaise jiaie llofuegamie Jesús mo llote:

—O diga jaitícue; ia cue moo nia fiodañena jira, o diga nia jaiñeitícue.

²² Jesús naimie uai ote:

—Cue diga idai mai bi. Cuena #noñedinodi o moona canoredimaci. Naimie fiodaia, naimiena naimaci raílle. Cue rafue jiaie rafue baifemo faite. Cue diga mai bi.

Jesúdi joraina llicaitaja rafue

(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica ñine jaillena, botemo jaide. Ie llofueoicaigano jiai jaidimaci. ²⁴ Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode.

Baguamona botemo jinui a uaide. Bote oruiacana jira, ²⁵ jaciruillamona, Jesúna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cuena raise inoñedomoi. Jacinaiño.

Iemei Jesús naidacaillano, aifina lletade. Joraina jiai llicaitade. Ieconí llicaiide. Bagoñede. ²⁷ Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

Jesúdi Gadara railla eniruemo illa rafue

(Mr 5.1-20; Lc 8.26-39)

²⁸ Ruica dine naimaci ridemo, Gadara railla eniruemo sijidimaci. Ieconí menamie Jesús dine bitiaimaiai. Jananiai anamo ite iaimaiai. Comini raioillanomo nofie moto ifuaimona bitiaimaiai. Nai iaimaiai eo riirena jira, jaca bu nainomo jainide. ²⁹ Jesúna iaimaiai ciua facaise jananiai iaimaiaina cuiroitate:

—Jusiñamui Jitodio. ¿Niese cocona nibaiacadio? Coco duere sefuille facaise nia iñede; iadedi birui cocona duere finuaibidio —cuiroidiaimaiai.

³⁰ Naie bai iaie ailluena chanchuai guillano itimaci. ³¹ Jananiai Jesúmo duere llotimaci:

—Oni caina o oretajanona, chanchuai abimo caina oreta.

³² Jesús uai ote:

—Mai jai.

Ieconí nai iaimaiaimona jananiai oni jaillanona, chanchuai abimo jaide. Iemona iconaído chanchuai joraimo aisicana jaillanona, corobaiside.

³³ Iena ciuanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaiai rafuena llotimaci. ³⁴ Ie jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

9

Jesús tisitaitimiena jillotaja rafue

(Mr 2.1-12; Lc 5.17-26)

¹ Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride. ² Nainomo rilla mei, naimie dine comini ie biramo biide tisitaitimiena atide. Naimiena atidinodi Jesús naimiena jillotajana inote. Iena Jesús uiñuanona, tisitaitimie mo lloste:

—Moo, o comecina ocuiño. O jeacino cue feitaja jira, iena jai oni dotadicue. Ie facai ibana jai oñeiticue.

³ Jesús dine ofidinomona dajerie Moisés micori llogacinona llofueraini itimaci. Jesús lluana naimaci cacajano, Moisés micori llogacinona llofueraini comecina facadimaci: “Dama Jusiñamui jeacinaona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. ⁴ Naimaci comeciaina facajacinona Jesús uiñuamona, Jesús dinena jicanote:

—¿Bue ñellena omoi comecina jeare facadomoi? ⁵ Bimiemo: “O jeacinaona jai oni dotadicue” cue lloia, cue uai siñonana uiñoñeitomoi;

ia bimie: “Mai naidacaillanona macari” cue lloia, cue uai siñonana uññoitomoi. ⁶ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uññollena, tisitaitimie mo lloiticue: “Mai naidacai. O biira ferianona, o jofomo mai jai”.

⁷ Iese naimie raillanona, tisitaitimie jillode. Naidacaida, ie jofomo jaide. ⁸ Comini iena ciuanona, jacinaitimaci. Bimie mo ie uaina Jusiñamui fecajana naimaci uññuamona, Jusiñamuimo iobillacinona fecadimaci.

Jesúdi Mateona fetua rafue

(Mr 2.13-17; Lc 5.27-32)

⁹ Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.

Naidacaida, naimie diga jaidicue.

¹⁰ Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci. ¹¹ Nainomo fariseuai comini jamai bitimaci. Moisés micori llogacinodo eo jaidimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

¹² Iena cacajano, Jesús llote:

—Ecairedinodi médicono jitaiñedimaci; ia duidinodi médicono jitaidimaci. Ie isoide. Mareuidino cuena jitaiñedimaci; ia maraiñedino cuena jitaidimaci. ¹³ Jusiñamui facaina lloraima micori jaie cuega rafuemo omoi comeciaina faca: “Jusiñamui llote: ‘Rana cuemo omoi fecajana jitaidicue; ia cominina omoi dueruillana jiai jitaidicue’ llote”. Cominina cue dueruilla jira, Jusiñamui dibeimo naimaci illena, mareuidinona itatajaibiñedicue; iadedi Jusiñamui dibeimo naimaci illena, maraiñedinona itatajaibiticue. Omoimona maraiñedino diga nabairiticue; ia naimacina uai biticue.

Jesús dne Juan Bautista llofueoicaigano billa rafue

(Mr 2.18-22; Lc 5.33-39)

¹⁴ Naie facaise Juan Bautista llofueoicaiganodi Jesús dne bite. Naimie mo llote:

—Cai einamaci llua isoi, Jusiñamuina cai raise iobitallena, guiñenaruillai illa facaiseconi guiñedicai. Cai jeacino facaina sunaicabiticai. Fariseuai comini jiai guiñedimaci; iadedi o llofueoicaigano gutimaci. Cai einamaci llogacinodo jaidicai. ¿Bue ñellena o llofueoicaigano iedo jaiñedimaci?

¹⁵ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillanona gutimaci. Jaiñeruido jai aireiacade conirue naimaci diga iñenia, naimaci comeci sunaillanona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ¹⁶ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi, joca mei, comue iniroi jacaie iniroimona fo llirite. Eo fodo cuararite. Jai maraiñede cioite. ¹⁷ Jacagomona finoca bolsa como finoca vino joneñega. Jonegadana,

mairiñena jira, sirillamona, igoí raíre cuararite. Vino faífite. Igoí jiaí faífite. Como finoca vino comogomo jonelle. Iemei iena faífiñeite. Ie isoide. Omoi einamací rafue ifomo jiaíe rafue biruí ite. Iena omoímo llocabiticue. Iedo jaidicái —llote.

Jesúdi mena duide riñona jillotaja rafue

(Mr 5.21-43; Lc 8.40-56)

¹⁸ Juan Bautista llofueoicaigano díga Jesús llotemo, jiaímie naimie díne bite. Naimiedi judíuái ofiraco sedaraíma. Jesúna duere jicanollena, caíñici ifodo rainadacáida llote:

—Cue jisa como fodaíte. O onollí naiñaiñomo o jonellesa, naiñaiño jilloillesa, cue jofomo cue díga mai bí.

¹⁹ Iena cacajano, Jesús naimie díga jaide. Ie llofueoicaigano jiaí jaidímaci. ²⁰ Bai jaillanona, duidiñaiño jinafona jaide. Naimie iniroina jetallena, naimie díne bite. Ie jeraimona doce años jaca díaide. Billanona naimie iniroina jetade. ²¹ “Naimie iniroí cue jetajamona jilloiticue” comecina facajamona, naiñaiño naimie iniroina jetade. ²² Ieconí Jesús dobaidacáida, abído erodatemo, naiñaiñona cíode. Raite:

—Ñoo, o comecina ocuíño. Cuená o inua jira, jai jillodío.

Ieconí naiñaiño jillode.

²³ Ofiraco sedaraíma jofomo Jesús rillano, naie jofó nama jisa jai fodaílla jira, comíni meríre fillana cacade. Ailluena faílliñailana cacade.

²⁴ Jesús dímena raite:

—Jofomona nana omoi jino jaillana jitaídícue. Cuemona bíñaiño fodaíñedesá. Jamái iníde.

Iena cacajano, naiñaiño jai fodaíte uíñuamona, Jesúri jaisitímaci. ²⁵ Comíni jino oretaja mei, naiñaiño onollína naimie llínuano, fodaíllamona naiñaiño jillode. Jillua mei, naiñaiñodi naidacáide. ²⁶ Naie rafue nana naie enírue itinomo llocana jaide.

Jesúdi uisínide iaímaiaína jillotaja rafue

²⁷ Ofiraco sedaraíma jofomona Jesús baí jaidemo, uisínide iaímaiaí naimie jinafona jaidiaímaiaí. Jesúna ado uaidotiaímaiaí:

—Caí illaíma David micorí jítodío. Jusíñamuimona o billa jira, cocona duenái.

²⁸ Uaí oñeno Jesús Capernaumo jaide. Naimie fo jaílla mei, naimie díne bitiaímaiaí. Iaímaiaímo Jesús jicanote:

—¿Omicóna cue jillotajana inotómico?

Fairiotiaímaiaí:

—Jii.

²⁹ Iaímaiaí uisína Jesús jetajano raite:

—Cuená omíco inua díese jilloitómico.

³⁰ Ieconí iaímaiaí uisídí cíode. Jesús naie rafuena lluaña eo janotade.

—Bumo lloñeno —llote; ³¹ íadedí iena llocana jaidiaímaiaí. Iemona Jesús mamecí nana naie enírue mo itinomo soríde.

Jesús ñaiñedimíena jillotaja rafue

³² Capernaumona Jesús baí jaidemo, naimie díne Janaba anamo illamíena jiaíe comíni atídímaci. Janaba anamo naimie illa jira, naimie ñaínide. ³³ Jesús Janabana oní orede. Oretaja mei, naie íma ñaíte. Nainomo ite comíni raíjicaíllanona raítímaci:

—Caí comíni díne bie isoide íma jilluaña jaca cíoiñedicái.

³⁴ Ie jira fariseuai cominini dinena raitimaci:

—Táife díbeimo Janaba illamona, Jesúsdi Táife uaido Janabana oni orede —raitimaci.

Jesúdi cominina duenailla rafue

³⁵ Díga nairaiamo ie llofueoicaigano díga Jesús llocana jaide. Nainomo judíuai ofiracuaimo llofueuide. Naimie anamo cominini illana Jusíñamui jitailla jira, Jesúsdi Jusíñamui díbeimo naimaci comeciai iuaina meiduaana llofueite. Ailluena duidinona jillotate. Naga isoide duicomona jillotate.

³⁶ Naimacina duenaite. Naimaci comeciai iticino oni duiñoitimie iñena jira, naimacina duenaite. Ailluena cominina ciode. Toica llaudaiaí isoi ebe isoi jaidimaci. Naimaci comeciai ocuiñonidimaci. Jusíñamui naimacina sedaicana uíñoñedimaci. ³⁷ Naimacina duenaillamona, ie llofueoicaiganomo llote:

—Illimo ailluena trigo ia, iena ollena, ailluena maijiraínina jitailla. Ie isoide. Ailluena cominini ite naimacimo Jusíñamui rafuena cai llollena; iadedi naie rafuena lloraíni eo iñedimaci. ³⁸ Ie rafue naimaci llollena, ailluena cominina raire naimie oretallena Jusíñamuimo jicano.

10

Jesúdi ie doce llofueoicaiganona fetua rafue

(Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Duicono oni oretallena, iena jiaí iñonocaide. ² Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaiaí Zebedeo jito iaimaiaí. ³ Felipe. Bartolomé. Tomás. Cuena jiaí uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo. ⁴ Jiaie Simón. Naimiedi cananista cominini facaisemo duide. Judas Iscariote micori. Naimiedi Jesúsna gaitatate.

Jesúdi ie llofueoicaiganona oretaja rafue

(Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judíuaiñedino dine jaiñeno. Samaritano railla cominini dine jaiñeno; ⁶ ia cai judíuai cominini dine jai. Naimacimona ailluena cominini Jusíñamui rafuena nia iñoñedimaci. Faificana nia jaidimaci. ⁷ Omoi jaillanona, cominimo llono: “Jusíñamui facaina jaie lloraíni micoriaí llogamie jai bene ite. Naimie anamo omoi illana Jusíñamui jitailla jira, naimie díbeimo omoi comeciai iuaina meido”. ⁸ Duidinona jillota. Fiodaitinona jillota. Efonaitinona jillota. Jananiaína oni oreta. Cue uaina jamai omoi feiñua jira, cominina jilloitajana ibatañeno. ⁹ Ucubena uíñeno. Guille ifo meidollena, rana uíñeno. ¹⁰ Ailluena rana omoi uíñellena, bolsana uíñeno. Abi meidolle iniroina uíñeno. Meidolle zapatona uíñeno. Omoi abi riidollena, jiguidana uíñeno. Jiaie cominina omoi canua isoi, omoína naimaci canua. Naimacimona omoi jitailla rana omoi ono. Ie jira ailluena rana uíñeno. ¹¹ Nie nairaiamo omoi ria, omoi rafuena jitaídimiéna jeno, naimie jofomo omoi illena. Naie jofomo omoi i, naie nairaiamo omoi ille dinori. ¹² Naie jofomo omoi rillanona, naie cominina marena uaido. ¹³ Omoína naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitaíñenia: “Jusíñamui

omoína canoite” naimacimo lloñoeno. ¹⁴ Omoína bu feiñoiacaiñenia, omoí uaina bu cacarefiacaiñenia, naie nairaimona omoí jaillanona, omoí eilliaimo ite jearacuaina jaidino. Maraiñede rafuena naimaci finuana naimaci uiñollena, omoí eilliaína jaidino. ¹⁵ Omoimo uanaicinona lloticue. Omoína naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoína comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifuena llua rafue

¹⁶ Jesús ie llofueoicaiganomo nia llote:

—Naimacina janallari fañellena, naimaci duere sefuñellena, toica llaudaiaí raise sedajana jitaídímaci. Ie isoide. Eo maraiñede comini motomo omoína oretaiticue. Omoína duere finoacanitímaci. Raise sedajana jitaídomoi. Jaio fiódaiñellena, aiside. Naimiëna bu meineñellena, ie abina eenollena, jaio aiside. Ie isoi omoí abi uiñocana omoí jai. Ucugidi buena jeare finoñede. Ie isoi omoí illa. Jeacino finuamona eneno omoí i. ¹⁷ Abina rairui. Dajerie omoína llogidoitímaci. Omoína gaitaja mei, naimaci ofiracomo omoína faitímaci. ¹⁸ Cue rafue omoí llua muidona, omoína gaitajanona, illaicomini dine omoína uitímaci. Omoína llogidoitínomo cue rafuena lloitomoi. Naie illaicominimo iena jiaí lloitomoi. ¹⁹ Naie illaicomini dine omoí ia, omoí riídollicinomo omoí comeciaina jarire facañeno. Naie facaise omoí ñaillicinona uiñoitomoi. ²⁰ Dani omoí comeciái icinodo ñaiñeitomoi; ia Jusiñamui Joreño uaido ñaitomoi. ²¹ Cuená ñinotomoi; ia ailluena cuena ñinoñeitímaci. Cuená omoí ñinua jira, omoína enoitímaci. Iemoná dajerie ie amana meinetallena, naimiëna llogidoite. Dajerie moodi ie uruena meinetallena, naimiëna llogidoite. Dajerie uruiáidi naimaci moona, naimaci eina meinetallena, naimacina llogidoitímaci. ²² Cue muidona ailluena comini omoína enoitímaci; iadedi cue uaina fañonocaiñedimie cue Moo diga monamo ja muidomo jaca iite. Naimiëna jillotaiticue. ²³ Cue rafue naimaci jitaíñenamona, omoína nie nairai duere finoia, dinomona cue rafuena llollena, jiaie nairaimo raire jai. Cue rafuena omoí llollena, diga judíuái illanuaimo nia jaitomoi. Nana naie comini nia ñinoñenia, Jusiñamui dinena dane abido biitícue. ²⁴ Ero, ie llofueraíma duere sefuia, ie llofuegamie daje isoi duere sefuite. Ie eci illamie duere sefuia, ie mullaíma daje isoi duere sefuite. ²⁵ Ie isoide. Cue cominina omoí jaillanona, cue duere sefuia, jiaí duere sefuitomoi. Taiife mameci jiaíci llinuanona, “Beelzebúdió” jiaíno cuena raitímaci. Iese cuena naimaci jeare ñaía jira, cue cominina omoí illa jira, omoína jiaí jeare ñaitímaci.

Jesúdi jaciruiñeno llofuia rafue

(Lc 12.2-9)

²⁶ Jesús nia llote:

—Cuená ñinoñedino omoína jeare ñaitímaci; ia nana cue rafuena llocana omoí jailla jira, naimacina jaciruiñeno. ²⁷ Omoimo rafuena anado jai llotícue. Iena nana cominimo marefodo llono. Ado llono. ²⁸ Omoí abina meineredimaci; ia omoí joreñoña meinenidimaci. Omoína naimaci meinea, omoí joreño Jusiñamui dine jaite. Iena uiñuamona, omoí meineiacadinona jaciruiñeno. Cue rafuedo omoí raise jaiñenia, Jusiñamuina jacirui. Naimiedi omoí abina, omoí joreño diga, iraimo

dotarede. ²⁹ Omoïna duere finoacadinona jaciruiñeno. Ero mena janorede sillina fecadomoïna, eo janore ibaca; iadedi cai Moo Jusiñamui jitañenia, naimacimona daje fioidañede. ³⁰ Ero, niga ifotirai omoïmo illana Jusiñamui uiñote. ³¹ Naimiedi omoïna sedajana jiai uiñote. Silliñiai baifemo Jusiñamui isiruigaomoi. Omoï duere finoacadinona jaciruiñeno. Jusiñamui jitañenia, omoïmo jaca buena suiñeite.

Jesús naimiena janoñenana llofua rafue
(Lc 12.8-9)

³² Ie llofueoicaiganomo Jesús nia llote:

—Cue rafuena omoï llumona, jiaïno omoïna duere finoitimaci. Cuen a birui omoï janoñenia, nana comini Jusiñamui uicomo ico ia, nainomo omoïna janoñeiticue. “Cue cominidomoi” omoïna raiticue. ³³ Cuen a birui omoï janoïa, nana comini Jusiñamui uicomo ico ia, nainomo omoïna janoititicue. “Cue cominiñedomoi” omoïna raiticue.

Jesús muidona nana comini uri iñena rafue
(Lc 12.51-53; 14.26-27)

³⁴ Ie llofueoicaiganomo Jesús nia llote:

—Nana cominina uri itatallena eniruemo biñedicue. Cuen a ñnoñedinodi cuena ñnotinona enoitimaci. Enoillamona cuena ñnotinona duere finoitimaci. ³⁵ Cue lloga rafuena damierie ñnua muidona, ie moo illa dibeïmo ie jito iñeite. Ie ei illa dibeïmo naiñaiño jisa iñeite. Ie jifaiño illa dibeïmo naiñaiño mio iñeite. Iese cominina uri itatañedicue. ³⁶ Omoï comini coninina enoitomoi. Iemona duere sefuitomoi. ³⁷ Ero, ie moon a cue baifemo bu isiruïa, ie eina cue baifemo bu isiruïa, cue jitailla ra naimie finoacaiñena jira, cuemo raise duiñede. Ie uruïa cue baifemo bu isiruïa, cuemo raise duiñede. ³⁸ Cue facaina bu fioidaiacaiñenia, cuemo raise duiñede. Naimiedi cue comini naimiena lloiacaiñedicue. ³⁹ Cue facaina fioidaiacaiñedimie ja muidomo faifite. Cue diga jaca iñeite; iadedi cue facaina fioidaitimie monamo cue diga jaca iite.

Jesús Jusiñamuïmona ibana feiñua llua rafue
(Mr 9.41)

⁴⁰ Jesús llote:

—Cue rafuena omoï llocana jaja, diga jofuemo riitomoi. Cue cominina omoï illamona, omoïna feiñotino cuena jiai feiñotimaci. Omoïna bu feiñoïa, cuane jiai feiñote. Cuen a feiñotimiedi cuena oretatimiena jiai feiñote. ⁴¹ Naimie cue comini illamona, damierie Jusiñamui facaina lloraïmana feiñotimaci. Jusiñamui facaina lloraïmana bu feiñoïa, Jusiñamuïmona ibana feiñoite, naie lloraïma Jusiñamuïmona feiñua isoi. Cue jitaillacinona finodinona bu feiñoïa, naimaci Jusiñamuïmona feiñua isoi, Jusiñamuïmona ibana feiñoite. ⁴² Cue dibeïmo itinona bu janore canoïa, Jusiñamuïmona ibana feiñoite. Naimacimo nïbai jamai jinuina fecade; iadedi naimacina canuamona, Jusiñamuïmona ibana feiñoite — llote. Iemei Jesús ie llofueoicaiganona, ie rafuena lloïna, orede.

11

Jesús dine Juan Bautista micori ie llofueoicaiganona oretaja rafue
(Lc 7.18-35)

¹ Ie doce llofueoicaiganona Jesús oretaja mei, iaïrei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micorí Jesús finoca rafuena fidiano, iena raise uifollena, Jesús dine ie llofueoicaiganona orede.
³ Jesúsmo llotimaci:

—Juan Bautistamona biticai. Jofue ifnenanomo navui naimie ia, “Jusiñamumona damie biite” naimie llofuecabite. Juan llofuegamiena o illana uifoiacadicaí. Imieñediodena, jiaimie billemo nia ocuridicaí.

⁴ Jesús uai ote:

—Cue llwana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono. ⁵ “Uisindino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo llono.
⁶ Jiai llono: “Ñibai nana cue rafuena raise cacaiñedio; ia cuena jaca nia inocana o jai, caimare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesúdi Juan rafuena llote:

—Jofue ifnenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoifede. Nie isoide rafue naimiemo ia, cue rafuena llocana jaide. ⁸ ¿Bue ñellena naimie dine jaidomoi? Mare iniroina jitadimiena cioifedomoi. Mare iniroina jitadinona omoi cioacaniadedi, illaicomini dine jaidomoi. ⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoi naimie llua jira. ¹⁰ Malaquíás micorí naimiena jaiie cuega:

Jusiñamui raite: “Ero, o uicodo cue rafuena llofollena, damiena oretaiticue, comini comeaiina marecinona duiñollena”
 cuega. Malaquíás Juan Bautistana cuete. ¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioifede. Iemona naimie baifemo faitomoi. ¹² Juan llofuiataniamona ailluena comini cue rafuena inuamona, Jusiñamui dibeimo birui duere iacadimaci. ¹³ Nana Jusiñamui facaina lloraini micoríaidi cue billena jaiie llotimaci. Moisés micorí iena jiai jaiie llote. Juan facaise naie llogacino jai suide. ¹⁴ Jusiñamui facaina lloraima jaiie llote: “Bie rafue suille facaise Elías isoidimie biite”. Naimie rafuena innotomoidena, Juandi naimiena uifnotomoi. ¹⁵ Omoi jeforena jira, raise fueollena, cue llamo cacarei.

¹⁶ Jesús nia llofue:

—Ero, omoina ñaiticue. Jifanote uruiaí isoidomoi. Uruiaí jifanoiacania, naimaci nabaiñiaina uaiduanona, raitimaci: ¹⁷ “Omoi diga jifanoiacadicaí; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicaí” raitimaci. ¹⁸ Ie isoidomoi. Juan jirorainide. Caimare guifede; ia naimie diga nabairiñedomoi. Naimiena gaiñedomoi. Ie jira omoi mona dajerie naimiena raitimaci: “Janaba anamo naimie illamona, naimie uairico isoi ite” raitimaci. ¹⁹ Monamona billanona,

ñimana jaidicue. Omoi isoi guiticue. Caĩmataidicue; ia cue diga nabairiñedomoi. Cuena jiaĩ gaññedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimiedio”. Iese raitomoi; iadedi Jusifiamuina ñnotinodi cue finoca rafuena marenana uiñotimaci.

*Dajerie nairai Jesúna ñnoñena rafue
(Lc 10.13-15)*

²⁰ Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uiñotimaci; iadedi naimaci comeciai iuai meidoñedimaci. Ie jira naimacina ñaite. ²¹ Llote:

—Omoimona damierie Corazín railla illanomona bitomoi. Omoimona damierie Betsaida railla illanomona bitomoi. Cue rafuena omoi ñnoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuaina meiduana uiñotallena, ebinide ñiroina jitajanona, naimaci ifogiamo jusefona jonetimaci. ²² Jusifiamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. ²³ Omoimona damierie Capernaum railla illanomona bitomoi. Birui abina iedoiacadomoi; iadedi jiairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciai iuai omoi meidoñenia, monamo cue Moo diga jaca iñeitomoi; iadedi naimie omoina duere finollemona sunaitomoi. ²⁴ Jusifiamui uicomo nana comini ico ia, cue rafuena omoi ñnoñena jira, Sodoma railla nairai baifemo duere sefuitomoi —llote.

*Jesús ie Moo diga ñaia rafue
(Lc 10.21-22)*

²⁵⁻²⁶ Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotimona bie isoide rafuena uiñotañedio; iadedi jamai bue isoidimona iena uiñotadio. O jitailla jira, iese uiñotadio. Ie jira iobillacinona omo fecaacadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaile diese omoina naimiena uiñotadicue. Ie muidona naimiena uiñotomoi. ²⁸ Omoi jeacinomona omoi jillobillena, duere jaidomoi. Omoi comeciai marena uri illena, cue ñibeimo mai omoi i. ²⁹ Cue llucino anamo omoi i. Cue rinina jira, cuemona omoi fueo. Iemei omoi comeciai marena uri iite. ³⁰ Omoina cue canua jira, cue llucino anamo omoi iacanano ia, sefuinide. Omoina cue canolle jira, cue llucino finuana sefuinide.

12

*Sábadoruimo Jesús llofueoicaigano maijia rafue
(Mr 2.23-28; Lc 6.1-5)*

¹ Ie rafue llamona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naido jaide. Ie llofueoicaigano aimetailla jira, trigona tijiana, golluano, guicana jaidimaci. ² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micorí rairuilla jira, sábadoruimo maijindicai; iadedi trigona naimaci tijiamona, caimona jai maijindimaci. Iese cai abimo jeacinona jai finodimaci.

³ Ie llofueoicaiganona riiduanu, Jesús uai ote:

—Cuemona jeacino finoñedimaci. David micorí jaie finoca rafuemo omoi comeciái raise facañedomoi. David micorí guille iñenia, naimie aimetaia, ie nabaiñiaí diga, Jusiñamui jofomo fo jaide. ⁴ Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiaí diga David micorí iena guite; ia Jusiñamui naimacina duere finoñede. ⁵ Moisés micorí llogacinomo jiaí raise comeciaina facañedomoi. Moisés micorí jaie llua isoi, sábadoruimo Jusiñamui jofomo Jusiñamui diga ñairaini maijuidimaci. Jusiñamuina naimaci sedallena, ocainana fatimaci. Iraina bonodimaci. Iese maijuidimaci; iadedi Jusiñamuimona jeacino finoñedimaci. Moisés micorí jaie cuegafuaina raise cacañedomoi. Iena raise facañedomoi. ⁶ Omoimo nia lloiticue. Jusiñamui jofomo finoca rafue baifemo faiticue. ⁷ Jusiñamui facaina lloraima iena jaie cuega: “Cuemo rana omoi fecajana jitaídicue; ia omoi jitaillamona, jaie cominina omoi duenaillacinodi rana cuemo fecajacino baifemo faite”. Iena omoi uifnotomoidena, cue llofueoicaiganomo: “Maraiñedicinona finodomoí” lloñedomoi. Cuemona cue llofueoicaigano jeacino finoñedimaci. ⁸ Monamona billanona, iimana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiaí rairuiredicue.

*Jesúdi onollina idisarodimiena jillotaja rafue
(Mr 3.1-6; Lc 6.6-11)*

⁹ Bai jaillanona, nairai dine rillanona, naimaci ofiracomo Jesús fo jaide. ¹⁰ Nainomo onollina idisarodimie illanona, fariseuai dinena Jesúmo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci. ¹¹ Jesús uai ote:

—Sábadoruimo omoimona damie ie toica llaua ifomo uaidena, nairuido ari iena ote. Naimiemo buena lloñedomoi. ¹² Ero, cominidi llaua baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

¹³ Onollina idisarodimiemo llote:

—O onolli mai oni ñuita.

Iena ñuitajamona jillode. ¹⁴ Iena ciuanona, fariseuai jino jaidimaci. Naimiena meinellena, coniniri siadotimaci.

Isaías micorí jaie Jesúna ñaia rafue

¹⁵ Naimiena naimaci meineiacanana Jesús uifnuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cuenallocana jaiñeno —naimacimo llote. Naimie mameci are sorillana jitañede. Fariseuai diga ie uai uaitaiacañede. ¹⁷ Iemona Isaías micorí jaie cuegafuiai jai suide. Jusiñamui Isaías micorina jaie cuetataga: ¹⁸ Ero, cue fetoca mullaíma ite. Naimiedi cue isirugamie. Naimieri iobidicue.

Cue Joreño naimiemo cue fecajanona, judíuainédinomo naimacina cue jilloitaacanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciái ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiena inotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judíuainédino naimiena inoitimaci.

Fariseuai Jesúna jeare ñaia rafue

(Mr 3.19-30; Lc 11.14-23; 12.10)

²² Jesús dine damieredi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñaiñede. Jesús Janabana oni oretajanona, naimiena jillotate. Naimie uaina botade. Ñaite. Ciode. ²³ Naiena ciodio rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jitomo ocuridicai.

²⁴ Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate — raitimaci.

²⁵ Naimiena naimaci enoillana Jesús uíñuanona, naimacimo llote:

—Daje isoi comeciaina lloillamo daje nairai facañenia, danomo majinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi llua isoi cue oretaia, Janaba ie díbeimo itino diga jai nabairiñede. Iemona naimie comini danomo iñeitimaci.

²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uíñollena. Iemei cue finoca rafuena uaitañeitomoi. ²⁸⁻²⁹ Ero, mairidimie ie jofomo ite rana ñibai fiñacadomoi. Iena fiñllena, naimiena nano raise omoi maiga. Raise maia mei, ie rana fiñredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue lluana jai uíñotomoi. ³⁰ Cue díbeimo iñedimie cuena enoide. Cue díbeimo cominina itañedimiedi naie cominina cuena inotañede. ³¹ Ie jira omoiimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreña jeare ñaiacinona dotañeite. ³² “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreña omoi jeare ñaia, Jusiñamui iena birui feitañeite. Iena íco jaca feitañeite.

Jesúdi riará llisilla llua rafue

(Lc 6.43-45)

³³ Jesús llote:

—Llisillamona nie isoide riará illana uíñotícaí. Amena ie llisilla llil-lamona, amena marena uíñoga. Llillamona, amena marañenana jiai uíñoga. ³⁴ Ie isoide. Omoi ñaiamona omoina uíñotícaí. Cuena omoi

maraiñeno ñaia jira, omoi comeciaí iticinona uifnoticai. Omoi maraiñena jira, jiao nairaidomoi isoidomoi. ³⁵ Mareuidimie mare ie comecimona ñaite; iadedi maraiñedimie maraiñede ie comecimona ñaite. ³⁶ Jamai ebena birui omoi ñaia, Jusiñamui uicomo nana comini ico illa facaiseconi Jusiñamui iba oite. ³⁷ Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciaí iuai meido.

Dajerie Jesús siño rafuena finuana jitailla rafue

(Mr 8.12; Lc 11.29-32)

³⁸ Naie facaiseconi dajerie Moisés micori llogacinona llofueraini dajerie fariseuai diga Jesúmo llotimaci:

—Maestro, o lloga uaina cai inollena, siño rafuena o finuana cioacadicai.

³⁹ Jesús uai ote:

—Maraiñedicinona finocabidomoi. Jusiñamui dibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeticue. Ero, Jonás micori jaie ite rafuena uifnotomoi. Naiemo omoi comeciaina omoi faca. ⁴⁰ Darui amani aillue lliciaí jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue. ⁴¹ Lliciaí jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciaí icinuaina meidotimaci. Cue rafuena omoi cacajamona, omoi comeciaí icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi?” omoína raifneticue. Jonás micori baifemo birui uaidicue; iadedi cuena inoñedomoi. ⁴² Ero, Saba railla nairai ie illaiño micoridi Salomón micori dine jaie aarena jaide. Naimie micori uifnuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena inoñedomoi. Omoi comeciaí icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoína ico ñaite: “Naimiedi siño rafue finuana ciodomoi. ¿Bue ñellena naimiena inoñedomoi?” omoína ico ñaite.

Janaba anamo illamie rafue

(Lc 11.24-26)

⁴³ Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue ifñenanomo jaide; iade baiñede. ⁴⁴ Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie ima comeci namanidena naimie baite. ⁴⁵ Iemei oni jaillanona, jiaie siete jananiaina naimie diga atide, naimaci anamo naie ima illena. Naie siete jananiai naimie baifemo maraiñedimaci. Iemona naie ima eo fodo jaide. Ie isoide birui ite maraiñede comini. Cue rafue naimaci inoñenia, eo fodo jaitimaci.

Jesús ie comini

(Mr 3.31-35; Lc 8.19-21)

⁴⁶ Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide. ⁴⁷ Damie Jesúmo llote:

—O ei, o amatiai diga, jino ite. O diga ñaiacade.

⁴⁸ Naimiemo Jesús dinena jicanote:

—¿Bu cue ei? ¿Bu cue amatiai?

⁴⁹ Ie llofueoicaigano dine ie onolli ñuitajanona, raite:

—Jadi, cue ei, cue amatiai. ⁵⁰ Cue Moo monamo ite. Naimie jitail-lacinona finodimiedi cue amana, cue miriñona, cue eina. Imaci ua cue cominina.

13

Trigo judaídime rafue

(Mr 4.1-9; Lc 8.4-8)

¹ Nai jofomona nairui Jesús jaillanona, jorai fue dine jaide. ² Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci. ³ Ailluena rafue naimacimo llote:

—Jusiñamui omoina sedaacana omoi fueollena, bie rafuena lloiticue. Damie trigona judaiaide. ⁴ Naimie judaiaimona, naisomo janore iduai juide. Naimie bai jailla mei, silliñiai iena guisai bitimaci. Ie jira sicoñede. ⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona, ríara eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo cien diga llisillana ote. Jainamona sesenta diga llisillana ote. Jainamona treinta diga llisillana ote. ⁹ Omoi jeforena jira, raise fueollena, cue lluomo cacarei. Iena ñino.

Jesús ie como lloga rafuena llofua rafue

(Mr 4.10-12; Lc 8.9-10)

¹⁰ Ie llofueoicaigano Jesús mo jicauaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamui omoina ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñotañede. ¹² Jusiñamuina ñnotimie Jusiñamui rafuena ñnocana jaite. Jusiñamui naimiena uiñotaite; iadedi Jusiñamuina ñnoñedimie Jusiñamui rafuena uiñoñecana jaite. ¹³ Ie jira bie isoidicínodo naimacimo lloticue. Cue siño finoca rafuena cio dimaci; iadedi iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci. ¹⁴ Isaías micori naimacina jaie cuela rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacacaiñedomoi.

Jai uisinidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue díbeimo iacaiñedomoi, omoina cue jilloitai raillanona”.

Isaías micori Jusiñamuina ñnoñedinona íese jaie cuete; ¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi ñnua jira, ni ua omoi marena ille jillaci. ¹⁷ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioiñedimaci. Iena cacacadimaci; iadedi cacaiñedimaci.

Jesúdi trigo judaidimiena llua rafue
(Mr 4.13-20; Lc 8.11-15)

¹⁸ Jesús llote:

—Ero, omoína trigo iduaina judaidimie rafuena llofueitícue. ¹⁹ Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacañedimaci. Ie jira Taifedi naimaci comeciaino cacaja uaina inotañede. ²⁰ Jiaie iduai nofiemo juide. Dajerie comini comeciai naie nofi isoidimaci. Jusiñamui uai nano naimaci cacaja, iena caimare feiñotimaci. ²¹ Nofiemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci. ²² Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Inotimaci; iadedi naimaci comeciai jarire illamona, naimaci raruaina ebruillamona, naie uai naimaci comeciaino itabiñede. Jusiñamui jitaile rafuena finocana jaiñedimaci. ²³ Jiaie iduai mare enruemo juide. Dajerie comini comeciai naie enrue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloitícue. Naimie dibeimo comini jaillena, naimie rafue llocana jaidícue. Jiaie uaido iena omoimo lloitícue. Damie trigona judaiaide. Ie illimo mare iduaina judaide. ²⁵ Naimie inia mei, ie enoidimie trigona eruaide raiticiaina bainino judaiaide. Iemei oni jaide. ²⁶ Trigo sicuamona lliside. Naie facaise naie raiticiai como raise bairedi. ²⁷ Judaidimie majiraini iena ciuana, naimiemo llote: “Mare iduai navui ritio. ¿Niesedeta raiticiai eo sicode?” ²⁸ Uai ote: “Cueno enoidimie iese finoca”. Naie majiraini naimiemo jicanotimaci: “¿Birui nai raiticiai cai raitiana jitaideo?” ²⁹ Uai ote: “Dama ite. Raiticiai omoi raitia, trigona jia jaitaitomoi. Dama iesede. ³⁰ Danomo sicoite. Ua facaiseconi cue majirainimo lloitícue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

Jesúdi mostaza ido llua rafue
(Mr 4.30-34; Lc 13.18-19)

³¹ Jesús jiaie rafue llote:

—Jusiñamui dibeimo comini jailla rafuena lloitícue. Jiaie uaido iena omoimo lloitícue. Damie mostaza idona rillamona, naiemona eo aillue riera sicode. ³² Mostaza ido eo janorede; iadedi sicua mei, eo aillue riera jaillamona, nainomo silliaia jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofua rafue
(Mr 4.33-34; Lc 13.20-21)

³³ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede. ³⁵ Jusiñamui facaina lloraima micori iena jaie cueda:

Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaise mona jaca bu iena uiñoñede.

Birui naimaci uiñollena, iena lloiticue”.

Jesús trigo motomo riga raiticiaina llofua rafue

³⁶ Comini jino faionocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñollena, trigo motomo riga raiticiari rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloiticue. ³⁸ Naie illidi nana comini. Mare iduaidi Jusiñamui duide comini. Raiticiaidi Taifemo duide comini. ³⁹ Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisai. Trigodi cuena inotino. ⁴⁰ Jobaillena raiticiari ofitaja isoi, ico abido cue bia, daje isoi iite. ⁴¹ Cue jaienisaina oretaiticue, nana jeacinona finoraini diese ofitallena, cue illanomonu iraimo dotallena. ⁴² Nainomo eo duere sefuillamonu, eeditimaci. Subicaitimaci. ⁴³ Iemei jitoma lligaiñua isoi, Jusiñamui sedajanomo naimienu inotinodi marena bairenitimaci. Omoi jeforena jira, raise fueollena, cue lluamocacarei. Bie isoi omoi duere sefuiñellena, cue lluanu ino.

Jesúdi eniruemo isiruiga reica rana llofua rafue

⁴⁴ Jesús llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai iñenu jira, naie eniruenu uainino ibaacadu, naie ra ollenu. Ucubue ollenu, naie rari iobilla jira, nana naimiemo ite raruiaina fecaite. Iemei eniruenu ibaite. Ie isoide. Jusiñamui illanomo omoi illenu, jiaie rafue uanonu jaiñeno. Dani Jusiñamui rafuenu uanonu jai. Dani iemo omoi comeciaina facu.

Perlas railla rafue

⁴⁵ Jesús llote:

—Jusiñamui dibeimo comini jailla rafuenu lloiticue. Ienu omoi raise uiñollenu, perlas railla rana ibaraimanu lloiticue. Eo mare perlas iballenu jenocabide. ⁴⁶ Eo raifide perla naimie baia, naie perlenu iballenu, nana ie raruiaina fecaite. Ie isoide. Jusiñamui ie cominina sedaacaju rafuenu omoi cacaju jira, ienu ocanu jai.

Jesús lloijina ñaia rafue

⁴⁷ Jesús llote:

—Jusiñamui dibeimo comini jailla rafuenu lloiticue. Ienu omoi raise uiñollenu, lloijina lloiticue. Joraimo lloijina comini faianonu, naga isoide lliciaina otimaci. ⁴⁸ Ari sonu mei, mare llicia diese fetodimaci.

Maraiñede lliciai diese oni faitimaci. ⁴⁹ Ie isoide. Ico abido cue bia, iese iite. Jusiñamuina ñnotinomona naimiëna ñnoñedino diese oni fetollena, Jusiñamui jaienisai biitimaci. ⁵⁰ Iemei iraimo Jusiñamuina ñnoñedinona dotaitimaci. Nainomo eo duere sefuillamona eetitimaci. Subicaitimaci.

Jesús llofueoicaiganodi mare rafuena jai uñña rafue

⁵¹ Ie llofueoicaiganomo Jesús jicanote:

—¿Nana cue lluaana cacadomoi?

Uai otimaci:

—Jii, nana cacadicaí.

⁵² Naimacimo llote:

—Ie jofomo comini bia, naimacina raise nafuëllena, naimacina caimare itatallena, jofo nama ie mare raruiamona naimaci jitailla ra naimacimo fecade. Comini comeciaina lloticue. Jusiñamui facaina lloraini micoriai llogacinona uññotomoi. Cuemona Jusiñamui ie cominina sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide. ⁵⁴ Ie eniruemo rillanona, Nazaretmo ite ofiracomo llofue. Naiemona cominidi rajicaillamona raitimaci:

—¿Ñiese naimiedi eo abina uññote? ¿Ñiese siño rafuena naimiedi finode? Naimiedi jamai bue isoidimie. ⁵⁵ Naimie amederaima jito. Naimie eidi María. Naimie amataidi Jacobo, José, Simón, Judas. ⁵⁶ Naimie miriñotiaidi cai motomo jiai ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵⁸ Naimie uaina naimaci ñnoñena jira, Jesús ailluena siño rafue finoñede.

14

Juan Bautista micori fiodailla rafue

(Mr 6.14-29; Lc 9.7-9)

¹ Naie facaiseconi Herodes railla gobernador Jesús mamecina cacade.

² Naimie ecimo maijiuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluaana gaiñenano, naimiëna duere finode. Herodes Juan micorina gaitatajanona, cárcelmo jonetade. ⁵ Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie

mícorina jaciruite. ⁶ Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. ⁷ Ie jira naiñaiñomo llote:

—Nie isoide rana o jitaadedi, omo iticue. Illaíma uai cuemo illa jira, iena ua finoiticue.

⁸ Naiñaiño ei naiñaiñomo lluanona, naiñaiño uai ote:

—Juan Bautista ifogí bandejamo jonecaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan mícorina meineta-jana llote. ¹⁰ Ie lloga uaina finollena, cárcelmo soldadona orede. Nainomo Juan mícori ifogina jaitade. ¹¹ Bandejamo naimie mícori ifogí jonecaida, soldado atiano, Herodías jisamo fecade. Ieconí ie eimo fecade. ¹² Iena fidianona, Juan mícori llofueoicaigano naimie mícori abina uaibitimaci. Iena naimaci raia mei, Jesúsno lluaidimaci.

Jesús cinco mil iñiaína ecaja rafue

(Mr 6.30-44; Lc 9.10-17; Jn 6.1-14)

¹³ Juan mícori meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci.

¹⁴ Eniruemo Jesús sijia, ailluena cominina dafafide. Naimacina ciuanona, naimacina duenaillanona, duidinona jillotade. ¹⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶ Uai ote:

—Naimacina oretañeiticue. Naimacina omoi eca.

¹⁷ Uai onaisite:

—Dani caimo ite cinco llomenico, mena lliciai diga.

¹⁸ Uai ote:

—Iena cuemo ati. ¹⁹ Raitie illanomo comini ana raillesa llono —raite.

Naie cinco llomeniconona naie mena lliciai diga uanona, monamo eruailanona, Jusiñamui iobillacinona fecade. Iemei taillude. Ie llofueoicaiganomo fecade, cominina ecallena. ²⁰ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci. ²¹ Cinco mil iñiaí diese guitimaci. Naimaci aitiaí jiai guitimaci. Naimaci uruiaí jiai guitimaci.

Jesús jinui emododo macarilla rafue

(Mr 6.45-52; Jn 6.16-21)

²² Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote. ²³ Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. ²⁴ Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. ²⁵ Nia monañedemo, jinui emododo naimaci dine Jesús bite. ²⁶ Naimiena naimaci ciuanona, jacinaillamona, raitimaci:

—¿Bu joreño caimo billana ciodicai? —Jacinaillamona cuiridimaci.

²⁷ Naie dacaíño Jesús naimacimo llote:

—Omoi joreñoncaíñeno. Cuesa. Jaciruiñeno.

²⁸ Pedro uai ote:

—Uanaí caí Namadio. O dine cue billesa cuemo llono.

²⁹ Jesús uai ote:

—Cue dine bi. —Ie jira botemona jinui emodo Jesús dine Pedro macarite; ³⁰ iadedi aifi billana naimie cianona, jacinaita. Jinuimo anabaiacade. Ado cuiroide:

—Nama, cuena cano.

³¹ Jesús ie onolli oni ñuitajanona, naimiena llinuanona, raite:

—Eo janore cue uaina inotio. ¿Bue ñellena eo inoñedio? Cuen a inotiodena, jinui emododo cue dine niadedi ridio.

³² Botemo a iaimaijai jallamona, ie facaise aifi llucaide. ³³ Ie jira botemo itino Jesúmo iobillacinona fecadimaci.

—Odi ua Jusiñamui Jitodio —raitimaci.

Jesúdi duidinona Genesaret eniruemo jillotaja rafue

(Mr 6.53-56)

³⁴ Ruica dine jaillanona, Genesaret railla eniruemo ridimaci. ³⁵ Jesúna nainomo itino uñuamona, naimie dine duidinona atillena, nana nairaimo jiaie cominina oredimaci. ³⁶ Naimie dine billanona, danie ie iniroi fuedamo jutadallena naimiemo jicanotimaci. “Naimie iniroimo cae jutadallemona jilloiticae” raillamo comeciaina facadimaci. Nana jutadate diese jillodimaci.

15

Jesúdi comini comeciaina ñaia rafue

(Mr 7.1-23)

¹ Jerusalémona fariseuai comini Jesús dine bitimaci. Moisés micori llogacinona llofueraini jiaie bitimaci. ² Naimiemo jicanotimaci:

—¿Bue ñellena o llofueoicaigano cae einamacie rafuedo jaiñedimaci? Naimacie guiacania, naimacie onolli cae einamacie llua isoi raise jocoñedimaci. Ie jira cae abimo jeacino finodomoie.

³ Jesús uai ote:

—¿Bue ñellena nana Jusiñamui llogacinodo jaiñedomoie? Omoie einamacie llogacinodo jaidomoie; iadedie nana Jusiñamui llogacinodo raise jaiñedomoie. ⁴ Jusiñamui jiaie llote: “O moo uai inuanona, naimiena cano. O ei uai inuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ⁵ Iese Jusiñamui llote; iadedie omoie einamacie llotimacie: “Jusiñamuimo cae ucubena cae fecajamona, cae moona, cae eina jai canonidicae”. ⁶ Iese omoie finocabilla jira, omoie einamacie llogacinodo omoie jaillamona, Jusiñamui uaina jamaidomoie. ⁷ Mareuidinona abi caitauidinodomoie. Isaías micori omoina jiaie raise llote. Naimiedie Jusiñamui llua cuete:

⁸ Bimacie naimacie uaido marecinona cuemo llote; iadedie cue rafuedo raise jaiacaiñedimacie.

“Ona isiruiticae” llotimacie. “Ona sedadicae” llotimacie.

Jamai ñaitimacie. Naimacie comeciace cue dibeimo raise iñede.

⁹ Cue uai itena, jamai comini llucacinona naimacie llofuecabilla jira, tainona cuena sedadimacie.

¹⁰ Fariseuai diga iese llua meie, naimie ecimo ailluena comini dane ofillanona, naimacimo llote:

—Iena raise omoie uñollena, cue llua mo cacareie. ¹¹ Omoie einamacie isoi omoie guiñenia, naimacie isoi omoie onollina omoie jocoñenia, omoie comeciaina jearetañedomoie. Omoie guigamona, omoie onollina jucua-mona, Jusiñamuina nabaiñedomoie. Omoimo jeacino illa jira, Jusiñamuina nabaiñedomoie. Omoie comeciace jearena jira, jeacinona finocabidomoie.

12 *Ie llofueoicaigano naimiemo lluaibitimaci:*

—O llua muidona, fairseuai cominina icidio.

13 *Naimie dinena uai ote:*

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite.

14 *Naimacina faimonocai. Uanaicinona naimaci uiñoñena jira, uisnidino isoidimaci. Jiaimiena uisnidimie ifoia, dafomo uaidiaimaiai. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jaiñedimaci. Ja muidomo faifitimaci.*

15 *Pedro naimiemo llote:*

—Aillinano o llua caimo raise llono.

16 *Uai ote:*

—¿Niese cue llua nia cacaiñedomoi? 17 Nie isoide ra guitomoina, omoi jebemo jaide. Ie mei omoi abiaimona jino bite; 18 iadedi omoi comeciaino iticinomona jearedena ñaitomoi. Omoi comeciai jearena jira, jearede rafuena finocabidomoi. 19 Omoi comeciai jearena jira, jeare comeciaina facacabidomoi. Comena meinecabitomoi. Omoi aiñede riño diga icabitomoi. Omoi iniñede ima diga icabitomoi. Fñricabitomoi. Tainona llogiricabitomoi. Jiaie comini joreñona jeare ñaicabitomoi. 20 Bie isoidicinuai omoi comeciaino illa jira, jearede rafuena finocabidomoi; iadedi omoi einamac i llua isoi, omoi onolli jocoñenamona jeacino comiñede.

Jesúdi judío iñaiñoñediñaiñoñona jillotaja rafue

(Mr 7.24-30)

21 *Genesaret railla eniruemona ie llofueoicaigano diga Jesús jailanona, Tiro railla eniruemo jaide. Sidón railla eniruemo jai jaide. 22 Ie facaiseconi naie eniruemona judiñediñaiñoñodi billanona, raite:*

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

23 *Jesús uai oñede. Ie jira ie llofueoicaigano naimie dine billanona, duere llote:*

—Naiñaiñoñona abido ie jofomo oreta. Caimo duere jicanuai bitesa.

24 *Jesús uai ote:*

—Faificana jaillana naimaci jai jailla jira, dani cai judiua i cominimo cue Moo cuena oretate. Naimiedi judiñediñaiñoñomo cuena oretañede.

25 *Ie facaise naimie dine naiñaiñoñodi billanona, naimiemo iobillacinona fecallena, caiñici ifodo ana rainada raite:*

—Maestro, cuena cano.

26 *Judiuañedinona naimie canoñenana naiñaiñoñodi uiñollena, naiñaiñoñomo Jesús llote:*

—Uruiai guillamona jiconiaina ecadicaidena, marañede.

27 *Naiñaiñoñodi dinena uai ote:*

—Jii, maestro; iadedi jiconiaidi imaci nama guillamona fiebide guillamona guitimaci. —Iese llote; ia jiaie rafuemo comeciaina facade. Uruiaina llote; iadedi judiua i comeciaina facade. Jiconiaina llote; ia judiuañedinomo jai comeciaina facade. Comeciaina facade: “O cominimo o rafue duide; ia cai Namana o illa jira, nibai o rafue caimo janore duide”.

28 *Jesús uai ote:*

—Cue uaina o ñnua jira, o jitailla rafuena finoiticue. —Ieconi naiñaiñoñodi jisa jillode. Janaba naiñaiñoñomona oni jaide.

Jesús ailluena duidinona jillotaja rafue

²⁹ Nainomona Jesús bai jaillanona, Galilea railla jorai fueo jaide. Iemei aneduaimo jaillanona, nainomo ana raide. Nainomo rilla mei, ³⁰ ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruaidinona, uisinidinona, uainidinona atidimaci. Diga duidinona naimie dine atidimaci. Iemei naimacina jillotate. ³¹ Ailli uainidino jai ñaiana cacajamona, ailli onollina idisaruaidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisinidino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

Jesúdi cuatro mil iñiaia ecaja rafue

(Mr 8.1-10)

³² Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci bai jaillanona. Naimacina cue duenailla jira, naimacina canoacadieue.

³³ Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

³⁴ Jesús jicanote:

—¿Ñiga llomenico omoimo ite?

Uai otimaci:

—Siete. Janorede llicisiriaí caimo jiaí ite.

³⁵ Comini ana raillena Jesús llote. ³⁶ Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena. ³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ³⁸ Nainomo cuatro mil iñiaí guitimaci. Naimaci ainiaí jiaí guitimaci. Naimaci uruiaí jiaí guitimaci. ³⁹ Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

16

Fariseuai comini Jesúmo siño rafuena finuana jicanuano billa rafue

(Mr 8.11-13; Lc 12.54-56)

¹ Dajerie fariseuai comini Jesús dine bitimaci. Naimiena facacillena, dajerie saduceuai comini jiaí bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

² Jesús uai ote:

—Jitoma sojicaidemo, mona jiairenia, raitomoi: “Íco are maremonanite”. ³ Jiaí raitomoi: “Jitiramo mona jiairenia, ja noci deite”. Monamo omoi eruaillamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. ⁴ Jecinona finocabidomoi. Jusiñamui díbeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiaí jilloiticue. —Ie llua mei, naimacimona Jesús ie llofueoicaigano diga oni jaide.

Jesús siritate rana llofuia rafue

(Mr 8.14-21)

⁵ Ruica dñe naimaci rillanona, ie llofueoicaigano llomeniconona feillana uibiñotimaci. ⁶ Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite. ⁷ Jesús iese llua jira, iena naimaci raise cacaiñena jira, dani coniniri siadotimaci:

—Llomeniconona cai atañena jira, caimo iese llote.

⁸ Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise inoñedomoi. Omoina canoredicue. ¿Bue ñellena dani omoi llomenico inenana siadotomoi? ⁹ ¿Niese inoñedomoi? ¿Niese cue navui siño finoca rafuemo comeaiina facañedomoi? Navui cinco mil inñiai cinco diganicodemo guitimaci. Monillamona, guigamona fiebillamona, doce cirigaiaimo iraidomoi. ¹⁰ Jiaicaiño cuatro mil inñiai siete diganicodemona guitimaci. Monillamona guigamona fiebillamona, siete cirigaiaimo iraidomoi. ¹¹ Omoina cue ecallena, ¿niese cuena birui inoñedomoi? Llomeniconona ailli ñañedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaite.

¹² Ie facaise naimie llua jai cacadimaci. Llomenico siritate rana naimie ñañede; iadedi fariseui llofuiacinomona naimaci abina rairuillena ñaite. Saduceuai llofuiacinomona naimaci abina rairuillena ñaite.

Pedro Jesúsna llua rafue

(Mr 8.27-30; Lc 9.18-21)

¹³ Cesarea Filipo railla enruemo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraïma micoridio”.

¹⁵ Jesús dane jicanote:

—¿Niese omoi cuena raitomoi?

¹⁶ Pedro uai ote:

—Odi cai jilloitaraimadio. Cristodio. Jusiñamui facaina lloraïni micoriai o billena jaié llotimaci. Cai cajede Jusiñamui jitodio.

¹⁷ Jesús dñena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade. ¹⁸ Pedro, o comeaiina uiñotacue. Cuena como o lloga uaina meidoñeitio. Bie rafuena jiaie cominimo o llua mona, jiai inoitimaci. Cuena inuamona, cue cominina jaitimaci. Cue dibeimo inedino iena itatanidimaci. ¹⁹ Ailluena cominimo Jusiñamui ie cominina jailla rafuena nano lloraïmana jaitio. O llucinodo jaitino cue cominina jaitimaci. O llucinodo jaiñeitino cue cominina jaiñeitimaci

²⁰ Iena llua mei, ie llofueoicaiganona rairuide:

—Cue Cristonana bumo nia lloñeno.

Jesús ie fiodaillena llofuia rafue

(Mr 8.31-9.1; Lc 9.22-27)

²¹ Naie facaise mona ie llofueoicaiganomo Jerusalémo naimie jaillena marefodo llote:

—Nainomo cai judíuái illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloiticue.

²² Pedro dinena lletade:

—Nama, ¡Jusiñamui iena jitaiñede! Bie isoide rafue omo suiñeite.

²³ Jesús jinafo dine naimiemo erodate. Raite:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

²⁴ Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite. ²⁵ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaiá, jaca faifiñeite. ²⁶ Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñeno faifite. ²⁷ Cue jaienisai diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue cominiñedinona duere finoiticue. ²⁸ Uanaicinona omoimo lloiticue. Omoimona dajerie nia fioidañeitomoimo, illaimana cue bairellena cioitomoí.

17

Jesús abí meidocailla rafue

(Mr 9.2-13; Lc 9.28-36)

¹ Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uiñede. ² Nainomo rilla mei, naimaci uicomo naimie abí meidocaide. Jitoma isoi naimie uieco bairecaide. Naimie iniori naie dacaño eo userecaide. ³ Naie facaise naimacimo Moisés micori joreño, Elías diga bairede. Elíadi Jusiñamui facaina jaié lloraíma. Jesús diga ñaitiaímaíai. ⁴ Jesús mo Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruga Jito. Naimieri iobidicue. Naimie llamo cacarellanona, iena ñno —llote. ⁶ Jesús llofueoicaigana iena cacajanona, eo jaciruillanona, naimaci uieco dinena ana bitadatimaci. ⁷ Jesús naimaci dine billano, naimacina jetajanona, raite:

—Mai jaciruiñeno naidacai.

⁸ Naimaci erorillamona, dama Jesúna cidimaci. ⁹ Anedumona bitimacimo, naimacimo Jesús llote:

—Omoi ailli ciua rafuena bumo lloñeno, cue fiodaillamona cue jillua dinori.

¹⁰ Naimiemo llotimaci:

—Moisés micori llogacinona llofueraini birui raicabitimaci: “Elías railamie dane biite. Ie mei cai jilloitaraíma biite” raitimaci. Jusiñamuimona

o billana ñnoticai. Odi cai Jilloitaraimana ñnoticai. Odi cai Jilloitaraimadiomo, ¿bue ñelli iese raitimaci?

¹¹ Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise llollena. Jusiñamui díbeimo naimaci illena, comini imaci comeciai meiduana llote. ¹² Ero, naimie jai bite; iadedi bie comini naimiena raise uiñoñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, imana cue jaillena; iadedi duere sefuiticue.

¹³ Ie muidona Jesús llofueoicaigano naimiedi Juan Bautista micorina ñaiana jai uiñotimaci.

Jesúdi Janaba anamo itimiena jillotaja rafue

(Mr 9.14-29; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comini itimacimono ride. Jesús dine damie billanona, naimiena raise uaiduanona, caiñici ifodo rainadaçaida raite:

¹⁵ —Maestro, cue jitona duenai. Janaba anamo naimie ite. Iemona naillicabide. Duere sefuide. Uai-uaicabide. Jiaicaiñodedi iraimo uailanona, uside. Jinuimo jiai uailanona, niadedi corobaite. ¹⁶ Naimiena jilloitallena o llofueoicaigano dine naimiena atidicue; iadedi naimiena jillotanidimaci.

¹⁷ Iena cacajanona, Jesús ie llofueoicaiganomo llote:

—Cue uai siñonana ñia ñnoñedomoi. Cue mare rafuedo ñia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

¹⁸ Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemona Janaba oni jaide. Ieconí naie urue jillode.

¹⁹ Ie mei ie llofueoicaigano Jesús mo anado jicanotimaci:

—¿Bue ñellena Janabana oni oretanidicai?

²⁰ Uai ote:

—Raise ñia omoi ñnoñena jira, uanaicinona omoi mo lloiticue. Janaba oni oretallena, cue uai navui omoi mo iticue. Birui raise cuena omoi ñnoñena, bie Janaba oni oretanidomoi. Jusiñamuina eo janore ñnotomoidena, diga rana finodomoi. “Oni bai jai” bie anedumo llotomoidena, omoi na naimie canuamona, bie anedu oni liai bai jaite. Jusiñamuina omoi ñnoia, naga rana finoredomoi. ²¹ Jusiñamuimo omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

Jesús ie fiodaillena dane llofuia rafue

(Mr 9.30-32; Lc 9.43-45)

²² Galileamo ie llofueoicaigano diga danomo itemo, Jesús naimacimono llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. ²³ Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

Jesúmo Jusiñamui jofo facaina damie ibataja rafue

²⁴ Capernaumo naimaci rilla mei, Jusiñamui jofo ucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵ Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitoniamona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitoniamona ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; ²⁷ iadedi Jusiñamui jofo ucube orainina coco icifnellesa, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

18

Jesús ie llofueoicaigano moto imiena ille rafue

(Mr 9.33-37; Lc 9.46-48)

¹ Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imiena ille?

² Iena cacajanona, Jesús daje urue uaiduanona, naimaci motomo jonete. ³ Uai ote:

—Uanaicinona omoimo lloitie. Jusiñamui dibeimo omoi illena, jeacinona omoi fainonocaiñenia, bie urue isoi omoi moto imieñedimiena illanona, Jusiñamui sedajanomo ifeitomoi. Cue cominina omoi ia, bie urue isoi iitomoi. ⁴ Bie urue isoi abi iedoñedimiedi Jusiñamui ie cominina sedajanomo imie moto naimiena ille. ⁵ Bie isoidimie cuemo duillamona, naimiena feiñotimiedi cuena jai feiñote; ⁶ iadedi cuena inotimiena jeacinona finotaiacadimie iena finoñellena, jeacinona finotaiacadimie cimaimo aillue nofici maianona joraimo corobaillena, naimiena dotacadena, cuemona mare.

Jesúdi jeacinona finoñenana llofuia rafue

(Mr 9.42-48; Lc 17.1-2)

⁷ Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiñamui omoi ramo faitimiena duere finoite. ⁸⁻⁹ Biena ñaitie. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomo. Omoi abina omoi namatañiadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaitie. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi naimiēna #notinōmona damie faifillana jitaiñena rafue

(Lc 15.3-7)

¹⁰ Jesús llote:

—Urue isoi omoī illena como lloticue. Iena dane lloticue. Cue Moo naimacina uñua jira, bie urue isoidinona jamaiñocaiñeno. Monamo cue Moo ecimo naimaci jaiēnisaī jaca ite, naimacina canollena. ¹¹ Jusiñamuimona cue billanona, naimiēna #noñedinona naimaci jeacinomona jilloitallena biticue. ¹² Ero, omoimo iena jiaie rafuedo lloticue. Damiemo cien diga toica llauda ite. Naiemona daje feiraite. Iena faifñellena, jiaie llaudaiaina faionocaida, iena jenuaite. ¹³ Iena baillanona, ierī iobite. Baillari oni jaiñedinori baifemo iobite. ¹⁴ Ie isoide. Jusiñamui naimiēna #notinōmona damie faifillana jitaiñede. Ie jira naimacina jeacinona finotañeno.

Jesús omoī ecimo itimie omoīna jeare finuana llofuia rafue

(Lc 17.3)

¹⁵ Jesús nia llote:

—O ecimo itimie ona jeare finoia, naimie dine iena lluai. Daīmaiaī iena omico llono. O uai naimie fairioia, naimie o dibeimo jai iite. ¹⁶ O uai naimie fairioñenia, jiaī menamiēna uñño, o lluomo iaīmaiaī cacareillesa. ¹⁷ O uai naimie fairioñenia, omoī ofiracomo bicabitinomo iena llono. Naimaci uai naimie fairioñenia, Jusiñamuina #ñoñedinomiēna omoī nabaiñena isoi, Moisés llogacinodo raise jaiñedino omoī nabaiñena isoi, naimiēna nabaiñeno. Omoī ofiracomo naimiēna feiñoñeno. ¹⁸ Iese omoī finoia, omoī comeciaī daje isoi lloillamona, Jusiñamuimona mare.

¹⁹ Omoimo nia lloticue. Daje isoi comecina cue Moo Jusiñamuimo jicallena menamaiaī facajamona, cue Moomo iaīmaiaī jianona, cue Moo iaīmaiaī jitaille rafuena finoite. ²⁰ Menamie cue dibeimo illamona, damie amani cue dibeimo illamona, naimaci motomo iticue.

²¹ Pedro naimiemo jicanuaibite:

—Nama, cue ecimo itimie cuena jeare finoia, ¿niga icaiño ibana cue oñeno iena feitaicue? Nibai siete digacaiño.

²² Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoī raise uññollena, bie rafuena lloticue.

²³⁻²⁴ Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentas iballena. Damie eo debede. Diez mil ucubena debede. ²⁵ Naimie ucube iñena jira, naie illaimadi ie cuenta iballena, naimie ai, ie uruiaī diga, nana ie raruiaī diga, fecallena llote. ²⁶ Iena cacajano, ie illaīma uicomo caiñici ifodo raita duere jicade: “Nama, dama ite. Fecuisse omo ibaiticue”. ²⁷ Naimie duenaillamona, naie illaīma llote: “#batañeiticue. Cuemo jai debeñedio. Mai jai”. ²⁸ Ie mei naimie jaide. Bai jaillanona, jiaie maijiraima diga dafaifide. Jai debeñedimieo janore debede. Cien ucubena debede. Jai debeñedimie dinena ie cimaiona llinuana llote: “O debia cuemo mai iba”. ²⁹ Ie jira debedimie caiñici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”. ³⁰ Uai ote: “Ja raire jitaicue”. Naimiēna duenaiñena jira, cárcelmo naimiēna jonetade, ie cuenta iballe dinori. ³¹ Naimie nabaiñiaī iena fidianona, sunaitimaci. Ie jira naimaci illaīma dine nana naie rafuena lluidimaci. ³² Naie illaimadi nana debedimiea abido uaiduano, naimiemo llote: “Maraiñedio. Navui

o cuentana ibatañedicue, cuemo o duere jicaua jira. ³³ ¿Bue ñe o nabaina duenaiñedio, ona cue duenaila isoi?” ³⁴ Icirillamona, naie illaima naimiēna cárcelmo jonetade, nainomo duere sefuillena, nana ie cuenta iballe dinori. ³⁵ Ie isoide. Cue Moo Jusiñamui omoīna duere finoite, omoī comeciāi jitaillamona omoī ecimo itimie ie maraiñede finoca rafuena omoī feitañenia —llote.

19

Jesús iima ie aina dotaja rafuena llofuia rafue

(Mr 10.1-12; Lc 16.18)

¹ Ie llofueoicaigano diga Galileamona jaillanona, Jordán railla ille ruica dibeimo Judeamo Jesús jaide. ² Ailluena comini naimiēna racadimaci Nainomo duidinona jillotate. ³ Naimiēna facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiēna duere finoacadimaci. Jicanotimaci:

—¿Iima ie aina dotajana rairuidio? ¿Ñie isoide rafue muidona damie ie aina dotarede?

⁴ Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaīmaiaina finode. Imana finode. Riñona jiaī finode”. ⁵ Ie jira Jusiñamuidi jaie llote: “Ie ai diga illena, iima ie moona faīnonocaite. Ie eina jiaī faīnonocaite. Ie ai diga illamona, menade comedi daamiēna jai jaide” llote. ⁶ Menade come jai damiēna jai ite. Jusiñamui iese iaīmaiaina itataja jira, iima ie aina dotañellesa. Riño ie inina dotañellesa.

⁷ Dane jicanotimaci:

—¿Bue ñe Moisés micori cuete: “Iima ie aina dotaacania, dotalle rabena nano cueite. Ie mei naiñaiñona dotaite”?

⁸ Jesús uai ote:

—Jusiñamui uaina raise omoī inoñena jira, Moisés micori iima ie aina dotajana rairuiñede; iadedi nano dofoconi iese iñede. ⁹ Jiaie riño diga naimie illena, ie aina bu dotaia, jiaie iima diga naiñaiño iñenia, naimiedi jeacinona jai finode. Ie aina dotajana rairuidicue.

¹⁰ Naimiemo ie llofueoicaigano dinena llotimaci:

—Iese ia, cai jitaillamona aina jamai cai dotanina jira, damamei ainidicai.

¹¹ Naimacimo Jesús llote:

—Nana comini omoī como llucinodo jainidimaci. Dani Jusiñamuina jitaidino iedo jairedimaci. ¹² Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

Jesúdi naimie dine uruiai billana jitailla rafue

(Mr 10.13-16; Lc 18.15-17)

¹³ Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo llollena jitaidimaci. Ie llofueoicaigano iena rairuidimaci; ¹⁴ iadedi Jesús raite:

—Uruiai cue dine billesa. Naimacina rairuiñeno. Cuena bie isoide inotinodi Jusiñamui ie cominina sedajanomo jainaiaidimaci.

¹⁵ Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

Ucuberedimie Jesús diga ñaia rafue

(Mr 10.17-31; Lc 18.18-30)

¹⁶ Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena finoiticue?

¹⁷ Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina ñinocana jai.

¹⁸ Uai ote:

—¿Nie llogacinuaina ñinoiticue?

Jesús dinena uai ote:

—Comena meineño. O añe ñe diga ñeño. Fiiño. Jaiimiena o llogidoia, tainona lloño. ¹⁹ O moo uaina ñno. O ei uaina ñno. O abina o isiruilla isoi, nana cominina isirui.

²⁰ Naie conirue uai ote:

—Nana iena jai ñnoticue. ¿Nie isoide rafuena nia finoiticue?

²¹ Jesús dinena uai ote:

—Jusiñamui jitaillacino o jaiacania, o raise marebicaiania, omo ite raruiaina feca. Naie ucubena dueredinomo feca. Cuena o ñnuamona, monamo ico jaca iitio. Cue llofuegamiena o illena, mai cue diga bi.

²² Iena naimie cacajano, sunaite. Naimiemo eo ailluena ra illa jira, iena fecaacañede. ²³ Jesús ie llofueoicaiganomo llote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite. ²⁴ Iena nia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana fainonocaida, o diga jaicabidicai. ¿Niese Jusiñamuimona ibana feiñoiticai?

²⁸ Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiai iite, nainomona omoi juduai doce nairaiana omoi sedallena. ²⁹ Cuena naimie isiruillamona, ie jofona bu fainonocaia, ie amatiana bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite. ³⁰ Jamai bue isoidomoi. Omoimona jaino jamai bue isoñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

—Jusiñamui díbeimo comíni jailla rafuena lloiticue. Naimie comínina naimaci jaillamona, Jusiñamuimona nana naimie comíni daje isoidimaci. Iena raise omói uñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide. ² Dajeriena baillanona, “Omoimo daberie íbaiticue” llote. “Jee” raitimaci. Ieconí ie illimo maijillena, naimacina orede. ³ Jitoma nia oni daidemo, mercadomo naimie jiaínona ciode. Jamai ítimaci. ⁴ Ie jira naimacimo llote: “Cue illimo maijiai. Raise íbaiticue” llote. ⁵ Ie mei jaidimaci. Jitoma naidai ia, jiaínona cianona, naimacimo maijillena llote. Jitoma oni caidemo, jiaínona cianona, naimacimo maijillena jiai llote. ⁶ Jitoma jasici muido ítemo, jiaínona cianona, jicanote: “¿Bue ñellena namonana jamai ítomói?” ⁷ Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote. ⁸ Jitoma edaciidemo, naie patrón ie mullaímamo llote: “Maijiraínina uaido. Jinafona maijiaidinona raire nano íba. Ie mei jitiramo maijiaidinona jinafo íba” llote. ⁹ Ie jira jinafona maijiaidinona nano íbade. Dabe íbade. ¹⁰ “Naimaci baífemo feiñoíticai” raillamo jitiramo maijiaidino comeaiina facadimaci; íadedí íese feiñoñedimaci. Nana daberie feiñotimaci. ¹¹ Ie jira naie patrón joreñona jeare ñaitimaci: ¹² “Jinafona maijiaidino dallu maijidimaci. Ecasilla facaise maijñedimaci; íadedí namonana maijidicai. Dani cai íbaja isoi íbadío” ñaitimaci. ¹³ Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omói lloticue. O dinena: ‘Jee’ raitío. ¹⁴ O ucubena jai o feiñua jira, mai jai. Cue jitailla jira, da o íbaja isoi dallu maijidinona íbadicue. ¹⁵ Cue ucubena jira, cue jitailla isoi cue íbaia, ¿niése cuena jeare ñaitomói? Jiaínona cue duenaillanona, ¿bue ñellena uradoidomói? Mai jai” llote. Jusiñamui ie comínina sedaacana omói raise uñollena, bie rafue jai lloticue. ¹⁶ Jamai bue isoidomói. Omoimona jiaíno jamai bue isoiñedimaci; ia naimie comínina naimaci jaillamona, Jusiñamuimona naimaci díga daje isoidomói. Naimie díga jaca íitomói.

Jesúdi ie fiodaillena dane llua rafue

(Mr 10.32-34; Lc 18.31-34)

¹⁷ Jerusalémo ie llofueoicaigano díga Jesús jaidemo, dani naimaci díga ñaillena, naimacina oni uite. ¹⁸ Raite:

—Ero, Jerusalémo jai jaidicai. Monamona billanona, íimana jaidicue; íadedí omói illaicomíni cuena gaitaitimaci. Gaitaja mei, cue meinelena llotimaci. ¹⁹ Judíuaiñedino illaicomínimo cuena fecaitimaci. Cueri jifanoítimaci. Cuena faitimaci. Ie mei cuena coraítimaci; íadedí cue fiodailla mei, daruí amani illanona, Jusiñamui cuena jillotaite.

Jesús díne Jacobo Juan íaimaiaí ei billa rafue

(Mr 10.35-45)

²⁰ Naie facaise Jesús díne Jacobo, Juan íaimaiaí ei díga, bitíiaimaiaí. Íaimaiaí moodí Zebedeo. Jesús díne íaimaiaí ei rillanona, naimiena raise uaidollena, caíñici ífodo ana rainadacaida llote:

—Omo daje rafue jicanoíacadicue.

²¹ Naiñaiño Jesús díne jicanote:

—¿Bue ñiaíbitío?

Naiñaiño uai ote:

—Illa imana o jailla mei, cue jito ia imai ai o ecimo illana o llwana jita idicue. Dame o nabeimo. Jia imie o jarifebeimo. —Jia ino baifemo ia imai ai illena, naiñaiño iese llote. ²² Naimacimo erua illanona, Jesús dinena uai ote:

—O jita illacinona raise uiñoñedio. Cue duere sefuiticue.

Naiñaiño jito ia imai ai mo jicanote:

—¿Ie isoi duere sefuiacadomico?

Uai otia imai ai:

—Jii.

²³ Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo itino iena.

²⁴ Iena jiaie llofueoicaigano cacajano, naie ia imai ai iri iciritimaci.

²⁵ Jesús nana naimacina uaiduanona, raite:

—Nana illa cominidi naimaci anamo itinona ocuicabidimaci; ²⁶ iadedi omoi dine iese iñena. Omoi mona bu imiena iacania, omoi mulla imana naimie jaisoillasa. ²⁷ Omoi mona bu imiena iacania, omoi na naimie canocana jaisoillasa. ²⁸ Cuemona fueo. Biñedicue cominina cue ocuillena; iadedi cominina canua ibidicue. Cue jita illa jira, nana comini facaina fiodaisa ibiticue. Naimaci jeacinomona naimaci jillobillena, fiodaisa ibiticue. Ailluena comini cuena iñuamona jilloitimaci. Coninina omoi canua —llote.

Jesús mena uis inidi a imai ai na jillotaja rafue

(Mr 10.46-52; Lc 18.35-43)

²⁹ Jericó railla naira imona jaidimacimo, ailluena comini naimaci jinafona racadimaci. ³⁰ Ie facaiseconi mena uis inidi a imai ai nai fuemo raidia imai ai. Jesús naiedo jaillano cacajano, naimiena ado uaidotia imai ai:

—David micori Jitona o illamona, Jusiñamuimona o billa jira, cocona duenai. Cocona cano.

³¹ Ia imai ai llucaillena, Jesús diga jaidino ia imai ai na lletade; iadedi eo cuiroidia imai ai:

—Maestro, David micori Jitona o illamona, cocona duenai.

³² Ia imai ai na Jesús cacajano, ieconi naidadajanona, ia imai ai na uaidote. Jicanote:

—¿Niese omiconona cue nibaiana jita idomico?

³³ Uai otia imai ai:

—Maestro, coco uisina o cioitajana jita idicoco.

³⁴ Ia imai ai na duenailanona, ia imai ai uisina jetade. Ieconi ia imai ai uisidi ciodo. Ia imai ai jai cianona, ie llofueganona ia imai ai jaillena, Jesús diga jaidia imai ai.

21

Jesús illa ima isoi Jerusalémo jailla rafue

(Mr 11.1-11; Lc 19.28-40; Jn 12.12-19)

¹ Oni jaillanona, Jerusalémo ia ireica idimacimo, Betfagé railla naira imo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiena orede. ² Raite:

—Bie naira illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie ia imai ai na suiñuano

bene ati. ³ Omícomo “¿Bue ñellena bie suiñodomíco?” bu jicanoia, llono: “Coco Nama naie iaímaiaína jitaide. Naillí naimie iaímaiaína raire abído oretaite” —raite.

⁴ Jusiñamui facaina lloráima micorí jaie llua isoi, bie rafue suide.

⁵ Naimie micorí jaie cuete:

Jerusalén itinomo llono:

“Ero, omoi illaíma omoína sedallena biite.

Abi íedofñeno biite.

Burra urue emododo naimie biite”

cuete. ⁶ Iaimaiaí jaillanona, Jesús llua isoi finodiaímaiaí. ⁷ Burra ie urue díga atidiaímaiaí. Burra urue emodomo naimie llofueoicaigano naimaci iniroina jobianona, ie emodomo Jesús rainadate. ⁸ Naimiena iobitallena, illaíma isoi naimie jaillena, ailluena comíni imaci iniroi díga, naiso motomo jobedímaci. Jiaíno raforono uanona, naiso motomo jobedímaci. ⁹ Dajerie Jesús uicomo jaidímaci. Dajerie naimie jinafona jaidímaci. Ado cuiriisite:

—¿Cai Jilloitaraíma billa! ¡Naimiedi David micorí Jito! ¡Jusiñamui mamecido bitímie eo mare! ¡Jusiñamui caína jilloitajasa!

¹⁰ Jerusalémo naimie ridemo, nana nainomo itino naie rafuena uíñoiacadímaci.

—¿Buta bite? —jicanotímaci. ¹¹ Jesús díga bitino dínena uai otímaci:

—Jesús bite. Naimiedi Jusiñamui facaina lloráima. Galileamo ite Nazaret ímie.

Jesúdi Jusiñamui jofomona damieriena dotaja rafue

(Mr 11.15-19; Lc 19.45-48; Jn 2.13-22)

¹² Jerusalémo Jesús rilla mei, Jusiñamui jofomo naimie jaide. Naie jofe eo aillue. Díga cuartos nainomo ite. Jusiñamuimo ofomaiaína fecallena, naimiemo toíca llaudaiaína fecallena, nainomo comíni jaisoidímaci. Naie comína íbatajanona, ofomaiaína, toíca llaudaiaí díga, damierie fecaudímaci. Iena Jesús cíuanona, naimaci mesaiaína oni caicode. Ucugína fecaudíno raíracuai jiaí oni caicode. ¹³ Naimacímimo llote:

—Ie facaina lloráima Jusiñamui llogacino jaie cuega: “Cue jofe ite, nainomo cuemo comíni jíllena” cuega. Ero, ailluena omoi íbataja jira, naimie jofona fíriruidíno jofona omoi finoca.

¹⁴ Ie facaise uisínidíno Jusiñamui jofomo naimie díne bitímaci. Ñujañjacaida macarítino jiaí bitímaci. Naimaci billanona, Jesús naimacína jillotate. ¹⁵ Nainomo Jesúdi díga mare rafuena finode. Díga comína jillotate. Iena cíuanona, nainomo ite uruaí ado cuiriisite:

—David micorí Jitori íobidícaí. Jusiñamui lloráini micoríaí jaie llua isoi, cai jilloitaraíma jai ite.

Iena cíuanona, iena cacajanona, judíuai illaícomíni íciritímaci.

¹⁶ Naimiemo jicanotímaci:

—¿Bie uruaí cuiriillana cacadio?

Jesús dínena uai ote:

—Jii, cacadicue. David micorí iena jaie cuete. ¿Ñiese iena ca-caíñedomoi? Naimie cuete:

Naimiemo Jusiñamuidi uruaína mare íobillacínona fecataite.

¹⁷ Naimacína faínonocaida, Betaniamo Jesús jaide, nainomo ínillena.

Jesús higuera railla riarana faidua rafue

(Mr 11.12-14, 20-26)

18 Ie areruido Jerusalémo abido ie llofueoicaigano diga Jesús bia, aimetaite. 19 Nai fuemo higuera railla riarana cianona, iena jibuide. Naiemo naie llisilladi iñede. Dama ie ibena cide. Ie jira naie amenana llote:

—Biemona jaca llisiñeite. —Iese railla dacaiño naie riaradi duide. 20 Ie llofueoicaigano iena cianona, rajjicaillamona raitimaci:

—¿Niese naie riaradi raire duide?

21 Jesús dinena uai ote:

—Uanaicinona omoimo lloiticue. Cue Moona raise omoi ñnoia, bie isoide rafuena finoitomoi. Raise omoi ñnoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite. 22 Naimie iena finuana omoi ñnuamona, nie isoide rafue cue Moomo omoi jicajia, iena naimie finoite.

Jesúdi ie siño uaina llua rafue

(Mr 11.27-33; Lc 20.1-8)

23 Jerusalémo rillanona, Jusiñamui jofomo Jesús fo jailla mei, nainomo ite cominina llofue. Judíuai illaicominini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

24 Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. 25 Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuelono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micorilluana ñnoñedomoi?” 26 “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

27 Ie jira fairiotimaci:

—Uñnoñedicai.

Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi mena jito iaiaiaia illa llua rafue

28 Judíuai illaicominimo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo birui maijai”. 29 Uai ote: “Jaiacaiñedicue” llote. Dally illanona, ie comecina dane facajano, maijaiide. 30 Jiaie jitomo daje isoi llote. Naimie uai ote: “Jai, maijaiticue” llote. Iese llote; iadedi maijaiñede. 31 ¿Nie jitoca ie moo jitaille rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoina ñaiticue. Omoimona marañedicaci; iadedi Jusiñamui cominina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiai iitimaci; iadedi nainomo jaca iñeitomoi. 32 Marena omoi comeciaina itatallena, Juan micoridi navui bite; iadedi naimie micorina ñnoñedomoi. Ucube oraini naimie micoridi rafuena ñnotimaci. Callirediñaiñuaidi naimie

mícori rafuena ñnotimaci. Iena uiñotomoi; iadedi omoi comeciai iuaillaina meidoñedomoi. ñnoñedomoi.

Jesúdi marañede majiraini rafuena llua rafue

(Mr 12.1-12; Lc 20.9-19)

³³ Judíuai illaicomínimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jiaínomo fecade. Ie mei jiaie eniruemo jaide.

³⁴ Uvas jai einaila facaise riaraiaina sedaraini ñine naie patrón janore mullaiaína orede, naimie facaise iedinona naimie feñollena; ³⁵ iadedi naie sedarainidi ie mullaiaína duere finosite. Daje mullaimana fatimaci. Jiaimiena meinetimaci. Jiaimiena noficina fairnotimaci. ³⁶ Ie mei patrón jiaie mullaiaína orede. Naimacina jiai duere finodimaci. ³⁷ Ja muidomo ie jítóna orede. “Cue jítóna jaciruitimaci. Naimie uaina ñnoítimaci” comecina facade. ³⁸ Riaraiaina sedaraini naimiena cüanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi como fiebillesa” raitimaci. ³⁹ Naimiena jino dotajanona, naimiena meinetimaci. ⁴⁰ Naie illi nama ico abido bille mei, ¿nie isoide rafuena naimie naie illina sedarainina ñinoite? Cuemo llono — llote.

⁴¹ Judíuai illaicomíni uai otimaci:

—Naie marañedinona dueruiñeno meineite. Ie mei jiaie comínimo naie illi fecaite, iena sedallena, naiemona riarana feñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraima mícori omoína jaie cuete. Ie cüegafuena raise facañedomoi. Naimie mícori cüega:

Jofo finoraini jitañena noficidi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona, “Eo mare” raiticai

cüega. Jusiñamui comínina damierie jaillana naimie mícori cuete. Jusiñamui oretagamiena damierie jitañenamona, naimie comínina jaiñeitimaci; iadedi Jusiñamui oretagamiena ailluena ñnuamona, naimie comínina jaitimaci. Ero, naimie mícori caina cuete. Naie jofona finoraini isoidomoi. Naie nofici isoidicue. Cue rafuena omoi jitañena jira, naimie comínina jaiñeitomoi. ⁴³ Jusiñamuidi ie comínina sedajanomo omoína itatañeite; iadedi jiaie comínina nainomo itataite, naimie jitailla rafuena naimaci finua jira.

⁴⁴ Jesús llote:

—Naie noficina dane ñaiticue. Noficimo bu eicaitaia, bofedaite; ia naie nofici bumo ana uaiá, naimiena saitaite. Ie isoide. Cue lluaana omoi jamaia, duere sefuitomoi. Iena omoi ñnoñenia, ja muidomo fañfitomoi.

⁴⁵ Jesús lluaana naie judíuai illaicomíni cacajanona, naimiedi naimacina ñañana jai uiñotimaci. ⁴⁶ Icirillamona, naimiena gaitaacadimaci; iadedi comínina jaciruitimaci, comínidi naimie Jusiñamui facaina lloraimana raillanona.

22

Jesúdi illaima ie jito aina ua llua rafue

¹ Jusiñamui jofomo Jesús nia illanona, nainomo itinona llofuate:

² —Jusiñamui ðibeimo comini jailla rafuena omoimo lloiticue. Iena omoi uñollena, bie rafuedo iena lloiticue. Illaimadi ie jito ai ua rafue finode. ³ Naimie ie mullaini orede, rafuemo llogano uaidollena; iadedi nai llogano biacaiñedimaci. ⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. Firetaiai, farediretaiai diga, jai faga. Jai nana fuite. Rafuemo mai bi’ ”. ⁵ Naimaci cacarefiacaiñede. Damie ie illimo jaide. Jiaimie ie chinganamo jaide. ⁶ Jiaino mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. ⁷ Ie jira naie illaima eo icirite. Naimie soldadaui oretate, naimie mullaini meinetinona meinellena. Naimie naimaci illano jobaitate. ⁸ Ie meinoconi ie fiebide mullainimo llote: “Rafue guille jai nana finoca; ia llogano maraiñedimaci. ⁹ Naiso bojicaillanomo jai. Nana o ciolle diese llono: ‘Rafuemo bi’ llono”. ¹⁰ Ie jira ie mullaini jai naisona jaide. Maraiñedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaima nainomo fecaca iniroina jitadimaci. ¹¹ Illaima fo bia, mesamo itino jibuillena, dinomo daje iima rafue ie mare iniroina jitañenana ciode. ¹² Naimiemo jicanote: “Nabai, ¿niese bene rafue ie mare iniroina jitaño bitio?” jicanote. Naimie uainicaide. ¹³ Ie jira naie illaima ie mullaiamo llote: “Naimie cuena ñnoñena jira, naimie onolli dajemo nitaicaida maino. Ie eillina daje isoi maino. Cuenona naimie jino dota. Nainomo itino diga duere sefuite. Jiai sunaite” llote. ¹⁴ Ero, naie rafuemono omoi fueo. Illaima ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

*Jesúmo gobiernomo ucubena fecajana jicanua rafue
(Mr 12.13-17; Lc 20.20-26)*

¹⁵ Naimacimo Jesús lua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci. ¹⁶ Ie jira naimie ðine naimaci cominimona dajerie oredimaci. Herodianuai railla cominina jiai jaidimaci. Jesús ðine rillanona, raitimaci:

—Maestro, unaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. ¹⁷ Omo rafuena jicanoicadicai. Dani Jusiñamuina sedadikai; iadedi romanos railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —lloitimaci.

¹⁸ Naimaci comeciaina maraiñedicinona facajana Jesús uñuamona, uai ote:

—¿Bue ñellena cuena facacitomoi? Maredinona abi caitadomoi.

¹⁹ Ucube cuemo acata —llote. Ie jira acatatimaci.

²⁰ Jesús ðinena jicanote:

—¿Bu ie joreño nainomo ite? ¿Bumo jainaiaide bie cuega radi?

²¹ Uai otimaci:

—César.

Jesús ðinena raite:

—César iena itedi Césarmo ille. Jusiñamui iena itedi Jusiñamuimo ille —raite.

²² Naimie lluna cacajano, rajicaidimaci. Naimie jeare uai oñena jira, naimie dinomona oni jaidimaci.

Jesús dine saduceuai railla comini billa rafue

(Mr 12.18-27; Lc 20.27-40)

²³ Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

²⁴ —Maestro, Moisés micori jaie cuega: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁵ Ero, cai motomo siete amatiai ite. Nano doforamie ie aina ote. Naimie nia uruiainide fiodailla. Ie emodo imie ie ama feciñona ote. Uruianide jiai fiodailla. ²⁶ Naie siete digamiedemona iese sefuide. ²⁷ Ja muidomo naie riño jiai fiodaite. ²⁸ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

²⁹ Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. ³⁰ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaenisaí ainidimaci. Ininidimaci. Ie isoi iitimaci. ³¹ Fiodaitino jilluana omoimo lloiticue. Jusiñamui omoi jaiagaimo jaie llogacinona inoñedomoi. Naimie llote: ³² “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite —llote. ³³ Nainomo ite comini iena cacajano, naimie llofuiaí raíjicaidimaci; ia saduceuai dinena uainicaidimaci.

Jesús nanoca llogacinona llofuia rafue

(Mr 12.28-34)

³⁴ Saduceuai comini uainicaillana fariseuaidi jai fidiano, Jesús dine ofidimaci. ³⁵ Naimacimona damiedi Moisés micori jaie llogacinona eo uiñote. Jesúna facacillena, naimiemo jicanote:

³⁶ —Maestro, Moisés micori jaie llogacinuaimona, ¿nie llogacino ua nanoca llogacinona?

³⁷ Jesús dinena uai ote:

—Moisés micori jaie cuega: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”. ³⁸ Bie ua nanoca llogacino. ³⁹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. ⁴⁰ Bie mena llogacinomona nana jiaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide —llote.

Jesús dinena fariseuai cominimo jicanua rafue

(Mr 12.35-37; Lc 20.41-44)

⁴¹ Naimie dine nia fariseuai comini ia, Jesús naimacimo llote:

⁴² —Jusiñamui lloraini micoriai jaie raitimaci: “Jusiñamuidi Cristo raillamiena oretaite, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

⁴³ Jesús dinena jicanote:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai.

Ona ñnoñedino o anamo itataiticue”.

⁴⁵ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23

Jesúdi judíuai illaicomínina ñaia rafue

(Mr 12.38-40; Lc 11.37-54; 20.45-47)

¹ Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo llote:

² —Moisés micori llogacinuaina llofuerainidi naie rafuedo jai jaicabidimaci. Fariseuai comini iedo jiai jaicabidimaci. ³ Naimaci llofuiacinodo omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci llofuiacinodo naimaci jaiñena jira. ⁴ Omoi einamac i llogacinuaido raise omoi jaillena, diga rafuena omoi finuana jitaídímaci; iadedi iedo omoi jaillena, omoína jaca canoñedimaci. “Jusiñamuina eo raise sedadicaí” comecina facadimaci. Iemo naimaci comecina facajamona, ⁵ iena omoi cioillena, nana naimaci finua rafuena marefodo finodimaci. Jiaie cominimo ite Jusiñamuimo jiarabe baifemo faitibena uiacabidimaci. Iniroi fuedadi aillofena jonegana gaidimaci. ⁶ Rafue ia, naimaci jamai bue isoiñedinomo comecina facajanona, rafue nama ecimo raíacadimaci. Ofiracomo uicomo raíacadimaci, comini naimaciri acarillena. ⁷ Níne naimaci jaia, nana comini naimacina uaiduana gaidimaci. Maestrodicinona uaiduana jiai gaidimaci. ⁸ Jusiñamuina eo raise naimaci sedajana omoi uiñuana jitaídímaci. Naimaci isoi iñeno. Omoi damacina jira, omoimona damie omoi baifemo faiamo comecina facañeno. Naimiena maestrona raiñeno. Omoi baifemo cue illanona, omoi maestrodicue. ⁹ Omoi Moo Jusiñamui monamo illanona, dama naimiena seda. Jiaimiena sedaño. Jusiñamui isoi jiaimiena “Moo” raiñeno. ¹⁰ Omoi damacina jira, omoimona damiena “Cai illaíma” raiñeno. Omoi illaimana jai iticue. ¹¹ Omoimona bu imiena jaíacania, omoi mullaímana naimie nano jaillamona, omoína naimie canua. ¹² Jusiñamuidi “Jiaino afemo iticue” raillano comecina facadimiena jamai bue isoidimiena itataite; ia Jusiñamuidi “Jiaino afemo iñedicue” raillano comecina facadimiena jamai bue isoiñedimiena itataite.

¹³ Naie facaise Moisés micori llogacinona llofuerainidi fariseuai comini diga illanona, Jesús naimacimo llote:

—Jusiñamui omoína duere finoite. Mareuidinona abi caitadinodomoí. Jusiñamui díbeimo comini illana jitaíñedomoí. Naimie díbeimo omoi illana jiai jitaíñedomoí. Ie muidona Jusiñamuimona duere sefuitomoí. ¹⁴ “Jusiñamuina eo sedadimaci” omoína comini comeciaina facajana jitaídomoí. Ie jira are jidomoí; iadedi iese iñedomoí. Maraiñede rafuena finocabidomoí. Jifuianona feciñuai rana bairocabidomoí. Ie jira

Jusiñamui omoına eo duere finoite. ¹⁵ Damiena omoi dibeimo itatallena, omoi isoi Jusiñamui rafuedo naimie jaillena, diga rafuena finodomoı. Omoi dibeimo illa mei, omoi baifemo omoi einamacı llogacinodo naimie jaillana jitaıdomoı. Omoi diga ıco naimie ua faifite. Comınına uanaiñedicinodo jaitatomoı. Iese omoi illa jira, duere sefuitomoı.

¹⁶ 'Omoi llofuiacino diga comınına canoñedomoı. Mareuidınona abi caitadinodomoı. Raicabitomoı: "Cai lloga uai cai finollena jıai comını uıñollena, Jusiñamui jofomo ite oro mamecina llinotıcaı; iadedı Jusiñamui jofo mamecina cai llınoıa, cai lloga uaina cai finoñenia, caimona mare. Jusiñamuımona duere sefuiñeıtıcaı" raicabitomoı. ¹⁷ Abı uıñoñedomoı. Omoi llofuiacino diga comınına canoñedomoı. Jusiñamui jofomo naie oro jainaiıılla jira, naie orodı mare; iadedı naie oro naie jofo baifemo uaiñede. Abına omoi uıñoñena jira, Jusiñamui omoına duere finoite. ¹⁸ Jıai raitomoı: "Jusiñamuımo faga toıca ocaina jobaisoıllano mamecina cai llınoıa, cai lloga uaina cai finoñenia, caimona mare; iadedı Jusiñamuımo fecaca toıca ocaina mamecina cai llınoıa, cai lloga uaina jaca finoıtıcaı". ¹⁹ Abı uıñoñedomoı. Omoi llofuiacino diga comınına canoñedomoı. Naie jobaisoıllanomo naie ocaina illa jira, naie ocaina mare; iadedı naie ocaina naie jobaisoıllano baifemo uaiñede. ²⁰ Ero, Jusiñamuımo ocaina jobaisoıllano mamecina omoi llınoıa, nainomo ite ocaina mamecina jıai llinotomoı. ²¹ Jusiñamui jofo mamecina omoi llınoıa, Jusiñamui nainomo illa jira, naimie mamecina jıai llinotomoı. ²² Monamo ite ra mamecina omoi llınoıa, Jusiñamui illano nainomo illa jira, nainomona comınına naimie sedaja jira, naimie mamecina jıai llinotomoı. Omoi llua rafuena omoi finoñenia, Jusiñamui omoına duere finoite.

²³ 'Mareuidınona abi caitadinona omoi illamona, omoımo nıa lloıtıcue. Nana omoi illımo ite ramona, nana omoımo ite ucubemona Jusiñamuımo janore jısa fecacabıdomoı. Nana comını omoi isoi illena jitaıdomoı. Mare; iadedı nanoca rafuena jaca finoñedomoı. Jıaıe comınımo omoi comecına facañedomoı. Jıaıe comınına duenaiñedomoı. Omoi lloga uaina finoñedomoı. Nana naie isoıde rafuena omoi jıai fınuı. İena omoi finoñenia, Jusiñamui omoına duere finoite. ²⁴ Abına uıñoñedomoı. Jallecıma jıroracomo ıa, ıena onı faıga; ıa aıllue ra nainomo ıa, ıena cıoıñeno namo gutadomoı. İe isoıde. Omoi llofuiacino diga comınına canoñedomoı. Jusiñamui ıe eo jıtaılla rafuedo comını jaıllana llofueñedomoı. Nanocafueñededo comını jaılla rafuena llofuetomoı. Nanoca rafuedo comını jaıllana llofueñedomoı.

²⁵ 'Omoımo nıa lloıtıcue. Omoi einamacı llogacinodo eo jaidomoı; iadedı omoi comeciına raise finoñedomoı. Eo fııdomoı. Jıfııanıona comını rana bairodomoı. Jeacınona fıncana jaidomoı. ²⁶ Abına uıñoñedomoı. Da pocillos jınafo, da platos jınafo jocodıno isıdomoı. Pocillos jerai, platos jerai jocoñedıno isıdomoı. Omoi abına fınodomoı; iadedı omoi comeciına raise finoñedomoı. Nano omoi comecına raise fıno. Mare rafue fıncana jai. Omoi einamacı rafuemo comecına facañeno; ıa Jusiñamui rafuemo comecına faca. İese omoi jaiñenia, Jusiñamui omoına duere finoite.

²⁷ 'Omoımo nıa lloıtıcue. Marena fınoca raiıfo isıdomoı. Jınofe marena eruaıde; iadedı nainomo mare ra ıñede. Comını illaıci jamai ite. Jai maraiñede. ²⁸ İe isıdomoı. Marena eruaıdomoı; iadedı maredınona

abi eo caitadomoí. Omoí comecíai eo maraisiñede. Omoí comecína raise omoí finoñenia, Jusiñamui omoína duere finoite.

²⁹ 'Omoímo nia lloiticue. Naimacímo biruí omoí comeciána raise facallena, Jusiñamui facaina lloraini micoriai raiafona marena eruaillena finodomoí. Mareuidino micoriai raiafo emodo marena eruaillena finodomoí, ³⁰ raillano: “Cai jaiagai Jusiñamui facaina lloraini micoriaína meinetimaci. Naie facaiseconi iticaídena, naimaci isoi finoñedícaí. Cai jaiagai isoi biruí iñedícaí” raitomoí; ³¹ iadedí omoí lluamona Jusiñamui facaina lloraini micoriai meinetino uruíai omoína uiñotícaí. ³² Omoí jitailla jira, omoí jaiagai isoi jeacinona eo finocana mai jai. Naimaci jai taineca rafuena mai omoí finocana jai. ³³ Omoí maraiñena jira, jaio nairai isidomoí. Ja muidomo iraimona jillobiñeitomoí. Nainomo duere sefuitomoí. ³⁴ Cue rafuena lollena, cue facaina llorainína omoí dine oretaiticue. Cue rafuena eo uiñotinona omoí dine oretaiticue. Cue rafuena omoí raise uiñollena, llofueraini omoí dine jiaí oretaiticue. Dajeriéna meinetomoí. Naimacína coraítomoí. Omoí ofiracomo dajeriéna faitomoí. Diga nairaimo naimacína duere finoítomoí. ³⁵ Abel micori jaie ite. Naimie maremie. Ie ama naimiéna meinete. Naimie facaise-mona omoí jaiagai ailluena mare comínina meinetimaci. Ie mei omoí jaiagai Zacaríana meinetimaci. Naimiedi Berequíás jito. Jusiñamui jofomo Jusiñamui mo toica ocaina jobaisoillano ecimo naimiéna meinetimaci. ³⁶ Uanaicino omoímo lloiticue. Naimacína omoí jaiagai meinia muidona, omoímona Jusiñamui biruí ibana oite. Naimaci isoi maraiñede rafuena finocana jaidomoí. Jusiñamui omoína duere finoite.

Jesús Jerusalémo itinomo llua rafue

(Lc 13.34-35)

³⁷ Jesús llote:

—Jerusalémo itino, omoímo rafuena lloiacadicue. Jusiñamui facaina llorainína jaie meinetomoí. Naimie omoí dine oretaganona noficína fairinuano, naimacína meinetomoí. Omoína cue sedallena, atava ie uruíai sedaja isoi, diga icaiño cue anamo omoína uaidoiacadicue; iadedí omoí dinena cuena jitaiñedomoí. ³⁸ Iemona Jusiñamuidí omoí illanona jai faínonocaide. ³⁹ Cue Moo dine jaiticue. Cue jailla mei, cuena cioiñeitomoí. Ico abido cue bia, omoí comíni cuena lloítimaci: “Jusiñamui oretagamie eo mare. Naimiedi cai Nama” lloítimaci

24

Jesúdi Jerusalémo ite Jusiñamui jofo judaiana llua rafue

(Mr 13.3-23; Lc 17.22-24; 21.5-24)

¹ Jusiñamui jofomona ie llofueoicaigano diga Jesús jino jaidemo, Jesúna nai jofona eruaítatimaci. ² Jesús dinena llote:

—Bie jofona ciódomoí. Uanaicínona omoímo lloiticue. Nana bie jofomo ite noficiái ico judaisite —llote. ³ Ie mei Olivos railla anedu dine rillanona, Jesús naie muidomo raídemo, ie llofueoicaigano naimiémo iena anado llotimaci:

—Jusiñamui jofo judaiana omo jicanoiacadícaí. ¿Niruido iena suite? Caimo llono. O abido billirui iaírei ia, ¿nie isoide rafue suite, o abido billiruina cai uiñollena?

⁴ Uai ote:

—Omoína bie rafuena bu jifueñellena, omoí abína rairuí. ⁵ Ailluena comíni cue mamecido billanona: “Cristodicue” raitimaci. Diga comínina jifueítimaci. Iemona omoí abína rairuí. ⁶ Jobaimiaí illena fidiítomoí;

iadedi jaciruiñeno. Iese suite; iadedi abido nia biñeiticue. ⁷ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo comini aime guitimaci. Diga illanuaimo ñuisañuai suite. ⁸ Iese suia, omoi duere sefuillifue omoimo suite.

⁹ Cuen a ñnoñedino omoina gaitatajanona, omoina meineitimaci. Cue cominina omoi illamona, nana nairaijai omoina enoitimaci. ¹⁰ Naie facaise cue dibeimo itinomona ailluena abido danomo jaitimaci. Iemona duere omoi sefuillena, omoina janoñeitimaci; iadedi omoina enoillamona, omoina llogidoitimaci. ¹¹ Naie facaise diga comini raitimaci: “Jusiñamui facaina llorainidicai”; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci dibeimo itataitimaci. ¹² Jeacino eo comuicana jailla jira, ailluena comini conini isiruiñeitimaci; ¹³ iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁴ Diga cominidi Jusiñamui dibeimo comini ille rafuena nana nairaimo lloitimaci, nana nairaijai iena cacaillena. Ie mei abido biiticue.

¹⁵ Cue lluomo cacarei. Daniel micori Jusiñamui facaina lloraïma. Naimie micoridi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, ¹⁶ naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi. ¹⁷ Jofu emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. ¹⁸ Aneduai dine raire rillena, illimo omoi ia, abido jofomo biñeno, omoi iniroi omoi diga uillena. ¹⁹ Naie rafuemo jillobillena, naie facaise urueside riño duere sefuite. Uruena nia jirode riñodi jiaie duere sefuite. ²⁰ Eo duere sefuiñellena, Jusiñamui omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamui jicano. ²¹ Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci. ²² Naie facaise ianori fo Jusiñamui oñeítana, buna jaca jillobiñeite. Naimie fetocano muidona, naie facaise Jusiñamui ianori fo oite.

²³ Ie facaise omoimo bu raia: “Jadi, Jusiñamui facaina lloraïma benomo birui bairedede. Naimiedi Cristo”, iena ñnoñeno. Jiaimie raia: “Oni batine Cristo birui bairedede”, iena ñnoñeno. ²⁴ Cristona abi caitadino biitimaci. Jusiñamui facaina llorainina abi caitadino jiaie biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²⁵ Ero, bie rafue nia suiñenia, iena omoimo jai lloticue. ²⁶ Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ñnoñeno. ²⁷ Mona borillamona mona jillacidi usere cide. Nana cominimo bairedede. Ie isoide. Cue abido bia, nana comini iena uiñoitimaci. ²⁸ Urujaisai rifaide ramo ofillana uiñua isoi, nana cuena ñnotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

²⁹ Jesús llote:

—Naie duere sefuilla facaise meinoconi jitoma lligaiñoñeite. Fivui jiaie lligaiñoñeite. Monamona ucuai llujite. Nana naie radi jaidisite. ³⁰ Ie mei monamo baireiticue. Ieconí nana nairaijai jarire iitimaci. Jacinaitimaci.

Uillie motodo cue billena cioitimaci. Ebire biiticue. Naimacina cue sedallena, illaimana biiticue. ³¹ Cue jaïenisaina cue ecimona oretaiticue. Ado trompeta ficiretajano, cue fetocano diese naganomona ofitaitimaci.

³² 'Higuera railla riaromona omoi fueo. Bie eniruemona naie riarafirullamona, fiemona raire illana uiñotomoi. ³³ Ie isoide. Bie rafue ico suia, cue billirui iaïrei illana uiñotomoi. ³⁴ Uanaicimona omoimo lloiticue. Nana bie rafue suille facaiseconi bie nairai nia iite. ³⁵ Mona enirue diga fuite; iadedi cue lloga uai jaca suite. ³⁶ Cue abido billirui jaca bu uiñoñede. Jusiñamui jaïenisai iena uiñoñedimaci. Jusiñamui Jitodicue; iadedi cue abido billiruina jiaï uiñoñedicue. Dama cue Moo iena uiñote. ³⁷ Abido cue billirui iaïrei ia, Noé micori facaiseconi itino isoi comini iitimaci. Naimaci duere sefullemo Noé micori facaise itinodi comeciaina facañedimaci. ³⁸ Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facaidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. ³⁹ Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ⁴⁰ Naie facaiseconi menamie illimo danomo iitiiamaiaï. Damie Jusiñamui dine jaite. Jiaimie fiebillanona, Jusiñamuimona duere sefuite. ⁴¹ Mena riño danomo doberitiiñuai. Dañaiño Jusiñamui dine jaite. Jiañaiño fiebillanona, Jusiñamuimona duere sefuite. ⁴² Cue billirui omoi uiñoñena jira, iemo ocuri. ⁴³ Bie rafuemona omoi comeciaina omoi faca. Jofo namadi firiraima nie naiona billena uiñotena, ie rana faifiñellena, ie jofona raise sedade. ⁴⁴ Ie isoi cue billemo ocuri. Monamona ico abido biiticue. Omoi ocuriñena facaisemo riiticue. Ie jira cue billemo nagarui ocuri.

*Jesúdi patrón ie mullaimana ie jofona sedataja llua rafue
(Lc 12.41-48)*

⁴⁵ Jesús llote:

—Cue billena omoi raise cacallena, jiaie rafuedo iena lloiticue. Patrón daje mullaimana ie jofona sedatate. Naie mullaima inogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide. ⁴⁶ Patrón ico abido bia, ie jofona ie mullaima raise sedaia, mullaimari naimie iobillamona, ie mullaima marena iite. ⁴⁷ Iobillamona, patrón ie mullaimana nana ie raruiana sedataite; ⁴⁸ iadedi ie mullaima marañenia, ie comecina facaite: “Cue patrón are biñeite. Naimie lloga uaina finoñeiticue”. ⁴⁹ Ie comecina iese facaja jira, naimie anamo ite mullaima faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁵⁰ Ie ocuriñena facaise ie patrón abido billanona, naimiena duere finoite. ⁵¹ Ie isoide. Cue abido bia, cuena inotinori iobiticue; ia cuena inotinona abi caitadino dine cuena inoñedinona dotaiticue. Nainomo duere sefuillano eetimaci.

25

Jesúdi diez jitañuaina llua rafue

¹ Jesús llote:

—Abido cue bia, Jusiñamui ie cominina sedaite. Cue billemo ocuritinaona sedaite. Naie facaise ite cominidi diez jitañuaimo ite rafue isoidimaci. Naiñaiñuai lamparniaï llivanona, ima ie aina ua

meinomo finoca rafuemo jaiacadimaci. ²⁻⁴ Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci. ⁵ Hima diga ie rafue dine jaillemo ocuridimaci. Hima are biñena jira, inidimaci. ⁶ Daje diberuisse damie ado lluana cacadimaci. Llote: “Jai, naie iimadi jai bite. Mai bi, naimie uicomo naimiemo cai dafaiñillesa”. ⁷ Casillanona, naie jitañiñuai lamparíniai unedimaci. ⁸ Abi uiñoñediñaiñuai dinena abi uiñotiñaiñuaimo jicadimaci: “Farena caimo feca. Cai lamparíniai boacaiñedesa”. ⁹ Uai otimaci: “Fecaacaiñedicai. Omoimo cai fecaiadedi, caimo baiñeite. Omoi jitaia, chinganomo ibajai”. ¹⁰ Naiñaiñuai ibajailla mei, naie iima ride. Naimiemo ocuridiñaiñuai diese naimie diga nainomo guillena, rafuemo jaidimaci. Naimaci fo jailla mei, nase naie iima ibaide. ¹¹ Ie mei naie farena ibajaidiñaiñuai abido billano, raitimaci: “Nase econo”. ¹² Naie iima uai ote: “Uanaicinona omoimo lloiticue. Omoina uiñoñedicue. Econoñeiticue”. ¹³ Ie isoide. Cue billiruina omoi uiñoñena jira, nagarui cuemo omoi ocuri.

Jesúdi patrón ie mullaiaimo ucubena fecaja llua rafue

¹⁴ Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiaie enirue jaiacana jira, ie mullaiaina ie ucubena eenotade. ¹⁵ Damie mo cinco diga ucubena fecade. Jiaimiemo menacubena fecade. Jiaimiemo dacubena fecade. Nagamie ie maijille dinori fecade. Ie mei oni jaide. ¹⁶ Cinco diga ucubena feñotimie jaillanona, iena fecallena, rana ibade. Iemona jiaie cinco diga ucubena ote. ¹⁷ Menacubena feñotimie iena fecallena, rana ibade. Iemona jiaie menacubena ote. ¹⁸ Daucubena feñotimie eniruemo naie ucube eenote. Iena fecallena, rana ibañede. Iemona buena oñede. ¹⁹ Digarui illanona, naie patrón abido bite. Naimaci cuentas siadollena, ie mullaiaina uaidote. ²⁰ Cinco diga ucubena feñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”. ²¹ Patrón uai ote: “Raise marena maijidio. Eo mare mullaimadio. Janore ucube o raise sedaja jira, ona ailluena rana sedataiticue. Cue diga caimare jaca iitio”. ²² Menacubena feñotimie bite. Raite: “Patrón, cuemo menacubena fecadio. Iemona jiaie menacube oticue”. ²³ Naimie patrón uai ote: “Raise marena maijidio. Eo mare mullaimadio. Janore ucube o raise sedaja jira, ona ailluena rana sedataiticue. Cue diga caimare jaca iitio”. ²⁴ Daucubena feñotimie bite. Raite: “Patrón, o riirenana uiñoticue. O mullaiai maijiamona ganacabidio. ²⁵ Ucubena cue fañiñellena ona jaciruiticue. Ie jira eniruemo o cuemo iga ucubena eenoticue. Jai, iena jai abido atidicue”. ²⁶ Patrón uai ote: “Maraiñedio. Rairaidio. Cue mullaiai maijiamona cue ucube uana uiñotio. ²⁷ Bancomo naie ucubena jonetiodena, naie ucubemona jiaie ucube janore uamona, abido cue bia, iena feñoticue”. ²⁸⁻³⁰ Ie mullaiaimo llote: “Naimiemona ie ucubena bairo. Diez ucube illamiemo iena feca. Bie maraiñede mullaia jiti redinomo cuemona oni dota. Nainomo comini duere sefuillanona eeditimaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoina duere finoñellena, cue abido billirui omoi uiñoñena jira, Jusiñamui jitaillacinona finocana omoi jai.

Jesúdi cominina duere finolle llua rafue

31 Jesús llote:

—Omoína nia llofueitícue. Abido cue bia, nana cue jaienisaí diga biitícue. Illaímana íco cue bia, illaíma illa ífomo íitícue. Eo siño uaido biitícue. 32 Cue uicomo nana nairaíai ífitímaci. Toíca llaudaíai sedaraíma íe chivos motomona íe llaudaíai oní fetua ísoí, naimacina fetoitícue. 33 Cue jitaillacínona finodíno díese cue fetuanona, cue nabeimo itataitícue. Cue jitaillacínona finoñedíno díese cue fetuanona, cue jarifebeimo itataitícue. 34 Cue illaímana jira, cue nabeimo ítinomo lloítícue: “Cue Moo omoíri íobillanona, omoína jai caímare ítatate. Cue Moo comínina omoí illa jira, cue sedajanomo maí bi. Nainomo duidomoi. 35 Cue jitaillacínona omoí finuamona navuí aímataitícuemo, cuena ecadomoi. Jiroacadícuemo, jínui cuemo fecadomoi. Omoí nairaí díne cue macaria, cuena omoí uíñoñoeno omoí jofomo cuena feíñotomoi. 36 Ínroinidícuemo, ínroi cuemo fecadomoi. Duidícuemo, cuena canollena, cuena jíbuisaíbídomoi. Cárcelmo íticuemo, cuena canollena, cuena jíbuisaíbídomoi”. 37 Cue jitaillacínona finodíno dínená cuemo jícanoítímaci: “Nama, ¿níruído aímataitíomo, ona ecadícaí? ¿Níruído jiroacadíomo, jínui omo fecadícaí? 38 ¿Níruído ona cíodícaí, caí jofomo ona feíñollena? ¿Níruído ínroína omo fecadícaí? 39 ¿Níruído duidíomo, ona jíbuisaídícaí? ¿Níruído cárcelmo ítíomo, ona jíbuisaídícaí?” 40 Uai oítícue: “Uanaícínona omoímo lloítícue. Cuena ínotínomona jamáí bue ísoídímíena canodomoi, cuena jiaí canodomoi” lloítícue.

41 Íemeí cue jarifebeimo ítinomo lloítícue: “Cuemona oní maí jai. Cue comíníñedomoi. Jai faífidomoi. Duere omoí sefuíllena, íraímo maí jai. Naíe íraí jaca dúíñede. Jusiñamuí dí naina Taífe íena jai finode. Jusiñamuí dí Taífe comíní íena jiaí jai finode. 42 Cue jitaillacínona omoí finoñenamona, navuí aímataitícuemo, cuena ecañedomoi. Jiroacadícuemo, jínui cuemo fecañedomoi. 43 Omoí nairaí díne cue macaria, omoí jofomo cuena feíñoñedomoi. Ínroinidícuemo, ínroi cuemo fecañedomoi. Duidícuemo, cuena canollena, cuena jíbuisaíbíñedomoi. Cárcelmo íticuemo, cue canollena, cuena jíbuisaíbíñedomoi”. 44 Cuemo jícanoítímaci: “¿Níruído aímataitíomo, ona ecañedícaí? ¿Níruído jiroacadíomo, jínui omo fecañedícaí? ¿Níruído ona cíodícaí, caí jofomo ona feíñollena? ¿Níruído ínroinidíomo, omo fecañedícaí? ¿Níruído duidíomo, ona jíbuisaíbíñedícaí? ¿Níruído cárcelmo ítíomo, ona jíbuisaíbíñedícaí?” 45 Uai oítícue: “Uanaícínona omoímo lloítícue. Díga comíní cuena ínotímaci. Naimacímona jamáí bue ísoídímíena omoí canoñena jira, cuena canoñedomoi” lloítícue. 46 Naimaci jaca ísí cacaitímaci; íadedí cue jitaillacínona finodíno cue Moo sedajanomo jaca íitímaci.

26

*Judíuai illaícomíní Jesúsna gaitallena síadua rafue
(Mr 14.1-2; Lc 22.1-2; Jn 11.45-53)*

1 Íe llofueoícaiganona llofuía meí, naimacímo Jesús llote:

2 —Pascua raílla rafue íllena, menaruí fiebide. Íena uíñotomoi. Monamona jaíe cue billamona, ímana jaídícue. Cue fíodáíllena cue Moo cuena oretate. Illaícomíní cuena coraíllena, bíruí cuena gaitaitímaci — llote. 3 Naíe facaísecomí Jusiñamuí díga nanoca ñairainídí, jaíe illaícomíní díga, nanoca ñairáíma jofomo ofídímaci Nanoca ñairáímadí Caífás.

⁴ Jesúna jifuiano gaitallena coniniri siadotimaci. Naimiena meinellena jiaí siadotimaci. ⁵ Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaitañamona, comini cai diga fuiritimaci. Nia sedaiticai.

Jesúmo riño caimare soride ra totaja rafue

(Mr 14.3-9; Jn 12.1-8)

⁶ Betania railla nairaimo Jesús jaillanona, Simón jofomo jaide. Simódi jaie efonaitimie. ⁷ Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. ⁸ Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. ⁹ Iena fecacadena, eo ailluena raifide. Naie ucube dueredinomo fecadena, caimona mare.

¹⁰ Naimaci ñaiana Jesús uíñua jira, naimacimo llote:

—¿Bue ñellena naiñaiñoa jeare ñaitomoi? Mare rafuena cuemo finode. ¹¹ Omoi diga dueredino jaca itimaci; iadedi omoi diga jaca iñeiticue. ¹² Cue abimo bie caimare soride ra naiñaiño totajamona, cue fiodaillirui facaina naiñaiño iese finode. ¹³ Omoimo uanaicinona lloiticue. Ninomo cue mare finoca rafuena bu lloia, naiñaiñoa uibiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue

(Mr 14.10-11; Lc 22.3-6)

¹⁴ Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide. ¹⁵ Naimacimo jicanote:

—Omoimo Jesúsna cue fecaia, ¿niga ucubena cuemo fecaitomoi? — jicanote. Naimaci siadua mei, treinta ucubena naimiemo fecadimaci.

¹⁶ Naie facaiseconimona Jesúna gaitatalliruimo naimie ocuride.

Jesúdi ie fiodaille rafuena llua rafue

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pascua railla rafue ia, siritaga rana guiñedimaci. Dani llomenicon a guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaidio?

¹⁸ Uai ote:

—Jerusalémo omoi jaillanona, omoimo cue llogamiena omoi ciuanona, naimiemo llono: “Cai llofueraima fiodaille facaise iairei ite. O jofomo ie llofueoicaigano diga pascua rafuena finoacade” llono.

¹⁹ Ie muidona ie llofueoicaiganodi ie lluaana finodimaci. Pascua railla rafue guille finodimaci. ²⁰ Nairui jitoma ana itemo, Jesús ie doce llofueoicaigano diga nainomo guisaide. ²¹ Naimaci mesamo guitimacimo, Jesús llote:

—Omoimona damie cuena gaitataite —llote. ²² Iena cacajanona, eo sunaitimaci. Damierie naimiemo jicanoside:

—¿Cuena ñaitio?

²³ Uai ote:

—Omoimona damie bie platomo cue diga llomenico diga mutade. ²⁴ Jusiñamui facaina lloraima cuega isoi, monamona jai billamona

fiodaiticue; iadedi cuena gaitataitimie eo duere sefuite. Naimie jeiciñegadena, cuemona mare.

²⁵ Jesúsna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

²⁶ Naimaci nia guitimacimo, llomeniconna Jesús llinuanona, Jusiñamuimo iobillacinona fecaja mei, llomeniconna tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

²⁷ Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoi jiro. ²⁸ Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi comeci. ²⁹ Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue. —Iena jirodimaci.

Jesúdi Pedro naimiena januana llua rafue

(Mr 14.26-31; Lc 22.31-34; Jn 13.36-38)

³⁰ Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. ³¹ Jesús naimacimo llote:

—Cuemo suille rafue muidona, ja naio cuena fañonocaitomoi. Jusiñamui facaina lloraíma micori iena jaie cuega: “Toíca llaudaíai sedaraímana meinetaiticue. Naimie toíniai uaficaída jaitimaci” cuega. Naimie micori caina cuete. ³² Ero, fiodaillamona cue jillua mei, omoi uicodo Galileamo jaiticue, nainomo omoi diga dafaiñillena.

³³ Pedro uai ote:

—O finolle rafue muidona nana jiaíno ona fañonocaia, ona jaca fañonocaiñeiticue.

³⁴ Jesús dinena raite:

—Uanai omo lloiticue. Ja naio iitava nia ñaiñenia, dacaiño amani cuena janoitio.

³⁵ Pedro uai ote:

—O diga cue fiodaiadedi, ona janoñeiticue.

Nana ie llofueoicaigano daje uaido jiai raitimaci.

Jesúdi Getsemanímo Jusiñamuimo jia rafue

(Mr 14.32-42; Lc 22.39-46)

³⁶ Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Benó ana raí. Omoímona oni baí janore jaiticue. Cue Moo diga ñaiñillena, jaiticue.

³⁷ Pedrona uite. Zebedeo ie jito iaímaiaína jiai uite. Naimie sunaicaide. Ie comeci uri iñede. ³⁸ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁹ Naimie janore baí jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedi cue comeci jitail-lacinona finoñeno. Cuemo o jitaillacino fino —jüde. ⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia iñedemo. ⁴¹ Inñeno. Taife ramo omoína fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci daní ocuiñoñede. Ie muidona Jusiñamuimo jii, omoína naimie ocuiñotallena —llote. ⁴² Ie mei dane jüllena jaide. Raite:

—Ore Moo, o jitaia, cue duere sefuillamona cuena jillota. Cue fiodail-lana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi lliñoilla jira, naimaci inisitemo ride. ⁴⁴ Abido jaillanona dane jüde. Ailli daje isoiduaido jüde. ⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fiodaiticue. Cuena ja gaitajanona, Jusiñamui jitailla jira, naimiëna inoñedino anamo ja iiticue. ⁴⁶ A naidacai. Maiña. Cue gaitaitimie jai bite.

Jesúna gaitalle rafue

(Mr 14.43-50; Lc 22.47-53; Jn 18.2-11)

⁴⁷ Jesús nia ñaitemo, ieconi Judas micorí bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamací dinena jiai bitimaci. ⁴⁸ Jesús dine naimaci nia riñenia, Judas micorí naimie diga bitinomo jai llote:

—Jesúna omoi uifñollena, naimiëna libanoiticue. Ie mei naimiëna gaita —llote. ⁴⁹ Jesús dine naimaci rillanona, Judas micorí Jesús dine raire jaide. Naimiëna uaidote:

—Maestro, jai biticue. —Ieconi naimiëna llibanote. ⁵⁰ Jesús dinena raite:

—¿Bue ñiaibitio?

Ie mei Judas micorí diga bitinodi Jesúsna gaitadimaci. ⁵¹ Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaima ie mullaima jefona jaibonote. ⁵² Jesús naimiemo llote:

—O fuiriacania, o jiai fiodaitio. O lloebi dane eeno. Cue riiduanona, fuiriñeno. ⁵³ Cuena riidollena, cue Moomo cue jicaia, eo ailluena jaienisai cue dine naimie oretaitie; ⁵⁴ iadedi iese cuena riidoia, Jusiñamui facaina lloraini micoriai cuegafuiai suiñeite. Cue fiodaille rafuena cuetimaci —llote. ⁵⁵ Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Fñiraimadicueta cuena omoi gaitajaibilla. Jusiñamui jofomo nagarui llofuecabiticue; iadedi cuena gaitañedomoi. ⁵⁶ Nana bie rafue suide, Jusiñamui facaina lloraini micoriai cuegafuiai suillena —llote. Ie facaise nana naimie llofueoicaigano naimiëna fañonocaillano, aisidimaci.

Jesúdi judíuai illaicomini dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesúsna gaitadinodi Caifás jofomo Jesúsna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micorí llogacinona llofueraini ofidimaci. Einamací jiai ofidimaci.

⁵⁸ Jesús jinafona Pedro aarena jaide. Caifás jofo nairaibirimo jaide. Naie rafue fuiduana naimie uiñollena, nainomo ite jofomo maijiraini diga raide.

⁵⁹ Naimiena meinellena, nana naie illaicomini Jesúmo nicino illana uiñoiacadimaci. ⁶⁰ Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúna ñaitimaci; iadedi taino llotimaci. Ie mei menamie bitiaimaiai.

⁶¹ Raitiaimaiai:

—Bimie llote: “Jusiñamui jofona judairedicue. Judaia mei, darui amani illanona, iena dane finoredicue” —lloitiaimaiai.

⁶² Jusiñamui diga nanoca ñairaima Jesúmo jicanote:

—¿Niese iaimaiai uai oitio? ¿Nie isoide rafue ona llogidotiaimaiai?

⁶³ Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, unaicinona cai lloñenia, caina duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

⁶⁴ Jesús dinena uai ote:

—Jii, naimiedicue. Iena raise llotio. Monamona jaie cue billamona, imana jaidicue; iadedi ico jiairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiai cioitimaci.

⁶⁵ Iena cacajanona, naimiemonna Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitañedica. Ie ñaia mona dama naimie abina llogidote. ⁶⁶ ¿Niese naimiena raitomoi?

Jiai illaicomini dinena uai otimaci:

—Naimie fiodaillesa.

⁶⁷ Ie mei naimie uiecona tuallaitimaci. Naimiena ducoidimaci. Jiai bucoidimaci. ⁶⁸ Raitimaci:

—O Cristodiodena, ¿bu o bucoia? caimo llono.

Jesús uai oñede.

Pedrodi Jesúna janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofo nairaibirimo ite. Naie jofo nama mullaño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite. ⁷⁰ Nana nainomo itinomo Pedro llote:

—O lluana uiñoñedicue.

⁷¹ Nase fuemo Pedro jaidemo, naimiena jiaie mullaño ciuanona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uiñote. O llogamiena uiñoñedicue.

⁷³ Dally illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

⁷⁴ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúna uiñoñedicue. —Ieconí itava ñaite.

⁷⁵ Iena cacajano, Pedro Jesús lluana uibiñote. Jaive Jesús Pedromo

llote: “Itava nia ñaiñenia, dacaiño amani cuena janoitio” llote. Iena uibiñuanona, Pedro jino jaillano, sure eede.

27

Pilato dine Jesús illa rafue

(Mr 15.1; Lc 23.1-2; Jn 18.28-32)

¹ Monaidemo, nana Jusiñamui diga nanoca ñairainidi, nana einamaci diga, Jesúna siadotimaci. Naimiena meinellena siadotimaci. ² Siadua mei, Jesúna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fiodailla rafue

³ Judas micori Jesúna jai gaitatate. Naie illaicomini Jesúna meiniana llua naimie micoridi uiñuamona, ie comeci iuaina meidote. Illaicominimo ie treinta diga ucubena abido atide. ⁴ Raite:

—Jesús marañede rafuena jaca finoñede. Naimie fiodañeite. Naimiena cue gaitatajmona, marañedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵ Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaiio llirinote raona. ⁶⁻⁷ Jusiñamui diga nanoca ñairaini naie ucubena irai mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicaí. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci. ⁸ Naie ucube muidona damie fiodailla jira, birui naie enirue mamecidi dirue ie enirue. ⁹ Iemona Jeremías micori jaie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damierie railla jira, naimiena meinellena, treinta ucubena fecaitimaci. ¹⁰ Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

Pilato dine Jesús illa rafue

(Mr 15.2-5; Lc 23.3-5; Jn 18.33-38)

¹¹ Pilato railla gobernador uicomo Jesúna atia mei, Pilato Jesúmo jicanote:

—¿Judíuai comini illaimadio?

Jesús uai ote:

—Jii. Raise llotio.

¹² Ie mei Jusiñamui diga nanoca ñairainidi, einamaci diga, naimiena llogidote; iadedi naimie dinena uai oñede. Ie abina riidoñede. ¹³ Ie muidona Pilato naimiemo llote:

—Diga rafuena ona llogidotimaci. ¿Ñiese uai oñedio?

¹⁴ Jesús nia uai oñede. Ie jira Pilato uainicaide.

Pilatodi Jesús fiodaillana llua rafue

(Mr 15.6-20; Lc 23.13-25; Jn 18.38-19.16)

¹⁵ Naga año pascua railla rafue facaiseconi cárcelmo itinomona Pilatodi comini jicacamienna jamai jino orede. ¹⁶ Bie año cárcelmo Barrabás

raillamie ite. Naimie mameci eo are soride. ¹⁷ Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiai ite. Naimiedi Cristona jiai mameciredede.

¹⁸ Iese jicanote; iadedi naimiedi Jusiñamui diga nanoca ñairaini Jesúri uradoillana uifote. Naimaci Jesúna meineiacanana jiai uifote. ¹⁹ Ie maijiracomo naimie nia illanona, naie facaise Pilato ai naimie dine rabe orede. Cuete: “Bimiedi marañede rafuena jaca finoñede. Naimiena duere finoñeno. Jaive naio cue nicairillano, naimie muidona cue comeci jarire ite”. ²⁰ Ailluena comini Pilato dine ofillanona, Jusiñamui diga nanoca ñairainidi, einamaci diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —llotimaci. ²¹ Comini ofilla mei, naimacimo Pilato dane jicanote:

—¿Nimie cue jino oretajana jitaidomoi?

Uai otimaci:

—Barrabás.

²² Pilato dinena jicanote:

—¿Niese Jesúna cue finuana jitaidomoi? Naimiedi Cristona jiai mameciredede.

Nana uai otimaci:

—Naimiena cruzmo corai.

²³ Pilato dane jicanote:

—¿Nie isoide marañede rafuena finode?

Naimaci dinena ado ibi llonoidimaci:

—Naimiena corai.

²⁴ Jesúna jino oretajana jitañedimaci. Iena Pilato uifnuamona, comini jai uri iñenana naimie cianona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

²⁵ Uai otimaci:

—Dama iesede. Naimie fiodaite cai muidona. Jiai cai urui ai muidona.

²⁶ Ie mei Pilatodi Barrabás naimaci jitailla jira, jino orede; iadedi Jesúna sechedotajanona, naimiena coraillena orede. ²⁷ Dajerie soldaduai di Pilato jofomo Jesúna uite. Nana soldaduai nainomo ofdimaci. ²⁸ Naimie iniroi duiñuano, naimiemo jiduirede iniroina jita dimaci. ²⁹ Eecuaimona niga nuiciraina naimie ifogimo jita dimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judiui illaima. —Iese raillanona naimiena jifanododimaci.

³⁰ Naimiena tualla itimaci. Naimie onollimo ite radosina naimaci llinocaida, naiedo naimie ifogina buta-butadimaci. ³¹ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jita dimaci. Ie mei naimiena coraillena oni uitimaci.

Jesúna coraia rafue

(Mr 15.21-32; Lc 23.26-43; Jn 19.17-27)

³² Jerusalémona naimaci jaillanona, Cirene railla eniruemona bitimiemo dafaifidimaci. Naimie mameci Simón. Naimiena Jesús uiga cruzna rocatatimaci. ³³ Gólgota raillanomo jaidimaci. Ifocoraia eruailla jira, iese mameciredede. ³⁴ Nainomo rillanona, ie abi isirena cacaiñellena, vinomo erirede rana faianona, naimiemo fecadimaci; iadedi iena naimie facajano, iena jiroñede. ³⁵ Naimie coraia mei, cruzna naidania mei, naie

soldadaui naimie iniroi daní coninimo fecasite. Naie iniroi bu uille raillanona uñollena, jifanododimaci. ³⁶ Ie mei ana raidimaci, naimiemo eruaillena. ³⁷ Naimie ifogi afebeimo ie llogiduafluena jonetimaci. Iese cuela: “Bimiedi Jesús. Judíuái comini illaíma”. ³⁸ Ie mei mena firiruide iaímaiaína coraidimaci. Damie Jesús nabeimo coraíca. Jiaímie Jesús jarifebeimo coraíca. ³⁹ Naisodo jamai jaidino Jesúsna mameritimaci. Mamerillamona, ifogiaina jaididimaci. ⁴⁰ Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoiticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

⁴¹ Ie facaise Jusiñamui diga nanoca ñairaini naimiema mameritimaci. Moisés micori llogacino llofueraíni naimiema jiai mameritimaci. Eina-maci naimiema jiai mameritimaci. Raitimaci:

⁴² —Jiaie cominina jillotate; iadedi dama naimie abina jilloitanide. Naimiedi cai judíuái comini illaíma raillamiedena, cruzmona naimie ana niade billasa. Ie mei naimiema inoiticaí. ⁴³ “Jusiñamui Jitodicue” naimie railla jira, naimiedi Jusiñamuina ja inotena, Jusiñamui jitaia, Jusiñamui naimiema jillotaite. —Iese naimiema mameritimaci. ⁴⁴ Naimie diga coraíca iaímaiaí daje isoi naimiema mameritiaímaiaí.

Jesús fiodailla rafue

(Mr 15.33-41; Lc 23.44-49; Jn 19.28-30; Heb 9)

⁴⁵ Jitoma naidai itemona, daje amani horas mona jitibicaide. ⁴⁶ Ie meinomo judíuái railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena faínonocaidio?” raite.

⁴⁷ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloráima Elíana uaidote —raitimaci. ⁴⁸ Naimacimona damie jarire jaillanona, fibecode ramo vinona faite. Radosimo jilillano jirollena, naimiemo a fecade. ⁴⁹ Ieconí jiaíno raitimaci:

—Éna nai. Dallu seda. Elías naimiema jilloitajaíbillena sedaiticaí.

⁵⁰ Ieconí Jesús dane ado cuirioita, fiodaite.

⁵¹ Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconí ñuisaño suide. Iemona nofie oni bojode. ⁵² Diga raíafuaí econote. Jesús jillua mei, raíafomona, fiodaillamona, ailluena Jusiñamuina inotinodi jillodimaci. ⁵³ Ie mei Jerusalémo naimaci jaillanona, diga comini naimacina ciodimaci. ⁵⁴ Nainomo ite capitán, ie soldadaui diga, Jesús fiodaillana eruaidimaci. Ñuisaño ñuillana cacadimaci. Nana suide rafuena cíanona, eo jacinaillamona, naimie raite:

—Uanai bimiedi Jusiñamui Jito.

⁵⁵ Ailluena riñoniaí naie rafuena aarena ciodimaci. Naimiema canollena, Galileamona Jesús diga navui bitimaci. ⁵⁶ Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruaí ei jiai ite.

Jesús raíafomo jonia rafue

(Mr 15.42-47; Lc 23.50-56; Jn 19.38-42)

⁵⁷ Jitoma ana itemo, eo ucuberedimie Pilato dine jaide. Naimiedi Arimatea nairaí imie. Naimie mameci José. Jesús dibeimo jaidimie. ⁵⁸ Jesús abina jcállena, Pilato dine jaide. Pilato “Jee” raillanona, Jesús abina naimie ollena llote. ⁵⁹ Ie mei Jesús abina cruzmona ana José

uanona, jeanide mare userede iniroi diga naimie abina ferinote. ⁶⁰ Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide. ⁶¹ María Magdalena raiafo uico dine jiaie María diga rainadatiainuui.

Soldaduai Jesús raiafo sedaja rafue

⁶² Ie areruido, pascua railla rafue illarui, dajerie judiuai illaicomini Pilato dine jaidimaci. ⁶³ Raitimaci:

—Ero, naie abi caitadimie nia fodañenia, navui llote: “Cue fodaillamona, darui amani illanona, jilloiticue”. ⁶⁴ Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi ari oi raillano. Naimie abina naimaci fianona lloitimaci: “Naimie jai jillode”. Iese suia, cominina eo jifueitimaci.

⁶⁵ Pilato uai ote:

—Soldaduai omoïdo oreiticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise ibaidimaci. Naiena sedallena, soldaduaïna nainomo faïnonocaidimaci.

28

Jesús fodaillamona jillua rafue

(Mr 16.1-8; Lc 24.1-12; Jn 20.1-10)

¹ Sábado fuilla mei, monaïcania, María Magdalena, jiaie María diga, raiafona jibuisaidiainuui. ² Ieconï ñuisaño suide. Monamona billanona, Jusiñamui jaienici raiafomo ibaica noficina oni ñuitade. Naie noficimo raide. ³ Eo queniredena eruaide. Naimie iniroi eo userede. ⁴ Nainomo ite soldaduai naimiena eo jacinaillamona, abi docaidimaci. Iemona fodaïtino isoi dallu itimaci. ⁵ Ie facaise naie jaienicidi dinena naie riño iaïñuaimo llote:

—Jaciruiñeno. Coraica Jesúna omuiño jenuana uiñoticue. ⁶ Naimie bene iñede. Naimie llua isoi, fodaillamona naimie jai jillode. Naimie ifo jeraimo billano mai jibuisaïbi. ⁷ Ie mei ie llofueoicaigano dine raïre omuiño jai. Fodaillamona naimie jilluana naimacimo llono. “Galileamo omoï uicomo naimie jaite” llono. Bie rafue omuiño jai lloticue —llote. ⁸ Ie jira raiafomona rajicaïllanona, eo iobïllanona, raïre jaidiainuui. Ie llofueoicaigano dine aisidiainuui. ⁹ Ie llofueoicaigano dine iaïñuui nia riñenia, Jesús iaïñuaimo dafaiïllano, raite:

—Itomuiño. —Naimie dine iaïñuui rïllanona, naimiena sedallena, naimie eïllina llinotiainuui. ¹⁰ Jesús dinena raite:

—Jaciruiñeno. Cue llofueoicaiganomo llono: “Galileamo jai. Nainomo omoina cioiticue” llono.

Soldaduai raiafona sedademo suide rafue

¹¹ Jaidiainuaimo, nainomo ite soldaduaïmona dajerie Jerusalémo jaide, nanoca Jusiñamui diga ñairainimo nana naimacimo suide rafue llollena. ¹² Iena cacajano, einamacï diga iena siadotimaci. Ie mei naie soldaduaïmo ucubena fecadimaci. ¹³ Raitimaci:

—Jiaie cominimo llono: “Cai inia mei, ie llofueoicaigano ie abina fïano uitimaci” llono. ¹⁴ Iena cai gobernador fidiïa, naimie diga ñaiticai, omoina naimie duere finoñellena —raitimaci. ¹⁵ Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

Jesús ie llofueoicaiganomo iraicaiño lloga rafue

(Mr 16.14-18; Lc 24.36-49; Jn 20.19-23)

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci. ¹⁷ Naimiena naimaci ciuanona, naimiena sedadimaci; iadedi dajerie Jesús jilluana raise nia inoñedimaci. ¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. ¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza. ²⁰ Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

MARCOS JESUCRISTO ENRUEMO ILLA RAFUE CUIAFUE

*Jofue iñenanomo Juan Bautista micori illa rafue
(Mt 3.1-12; Lc 3.1-9, 15-17; Jn 1.19-28)*

¹⁻² Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micori Jusiñamui facaina jaie llua mona, Juan Bautista micori llofuellena llote. Iena suillamona, Jesucristo enruemo ite rafue tainede. Iena nano lloiacadicue. Isaías micori cuete:

“Ero, o uicodo cue rafuena lollena, damiena oretaiticue” Jusiñamui raite.

³ Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote. Naisona llote; iadedi naimie uaina naimaci feiñollena, naimaci comeciái marena finuana ñaite.

⁴ Isaías micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide. Cominina dafaiña, naimacimo llote:

—Omoi jeacinona fainonocaida, Jusiñamui dibeimo omoi comeciái iuailai meido. Iemona omoi jeacinona feitaite. Omoi comeciái iuailai omoi meidoia, cominina iena uiñotallena, mai omoi bautizallomoi.

⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fue mona jai jaisoidimaci. Jusiñamui naimaci jeacinona naimaci llua meino, naimacidi Juan micori bautizaga.

⁶ Juan micoridi camello itiraiai ie nilla iniroina jítade. Igoi iena ie moilligaina jítade. Fioduaina rite. Ciifona mete. Jamai rana guite.

⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue. ⁸ Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

*Jesús bautizaja rafue
(Mt 3.13-17; Lc 3.21-22)*

⁹ Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúsdi Juan bautizaga. ¹⁰ Bautizaja mei, jinui mona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode. ¹¹ Monamona Jusiñamui llote:

—Cue isiruiga Jitodio. Ori iobidicue.

*Jesúna Taife ramo faia rafue
(Mt 4.1-11; Lc 4.1-13)*

¹² Jesús bautizaja mei, Jusiñamui Joreño jofue iñenanomo naimiena uite. ¹³ Comini nainomo iñede. Difai ocainaiái itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

*Galileamo Jesús illa rafue
(Mt 4.12-17; Lc 4.14-15)*

¹⁴ Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide.

¹⁵ Llote:
—Jusiñamui birui omoina sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fainonocaida, omoi comeciai iuaina meido. Bie rafuena mai omoi ñno.

*Ie llofueoicaigano jaillena, Jesúsdi nagaamagamiëna fetua rafue
(Mt 4.18-22; Lc 5.1-11)*

¹⁶ Jiairuido Galilea railla jorai fuemo Jesús macaritemo, menamiëna ciode. Naga ie ama iaimaiai. Damie Simón. Jiaimie Andrés. Llojjina fairaima iaimaiai. Iese jaca naie iaimaiaidi maijuiddiaimaiai.

¹⁷ Iaimaiaimo llote:
—Cue diga omico jaoicaillena, cue diga mai bi. Cue llofueganona omico jaillena jitaidicue. Lliciana birui ocabitomico; iadedi cominina oitomico, cue dibeimo naimaci illena.

¹⁸ Iena cacajanona, ieconi iaimaiai llojjina fainonocaida, naimie diga jaidiaimaiai. Ie llofueganona jaillena, jaidiaimaiai. ¹⁹ Lliai bai Jesús jaidemo, jiaie menamiëna ciode. Naga ie ama iaimaiai. Damie Jacobo. Jiaimie Juan. Iaimaiai moodi Zebedeo. Botemo iaimaiai llojjina sigaidiaimaiai. ²⁰ Jesús iaimaiaina uaidote, ie llofueganona jaillena. Ie maijiraini diga iaimaiai moona fainonocaida, botemona ari billanona, Jesús diga jaidiaimaiai.

*Jesúdi Janaba anamo itimie jillotaja rafue
(Lc 4.31-37)*

²¹ Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofue. ²² Moisés micori llogacino llofueraini isoi llofueñede. Illaima uai isoi naimie llofuia jira, nainomo ite comini naimie llofuiamona rajjicaidimaci. ²³ Janaba anamo illamie nainomo ite. ²⁴ Jesús llofuiana cacaita, Janabadi ñimana ado cuirioitate:

—Odi Nazaret ie Jesús. ¿Bue ñeacadío cai diga? Caina duere finuaibidío. Ona uñoticue. Odi Jusiñamui ie mare fetocamiedio.

²⁵ Jesús naimiëna lletade:

—Llicai. Naimiemona oni jai.

²⁶ Janaba naimiëna docaitajanona, ado cuirioillanona, naimiemona oni jaide. ²⁷ Iena cñuanona, nana nainomo itino rajjicaidimaci. Coniniri siadotimaci:

—¿Ñiese ite? Bimie jiaie uaido llofue. Janabamo naimie llua mei, ñimamona Janaba oni jaide. Janaba Jesús uaina ñnote.

²⁸ Iemona nana Galilea eniruemo Jesús mameci are soride.

*Jesús Pedro jifaiñona jillotaja rafue
(Mt 8.14-15; Lc 4.38-39)*

²⁹ Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiaide. Jacobo, Juan diga jiai fo jaide. ³⁰ Ie facaise Simón jifaiño duide. Abi cuaride. Nainomo itino Jesúsno naiñaiño duillana llote. ³¹ Iena cacajanona, naiñaiño dine jaillanona, Jesús naiñaiño onollina llinote. Naiñaiñona naidacaitade. Ieconí abi cuarilla fainonocaide. Guille finuanona, ie jofomo itinona ecade.

Jesúdi ailluena duidinona jillotaja rafue

(Mt 8.16-17; Lc 4.40-41)

³² Navuida, jitibicaidemo, Jesús dine comini ailluena duidinona atidimaci. Janaba anamo itinona jiai atidimaci. ³³ Nana Capernaum comini naie jofu nasemo ofidimaci. ³⁴ Jesúdi diga duicono ailluena duidinona jillotate. Ailluena comini Janaba anamona jillotate. Naimiena jananiai uifua jira, Jesús naimaci ñaiana rairuide.

Galileamo Jesús llofuia rafue

(Lc 4.42-44)

³⁵ Ie areruido nia monañenia, Jesús casillanona, Capernaumona comini iñenanomo Jesús jaide. Nainomo Jusiñamui jide. ³⁶ Monaia, casidemo, jofomo Jesús iñena jira, Simón, ie nabaiñai diga, Jesúsna jenuaide. ³⁷ Baillanona, raite:

—Nana comini ona jenodimaci.

³⁸ Jesús uai ote:

—Jiaie nairaii dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

Jesúdi efonaitimiena jillotaja rafue

(Mt 8.1-4; Lc 5.12-16)

⁴⁰ Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaialedi, cuena jillotaredio.

⁴¹ Naimiena duenailamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadícue. Mai o jillo. ⁴² —Ieconí naimie jillode. ⁴³ Ie facaise Jesús naimiena oretaiacanano, naimiemo riire llote:

⁴⁴ —O jilluana bumo lloñeno; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uifollena, naimiemo o abina acatajai. Moisés micori jaie lloga rana Jusiñamui feca.

⁴⁵ Iese Jesús naimiemo llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoñede; ia comini iñenanomo jaisoide. Iese jaisoide; ia naganomona naimie dine biñoidimaci.

2

Jesús tísitaitimiena jillotaja rafue

(Mt 9.1-8; Lc 5.17-26)

¹ Nigarui illanona, Capernaumo Jesús dane abido ride. Comini iena fidianona, ² ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofue. ³ Cominina Jesús llofuetemo, naimie dine nagaamagamie ie bñramo bñde tísitaitimiena atidimaci. ⁴ Ailluena comini illa jira, Jesús dine naimaci rinidimaci. Naie jofu bñbanilla jira, jofu emodomo a jaidimaci. Jofu beicimo ite tidabacuido a jaidimaci. Jofu emodo econuano, Jesús ecimo naimiena ie bñramo bñde diga, rao diga, ana ñuitadimaci. ⁵ Iena Jesús ciuanona, tísitaitimie jilluana naimaci iñuana Jesús uifote. Tísitaitimie llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

⁶ Nainomo itinomona damierie Moisés micori llogacinona llofueraini nainomo raidimaci. Comecina facadimaci: ⁷ “¿Ni ese bimiedi iese llote? Dama Jusiñamui jeacina dotarede. Bimie Jusiñamuifede; ia Jusiñamui ifomo iacade. Jusiñamuina jai jeare ñaite”. ⁸ Naimaci comeciai facajacina Jesús uñuanona, naimacimo jicanote:

—¿Bue ñellena omoi comeciaina iese facadomoi? ⁹ Bimiemo: “O jeacina jai oni dotadicue” cue lloia, cue uai siñonana uññoñeitomoi; ia bimiemo: “Mai naidacaillanona, o bira ferinocaida, mai macari” cue lloia, cue uai siñonana uññoitomoi. ¹⁰ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uññollena, tsitaitimiemo lloiticue: ¹¹ “Mai naidacai. O bira ferianona, o jofomo mai jai”.

¹² Iese naimie raillamona, tsitaitimie jillode. Naidacaida, ie bira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacina fecadimaci. Raitimaci:

—Bie isoide siño comena jaca cioñediacai.

Jesúdi Levína fetua rafue

(Mt 9.9-13; Lc 5.27-32)

¹³ Jiairuido jorai fuemo Jesús dane jaide. Ailluena comini naimie dine ofillanona, naimacina llofuede. ¹⁴ Llofuia mei, Jesús bai macaritemo, Leví raillamiena ciode. Levídi Alfeo jito. Gobierno ucube ouillanomo naimie maijuide. Nainomo raidena Levína ciode. Naimiemo llote:

—Cue llofuegamiena o jaillena, cue diga bi. —Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci. ¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúsna cianona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci. ¹⁷ Iena cacajano, Jesús llote:

—Ecairedinodi médicono jitaiñedimaci; ia duidinodi médicono jitaídímaci. Ie isoide. Mareuidino cuena jitaiñedimaci; ia maraiñedino cuena jitaídímaci. Jusiñamui díbeimo mareuidinona uaíbiñedicue; iadedi maraiñedinona uaíbiticue. Omoimona maraiñedino diga nabairiticue; ia naimacina uaíbiticue.

Jesúmo comini guiñenana jicanua rafue

(Mt 9.14-17; Lc 5.33-39)

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací llua isoí, Jusiñamuina naimaci raise iobitallena, guiñenaruillai illa facaiseconí Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano

iedo jiai jaidimaci; ia o llofueoicaigano jaca guitimaci. ¿Bue ñellena cai einamací rafuedo jaiñedimaci?

¹⁹⁻²⁰ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jillíñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ²² Jacagomona finoca bolsa como finoca vino joneñega. Jonegadana, mairiñena jira, sirillamona igoi raire cuararite. Vino faifite. Igoi jiai faifite. Como finoca vino comogomo jonelle. Iemei iena faifiñeite. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai —lote.

Sábadoruimo Jesús llofueoicaigano maijia rafue
(Mt 12.1-8; Lc 6.1-5)

²³ Jiairuido sábadoruimo Jesús, ie llofueoicaigano diga, trigo illa illi motodo joide naison jaide. Ie llofueoicaigano trigona tijiano, guicana jaidimaci. ²⁴ Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

²⁵ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jai finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jalla mei, Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede. ²⁷ Jusiñamui sábadona finuamona, sábadu ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi. ²⁸ Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

3

Jesúdi onollina idisarodimiena jillotaja rafue
(Mt 12.9-14; Lc 6.6-11)

¹ Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite. ² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoa, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode. ³ Onollina idisarodimiemo Jesús llote:

—Cue ecimo mai bai bi.

⁴ Jesús nainomo itinomo jicannote:

—¿Nie isoide rafue sábadoruimo finuadi mare? Bimie birui cue jillotadadi, birui mare rafuena finodicue. Cuená birui omoi meineiadedi, birui marañede rafue finodomoí. Sábadoruimo, ¿nie isoide rafue finuana rairuidomoí?

Comini dinena uai oñedimaci. ⁵ Naimie uaina naimaci inoñena jira, riicaillanona, Jesús naimacimo erodate. Duidimie mo lote:

—O onolli mai oni ñuita.

Iena oni ñuitajamona jillode. ⁶ Iena ciuanona, fariseuai jino jaidimaci. Naimiena meinellena, illaíma Herodes dibeimo itinona baillanona, naimaci diga coniniri siadotimaci.

Jorai fuemo Jesúsdi ailluena cominina llofuia rafue

⁷ Naie nairaimona jorai fuemo Jesús, ie llofueoicaigano diga, oni jaide. Galilea railla eniruemona ailluena comini naimie dine bitimaci. Judeamona jiaíno bitimaci. ⁸ Jerusalémona, Idumeamona, Jordán ruicafebellemona, Tiro jinofemo ite eniruemona, Sidón jinofemo ite eniruemona ailluena bitimaci. Nana naimie siño finoca rafuena cacajanona, naimiena cioacadimaci. ⁹ Comini naimiena meetasii raillanona, ie llofueoicaiganomo daje botemo naimie jaillena eenogana lote. ¹⁰ Ailluena duidinona naimie jai jillotaja jira, nana duidino naimie mo riacadimaci. Jilloillena naimiena jetaacadimaci. Iemona naimie illa bote eenuana jitaide. ¹¹ Jananiai anamo itino Jesúsna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui jítodio. ¹² —Ia Jesús naimiena naimaci lluaná rairuide.

Jesúdi ie doce llofueoicaiganona fetua rafue

(Mt 10.1-4; Lc 6.12-16)

¹³ Naie facaise anedumo Jesús jaide. Ie jitaillano diese naimie dine uaidote. Naimie dine billa mei, ¹⁴ doce digamiena fetode. Naimie diga jaicabillena, naimacina fetode. Ie rafuena lollena, naimacina oretaiacade. ¹⁵ Janaba anamo itinomona Janabana oni oretallena, ie uai naimacimo ite. ¹⁶ Iese mameciredimaci: Simón; naimie mameci jiaicidi Jesús jítaca Pedrona. ¹⁷ Jacobo, Juan; iaímaiaí Zebedeo jito iaímaiaí. Jiaíe mameci iaímaiaína Jesús jonete Boanergesna. Naie mameci oni dobaíñuamona mona guruama. Iciriruilla jira, iese mamecirediaímaiaí. ¹⁸ Andrés, Felipe, Bartolomé, Mateo, Tomás, jiaíe Jacobo; naimiedi Alfeo jito. Tadeo, jiaíe Simón; naimiedi cananista comini facaisemo duide. ¹⁹ Judas Iscariote micori; naimiedi Jesúsna gaitatatimie.

Fariseuai Jesúsna jeare ñaia rafue

(Mt 12.22-32; Lc 11.14-23; 12.10)

²⁰ Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide. ²¹ Naimiena ie comini fidiano: “Naimiedi jai uarico isoi iacade” raillanona, comecina facadimaci. Ie jira naimiena ie ei jofomo isaíbiacadimaci. ²² Jerusalémona Moisés micori llogacinona llofueraíni naie facaise billanona, raitimaci:

—Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúsdi Janabana oni oretate —raitimaci.

²³ Naimaci raillana naimie cacajanona, naimie dine Jesús naimacina uaidote. Lote:

—Janaba díbeimo Beelzebú illamona, dama ie abina oretanide. ²⁴ Ero, daje isoi comeciaina lloiñenamo daje nairai facañenia, danomo maijiniðimaci. Oni jaidimaci. ²⁵ Daje isoi comeciaina lloiñenamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi llua isoi cue oretaia, Janaba ie díbeimo itino diga jai nabairiñede. Iemona naimie comini danomo iñeitimaci. Ie uai ieconi saite. ²⁷ Ero, mairidimie ie jofomo ite rana nibai fiacadomoi. Iena fillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. ²⁸ Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; ²⁹ iadedi naimiedi ie Joreñaona jeare ñaiacinona jaca dotañeite. Jusiñamui iena jaca feitañeite —llote.

³⁰ —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

Jesús ie comini

(Mt 12.46-50; Lc 8.19-21)

³¹ Jesús comini naimie dine rillanona, naimie diga ñaiacanano jino naidaidimaci. ³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

³³ Jesús dinena uai ote:

—¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

—Jadi, cue ei, cue amatiai. ³⁵ Jusiñamui jitaillacinona finodimie cue amana, cue miriñona, cue eina. Imaci ua cue cominina.

4

Jesúdi trigona judaidimienaa llua rafue

(Mt 13.1-9; Lc 8.4-8)

¹ Jiairuido jorai fuemo dane jaillanona, ailluena comini naimie dine ofillamona, Jesús naimacina llofue. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci.

² Ailluena rafuena naimacina llofue. Raite:

³ —Omoi fueollena, bie rafuemo raise cacarei. Damie trigona judaiaide. ⁴ Naimie judaiamona, naisomo janore iduai juide. Naimie bai jailla mei, silliniiai iena guisaibitimaci. Ie jira sicoñede. ⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona riana eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo treinta diga llisillana ote. Jiaianamona sesenta diga llisillana ote. Jiaianamona cien diga llisillana ote. ⁹ Omoi jeforena jira, raise fueollena, cue llamo cacarei. Iena iño.

Jesús ie como lloga rafuena llofuia rafue

(Mt 13.10-23; Lc 8.9-15)

¹⁰ Ailluena cominimona jailla mei, naimie diga jaisoidinodi, ie doce llofueoicaigano diga, Jesúmo ie llofuiana jicannotimaci. ¹¹ Uai ote:

—Jusiñamuidi omoína ie sedaacana rafuena jai uiñotade. Jai ie iena uiñonedomoi. Jiaie cominina iena nia uiñotañede. ¹² Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci inoñena jira, uiñoñeno jaitimaci. Cue llofuiana jamai cacadimaci; iadedi naimaci inoñena jira, raise cacaiñedimaci. Uñoñedimaci. Jusiñamui dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. ¹³ Cue como llofuia cinona omoi raise cacaiñenia, dane cue llofuia, iena jiaie raise nibai cacaiñeitomoi; ¹⁴ ia iena omoína llofueiticue. Trigona judaidimiedi Jusiñamui rafue lloraima isoide. ¹⁵ Dajerie iduai naisomo juide. Dajerie comini comeciaie naie naiso isoidimaci. Jusiñamui uaina cacadimaci; ia Taife naimaci comeciaimo cacaja uaina inotañede. ¹⁶ Jiaie iduai nofiemo juide. Dajerie comini comeciaie naie nofie isoidimaci. Jusiñamui uai nano naimaci cacaja, iena caimare feiñotimaci. ¹⁷ Nofiemo riga iduai jainaonidedi raise sicofede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci. ¹⁸ Jiaie iduai eecuaie illanomo juide. Naie iduai sicua mei, iena eecuaie ibaila jira, raise llisiñede. Dajerie comini comeciaie naie illano isoidimaci. Jusiñamui uaina cacadimaci. Inotimaci; ¹⁹ iadedi naimaci comeciaie jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci. ²⁰ Jiaie iduai mare eniruemo juide. Dajerie comini comeciaie naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Jesúdi lamparína ñaia rafue
(Lc 8.16-18)*

²¹ Jorai fuedo Jesúdi cominina nia llofueite:

—Jai uneca lamparín jiaie illanomona atia mei, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. ²² Ie isoide. Cue rafue llocana jiaie, comini comeciaie iticinona uiñotade. Uanaicino naimaci cacajamona, damierie inotimaci. Damierie inoñedimaci. ²³ Omoi jeforena jira, raise fueollena, cue lluamo cacarei. Iena ino.

²⁴ 'Cue lluamo raise cacarei. Omoi cacaja diese Jusiñamui omoína uiñotaite. ²⁵ Iena omoi inoia, Jusiñamui omoína canoite. Omoína uiñocana jaitaite. Jiaimie iena janore cacajamona, iena inoñenia, Jusiñamui naimiena faifitaite.

Jesúdi Jusiñamui ie cominina sedaacana llofuia rafue

²⁶ Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide. ²⁷ Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede; ²⁸ ia eniruemono nano sicode. Monaila mei, lliside.

Iemona naicuai comuide. ²⁹ Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

Jesúdi mostaza ido lua rafue

(Mt 13.31-35; Lc 13.18-19)

³⁰ Jesús jiaie rafuena llote:

—Jusiñamui díbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. ³¹ Jiaie rafuedo iena omoimo lloiticue. Damie mostaza idona rillamona, naiemona eo aillue riará sicode. Mostaza ido eo janorede; ³² iadedi sicua mei, eo aillue riará jaillamona, ie onogaillaí jégairiena jira, icairo anamo manaídinomo sillíñiaí jicaiciaína finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

³³ Naie isoide rafuiaído Jesúdi Jusiñamui ie cominina sedaacana rafuena cominimo llote. ³⁴ Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofujete.

Jesúdi jorai baguana llícaitaja rafue

(Mt 8.23-27; Lc 8.22-25)

³⁵ Ailluena comini llofuia mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai caí jailli.

³⁶ Cominina fañonocaida, botemo naimie jai illamona, naimie llua isoi, oni jaidimaci. Jiaie botes jiaí jaide.

³⁷⁻³⁸ Bai jaillanona, jillacimo Jesús ñide. Ie ifogí almohadamo bíide. Ie facade aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinailamona, Jesúna casitatimaci. Raitimaci:

—Maestro, ¿ñiese itio ñioilla? Caina cano. Jai buisaidícaí. Corobaisaidícaí.

³⁹ Naimie casillano, aífina lletade. Jinui baguana llícaitade. Ieconí aifi llícaide. Bagoñede. ⁴⁰ Ie llofueoicaiganomo jicanote:

—¿Bue ñellena jacinaitomoi? ¿Ñiese cuena raise ñnoñedomoi?

⁴¹ Uai oñeno eo rajicaidimaci. Coniniri ñaitimaci:

—Bimiedi ¿ñie isoidimie? Aifi naimie uaina ñnote. Jorai naimie uaina jiaí ñnote. —Bai jaillanona, ruica ñine ridimaci.

5

Jesúdi Gadara railla eniruemo illa rafue

(Mt 8.28-34; Lc 8.26-39)

¹ Ruica ñine naimaci ridemo, Gadara railla eniruemo sijidimaci. ² Botemona arí Jesús jaidemo, naimie ñine damie bite. Naimiedi Janaba anamo itimie. ³ Comini raioillanomo noñie moto ifuaimo naimie i-isoide. Janaba anamo naimie illamona, comini ñiga marena jaca irañide. ⁴ ñiga ícaíño lloeo ñiga ie onollidi maiga; iadedi oni ecocaida, lloeona ticonote. Ie eilli jiaí maiga; iadedi saitaicaida, lloeona ticonote. Ie jira buna naimiena raise mainide. ⁵ Nagarui noñie motomo ite. Anedumo jaisoide. Cuirí-cuirisoide. Dama ie abina noñici ñiga jaidode. Iese naimie isoide. ⁶ Noñiemona Jesúna ciuanona, aisicana Jesús ñine bite. Naimiena sedalena, ie cañici ifodo ana rainadate. ⁷⁻⁸ Jesús llote:

—Janaba, bimiemona oni jai.

Janabadi íimana ado llotatate:

—Nanoca Jusiñamui Jitodio. ¿Ñiese cuena nibaiacadio? Jusiñamui mamecido cuena duere finoñoeno.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

¹⁰ Bie illanomona naimacina oretañellena Jesúmo duere jicanotimaci.

¹¹ Naie facaise nainomo ite anedumo ailluena chanchuai itimaci.

¹² Chanchuai abimono naimaci jaillena Jesúmo duere jicanotimaci. ¹³ Jesús dinena:

—Jee —raite. Ieconí iima abimona oni jaillanona, chanchuai abimono jaidimaci. Dos mil chanchuai nainomo itimaci. Iena suidemo, iconí jillacimo joraimo chanchuai aisiano corobaisidimaci.

¹⁴ Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. ¹⁵ Jesús dine naimaci ridemo, jaive Janaba anamo illamiena Jesús ecimo raillana cioidimaci. Naimie iniroina jai jitade. Naimie jai uairicoñede. Iena ciuanona, Jesúsna jaciruitimaci.

¹⁶ Naie rafuena cioidino jaive Janaba anamo illamie jilluana llotimaci. Chanchuai mo suide rafuena jiai llotimaci. ¹⁷ Naie enirue itinodi Jesúmo naimaci eniruemonona oni jaillena duere jicanotimaci.

¹⁸ Botemo Jesús jaicania, jaive Janaba anamo illamie Jesúmo jicanote, naimie diga jaillena; ¹⁹ ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo lloño. Jusiñamui ona duenaillana naimacimo lloño.

²⁰ Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

Jesúdi mena duide riñona jillotaja rafue

(Mt 9.18-26; Lc 8.40-56)

²¹ Ruica dibeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia, ²² Jairoña mameciredimiedi Jesús dine bite. Naimiedi judíuai rafue ofiraco sedarima. Jesúmo duere jicanollena, ana bitadate. ²³ Duere jicanote:

—Cue jisa jai fioidiacade. Cue jofomo cue diga bi, o onolli naiñaiño mo o jonellena, naiñaiño jilloillena.

²⁴ Iena cacajano, ie llofueoicaigano diga, naimie diga Jesús jaide. Ailluena comini Jesúmo ñaijillanona jaidimaci. ²⁵ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. ²⁶ Diga manorainimona duere sefuide. Jilloñede; ia fodo jaide. Nana ie ucube jiai fuite. ²⁷ Jesús duidinona jilluana naiñaiño fidiamona, jinafo dinena billanona, naimie iniroina jetade. ²⁸ “Naimie iniroi cue jetajamona jilloitícue” comecina facajamona, naiñaiño naimie iniroina jetade. ²⁹ Ieconí diailladi fañonocaide. Ie abí jilluana naiñaiño jai uiñote. ³⁰ Ie abimona ie uai oni jaillana Jesús uiñuanona, dobaicaide. Cominimo jicanote:

—¿Bu cue iniroina jetade?

³¹ Ie llofueoicaigano dinena uai otimaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

³² Raise uñollena, Jesús ie ecimo itinomo erodate. ³³ Duidiñaiño ie jilluana uñua jira, Jesús dine jacirucana bite. Naimie uicomo ana bitadajanona, nana naiñaiñomo ite rafuena llote. ³⁴ Naiñaiñomo Jesús llote:

—Ñoo, cuena o ñnua jira, jai jillodio. Mai marena o jai. O duicomona jai jillobidio.

³⁵ Naiñaiño diga Jesús nia ñaitemo, Jairo jofomona jiaño bite. Jairomo llote:

—O jisa jai fiodaite. Maestrona ñaidoñeno.

³⁶ Iena cacajano, Jairomo Jesús llote:

—O comeci jarire iñeno; ia cuena nia ñno.

³⁷ Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. ³⁸ Jairo jofomo rillanona, nainomo itino eecuinaillana cacade. Failliñailana cacade. ³⁹ Jesús fo jailla mei, nainomo itinomo jicanote:

—¿Ñiese itomoi eecuinailla? Cuemona naiñaiño fiodañedes. Jamai inide.

⁴⁰ Iena cacajano, naiñaiño jai fiodaite uñuamona, Jesúsri jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide. ⁴¹ Naiñaiño onollina linocaida, judíuai uaido raite:

—Talita, cumi. —Iena oni dobaiñuamona: “Jitaibici, mai naidacai” raite.

⁴² Ieconijilluanona naidacaide. Jai jilluano macarite. Naiñaiñomo doce años jai ite. Nana nainomo itino ieri eo rajicaidimaci.

⁴³ —Bumo bie rafuena lloñeno —naimacimo Jesús llote. Guillena naiñaiñona ecajana jiai llote.

6

Nazaretmo Jesús illa rafue

(Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano diga Nazaretmo ride. ² Rilla mei, sábadoruimo nainomo ite ofiracomo llofue. Iena cacajanona, nainomo itino rajicaidimaci. Raitimaci:

—¿Ñiese eo abina uñnote? ¿Bumona ie uaina ote? ¿Ñiese siño rafuena naimiedi finode? Naimiedi jamai bue isoidimie. ³ Naimiedi amederaima. María jito. Ie amatiandi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.

⁴ Jesús naimacimo llote:

—Naga illanomo cominidi Jusiñamui facaina lloiraíma uaina feiñotimaci; iadedi naimie nairaímo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotate; ⁶ ia naimaci ñnoñenari rajicaide. Ie mei diga nairaíaimo Jesús llofuecana jaide.

Jesúdi ie llofueoicaiganona oretaja rafue

(Mt 13.53-58; Lc 4.16-30)

⁷ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Ie rafuena llollena, jiaie illanuaimo naimacina menamierie oretaiacade. ⁸ Raite:

—Ailluena rana uiñeno. Omoi abi riidollena, jiguidana uiño. Llomenicon a uiñeno. Ailluena rana omoi uiñellena, bolsana uiñeno. Ucubena uiñeno. ⁹ Zapatona jítajano jai. Abi omoi meidolle iniroina uiñeno. ¹⁰ Nie nairaimo omoi jai, daacomo omoi ri. Naie nairaimo omoi ille dinori, daacomo omoi i. ¹¹ Omoína bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

¹² Jesús naimacimo llua mei, jaidimaci.

—Omoi jeacinona fainonocaillanona, Jusiñamui dibeimo omoi comeciai uai meiduana omoi jai —llofucana jaidimaci. ¹³ Janaba anamo ite cominimona Janabana oredimaci. Duidino abimo farena gĩa mei, naimacina jillotate.

Juan Bautista micori fiodailla rafue

(Mt 14.1-12; Lc 9.7-9)

¹⁴ Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jai lloraima micori jai jillode.

¹⁶ Jesúsna fidiano, Herodes comecina facade: “Juan micori ie ifogina navui jaitaticue. Fiodaillamona naimie jai jillode”.

¹⁷⁻¹⁸ Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

¹⁹ Ie muidona Herodías dinena Juan Bautista micorina jearuite. Naimiena meinetaiacade; ²⁰ ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micori llua ca-cade. Iena gaide; ia iena raise cacaiñede. Ie muidona Herodías naimie micorina meinetanide; ²¹ ia ja muidomo naiñaiño sedallirui ride. Herodes cumpleños ie rafuena finode. Ailluena illaicomina ie rafuemo uaidote. Eo ucuberedinona jiai uaidote. ²² Rafuemo Herodías jisa saillamona, Herodena iobitade. Ie uaidoganona jiai iobitade. Iobil-lamona, Herodes naiñaiño lote:

—O jitailla ra cuemo jica. Iena omo fecaiticue. ²³ Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

²⁴ Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes dine raire abido billanona, lloste:

—Juan Bautista ifogi bandejamo ja jonecaida, cuemo ine.

²⁶ Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacaifede. ²⁷ Ie facaise ie soldaduaimona Herodes damie carcelmo orede. Juan ifogina atillena ocuide. Herodes ocuilla isoi finode. Juan ifogina jaitade. ²⁸ Bandejamo naimie ifogi jonecaida, iena atiano, Herodias jisamo fecade. Ieconí ie eimo fecade. ²⁹ Iena fidianona, Juan micori llofueoicaigano naimie micori abina uaibitimaci. Iena raitimaci.

Jesús cinco mil iñiaina ecaja rafue

(Mt 14.13-21; Lc 9.10-17; Jn 6.1-14)

³⁰ Jesús llofueoicaigano abido bia, Jesúsno nana naimaci finoca rafuena llotimaci. ³¹ Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo lloste:

—Jafaici cai ollena, eneno oni mai cai jailli. Comini iñenanomo mai cai jailli.

³² Ie muidona botedo comini iñenanomo dani jaidimaci. ³³ Ailluena comini naimaci oni jaillana ciodimaci. Naimacina uiñuamona, diga nairaiamona aisicana jaidimaci. Jesús nia riñenia, uicodo ie jaillanomo ridimaci. ³⁴ Jesús sijanona, ailluena cominina ciodo. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofue. ³⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuicade. ³⁶ Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

³⁸ Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

³⁹ Iena cacajano, cominimo raitie illanomo dajerise ana raillena Jesús lloste. ⁴⁰ Naimaci cien digamierie ana raisite. Jiaino cincuenta digamierie ana raisite. ⁴¹ Naie cinco llomenicono, naie mena lliciai diga, Jesús uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade. ⁴² Nana guillanona monidimaci. ⁴³ Monillamona, fiebide guillena iraidimaci. Doce cirigaiaimo oruititimaci. ⁴⁴ Cinco mil iñiaí diese guitimaci. Naimaci ainiaí, imaci uruiaí diga, jiai guitimaci.

Jesús jinui emododo macarilla rafue

(Mt 14.22-27; Jn 6.16-21)

⁴⁵ Guilla mei, botedo ie llofueoicaigano ruica dine Betsaidamo jaillena lloste. Naie facaiseconi cominina naimie nia facadote. ⁴⁶ Cominina facadua mei, aneduaimo dane jaide, Jusiñamui diga ñaillena. ⁴⁷ Jitibicaidemo, nainomo dama ite. Ie llofueoicaigano jorai motomo jai itimaci. ⁴⁸ Aifi naimacimo riire rilla jira, riire jaitimaci. Iena Jesús cianona, jinui emododo naimaci dine bite. Naimaci ecido naimie jaisaide; ⁴⁹ ia naimiena naimaci cianona, comecina facadimaci: “¿Bu joreño caimo billana ciodicai?” ⁵⁰ Naimiena ciumona, nana jacinaillamona cuiroidimaci. Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

⁵¹ Botemo Jesús jaide. Ie facaise aifi llicaiide. Ieri eo rajicaidimaci. ⁵² Janore guillemona ailluena cominina naimie ecajana jaive ciodimaci; ia naimie uai siñonana nia raise uiñoñedimaci. Naimiena nia raise iñoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci. ⁵⁴ Botemona ari jaidemo, nainomo itino Jesúsna uiñotimaci. ⁵⁵ Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atuidimaci. ⁵⁶ Diga nairaiamo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

7

Jesúdi comini comeciaina ñaia rafue

(Mt 15.1-20)

¹ Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiai bitimaci. ² Jesús llofueoicaiganomona damerie naimaci isoi guiñenana ciodimaci. ³⁻⁵ Fariseuai dinena Jesúsno jicanotimaci:

—¿Bue ñellena omoi llofueoicaigano cai einamac i rafuedo jaiñedimaci? Naimaci guiacania, naimaci onolli cai einamac i llua isoi, raise jocoñedimaci. Ie jira cai abimo jeacino finodomo i.

Iese jicanotimaci, naimaci einamac i rafuedo naimaci jailla jira. Maraiñede rafue naimacimo suiñellena, iese ailluena judíuai jaidimaci. Naimaci guiacania, naimaci einamac i llua isoi, onollina diga icaiño jocuano, guitimaci. Mercadomona bia, naimaci einamac i llua isoi, abina lleredimaci. Naimaci einamac i llua isoi, tazones, ollas, bandejas jiai jicodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona maraiñede. Naimie caina duere finoite”. Jearede rafue naimaci abimo oñellena, iese finoidimaci.

⁶ Jesús uai ote:

—Mareuidinona abi caitauididodomoi. Isaías micori jaiie omoina raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jiacaiñedimaci.

“Ona isiruiticai” llotimaci.

“Ona sedadicaí” llotimaci.

Jamai ñaitimaci. Naimaci comeciai cue dibeimo raise iñede.

⁷ Cue uai itena, jamai comini llucacina naimaci llofuecabilla jira, tainona cuena sedadimaci cuete. ⁸ Isaías micori llua isoi itomoi. Jusiñamui llogacina fainonocaida, omoi einamaci rafuedo jaidomoi. ⁹ ¿Bue ñellena nana Jusiñamui llogacino jaiñedomoi? Omoi einamaci llogacino jaidomoi; iadedi nana Jusiñamui llogacino raise jaiñedomoi. ¹⁰ Moisés micori jaielote: “O moo uai iñuanona, naimiena cano. O ei uai iñuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ¹¹⁻¹² Iese Moisés micori lote; iadedi omoi einamaci llotimaci: “Jusiñamuimo cai ucubena cai fecajamona, cai moon, cai eina jai canonicai”. ¹³ Iese omoi finocabilla jira, omoi einamaci llogacino omoi jaillamona, Jusiñamui uaina jamaidomoi. Bie isoide rafuedo jaca jaidomoi.

¹⁴ Fariseuai diga iese llua mei, naimie ecimo ailluena comini dane ofillanona, naimacimo lote:

—Iena raise omoi uiñollena, cue llua mo cacarei. ¹⁵ Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jucamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacina finocabidomoi. ¹⁶ Omoi jeforena jira, raise fueollena, cue llua mo cacarei. Iena iño.

¹⁷ Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci. ¹⁸ Uai ote:

—¿Ñiese cue llua jiai nia cacaiñedomoi? Ñie isoide ra guitomoina, omoi comeciaino jeare iñede. ¹⁹ Omoi comeciaino jaiñede; ia omoi jebemo jaide. Ie mei omoi abiaimona jino bite.

Jesús llua mo, nana guille radi mare uiñoticaí. ²⁰ Jesús lote:

—Omoi comeciai jearena jira, jearede rafuena finocabidomoi. ²¹ Omoi comeciai jearena jira, jeare comeciaina facacabidomoi. Omoi aiñede riño diga icabitomoi. Omoi iniñede iima diga icabitomoi. Firicabitomoi. Cominina meinecabitomoi. ²² Jiai comini rana nicidocabitomoi. Jearede rafuena finocabidomoi. Iena ebiruitomoi. Jifuericabitomoi. Abina uradoicabitomoi. Jiaie comini joreña jeare ñaicabitomoi. Abina iedocabitomoi. Ebena jaicabitomoi. ²³ Bie isoidicinuai omoi comeciaino illa jira, jearede rafuena finocabidomoi; iadedi omoi einamaci llua isoi, omoi onolli jocoñenamona jeacino comuiñede.

Jesúdi judío iñaiñoñediñaiño jillotaja rafue

(Mt 15.21-28)

²⁴ Nainomona Jesús jaillanona, Tiro railla eniruemo jaide. Sidón railla eniruemo jiai jaide. Nainomo jofomo jaillanona, iena buna fidiana jitañede; ia iena janonide. ²⁵⁻²⁶ Ie facaise judío iñaiñoñediñaiño daño bite. Naiñaiñodi sirofenicia nairai iñaiño. Ie jisa Janaba anamo ite. Jesúsna fidiana, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúsno duere jicade. ²⁷ Judúaiñedinona naimie canoñenana naiñaiño uiñollena, naiñaiño Jesús lote:

—Urui ai guillamona jiconiaina ecadicaidena, maraiñede. Urui nano ecadicaí.

²⁸ Naiñaiño dinena uai ote:

—Jii, maestro; iadedi jiconiaidi uruiái guillamona fiebide guillemona guitimaci. —Iese llote; ia jiaie rafuemo comechina facade. Uruiaína llote; iadedi judíuaimo comechina facade. Jiconiaina llote; ia judíuáiñedinomo jiaí comechina facade. Comechina facade: “O cominimo o rafue duide; ia cai Namana o illa jira, níbaí o rafue caímo janore duide”.

²⁹ Jesús uai ote:

—Raise llotío. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa bíramo bídena ciode. Janaba naiñaiñomona oni jaillana jai uíñote.

Jesús jefona cacaiñedimiena jillotaja rafue

³¹ Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiaí jaide. Ja muidomo Galilea railla jorai fuemo ride. ³² Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci. ³³ Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade. ³⁴ Jusiñamui dine monamo eruaita, naimiena duenaillamona, jafaicina faite. Judíuái uaido naimiemo llote:

—¡Efata! —Oni dobaiñuamona: “¡Ecoricai!” raite.

³⁵ Ieconí ie jefodí ecoricaide. Jai raise cacade. Jai raise ñaite.

³⁶ Cominimo:

—Bimie jai jilluana bumo lloñeno —Jesús diga icaiño llote; ia naimie uaina iinoñedimaci. Iena llocana uitimaci. ³⁷ Naimieri eo rajicadimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

8

Jesúdi cuatro mil iñiaína eaja rafue

(Mt 15.32-39)

¹ Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenaila jira, naimacina canoiacadicue.

⁴ Jicanotimaci:

—¿Ñiese naimacina bene ecaiticai? Jofue iñenanomo iticai.

⁵ Jesús jicanote:

—¿Ñiga llomenico omoimo ite?

Uai otimaci:

—Siete.

⁶ Comini ana raillena Jesús llote. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. ⁷ Naimacimo janore llicisiriai jiaí ite. Ie facaina Jusiñamuimo iobillacinona fecaja mei, cominimo fecallena Jesús llote. ⁸ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitimaci. ⁹ Nainomo cuatro mil iñiaí guitimaci. Naimaci ainiai, imaci uruiái diga, jiaí guitimaci. ¹⁰ Guilla mei, cominina naimaci jofuemo Jesús orede. Ie

llofueoicaigano diga, botemo jaillanona, Dalmanuta railla eniruemo jaide.

Fariseuai comini Jesúmo siño rafuena finuana jicanuano billa rafuena
(Mt 16.1-4; Lc 12.54-56)

¹¹ Dajerie fariseuai comini Jesús dine bitimaci. Naimie uaina uaitaia-cadimaci. Naimiena facacillena, siño rafuena finuana jicanoicadimaci. Iena naimie finoñedena, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena cai cioillena, Jusifñamuina siño rafuena finota.

¹² Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

¹³ Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

Jesús siritate rana llofua rafue
(Mt 16.5-12)

¹⁴ Ruica dine rilla mei, Jesús llofueoicaigano llomeniconna feillana uibiñotimaci. Naimacimo daje llomenico ite. ¹⁵ Iena naimie uiñuamona, naimacimo Jesús llote:

—Fariseuai siritate ramona abina rairui. Illaíma Herodes siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

¹⁶ Jesús iese llua jira, iena naimaci raise cacaiñena jira, dani coniniri siadotimaci:

—Llomeniconna cai atañena jira, caimo iese llote.

¹⁷ Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Ñiese cuena iñoñedomoi? Cuemo siño uai illana nia raise cacaiñedomoi. ¹⁸ Uisiredomoi. Jeforedomoi. ¿Ñiese cue navui siño finoca rafuemo comeaiina facañedomoi? ¹⁹ Navui cinco mil iñiaí cinco diga llomeniconna guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

²⁰ Jesús llote:

—Jiaicaiño cuatro mil iñiaí siete diga llomeniconna guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

²¹ Jesús dinena jicanote:

—¿Ñiese cuena nia raise iñoñedomoi? Siño uai cuemo illana nia raise iñoñedomoi.

Jesús uisinidimiena jillotaja rafue

²² Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisinidimiena atide. Naimiena jilloitallena, naimiena jetallena, Jesúmo jicanote. ²³ Iena Jesús cacajanona, ie onollina llinuanona, nairai illa jinofemo uisinidimiena uite. Ie mei ie uisina tuade. Ie uisina jiaí jetade. Naimiemo jicanote:

—¿Buena ciodio?

²⁴ A eruailanona, uai ote:

—Comini macarillana cidicue; ia amena isoi eruaidimaci. Nia raise cidicue.

²⁵ Ie uisina Jesús dane jetade. Iemona oni erocaillamona, jai jillode. Jai raise cide. ²⁶ Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñoeno; ia nainomo jaiñoeno o jofomo mai abido jai.

Pedro Jesúsna llua rafue
(Mt 16.13-20; Lc 9.18-21)

²⁷ Cesarea Filipo eniruemo ite nairaiaimo Jesús jaidemo, ie llofueoicaiganomo jicanote:

—¿Ñiese jiaie comini cuena raitimaci?

²⁸ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eliadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁹ Jesús dane jicanote:

—¿Ñiese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci

³⁰ Jesús iena bumo lluaana rairuide.

Jesús ie fiodaillena llofuia rafue
(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofuate. Llote:

—Cai judíuai illaicomini cuena eo duere finoitimaci. Cuena jitañellemona, cuena meineitimaci; iadedi darui amani illanona, fiodaillamona jilloiticue.

³² Iena marefodo naimacimo llote. Iena cacajano, Pedro dinena lletade:

—Dama ite. Iese lloñoeno. Bie isoide rafuena lloñoeno.

³³ Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñoeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

³⁴ Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñoena. Cue dibeimo naimie jaillamona, duere sefuicana jaite. Nibai naiemona fodaite. Bu iese jaiacania, cue dibeimo naimie iite. ³⁵⁻³⁷ Duere sefuillana jaciruillamona, cue cominina bu jaiacaiñoena, ja muidomo faifite; iadedi duere sefuillana jaciruñenamona, cue cominina bu jaia, jaca faifiñeite. Cue cominina bu jaiñoena, nibai eo duere sefuñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñoeno faifite. ³⁸ Birui ite comini Jusiñamuina jitañedimaci. Naimiena jai fainocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñoena, ico cue bia: “Naimiedi cue comini” lloñeiticue. Jusiñamui jaienisaí diga, cue Moo dinena, monamona ico biiticue. Cue Moo uai cuemo illanona, ebire biiticue.

9

¹ 'Omoimo uanaicinona lloticue. Omoimona dajerie nia fiodañeitomoimo, illaimana ebire cue bairellena cioitomoí.

Jesús abi meidocaila rafue
(Mt 17.1-13; Lc 9.28-36)

² Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uñede. Nainomo rilla mei, naimaci uicomo naimie abi meidocaide. ³ Naie dacaiño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. ⁴ Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiaimaiai. ⁵ Iaimaiai jaiacania, Pedro Jesúsno llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

⁶ Eo jaciruilla jira, naimie ñaia rafuena raise uññoño jamai ebena ñaite. ⁷ Ie facaise uillie billamona, naimacina ibaide. Uilliemona Jusiñamui llote:

—Bimie cue isiruiga Jito. Naimie lluomo cacareillanona, iena ñino — llote.

⁸ Ieconí oni erodajanona, dama Jesúsna ciodimaci. Jiaionona cioñedimaci.

⁹ Anedumona bitimacimo, naimacimo Jesús llote:

—Omoi ailli ciua rafuena bumó lloñeno, cue fiodaillamona cue jillua ñinori. ¹⁰ Jesús llua isoi finodimaci. Iena bumó lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci. ¹¹ Naimiemo llotimaci:

—Moisés micori llogacinona llofuerañi birui raicabitimaci: “Elías raillamie dane biite. Ie mei cai jilloitaraima biite” raitimaci. Jusiñamui mona o billana ñnoticai. Odi cai jilloitaraimana ñnoticai. Odi cai jilloitaraimadiomo, ¿bue ñelli iese raitimaci?

¹² Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise llollena. Jusiñamui dibeimo naimaci illena, comini imaci comeciai meiduana llote. Jusiñamui facaina llorañi micoriai cue eo duere sefullena cuetimaci. Comini cue jeare finollena cuetimaci. Iemo omoi comeciaina jiai faca. ¹³ Elías isoidimie jai bite; iadedi Jusiñamui facaina llorañi micori jaie cuega isoi, naimaci jitailla jira, naimiena jai meinetimaci.

Jesúdi Janaba anamo itimiena jillotaja rafue
(Mt 17.14-21; Lc 9.37-43)

¹⁴ Ie jiaie llofueoicaigano ñine Jesús abido ria, nainomo ailluena comini itimacimo ride. Moisés micori llogacinona llofuerañi ñinena ie llofueoicaigano uaina uaitaside. ¹⁵ Jesús billana comini cianona, jacinaisidimaci. Naimiena feñollena, naimie ñine aisida jaidimaci.

¹⁶ Moisés micori llogacinona llofuerañimo Jesús jicanote:

—¿Ñiese cue llofueoicaigano uaina uaitatomoí?

¹⁷ Uai oñedimaci; ia cominimona ñaimie uai ote:

—Maestro, Janaba anamo cue jito illa jira, o ñine naimiena atidicue. Cue jito Janaba anamo illamona ñainide. ¹⁸ Nagarui Janaba bille ñiese, naimiena eniruemo uaitate. Iemona fuedi mullede. Ie isidodi murude.

Ie abi jaiãire jaide. O llofueoicaiganomo jicadicue, Janabana oni oretalena; ia oretanidimaci. Ie jira Moisés micorí llogacinona llofueraini bie rafuena, o llofueoicaigano diga, uaina uaitatimaci.

¹⁹ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

²⁰ Naie urue Jesús dine atianona, Janaba naimiena naillitate. Iemona urue eniruemo uaide. Jabi-jabide. Fue mullede. ²¹ Jesús dinena naie urue moomo jicanote:

—¿Nie dinori o jitodi bie isoi ite?

Uai ote:

—Naimie uruenamona. ²² Janabadi, diga icaiño iraimo usillena, naimiena uaitate. Corobaillena, diga icaiño jinuimo jiai uaitate. Janaba oni o retarenia, cocona duenaillamona, cocona cano.

²³ Jesús uai ote:

—“O retarenia” raitio. Ero, o jito jillotaredicue. Cuen a o ñnoia, o jito jilloite.

²⁴ Naie urue moo ieconi llote:

—Ona ñnoticue. Raise nia cue ñnoñenia, cuena raise ñnota.

²⁵ Naie façaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie dine dane biñeno.

²⁶ Ado cuirioillanona, naimiena eo riire naillitajanona, Janaba oni jaide. Iemona naie urue fioiditimie isoi eroçaide. Naimiena ciuanona, nainomo itino raitimaci:

—Naimie jai fiodaite; ²⁷ —ia Jesús naimie onollina llinocaida, naimiena a naidanete.

²⁸ Iemona oni jaillanona, damie jofomo Jesús nailli ria, naimiemo ie llofueoicaigano anado jicanotimaci:

—¿Bue ñellena Janabana oni oretanidicai?

²⁹ Jesús uai ote:

—Jusiñamuimo omoi jiamona, naimiena raise omoi ñnuamona, bie isoide Janabana oretaredomoi. Naimiena omoi raise ñnoñena jira, bie uruemona Janabana oni oretañedomoi.

Jesús ie fiodaillena dane llofuia rafue

(Mt 17.22-23; Lc 9.43-45)

³⁰⁻³¹ Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitaiñede. Naimacimo llote:

—Monamona billanona, ñmana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

³² Ie llofueoicaigano iena raise cacaiñedimaci; ia naimiemo iena jicanuana meiruitimaci.

Jesús ie llofueoicaigano moto imiena ille rafue

(Mt 18.1-5; Lc 9.46-48)

³³ Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

³⁴ Uai oñedimaci. Naimaci moto imiēna illena, naisodo siadocana bitimaci. Meiruillanona, uai oñedimaci.

³⁵ Naimie ana rainadaja mei, ie ecimo naimacina uaidote. Raite:

—Omoi moto imiēna bu iacania, jamai bue isoidimiēna naimie illa. Omoi muillaimana naimie jailla isoilla.

³⁶ Iena naimaci raise uiñollena, nainomo ite cominimona daje urue bai jainanocaida, naimaci motomo naimiēna jonete. Naimiēna menioita, naimacimo llote:

³⁷ —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiēna feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

Jesúdi ie dibeimo itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiēna ciodicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiēna rairuiñeno. Cue mamecido siño rafuena bu finoia, cuena jeare raire ñaiñeite. ⁴⁰ Cai dibeimo itimiedi cai facaisena ite. ⁴¹ Ero, cuemo omoi duillamona, omoi na bu janore canoia, Jusiñamuimona ibana feiñoite. Omoi mo nibai jamai jinuina fecaitē; iadedi omoi na naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

Jesúdi jeacinona finoñenana llofuia rafue

(Mt 18.6-9; Lc 17.1-2)

⁴² Jesús nia llofueite:

—Cuena como ñnotinona jeacinona finotaiacadimie iena finoñellena, naimie cimaimo aillue nofici maianona, joraimo corobaillena naimiēna dotacadena, mare. ⁴³⁻⁴⁸ Biena ñaiticue. Nie isoide rafue omoi na jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino finoñeno. Naimacimo ite aiaí fiodaiñena jira, naie irai jaca duiñenamona, nainomo itino jaca duere sefuitimaci.

⁴⁹ 'Ero, birui omoi duere sefuillamona, cue cominina jai jaidinona uiñoiticue. ⁵⁰ Guille caimaretallena, sal mare; iadedi ie caimano jai iñenia, iena dane caimaretañedicai. Ie isoide. Jeacino omoi finoia, omoi comeciai caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

Jesús ima ie aina dotaja rafuena llofuia rafue

(Mt 19.1-12; Lc 16.18)

¹ Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica díbeimo jaide. Ailluena comini naimie dine ofillamona, naimie llofueuilla isoi, naimacina llofue. ² Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Íima ie aina dotajana rairuidio?

³ Uai ote:

—¿Ñiese Moisés micori llote?

⁴ Uai otimaci:

—Moisés micori jaie cuete: “Íima ie aina dotaacania, dotalle rabena nano cueite. Ie mei naiñaiñaona dotaite”.

⁵ Jesús uai ote:

—Jusiñamui uaina raise omoi ñnoñena jira, Moisés micori íima ie aina dotajana rairuiñede; ⁶ iadedi nano dofoconi iese iñede. Enirue finua facaiseconi Jusiñamuidi come iaimaiaina finode. Íimana finode. Riñaona jiai finode. ⁷ Ie jira Jusiñamuidi jaie llote: “Ie ai diga illena, íima ie moona fainonocajte. Ie eina jiai fainonocajte. Ie ai diga illamona, menade comedi daamiena jai jaide” llote. ⁸ Menade come jai daamiena jai ite. ⁹ Jusiñamui iese iaimaiaina itataja jira, íima ie aina dotajana rairuidicue. Riño ie inina dotajana rairuidicue.

¹⁰ Jofomo ie llofueoicaigano diga, naimie nailli illanona, naimiemo bie rafuena jicanotimaci. ¹¹ Jesús dinena llote:

—Jaiie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. ¹² Ie inina fainonocaillanona, jaimiena nie riño uamona, naiñaiño jeacino jai finode.

Jesúdi naimie dine uruai billana jitailla rafue

(Mt 19.13-15; Lc 18.15-17)

¹³ Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Ie llofueoicaigano iena rairuidímaci; ¹⁴ iadedi iena cacajano, Jesús icirite. Jesús raite:

—Uruiai cue dine billesa. Naimacina rairuiñeno. Cuen a bie isoi ñnotinodi Jusiñamui cominidímaci. ¹⁵ Bie uruai abina íedoñedímaci. Einamacimona jamai bue isoidímaci. Naimaci isoi bu iñenia, Jusiñamui cominina jaiñeitímaci. Jusiñamui naimiena sedallena, Jusiñamui cominina naimie jaiñeite.

¹⁶ Naie uruai dasarie meni-menioicaida, naimaci ifogimo ie onollina joneta:

—Jusiñamui omoína canoite —llote.

Ucuberedimie Jesús diga ñaia rafue

(Mt 19.16-30; Lc 18.18-30)

¹⁷ Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ífodo rainadate. Raite:

—Maestro, odi maremiedio. Jusiñamui diga ico cue jaca illena, ¿buena finoiticue?

¹⁸ Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. ¹⁹ Moisés micori llogacinuaina ñnocana jai. Jaie cuete: “Comena meineñeno. O añede riño diga iñeno.

Fiiñeno. Jiaimiena o llogidoia, tainona lloñeno. O moo uaina iño. O ei uaina iño”.

²⁰ Uai ote:

—Maestro, uruena cue illa facaisemona nana bie llogacinuaina iñoticue.

²¹ Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruaiaina feca. Naie ucubena dueredinomo feca. Cueno o iñnuamona, monamo ico jaca iitio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie fecacaiñena jira, sure jaide. ²³ Naimie jailla mei, ie llofueoicaiganomo eruaillanona, naimacimo llote:

—Ucuberedinodi Jusiñamui cominina jaillena eo sefuiruitimaci.

²⁴ Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁶ Iena ie llofueoicaigano cacajano, Jusiñamui cominina ucuberedino raise jainina jira, “¿Ni ese dueredinodicaidi Jusiñamui cominina jaitica?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodica. Nana cai rana fañonocaida, o diga jai jaicabidica.

²⁹ Jesús uai ote:

—Uanaicino lloiticue. Cueno naimie isiruillamona, cue rafuena naimie llua mona, ie jofona bu fañonocaia, ie amatiaina bu fañonocaia, ie miriñuaina bu fañonocaia, ie moona bu fañonocaia, ie eina bu fañonocaia, ie uruina bu fañonocaia, ie eniruena bu fañonocaia, ³⁰ Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatai, ie miriñuai, ie eitai, ie uruai, ie enirue birui iite. Monamo naimie ico caimare iocire jaca iite. ³¹ Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoñedimaci; ia Jusiñamuimona ico jamai bue isoitimaci Jiañonomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoñeitimaci.

Jesús ie fodaillena dane llua rafue

(Mt 20.17-19; Lc 18.31-34)

³² Jerusalémo nia jaillanona, Jesús uicodo jaide. Nainomo naimie jaciruñeno jaillamona, ie llofueoicaigano raijicaidimaci. Naimaci diga jaidino jaciruioicaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:

³³ —Ero, Jerusalémo jai jaidica. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. Judíuaiñedino illaicominimo cuena fecaitimaci.

³⁴ Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue —llote.

Jesús dine Jacobo Juan iaïmaiaï billa rafue

(Mt 20.20-28)

³⁵ Naie facaise Jesús dine Jacobo, Juan diga bitiaïmaiaï. Iaïmaiaï moodi Zebedeo. Raitiaïmaiaï:

—Omo coco jicalle rafue cocoena finuana jitaïdicoco.

³⁶ Jesús uai ote:

—¿Ñie isoide rafuena jitaïdomico?

³⁷ Uai otiaïmaiaï:

—Illaïmana o jailla mei, o ecimo coco illena o lluaña jitaïdicoco. Damie o nabeimo. Jiaïmie o jarifebeimo. —Jiaïno afemo iaïmaiaï illena, iese llotiaïmaiaï.

³⁸ Jesús dinena llote:

—Omico jïcanuana raise uiñoñedomico. Cue eo duere sefuiticue. Llegi cacaiticue. ¿le isoi duere sefuiacadomico? ¿le isoi llegi cacaiacadomico?

³⁹ Uai otiaïmaiaï:

—Jii. Sefuiacadomico.

Jesús dinena raite:

—Cue isoi duere sefuitomico. Llegi cacaitomico; ⁴⁰ iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

⁴¹ Iena jiaïe llofueoicaigano cacajano, naie iaïmaiaïri iciritimaci.

⁴² Jesús nana naimacina uaiduanona, raite:

—Nana illaïcominidi naimaci anamo itinona ocuicabidimaci; ⁴³ iadedi omoi dine iese iñena. Omoïmona bu imiëna iacania, omoi mullaïmana naimie jaisoïllasa. ⁴⁴ Omoïmona bu imiëna iacania, omoïna naimie canocana jaisoïllasa. ⁴⁵ Cuemona fueo. Biñedicue, cominina cue ocuïllena; iadedi cominina canuaïbidicue. Cue jitaïlla jira, nana comini facaina fiodaisaïbiticue. Naimaci jeacinomona naimaci jillobillena, fiodaisaïbiticue. Aïlluena comini cuena ñnuamona, jilloitimaci. Coninina omoi canua —llote.

Jesúdi Bartimeona jillotaja rafue

(Mt 20.29-34; Lc 18.35-43)

⁴⁶ Oni jaïllanona, Jericó railla nairaimo Jesús ride. Naiemona ie llofueoicaigano diga jaïllanona, aïlluena comini Jesús jinafona racadimaci. Naie facaise ñaï fuemo uisnidimie raide. Naimie mameci Bartimeo. Timeo jito. Nainomo jamai raide, ucubena jamai jïca-jïcallena.

⁴⁷ Nazaret ie Jesús jaïllana naimie cacajano, ado cuirioide:

—David micori Jitona o illamona, Jusifñamuïmona o billa jira, cuena duenai. Cuena cano.

⁴⁸ Naimie ll#caïllena, Jesús diga jaidino naimiëna lletade; iadedi eo cuirioide:

—Maestro, David micori Jitona o illamona, cuena duenai.

⁴⁹ Naimiëna cacajano, Jesús naidadajanona, llote:

—Naimiëna cue dine uaido.

Bartimeona uaiduanona, raitimaci:

—O comecina ocuïño. Mai naidacai. Jesús ona uaidote.

⁵⁰ Iena cacajano, ie emodomo itiroina duiñuanona, raire naidacaida, Jesús dine bite. ⁵¹ Naimiemo Jesús jïcanote:

—¿Niese ona cue n̄baiana jitaideo?
 Uai ote:
 —Maestro, cioacadicue.
⁵² Jesús dinena uai ote:
 —Cuenta o in̄nua jira, jai jillodio. Mai jai. —Iecon naimie jai cide. Jesús diga jaidino diga naimie jai jaide.

11

Jesús illaima isoi Jerusalémo jailla rafue
 (Mt 21.1-11; Lc 19.28-40; Jn 12.12-19)

¹ Oni jaillanona, Jerusalémo iareicaidimacimo, Betfagé railla nairaimo ie llofueoicaigano diga Jesús ride. Betania nainomo jai ite. Olivos railla anedumo naga nairai iaimaia ite. Ie llofueoicaiganomona Jesús menamiena orede. ² Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. ³ Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretate llote”.

⁴ Naimie llua isoi, jaidiaimaia. Naisomo jofo nasemo burritona baillanona, iena suiñodiaimaia. ⁵ Ie facaise nainomo itino jicanote:

—¿Bue ñellena burritona suiñodomico?

⁶ Jesús llua isoi uai otiaimaia. Ie muidona:

—Jee —raitimaci.

⁷ Burritona atidiaimaia. Ie emodomo naimie llofueoicaigano naimaci in̄roi jobianona, ie emodomo Jesús rainadate. ⁸ Naimiena iobitallena, illaima isoi naimie jaillena, diga comini, imaci in̄roi diga, naiso motomo jobedimaci. Jiaino nai fuemona raforona uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiisite:

—¡Cai Jilloitaraima billa! Jusiñamui mamecido bitimie eo mare. ¹⁰ Cai illaima David micori ifomo caina sedallena, damie billemo birui ocuiridica. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo in̄llena jaide.

Jesús higuera railla riarana faidua rafue
 (Mt 21.18-19)

¹² Ie areruido Betaniamona Jerusalémo abido ie llofueoicaigano diga Jesús bia, aimetaite. ¹³ Arena higuera railla riarana cuanona, iena jibuide. Como firuide; ia naie llisilladi ñede. Ie llisilla facaise nia ñede. ¹⁴ Ie jira naie riarana llote:

—Biemona jaca llisíñeite. —Ie llofueoicaigano naimie llua ca cadimaci.

Jesúdi Jusiñamui jofomona damierena dotaja rafue
 (Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie comina ibatajanona, ofomaiaina, toica llaudaiaia diga, damierie fecaidimaci. Iena Jesús cuanona, naimaci mesaiaina oni caicode.

Ucugina fecauidino rairacuai jiai oni caicode. ¹⁶ Jofo facaimo marena tu-illa jira, comini rana jamai uillanona, iedo jaisoidimaci. Atona tuidifodo jaidoidimaci. Iena Jesús rairuide. ¹⁷ Naimacina llofujete:

—Ie facaina lloraima micori Jusiñamui llogacino jaie cuela: “Cue jofote, nainomo nana comini cuemo jüillena” cuela. Ero, ailluena omoi ibataja jira, naimie jofona fiiriruidino jofona omoi finoca.

¹⁸ Judíuai illaicomini naimie finoca rafuena fidianona, naimiena meinellena, coniniri siadotimaci. Ailluena comini naimie llofuiana ebiruillanona, rajicaidimaci. Ie jira judíuai illaicomini naimiena jaciruillanona, naimiena nia meinenidimaci. ¹⁹ Nairui navuida ie llofueoicaigano diga, Jerusalémona Jesús oni jaide.

Jesús faidoca riana duilla rafue

(Mt 21.20-22)

²⁰ Ie are ie llofueoicaigano diga, Jerusalén dine Jesús jaillanona, higuera railla riana duillana ciodimaci. Nana ie jainao diga duillana ciodimaci. ²¹ Jesús navui are lluana Pedro uibiñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina ñnocana jai. ²³ Uanaicinona omoimo lloiticue. Jusiñamui lluana raise bu ñnoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite. ²⁴ Nie isoide rafue Jusiñamui omoi jicajia, naimie iena finuana omoi ñnuamona, iena naimie finoite. ²⁵ Jusiñamui o jiacania, jiamie diga o rafue ia iena feita. Ie isoi cai Moo Jusiñamui omoimo ite jeacino jai feitaite; ²⁶ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona, ²⁸ jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁹ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ³⁰ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluana ñnoñedomoi?” ³² “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

³³ Ie jira fairiotimaci:

—Uññoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

12

Jesúdi marañede majiraini rafuena llua rafue
(Mt 21.33-46; Lc 20.9-19)

¹ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jiaínomo fecade. Ie mei jiaie eniruemo jaide. ² Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riarai llisilla ollena; ³ iadedi naie sedarainidi ie mullaimana fatimaci. Ie mei naimiemo riarai fecaño naimiena abido oredimaci. ⁴ Ie mei patrón jiaie mullaimana orede. Naimie ifogina bofedimaci. Naimiena jeare finodimaci. ⁵ Ie mei patrón jiaimiena orede. Naimiena meinetimaci. Ie mei ailluena mullaiana orede. Damieriena fatimaci. Damieriena meinetimaci. ⁶ Patróno ie isiruiga jito ite. “Cue jítóna jaciruitimaci. Naimie uaina ñnoitimaci. Naimiena oretaiticue” patrón comecina facade. ⁷ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. ⁸ Naimaci dine naimie rilla mei, naimiena meinetimaci. Ie mei ie abina illimona jino dotadimaci. ⁹ Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Ie mei jiaínona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoína jaie cuete. Ie ciegafuena raise facañedomoi. Naimie micori cuela:

Jofu finoraini jitaiñena noficidi nana naie jofomo ite nofici baifemo jai uaide.

Jusiñamui iena finotate.

Iena cai uñuamona: “Eo mare” raiticai cuela. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

¹² Judíuai illaicomini iena cacajanona, Jesús naimacina ñaiana naimaci uñuamona, naimiena gaitaacadimaci; ia cominina jaciruitimaci. Ie jira naimiemona oni jaidimaci.

Jesúmo gobiernomo ucubena fecajana jicanua rafue
(Mt 22.15-22; Lc 20.20-26)

¹³ Judíuai illaicomini jailla mei, dajerie fariseuai cominina Jesús dine oredimaci. Illaima Herodes dibeimo itinona oredimaci. Naimie raise uai oñenia, naimiena duere finollena, Jesúna facaciacadimaci.

¹⁴⁻¹⁵ Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoicadicaí. Dani Jusiñamuina sedadicaí; iadedi romanuai railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomo? Ucube cuemo acata.

¹⁶ Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiade bie cuega radi?

Uai otimaci:

—César.

¹⁷ Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaana cacajano, naimie raise uai ua jira, ieri rajicaidimaci. Naimie iese llua jira, naimiena duere finonidimaci.

Jesús dine saduceuai railla comini billa rafue

(Mt 22.23-33; Lc 20.27-40)

¹⁸ Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

¹⁹ —Maestro, cai facaina Moisés micori jaie cuega: “Fima fiodailla meinocni, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁰ Bie rafuena uiñoiacadica. Siete amatiaie ite. Nano doforamie ie aina ote. Naimie nia uruiainide fiodailla. ²¹ Ie emodo imie ie ama feciñona ote. Naimie uruiainide jiaie fiodailla. Naie siete digamiedemona iese sefuide. ²² Uruaiainide nana fiodailla. Ja muidomo naie riño jiaie fiodaite. ²³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

²⁴ Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. ²⁵ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaie ainidimaci. Ininidimaci. Ie isoie naie siete amatiaie iitimaci. ²⁶ Fiodaitino ico jilloillena omoimo lloiticue. Moisés micorim jofue iñenanomo illa facaise, amena boode motodo Moisés micorim Jusiñamui ñaia facaise, naimie micorim comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ²⁷ Jai fiodaitimaci; ia naimaci joreñuau nia itimaci. Jusiñamuidi danij cagedino imaci Jusiñamuina jira, naimaci joreñuau naimie dine itimaci. Ico naimaci abiaina jiaie jillotaite. Fiodaillamona jilluana omoi raise uiñoñedomoi —llote.

Jesús nanoca llogacinona llofuia rafue

(Mt 22.34-40)

²⁸ Naie facaise Moisés micorim llogacinona llofueraima Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micorim jaie llogacinuaimona, ¿nie llogacino ua nanoca llogacinona?

²⁹ Jesús dinena uai ote:

—Moisés micorim jaie cuega: “Israel comini, bie rafuemo cacarei. Cai Nama Jusiñamui jaca dajede. ³⁰ Omoi jitailla jira, nana omoi comeciaie diga, cai Nama Jusiñamuina isirui. Naimiemo omoi comeciaina eo faca”. ³¹ Ie emodomo ite llogacino janore daje isoide: “Dani omoi abi omoi isiruilla isoie, omoi ecimo itinona jiaie isirui”. Bie mena llogacino jiaie llogacinuau baifemo faite.

³² Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede. ³³ Cai jitailla jira, nana cai comeciãi diga naimiena cai isirua, naimiemo cai comeciãina eo facaia, cai abina cai isiruilla isoi cai ecimo itinona cai isirua, Jusiñamuina raise sedadicaï. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o inocana jaia, Jusiñamui jitailla isoi, ie cominina raire jaitio. — Ie facaise mona buna naimiena facaciai biñede.

Jesús dinena fariseuai cominimo jicanua rafue

(Mt 22.41-46; Lc 20.41-44)

³⁵ Jusiñamui jofomo Jesús jailla mei, nainomo itinomo jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci? ³⁶ Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote: “Illaïmana o illamona, cue nabei ñine ana ra.

Ona inoñedino o anamo itataiticue”.

³⁷ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiaï ie Nama. —Nainomo itino naimie llofuiana iocire cacareidimaci.

Jesúdi judíuai illaicomina ñaia rafue

(Mt 23.1-36; Lc 11.37-54; 20.45-47)

³⁸ Jusiñamui jofomo Jesús nia llofuianona, raite:

—Moisés micori llogacinona llofuerainimona abina rairui. Ilaicomina naimaci itimacidena, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoïñedinona itimacidena, comini naimacina uaiduana gaidimaci. ³⁹ Comini naimacimo acarillena, ofiracomo uicomo raïacadimaci. Rafue ia: “Jamai bue isoïñedicaï” raillamo comecina facajanona, rafue nama ecimo raïacadimaci. ⁴⁰ Feciñuaimona rana ocabillanona, naiñaiñuaina duere finodimaci. Naimiena eo sedadimacidena, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

⁴¹ Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci. ⁴² Ie facaise eo duerede feciño menaruñu jonete. ⁴³ Iena ciuanona, naimie ñine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete. ⁴⁴ Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiño ite ucubena jonete. Ie jira jiaïno baifemo jonete.

13

Jesúdi Jerusalémo ite Jusiñamui jofo judaiana llua rafue

(Mt 24.1-2; Lc 21.5-6)

¹ Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiai co ebirede. Bico eo ebire cide.

² Jesús dinena uai ote:

—Bie jofo birui eo mare; ia nana bie jofomo ite noficiai ico judaisite —llote.

³ Ie mei Olivos raila anedu dine rillanona, Jusiñamui jofu uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴ —Jusiñamui jofu judaisillana omo jicanoiacadica. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵ Uai ote:

—Omoína bie rafuena bu jifueñellena, omoi abina rairui. ⁶ Ailluena comini cue mamecido billemona: “Cristodicue” raitimaci. Diga comina jifueitimaci. Iemona omoi abina rairui. ⁷ Jobaimia: illena fidiitomo; iadedi jacruñeno. Iese suite; iadedi abido nia biñeiticue. ⁸ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime guitimaci. Iese suia, omoi duere sefuillifue omoimo suite. ⁹ Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitoi. ¹⁰ Diga comini cue rafuena nana nairaimo lloitimaci, nana nairai iena cacaillena. Ie mei abido biiticue. ¹¹ Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uifioitomo. Dani omoi comeciai icinodo ñañeitolomo; ia Jusiñamui Joreño uaido ñaitomo. ¹² Cuen a notomo; ia ailluena cuena ñnoñeitolomo. Cuen omoi ñnua jira, omoína enoitimaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruaidi naimaci moona, naimaci eina meinetallena, naimacina llogidoitimaci. ¹³ Cue comina omoi illamona, nana nairai omoína enoitimaci; iadedi cuena fañonocañedimie ja muidomo monamo jaca iite. Naimiena jillotaiticue. ¹⁴ Cue llamo cacarei. Jusiñamui facaina lloraimadi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitolomo. Nainomo ite jearede rafue finuana omoi cuanona, naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi. ¹⁵ Jofu emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uifeno. ¹⁶ Aneduai dine raire rillena, illimo omoi ia, abido jofomo biñeno, omoi iniroi omoi diga uillena. ¹⁷ Naie rafuemono jillobillena, naie facaise urueside riño duere sefuite. Uruena nia jirode riñodi jiaie duere sefuite. ¹⁸ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. ¹⁹ Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñeitolomo. ²⁰ Naie facaise ianori fo Jusiñamui ofñeiten, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹ Ie facaise omoimo bu raia: “Jadi, Jusiñamui facaina lloraima benomo birui bairedo. Naimiedi Cristo”, iena ñnoñeno, jiaimie raia: “Oni

batine Cristo birui bairede”, iena ñnoñeno. ²² Cristona abí caitadino biitimaci. Jusiñamui facaina llorainina abí caitadino jiaí biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²³ Ie jira omoi abina rairui. Ero, bie rafue nia suiñenia, iena omoimo jai lloticue.

Jesús abido ie bille rafue

(Mt 24.29-35, 42-44; Lc 21.25-36)

²⁴ Naie duere sefuilla facaise meinoconi, jitoma lligaiñoñeite. Fivui jiaí lligaiñoñeite. ²⁵ Monamona ucuaí ana llujite. Nana naie radi jaidisite. ²⁶ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁷ Cue jaienisaina cue ecimona oretaiticue. Cue fetocano diese naganomona ofitaitimaci.

²⁸ Higuera railla riaromona omoi fueo. Bie eniruemo naie riaru firuillamona, fiemona raire illana uiñotomoi. ²⁹ Ie isoide. Bie rafue ico suia, cue billirui iaírei illena uiñotomoi. ³⁰ Uanaicinsona omoimo lloticue. Nana bie rafue suille facaiseconi bie nairai nia iite. ³¹ Mona enirue diga fuite; iadedi cue lloga uai jaca suite. ³² Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiaí uiñoñedicue. Dama cue Moo iena uiñote. ³³ Abina rairuicana jai. Naimie omoína canollena, Jusiñamuimo jiaí jicabi. Cue billirui omoi uiñoñena jira, iemo ocuiri.

³⁴ Tena omoi raise uiñollena, bie rafuena lloticue. Patrón jiaie eniruemo jaide. Nia jaiñenia, ie mullaiaína ie jofona sedatate. Nagamie ie maijille ocuide. Jofo nasena sedadimiemo naimie billemo raise ocuirillena llote. ³⁵ Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaiá, nibai biite. ³⁶ Ebena naimie biite. Inidimacimo naimaci baisaibi raillanona, naimaci jaca ocuirilla. ³⁷ Ie isoide. Ebena biiticue. Cue abido billirui omoi uiñoñena jira, iemo jaca omoi ocuiri.

14

Judíuai illaicomini Jesúna gaitallena, siadua rafue

(Mt 26.1-5; Lc 22.1, 2; Jn 11.45-53)

¹ Naie facaise pascua railla rafue illena, menarui fiebide. Naie facaise llomenico guille rafue jiaí ite. Naie rafue ia, siritaga rana jaca guiñedimaci. Egiptomona naimaci jaiagai jillobillana começillena, naie rafue ite. Judíuai illaicomini Jesúna jifuiano gaitaacadimaci. Naimiena meineiacadimaci. Iena siadua mei, ² raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuiritimaci. Nia sedaiticai.

Jesúmo riño caimare soride ra totaja rafue

(Mt 26.6-13; Jn 12.1-8)

³ Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. ⁴ Damierie iena ciuanona, iciritimaci. Coniniri daní ñaitimaci:

—Naie ra jamai dotade. Jai faifide. ⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

⁶ Naimaci ñaiana Jesús uñua jira, naimacimo llote:

—Dama ite. ¿Bue ñellena naiñaiñona jeare ñaitomoi? Mare rafuena cuemo finode. ⁷ Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. ⁸ Cue facaina naiñaiño finoacana diese jai finode. Nia fiodañedicue; ia cue fiodaillirui facaina naiñaiño iese finode. ⁹ Omoimo uanaicinona lloiticue. Ninomo cue mare finoca rafuena bu lloia, naiñaiñona uibñollena, nana cominimo naiñaiño finoca rafuena lloite.

Judas micori raillamie Jesúsna gaitataiacana rafue

(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúsna gaitatallena, Jusiñamui diga nanoca ñairaini dine jaide.

¹¹ Iena cacajano, iobidimaci.

—Iena o finoia, omo ucubena fecaiticai —lloitimaci. Iemona Jesúsna gaitatallirui Judo ocuride.

Jesúdi ie fiodaille rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llaudaiaina fajarui illanona, Jesúsno ie llofueoicaigano jicanote:

—¿Ninomo pascua railla rafue ie guille finuana jitaideo?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca. ¹⁴ Naimie jailla jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” ¹⁵ Ie mei omicomio afebebamo ite aillue cuartaona acataite. Na raruiaí diga ite. Nainomo cai guille fino.

¹⁶ Jesús llua isoi jaidiaimaiaí. Jerusalémo rilla mei, naimie llua isoi baitiaimaiaí. Pascua rafue guille finodiaimaiaí. ¹⁷ Nairui jítoma ana itemo, ie llofueoicaigano diga, Jesús nainomo guisaide. ¹⁸ Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

¹⁹ Iena cacajanona, sunaitimaci. Damierie naimiemo jicanoside:

—¿Cuena ñaitio?

²⁰ Uai ote:

—Omoimona damie bie platomo cue diga llomenico diga mutade.

²¹ Jusiñamui facaina lloraíma micori cuega isoi, monamona jai billamona, fiodaíticue; iadedi cuena gaitataitimie eo duere sefuite. Naimie jeicñegadena, cuemona mare.

²² Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abí facai ie. Cue abimo omoi comequina facajano, iena guiño.

²³ Ie mei naimie jiroracomio jai llinote. Jusiñamuimo iobillacinona llua mei, naie jiroracomio jai totaca vino naimacimo fecade. Iemona nana jirodimaci. ²⁴ Naimie raite:

—Cue fiollaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie. ²⁵ Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue.

Jesúdi Pedro naimiena januana llua rafue
(Mt 26.30-35; Lc 22.31-34; Jn 13.36-38)

²⁶ Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. ²⁷ Naimacimo llote:

—Cuenta fainonocaitomoi. Jusiñamui facaina lloraima micori iena jaiie cuega: “Toica llaudaiaie sedaraimana meinetimaci. Naimie toiniaie uaficaida jaitimaci” cuega. Naimie micori caina cuete. ²⁸ Ero, fiollaillamona cue jillua mei, omoi uicodo Galileamo jaiticue, nainomo omoi diga dafai fillena.

²⁹ Pedro uai ote:

—Nana jiaíno ona fainonocaia, ona jaca fainonocaiñeiticue.

³⁰ Jesús dinena raite:

—Uanai omo lloiticue. Ja naio itava menacaiño nia ñaiñenia, dacaíño amani cuena janoitio.

³¹ Pedro dinena riire llote:

—O diga cue fiodaíadedi, ona janoñeiticue.

Nana ie llofueoicaigano daje uaido jiaie raitimaci.

Jesúdi Getsemanímo Jusiñamuimo jia rafue
(Mt 26.36-46; Lc 22.39-46)

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoímona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiaie uite. Naimie sunaicaide. Ie comeci uri iñede. ³⁴ Naimacimo llote:

—Cue comeci sunaicaide. Niadi fiodaíticue. Benomo fiebi; ia nia iniñeno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jii de:

³⁶—Ore Moo, nana rana finoredio. Cuenta legi cacaitañeno. Cue jitailla isoi cuenta finoñeno; iadedi o jitailla isoi cuenta fino.

³⁷ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo. ³⁸ Iniñeno. Tai fe ramo omoína fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoína naimie ocuiñotallena —llote.

³⁹ Ie mei dane jii llena jaide. Ailli naimie jia isoi, dane jii de. ⁴⁰ Ie llofueoicaigano dine dane billanona, naimaci uisi llirioilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. ⁴¹ Dane jia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodaílle faicise jai ite. Jusiñamui jitailla jira, cuenta ja gaitajanona,

naimiēna iñoñedino anamo ja iiticue. ⁴² A naidacai. Maiña. Cue gaitataitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci. ⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiēna llibanoiticue. Ie mei naimiēna gaita. Naimiēna raise maianona, naimiēna oni uiño.

⁴⁵ Jesús dine naimie rillanona, Judas Jesús dine raire jaide. Naimiēna uaidote:

—Maestro, jai biticue. —Ieconi naimiēna llibanote. ⁴⁶ Ie jira Jesúna gaitadimaci.

⁴⁷ Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote. ⁴⁸ Naimiēna gaitadinomo Jesús llote:

—Omoi lloebina atidomoi. Omoi butaralluna atidomoi. Cuena gaitallena, firiraimadicueta cuemo omoi billa. ⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuena jai omoi gaitajamona, Jusiñamui facaina lloraini micoriai cuegafuiai suite.

⁵⁰ Ie facaise nana naimie llofueoicaigano naimiēna fainonocaillano, aisidimaci.

Jesús jinafona conirue racaja rafue

⁵¹ Ie facaise daje conirue Jesús jinafona racade. Jamai abimo iniroi ferinocaida racade. Naimiēna ciuanona, comini naimiēna gaitadimaci; ⁵² ia ie iniroina fainonocaillanona, taimiēna aiside.

Jesúdi judíuai illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

⁵³ Jesúna gaitaja mei, Jusiñamui diga nanoca ñairaima dine naimiēna uitimaci. Nana judíuai illaicomini itimaci. Nanoca ñairaini itimaci. Einamaci jiai itimaci. Moisés micori llogacinona llofueraini jiai itimaci. ⁵⁴ Pedro naimaci jinafona aarena racade. Jusiñamui diga nanoca ñairaima nairairimo jaide. Jofono sedadino diga nainomo ite iraimo agaide.

⁵⁵ Naimiēna meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci. ⁵⁶ Diga comini Jesúna llogidotimaci; ia tainona llotimaci. Daje isoi lloñedimaci. ⁵⁷ Damierie billanona, tainona llogiduanona, raite:

⁵⁸ —Bimie llwana cacadicaí. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaianona, darui amani illanona, jiaie finoiticue. Comini iena finoñeitimaci”. ⁵⁹ —Iese llotimaci; ia daje isoi lloñedimaci.

⁶⁰ Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niēse uai oitio? ¿Nie isoide rafue ona llogidotimaci?

61 Jesús dinena uai oñede. Naie ñairaima jìcanote:

—¿Odi Cristodio? ¿Odi Jusiñamui Jitodio?

62 Jesús uai ote:

—Jii, naimiedicue. Monamona jaie cue billamona, imana jaidicue; ia ico jiaruido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiai cioitimaci.

63 Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaño naimiena llogidollena jai jitaiñedicai. 64 Jusiñamuina naimie jeare ñaiana jai cacadomoi. ¿Niese naimiena raitomoi?

Jiaie illaicomini dinena:

—Naimie fiodaillesa —llotimaci.

65 Ie facaise damierie naimiena tuallaitimaci. Ie uiecona ibaila mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoidimaci.

Pedrodi Jesúna janua rafue

(Mt 26.69-75; Lc 22.56-62; Jn 18.15-18, 25-29)

66 Naie facaise Pedro nairairirimo ite. Naie nanoca ñairaima mullaiñuaimona dañaiño nainomo billanona, 67 Pedro agaillana ciode. Raite:

—Nazaret ie Jesús cominidio.

68 Pedro iena januano, raite:

—O lluaña uñoñedicue. Iena raise cacaiñedicue.

Ie mei nase fuedo jaide. Naie facaise itava dacaiño ñaite. 69 Naie mullaiño naimiena dane cianona, nainomo jamai itinomo llote:

—Bimiedi Jesús ie llofueoicaigano imie.

70 Iena Pedro dane janote. Dallu illanona, nainomo jamai itino Pedromo llote:

—Odi Galilea imiedio. Jesús diga jaicabidio.

71 Uai ote:

—Uanai cue lloñenia, Jusiñamui cuena duere finoite. Uanaicinona cue lluaña naimie uñote. Ero, omoi llogamiena uñoñedicue.

72 Ieconí itava dane ñaite. Iena cacajano, Pedro Jesús lluaña uibiñote. Jaive naio Jesús Pedromo llote: “Itava menacaiño nia ñaiñenia, dacaiño amani cuena janoitio”. Iena uibiñuamona, Pedro eo eede.

15

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

1 Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador. 2 Pilato naimiemo jìcanote:

—¿Judíuai comini illaimadio?

Jesús uai ote:

—Jii.

3 Ie muidona Jusiñamui diga nanoca ñairaini Jesúna llogidotimaci:

—Naimie diga marañede rafuena finode —llotimaci.

4 Pilato dinena naimiemo jìcanote:

—¿Ni ese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodi Jesús fiodaillana llua rafue
(Mt 27.15-31; Lc 23.13-25; Jn 18.38-19.16)

⁶ Naga año pascua railla rafue facaiseconi cárcelmo itinomona Pilatodi comini jicacamiēna jamai jino orede. ⁷ Bie facaise cárcelmo Barrabás raillamiē ite. Gobierno diga naimiē navui jobairilla jira, naie facaise comena naimiē meinia jira, cárcelmo ite. ⁸ Ie facaise ailluena comini Pilato dine ofillanona, cárcelmona naimiē finocabilla isoi, damiē jino jamai oretallena jicadimaci. ⁹ Pilato jicanote:

—¿Bu jino cue oretallena jitaïdomoi? Omoi judíuái railla illaïmana níbaï jitaïdomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meiniacanana jiaï uiñote. ¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. ¹² Iena cacajano, Pilato naimacimo jicanote:

—¿Ni ese bimienā cue finuana jitaïdomoi? Naimiedi omoi judíuái illaïma raillamiē.

¹³ Ado llotimaci:

—¡Naimiēna coraï!

¹⁴ Pilato dane jicanote:

—¿Ni e isoide marañede rafuena finode? —Iena cacajano, ado ibi llonoidimaci:

—¡Naimiēna coraï!

¹⁵ Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiēna coraïllena orede.

¹⁶ Soldaduaï naimiēna gobernador jofo fo uillanona, nana soldaduaï nainomo ofidimaci. ¹⁷ Jiduirede iniroi naimiēmo jitaïdimaci. Eecuaimona niga nuiciraina naimiē ifogimo jitaïdimaci. ¹⁸ Naimiēna jifanoduanona, naimiēna uaidotimaci:

—¡Jadi, judíuái illaïma!

¹⁹ Radosi diga ie ifogimo buta-butadimaci. Naimiēna tuallaïtimaci. Naimiē illaïmana itena, naimiēna sedallena, cañici ifodo raiedimaci.

²⁰ Jesúna naimaci jifanodua mei, naimiē jiduirede iniroina duiñodimaci. Nano naimiē iniroina dane abido naimiēmo jitaïdimaci. Ie mei naimiēna coraïllena oni uitimaci.

Jesúna coraïa rafue
(Mt 27.32-44; Lc 23.26-43; Jn 19.17-27)

²¹ Jerusalémona naimaci jaillanona, jamai bitimiēmo dafaïfidimaci. Naimiedi Simón. Cirene railla enirue imiē. Naimiē jito iaïmaiaïdi Alejandro iaïmaiaï Rufo diga. Jerusalén onifemona naimiē billanona, naimiēmo dafaïfidimaci. Naimiēna Jesús uiga cruzna rocatatimaci.

²² Gólgota raillanomo jaidimaci. Ifocoraina eruaila jira, iese mameciredē.

²³ Nainomo rillanona, ie abi isirena cacaiñellena, vinomo erirede rana faianona, Jesúmo fecadimaci; iadedi naimiē iēna jiroñede. ²⁴ Ie mei naimiē cruzmo coraïa mei, cruzna naidania mei, naie soldaduaï naimiē iniroi danī coninimo fecasite. Naie iniroi bu uille raillanona uiñollena, jifanododimaci.

25 Jitoma nia fuiri daidemo, naimiena coraidimaci. 26 Cruzmo ie llogiduafulena jonetimaci. Jai cuega: “Judíuai comini illaíma”. 27 Ie mei mena firiruide iaimaiaína coraidimaci. Damie Jesús nabeimo coraica. Jiaimie Jesús jarifebeimo coraica. 28 Iemona Jusiñamui facaina lloraima micori jaiie cuegafue suide. Cuega: “Maraiñedino isoi naimie jai ite”.

29 Naisodo jamai jaidino Jesúsna mameritimaci. Mamerillamona, ifogíaina jaididimaci. Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoiticue” raisoidio. 30 Ie muidona dama o abina mai jillota. Cruzmona ana bi.

31 Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. 32 Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iena cai cioia, naimiena inoiticaí. —Iese naimiena jifanododimaci. Naimie diga coraicamie iaimaiaí naimiena jiai jeare ñaitiaimaiaí.

Jesús fiodailla rafue

(Mt 27.45-56; Lc 23.44-49; Jn 19.28-30)

33 Jitoma naidai itemona, daje amani horas mona jitibicaide. 34 Ie meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobañiuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

35 Iena cacajano, nainomo jamai itinomona damierie raitimaci:

—Naimie jaiie Jusiñamui facaina lloraima Eliana uaidote —raitimaci. 36 Naimacimona damie jarire jaillanona, fibecode ramo vinona faite. Radosimo jillillano jirrollena, naimiemo a fecade. Raite:

—Dallu sedaiticaí. Elías naimiena jillotajai billena uifoiacadicai.

37 Ie facaise ado cuirioita fiodaite. 38 Naie facaise Jusiñamui jofomo ie fetaca iniroife ana anaba jillacimo motodo menafe cuararide. 39 Jesúsna sedallena, nainomo capitán ite. Jesúmo eruaillanona, Jesús fiodaillana ciode. Raite:

—Uanaí bimiedi Jusiñamui Jito.

40 Dajerie riñoniaí naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite. 41 Galileamo Jesús navui illa facaise naie riñoniaí naimie diga jaisoidimaci. Naimiena canouidimaci. Jerusalémo Jesús billanona, ailluena riñoniaí naimie diga jiai bitimaci. Ie fiodaillana jiai cioidimaci.

Jesús raiafomo jonia rafue

(Mt 27.57-61; Lc 23.50-56; Jn 19.38-42)

42 Jitoma ana itemo, sábado rille jai iairei illanona, 43 Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuifocaida, Pilato dine jaide. Iena raillena, Jesús abina jicade. 44 Iena cacajano, Pilato Jesús fiodaillana raise uifoiacade. Ie fiodaillana nia fidiñede. Jesúsna sedade capitána uaiduanona, naimiemo Jesús fiodaillana jicanote.

⁴⁵ —Jesús jai fiodaite —capitán railla mei, Pilato Jesús abina Josémo fecallena llote. ⁴⁶ José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade. ⁴⁷ María Magdalena, jiaie María diga, naimie raiana ciode. María José ei.

16

Jesús fiodaillamona jillua rafue
(Mt 28.1-10; Lc 24.1-12; Jn 20.1-10)

¹ Sábadoruimo jítoma sojicaidemo, María Magdalena caimare soride rana ibade. Jacobo ei, María jiai ibade. Salomé jiai ibade. Jesús abimo jonellena, ie abina raise finollena naimaci einamaci finocabilla isoi, naiñaiñuai iena ibade. ² Domingo jítiramo jítoma como bairedemo, Jesús raiafo ñine naiñaiñuai jaide. ³ Jaillanona, coníñuaimo jicanote:

—¿Bu noficina caina oni ñuitalle raiafomona?

⁴ Raiafo ñine rillanona, iemo eruaillanona, nofici oni ñuitacana ciode. Naie nofici eo aillue. ⁵ Raiafomo jaillanona, naiñaiñuai coniruena eruaidimiena nabeimo raillana ciode. Naimie are userede iniroina jítade. Naimiedi jusiñamui jaienici. Naiñaiñuai jacinaite. ⁶ Nainomo itimie dinena raite:

—Jacinañeno. Nazaret ie Jesúsna jenodomoí. Naimiena coraidimaci; ia fiodaillamona naimie jai jillode. Bene jai ñíede. Naimie jonianomo mai eroda. ⁷ Naimie llofueoicaiganomo iena lluai. Ua Pedromo llono. Galileamo omoi uicomo naimie jaite. Omoimo naimie llua isoi, naimiena cioitomoí.

⁸ Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bumo lloñede.

Jesús María Magdalenamo bairia rafue
(Jn 20.11-18)

⁹ Domingo jítiramo Jesús jillua mei, María Magdalenamo Jesús nano bairedo. Naiñaiño Janaba anamo navui illamona, Jesús naiñaiñomona siete jananiai navui oni orede. ¹⁰ Naiñaiñomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai ciodicue —naimacimo naiñaiño llua mei, iena ñnoñedimaci.

Mena llofueoicaiganomo Jesús bairia rafue
(Lc 24.13-35)

¹² Ie meinocni Jesús mena llofueoicaiganomo bairedo. Naimie eruaisoilla isoi, eruaíñede. Iaimaiaí naisomo macaria, iaimaiaimo bairedo. ¹³ Jerusalémo abido iaimaiaí rilla mei, jiaie llofueoicaiganomo iena llotiaimaiaí; ia ñnoñedimaci.

Jesús ie once llofueoicaiganomo bairia rafue
(Mt 28.16-20; Lc 24.36-49; Jn 20.19-23)

¹⁴ Ie once llofueoicaigano danomo guitimacimo, Jesús naimacimo bairedo. Naimie jillua mei, damierie naimiena ciuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote. ¹⁵ Naimacimo llote:

—Nana nairaiaimo jai. Nana cominimo cue mare rafue llocana jai. ¹⁶ Cuen a ñnuamona, bautizagano diese Jusiñamui mona duere sefuiñeitimaci; iadedi Jusiñamui cuena ñnoñedinona duere finoite. ¹⁷ Cuen a ñnotino Janaba anamo itinomona Janabana oni oretaitimaci. Naimacina uiañoñega uaido ñaitimaci. ¹⁸ Jaiona naimacina llinoa, naimacina niese nibaiñeite. Bainode ra naimacina jiroia, naimacina niese nibaiñeite. Duidinona naimacina jetajamona, jilloitimaci.

Jesús monamo jailla rafue

(Lc 24.50-53)

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaiana Jesús illa jira, Jusiñamui nabeimo naimacina raide. ²⁰ Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimacina rafue illana uiañoñeitimaci. Macaibaite. Cue cuega rafue jai fuite. Marcodicue.

LUCAS JESUCRISTO ENIRUEMO ILLA RAFUE CUIAFUE

Lucas Teófilomo cartana orede

¹⁻⁴ Teófilo, cue isiruiga nabai. ¿Ñigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena cioidimaci. Iena llocana jiai jaidimaci. Naimacimona bie rafue raise uifoticue. Bie rafuena fidiana, damierie iena jai cuetimaci. Bie rafuena jiai jai cacadio. Bie rafuena cue raise uifua jira, uanaicinona o raise uifollena, bie cartana jai cueticue. Iese birui cue comeci jitaide.

Jusiñamui jaienicí Juan Bautista micorí jeicillena llua rafue.

⁵ Jesucristo nia jeicñenia, Zacarías illa facaise Herodena mameciredede illaimadi. Judea railla eniruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijiuide. Naimie aidi Elisabet. Naiñaiño jaie ite usumadi Aarón micorí. Aarón micorí Jusiñamui diga nano ñairaima. ⁶ Jusiñamuimona iaimaiaí mare, nana naimie lloga uaina raise iaimaiaí ñnua jira. ⁷ Naiñaiño oiniñona jira, uruenidiaimaiaí. Jiai jai uaicima iaimaiaí.

⁸ Zacarías facai ite comini maijia facaise ia, Jusiñamui jofo dine naimie maijiaide. ⁹ Nainomo naimie maijia, caimare soride ra fo jobaillena, naimiena fetodimaci. Naimaci finouilla isoi, jobaillanona daní Jusiñamui diga ñairaini naimiena fetodimaci. Iemei naimie fo jaide. ¹⁰ Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci. ¹¹ Ieconí cai Nama Jusiñamui jaienicí naie ra boano nabeimo Zacaríamo bairede. ¹² Naimiena ciuanona, Zacarías jacinaité. ¹³ Jaienicí naimiemo llote:

—Zacarías, jacinaiño. Jusiñamui o jiacinona jai cacade. Iemona o ai uruesite. Imana jocoite. Juan o jítalle naimie mamecidi. ¹⁴ Iemona o comeci caimare iite. Iobitio. Ailluena comini naimie jeiciari iobitimaci. ¹⁵ Jusiñamuimona naimie jamai bue isoifeitimiena jaite. Jifaitate rana jiroñeite. Naimie jeiciamona Jusiñamui Joreño naimiena namataite. ¹⁶ Cai Nama Jusiñamui dibeimo ailluena Israel cominina naimie itataite. ¹⁷ Jusiñamui jitaillacinona finocana jaite. Elíamo Jusiñamui Joreño jaie siño uai illa isoi, naimiemo iite. Jusiñamui rafuena naimie llua-mona, damierie, naimaci jaigai isoi, Jusiñamuina ñnoitimaci. Ailluena Jusiñamui uaina jai ñnoñedimaci; ia damierie birui ñnoitimaci. Naimaci comeci Jusiñamui dibeimo meidoitimaci. Iemona cai Nama Jesucristo bia, naimiena ñnoitimaci.

¹⁸ Zacarías dinena jicanote:

—¿Ñiese o llua suillena uifoticue? Jai uaicimadicoco.

¹⁹ Jusiñamui jaienicí dinena uai ote:

—Gabrieldicue. Jusiñamuimona biticue. Cuen a oretate, bie mare rafuena omo llollena. ²⁰ Ero, cue uaina o ñnoñena jira, uainitio, o jito jeicille dinori. Jiairuido bie rafue suite.

²¹ Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are

biñena jira, rajicaidimaci. ²² Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai lluana uiñotimaci. Naimie ñaiñeno ite. ²³ Jusiñamui jofomo naimie maijia facaise fuilla mei, ie jofomo abido jaide. ²⁴ Digarui illanona, ie aidi urueside. Ie jira jofomo naiñaiño cinco fivui fiebide, comecina facajanona: ²⁵ “Cue uruesilla jira, iena nia buna lloiacaiñedicue. Cue Nama cuena jai duenaillana uiñoticue. Navui cue urue iñena jira, meiruiticue. Jai meiruiñeiticue. Comini cue joreñona jai ñaiñeitimaci”.

Jusiñamui jaienici Jesús jeicillena lua rafue

²⁶⁻²⁷ Elisabet seis fivui uruesilla mei, Jusiñamuidi Galileamo ie jaienici Gabrielna orede. Nazaretmo María dine naimiena orede. María nia ininide; ia jai José jicanogañaiño. Naimie usumadi David micori.

²⁸ Rillanona, naiñaiño lote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

²⁹ Iena cacajanona, naiñaiño jacinaite. Iena naiñaiño raise cacaiñena jira, iemo comecina facade. ³⁰ Gabriel dinena lote:

—Jacinañeno. Jusiñamui ona duenaite. ³¹ Birui uruesitio. Himana jocoitio. Naimie mamecina jitaitio Jesúna. ³² Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiema illaimana itataite. ³³ Illaimana illamona, Israel railla nairaina jaca sedaite. Naimie ifomo jiaimie jaca iñeite.

³⁴ María uai ote:

—Hima diga nia iñedicue. ¿Ñiese bie nibaille?

³⁵ Gabriel lote:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiai marenite. Naimiedi Jusiñamui Jito. ³⁶ O comini iñaiño, Elisabet, ie uacitaila facaise jiai jai urueside. Naiñaiño jai jionaide; ia jai seis fivui naiñaiño uruesilla ite. ³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo iticue. O llucacino cuemona mare. Ie facaise Gabriel naiñaiño mona oni jaide.

Maríadi Elisabet dine jailla rafue

³⁹ Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide. ⁴⁰ Zacarías jofomo rillano:

—Itio —raillanona, Elisabetna uaidote. ⁴¹ Elisabet naiñaiño uaina cacajano, ieconi naiñaiño jeraimo ite urue iena jiai uiñuamona, niraide. Ie facaise Jusiñamui Joreño anamo Elisabet jai ite. ⁴² Iese illamona, María uruesillana uiñote. Naiñaiño ado lote:

—Jusiñamui ona eo marena canoite. O uruena marena itataite. ⁴³ Jamai bue isoidicue; ia, odi cue Jilloitaraíma ei illanona, cue dine bitio. Iena cuemo nia lloñedio; ⁴⁴ ia, cuena o uaiduanona, iobillamona cue jeraimo ite uruedi niraide. ⁴⁵ Cai Nama omo llotataga uaina suillana o inua jira, Jusiñamui ona eo marena canoite. —Jusiñamui Joreño naiñaiño mona, iena lote.

⁴⁶ María dinena uai ote:

Caiñai Nama eo mare. Naimiemo iobillacinona fecaacadicue.

⁴⁷ Naimiedi cue Jilloitaraímana jira, naimieri iobidicue.

⁴⁸ Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

⁴⁹ Naimiedi siño. Naimiedi mareuidimie. Cue facaina eo mare rafuena finode.

⁵⁰ Naimiena ñnotinona jaca duenaite. Cai jaigaina jaca duenaite. Caina birui jaca duenaite. Ua nana naimiena ñnotinona duenaite.

⁵¹ Diga siño rafuena finoite. Abi iedotino comeciai facajacinona llicaitaite.

⁵² Naimiedi illacomina oni dotaite; ia jamai bue isoidinona jamai bue isoiñedinona itataite.

⁵³ Dueredinona eo canoite; ia duenidinomo buena fecañeite.

⁵⁴ Duenailamona, cai Israel comina feitañeite.

⁵⁵ Cai jaigaimo naimie jaie llua isoi, birui caina canoite.

Abraham micorimo jaie llote: “Ona duenaiticue. O comina jaca duenaiticue”

María llote. ⁵⁶ Elisabet diga davui amani naiñaño fiebide. Ie mei ie jofomo abido jaide.

Zacarías jito jeicia rafue

⁵⁷ Elisabet jocuarui jai ridemo, imana jocode. ⁵⁸ Naiñaño ecimo ite comini, naiñaño comini diga, iena fidiamona, cai Nama naiñañaona eo duenailana uñotimaci. Naiñaño diga iobidimaci. ⁵⁹ Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci; ⁶⁰ iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

⁶¹ Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

⁶² Jefona cacaiñena jira Zacaríamo onolli diga jicanotimaci, ie jito mamecina jitalle. ⁶³ Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jítade?” comeciaina facadimaci. ⁶⁴ Ieconí Zacarías jai dane ñaite. Ie jira Jusiñamuimo iobillacino fecade. ⁶⁵ Nana iaímaiai ecimo itino rajicaidimaci.

—Jusiñamui muidona naie rafue suide —llotimaci. Bie rafuena fidiano, nana Judea railla aneduaimo itinodi iena ñaoidimaci. ⁶⁶ Iena cacajano, comeciaina facadimaci: “Bimie jamai bue isoiñeitimiena jaite”. Cai Nama naimiena marena jaca canua jira, iese llotimaci.

Zacarías Jusiñamuimo iobillacinona fecaja rafue

⁶⁷ Ie facaise Jusiñamui Joreño Zacaríana llotatajanona, Zacarías llote:

⁶⁸ Cai Nama Jusiñamuidi mare.

Cai Israel comini dine biite, caina jilloitallena.

⁶⁹ David micori Jusiñamuina jaie sedade.

David micori cominimona siño Jilloitaraímana cai dine oretaite.

⁷⁰ Ie facaina llorainido naimie jaie llua isoi, cai Jilloitaraímana oretaite,

⁷¹ Taífemona, Janabamona cai jilloillena.

⁷²⁻⁷³ Cai usumatiai micoriaimo: “Omoína duenaiticue” llote.

Cai usuma Abraham micorimo jaie llogacinona feitañede.

⁷⁴⁻⁷⁵ Taífemona cai jilloillena, cai Jilloitaraímana oretaite.

Nana cai ille dinori Jusiñamuina jaciruiñeno sedajana jitaide.

Naimie jitailla isoi cai illena, naimie jitaillacinona cai finollena, cai jilloitaraímana oretaite.

⁷⁶ Cue jito, ona lloiticue. Jusiñamui ie llorámana jaitio.

Cai Nama uicomo jaitio, comini comeciai o raise finollena.

⁷⁷ Ie cominimo jeacinomona jilluacinona lloitio.

Iena naimaci #noia, Jusiñamui naimaci jeacinona feitaite.

⁷⁸⁻⁷⁹ Jeacino anamo jai cai illa jira, jitiredinomo iticai isoidicai.

Jusiñamuina cai nia #noñenia, fiodaillana jaciruiticai.

Naimie caina duenaillamona, cai Jilloitaraïma billena o llofuellena, ona oretaite.

Naimiena cai #noia, jitiredinomo iñeiticai; ia Jusiñamui diga cai comeciai uri iite.

⁸⁰ Zacarías jito sairide. Jusiñamuina #nocana jaide. Cominimo naimie nia marefodo lloñenia, jofue iñenanomo ite.

2

Jesús jeicia rafue

(Mt 1.18-25)

¹⁻² Jesús jeicia facaise César Augusto anamo ailluena nairaiïa ite. Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaimo illana naimie uiñollena, nana comini mameciai cuellena ocuide. Jaca bu iese jaie finoñede. ³ Naimaci jaiagai illanomo mameciai cuiana ocuide. ⁴ Ie jira José Galileamona Nazaretmona jaide. Judeamo Belémo jaide. David micori cominimo naimie jainaiïa jira, David micori illanomo jaide. ⁵ Ie ai María diga jaide. Naiñaiño fenai jai eo aillue. ⁶⁻⁷ Belémo iaïmaiaï rillanona, naie facaise comini jofomo inillino iñena jira, jurareta jofomo ridiïaïmaiaï. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisai toïca llaudaïaï sedaraini dine jailla rafue

⁸ Jesús jeicia facaise naie naio Belén ecimo ite pastomo damierie toïca llaudaïaïna sedaraini itimaci. Naimaci toïniïaïna sedadimaci. ⁹ Ieconï cai Nama Jusiñamuimona daje jaienicï naimacimo ebena baïrede. Jusiñamui ie siño uai diga naimacina quetiñote. Jacinaitimaci. ¹⁰ Jaienicï llote:

—Jacinaiñeno. Mare rafue lloiacadicue. Nana cominina iobitalena, iena lloiacadicue. ¹¹ David micori illanomo damie como jeiciga. Jusiñamui facaina lloraini micoriaï naimie billena jaie lloudimaci. Naimiedi Cristo cai Nama. Naimie omoi Jilloitaraïma. Jeacinomona omoina jillotaite. ¹² Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue lluana uanaicinona uiñoitomoi —llote.

¹³ Ie facaise naie jaienicï dine ailluena jaienisai bitimaci. Jusiñamuimo iobillacinona fecajano rotimaci:

¹⁴ Monamo Jusiñamui illanona, naimiemo iobillacinona fecaacadicaï. Cominina naimie duenaillamona, naimie diga uri iitimaci rotimaci. Ie mei abido jaidimaci.

¹⁵ Monamo jaienisai jailla mei, toïca llaudaïaï sedaraini coniniri ñaitimaci:

—Belémo mai cai jailli, cai Nama caïmo como lloga rafuena cai jibuisaillena.

¹⁶ Ieconï raire jaidimaci. María José diga baitimaci. Iaimaiaï urue jurareta ecaranomo biillana ciodimaci. ¹⁷ Naimiena ciua mei, nana

naimacimo jaienici lloga rafuena llotimaci. ¹⁸ Nana naie rafuena cacadinodi ieri rajicaidimaci. ¹⁹⁻²⁰ Iaimaia i ruena ciua mei, llaudaia i sedaraini imaci toinia i dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

Jerusalémo Jusiñamui jofomo Jesúna iaimaia i uilla rafue

²¹ Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

²²⁻²⁴ Moisés micori jaie llua isoi Jerusalémo Jesúna uitiaimaia. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaima iena faja mei, riño facaina Jusiñamuimo jobaica”. Jia i cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaimaia.

²⁵ Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inocana jaide. Naimie cominina Cristo jilloitallena, Cristo billemo ocuride. Naie facaise Jusiñamui Joreño anamo naimie ite. ²⁶ Iemona Jusiñamui Joreñodi, naimiena Cristona cioillena, navui uicodo uiñotade. O nia fiodañenia, Cristona cioitio raillanona llote. ²⁷ Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode. ²⁸ Naimaci dine jaillanona, Jesúna meniñote. Jusiñamuimo iobillacinona fecajano jide:

²⁹ Nama, o anamo iticue.

Cuomo o lloga uai jai suilla jira, uri fiodaiticue.

³⁰ O oretaga jilloitaraimana jai ciodicue.

³¹ Naimiena oredio, nana comini jilloillena.

³² Naimiedi judiañedinona uanaicinona uiñotaite.

O cominina iobitaite

jide. ³³ Iena cacajamona, iaimaia i jitona lloga uairi rajicaidiaimaia.

³⁴⁻³⁵ Simeón iaimaiaimo çaimaredicinona llote:

—Jusiñamui omoia raise canoite —llote.

Maríamo llote:

—Ero, ie rafuena lloillena, Jusiñamui o jitona jai fetode. Naimie illamona, comini comeciaina facajacinona uiñotaite. Naimiemo suille rafuemono o comeci sure iite. Cai cominimona ailluena naimiena jitañeitimaci. Ailluena jitañeitimaci.

³⁶ Nairuido Jusiñamui jofomo Ana railla feciño ite. Jusiñamui naiñaiño lloga rafuena llouide. Naiñaiño moo Fanuel micori. Naiñaiño nairaidi Aser. Jitañiño facaisemona ie ini diga siete años illanona, naimie fiodaite. ³⁷ Naiñaiño jai eo uaciño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedauide.

³⁸ Simeón ñaiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ocurilla jira, naiñaiño naimaci jilloitaraimana nainomo itinomo llocana uite.

Nazaretmo abido naimaci jailla rafue

³⁹ Moisés micorí lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaimaia. ⁴⁰ Nainomo Jesús sairicana maicana jaide. Eo abina uiñote. Naimieri iobillanona, Jusiñamui naimiena canouide.

Jerusalémo Jusiñamui jofomo Jesús illa rafue

⁴¹ Naga año Jerusalémo pascua railla rafue dine Jesús moo iaimaia jaisoidiaimaia. Egiptomona naimaci jaiagai jillobillana comecillena, naie rafue ite. ⁴² Naimiemo doce años illa facaise Jerusalémo iaimaia jaisoilla isoi, jaidiaimaia. Naimie doce años illa jira, Jesúna uitiaimaia. ⁴³⁻⁴⁴ Rafue fuilla mei, abido bitiaimaia. Ailluena comini jiaí billa jira, Jesús billana raise uiñoñediaimaia. “Cai comini diga naimie bite” railanona comecina facadiaimaia; ia Jesús Jerusalémo fiebide. Darui raifi billa mei, iaimaia cominimo naimiena eo jenodiaimaia. ⁴⁵ Baiñena jira, inia mei, Jerusalémo darui jaillanona, abido jaidiaimaia. ⁴⁶ Ie are Jusiñamui jofomo naimiena baitiaimaia. Moisés micorí llogacinona llofueraini motomo naimie ite. Naimaci llofuiana cacade. Iena naimaci diga jiaí siadote. ⁴⁷ Nana cacadino naimie uiñogacinori rajicaidimaci. Naimie raise siadogacinori jiaí rajicaidimaci. ⁴⁸ Naimiena iaimaia baia, rajicaidiaimaia. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

⁴⁹ Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Ñiese bene cue illana uiñoñedomico?

⁵⁰ Naimie llwana raise cacaiñediaimaia. ⁵¹ Iemei iaimaia diga Nazaretmo naimie abido jaide. Iaimaia uai inuanona, iaimaia anamo ite. Ie ei María nana naie rafue ie comecimo facauide. ⁵² Naimie sairicana abina uiñocana jaide. Jusiñamui naimieri iobide. Comini dinena naimiena jiaí gaidimaci.

3

Jofue iñenanomo Juan Bautista micorí illa rafue

(Mt 3.1-12; Mr 1.1-8; Jn 1.19-28)

¹⁻² Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla enirue diga, gobernadori Felipe. Abilinia railla enirue gobernadori Lisantias. Jusiñamui diga nanoca ñairaima iaimaiaidi Anás, Caifás diga. ³ Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fainonocaida, Jusiñamui dibeimo omoi comeciaí iuai meido. Iemona Jusiñamui omoi jeacinona feitaite. Omoi comeci iuai omoi meidoia, comini iena uiñollena, mai omoi bautizallomoí.

⁴ Isaías micorí ie rabemo naimiena jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite. Naimie jaillino atona fino.

⁵ Nana iconi oruita.

Naga aneduai diese eniruena judai.

Neicairuai joide naisona atona fino.

Naimo itaicuai illa diese eniruenta oruita, daje facai illena.

⁶ Nana comini Jusiñamui naimacina jillotaiacanana uifñoitimaci”
cuete; ia naimaci comeciaina ñaite. Cai Namana inuana ñaite. Abina
iedoñenana ñaite. Jeacino finocana jaiñenana ñaite. Cai Nama Jesús bia,
Jesús uaina naimaci feiñollena, naimaci comeciai marena finuana ñaite.

⁷ Naimacina bautizallena, ailluena comini naimie dine bitimaci.
Naimacimo llouide:

—Maraiñede rafuena finocana omoi jailla jira, jaio nairai isoidomoi.
¿Ñiese jilloitomoi? Cue dine omoi billena, ¿bu omoimo lloga? ⁸ Omoi
comeciai iuaillai meido. Omoi jeacinona fainocoi. Iemona Jusiñamui
jitaillacinona fino. Mare rafuena finocana jai. Naiemona omoi comeciai
iuaillai meiduana uifñoiticai. Ie mei bautizallomoi. Omoi comeciaina
facañeno: “¿Bue ñellena o llua isoi finoiticai? Jusiñamui Abraham
micorina jaie eo raise nabaide. Abraham micori cai moo illamona,
Jusiñamui ricaiillifuemona jilloiticai”. Ero, omoimo lloiticue: Cue llua isoi
omoi finoñenia, naimie ricaiillifuemona jilloñeitomoi. Abraham micori
uruiaidomoi; iadedi Jusiñamui jitaillacinodo jaiacaiñedomoi. Naimie
jitaia, naimie jitaillacinona naimaci finollena, bene ite noficimona
naimiedi Abraham micori facaina uruiaina comuitarede. ⁹ Ero, lliñede
riara tiedomoi. Tia mei, maraiñena jira, iena jobaidomoi. Ie isoidomoi.
Omoi maraiñena jira, Jusiñamui omoina jai duere finoacade. Ie
ricaiillafue anamo jai itomoi. Omoi comeciai iuai omoi meidoñenia,
omoina duere finoite.

¹⁰ Iena cacajanona, comini dinena naimiemo jicanotimaci:

—Cai bautizaja mei, ¿ñiese iiticai? ¿Ñie isoide mare rafuena finoiticai?

¹¹ Juan uai ote:

—Ailluena iniroiredimiedi iniroinidimiemo iniroina feca.
Guilleredimiedi guillenidimiemo guillena feca.

¹² Naimacina bautizallena, gobierno ucubena oraini jiai bitimaci.
Jicanotimaci:

—Llofueraima, cai bautizaja mei, ¿ñiese iiticai? ¿Ñie isoide mare
rafuena finoiticai?

¹³ Uai ote:

—Gobierno facaina omoi ibataia, cominimona gobierno llua baifemo
oñeno.

¹⁴ Naimie dine billanona, soldaduai jicanotimaci:

—Cai bautizaja mei, ¿ñiese iiticai? ¿Ñie isoide mare rafuena finoiticai?

Uai ote:

—Cominimona rana bairoñeno. Ricinodo rana oñeno. Tainona
llogiduamona, cominimona rana oñeno. Omoi ucube illa diese feiño. Ie
baifemo ucubena nicidoñeno.

¹⁵ Juan llofuiamona naie facaise cominidi Cristo billemo ocuirilla
jira, “Juandi nibai Cristo” raillanona, Juanmo comeciaina facauidimaci.

¹⁶ Iena fidiano, Juan llote:

—Cristoñedicue. Jusiñamui dibeimo omoi illamona, jinui diga omoina
bautizadicue. Cai baifemo faitimie bie facaise biite. Naimie cue ifomo
meidoite. Jamai bue cue isoilla jira, naimiena cue canuana uifñoñedicue.
Naimiemo omoi duia, naimiedi Jusiñamui Joreño omoimo itataite. Omoi
comeciai iuai omoi meidoñenia, omoina duere finoite. ¹⁷ Trigona omoi
betaia, mare trigona eenotomoi. Maraiñede ra oni dotajanona, iena
jobaitomoi. Ie isoide. Naimie rafuena lluanona, naimiedi comeciai

iuailai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

¹⁸ Bie isoidicinodo cominimo ie mare rafuena llofueuide. ¹⁹ Naie fa-caiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade. ²⁰ Maraiñede rafuena Herodes finocana jaillamona, Juan cárcelmo jonetade.

Juandi Jesúna bautizaja rafue

(Mt 3.13-17; Mr 1.9-11)

²¹ Ailluena cominina Juan bautizaja facaise, Jesúna jiai bautizade. Bautizaja mei, Jesúsdi ie Moo diga ñaianona, mona bojode. ²² Ieconjusiñamui Joreño ucugina eruaillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

Jesucristo ie usumatiai

(Mt 1.1-17)

²³ Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Elí micori jito. ²⁴ Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. ²⁵ José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. ²⁶ Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. ²⁷ Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito. ²⁸ Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. ²⁹ Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. ³⁰ Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. ³¹ Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito. ³² David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. ³³ Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito. ³⁴ Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. ³⁵ Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. ³⁶ Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. ³⁷ Lamec micori Matusalén micori jito. Matusalén micori Enoc micori jito. Enoc micori Jared micori

jito. Jared micori Mahalaleel micori jito. Mahalaleel micori Cainán micori jito. ³⁸ Cainán micori Enós micori jito. Enós micori Set micori jito. Set micori Adán micori jito. Adándi Jusiñamui comuitagamie.

4

Taife ramo Jesús faia rafue
(Mt 4.1-11; Mr 1.12-13)

¹ Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiëna orede. ² Nainomo cuarenta digarui Taifedi naimiëna ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. ³ Jesús aimetaillana Taife uiñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomeniconajaita”.

⁴ Jesús uai ote:

—Iena lloñeiticue. Jusiñamui facaina lloaïma micori iena jaie cuega: “Jiaie rafuede llomenico guilla baifemo faite”.

⁵ E mei a ite anedumo Taife Jesúsna uillano, dallu illanona, naimiemo nana nairaïaïna acatate. ⁶⁻⁷ Llote:

—Nana bie nairaïaï cue anamo ite. Iena cue iacagamie mo itataredicue. Cuena o sedajamona, iobillacinona cuemo o fecaïa, nana bie nairaïaï omo fecaiticue. Bie nairaïaï illaïmana jaitio.

⁸ Jesús uai ote:

—Dama ite. Ona sedañeiticue. Moisés micori jaie cuega: “Cai Nama Jusiñamuina seda. Dama naimiemo iobillacinona feca”.

⁹ E mei Jerusalémo Jusiñamui jofo muidomo Taife Jesúsna uite. Raite:

—Jusiñamui Jitodiodena, eniruemo mai ana uai. ¹⁰⁻¹¹ David micori ona jaie cuega:

Ona eenollena Jusiñamuidi ie jaienisaïmo lloite.

Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamaï ebena naimiëna facaciñeiticue. O lluanana finoñeiticue.

¹³ Taife naimiëna ramo faia mei, naimiëmona ie jitaïlle dinori oni jaide.

Galileamo Jesús ie rafue llole jillaci
(Mt 4.12-17; Mr 1.14-15)

¹⁴ Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. ¹⁵ Ailluena judíuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

Nazaretmo Jesús illa rafue
(Mt 13.53-58; Mr 6.1-6)

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuïaïna ado facallena, naimie a naidadate. ¹⁷ Naie lloraco nama mullaimadi Isaïas micori jaie cuegafuïaï jai ferinoga rabe naimiemo fecade. Iena oni suiñoacida, bie rafuena baïllanona facade:

18-19 Jusiñamui Joreño cuemo ite.

Dueredınomo mare rafuena llołlona, cuena fetode.

Taiŕe anamo ailluena comıni illa jira, Jusiñamui naimacına jillotaiacana uiñoñedımacı.

Jusiñamui rafuena ailluena comıni uiñoñena jira, naimie illanomo rillena uiñoñedımacı.

Jeacino anamo naimacı illa jira, Jusiñamui naimacına jillotaiacana uiñoñedımacı.

Naimie naimacına duenaillana birui uiñuana jitaide.

Naimacımo mare rafue llołlona, cuena jai oretate.

²⁰ Naie rafue facaja fuillamona, cuegafuıai abıdo fecade. Naimacına llofuellena, dane ana raide. Nana nainomo ite comıni naimiemo eo eruaidımacı. ²¹ Iemei naimie naimacına llofujete. Raite:

—Omoi como cacaja cuegafuıai omoi motomo jai suide. Cuena ñaite.

²² Naimie lluana comıni cacajano, coninına raitımacı:

—Naimie fue mare. Naimie marena llofujete. —Iemona rajjicaillamona, coniniri raitımacı—, Naimiedi jamai José jito. ¿Ni ese naie rafue birui suide?

²³ Iena uiñuamona, Jesús dınena llote:

—Cue lluana iñoñedomoi. Comeciaina facadomoi: “Capernaumo naimie siño finoca rafuena fidıdıcacı. Siño rafuena cai motomo naimie jıai finoia, naimiena iñoitıcacı. ‘Ua médico duia, ie abına dama jillotarede’ cai einamacı raisoidımacı. Ie isoide. Naimie llua isoi naimie ia, siño rafue cai motomo finorede” comeciaina facadomoi. ²⁴ Uanaicınona omoımo lloıtıcue. Naimie comıni nairaimo Jusiñamui facaina lloraima ia, ie comıni naimie uaina feiñoıacasıñede. Iena jamaisıte. Ie isoide. Cue nairaimo cue illa jira, cue uaina iñoñedomoi. ²⁵ Jai ie isoide. Elías facaiseconı daje amani años abımo atomonado noci deiñede. Aime gutımacı. Naie facaiseconı bie enıruemo cai comıni dıne ailluena feciñuıai itımacı; iadedı omoi jaiagai Jusiñamui uaina iñoñedımacı. ²⁶ Jusiñamuidı Elıana cai comıni dıne oreñede; iadedı jıaie enıruemo ite feciño dıne naimiena orede. Sarepta railla nairaimo orede. Sidón railla enıruemo naie nairai ite. Cai comıniñede feciñomo orede. ²⁷ Jıaie rafuena lloıtıcue. Eliseo mıcorıdı Jusiñamui facaina jıaie llote. Eliseo mıcorı facaiseconı bie enıruemo diga efonaitno ite; iadedı naimacımona Jusiñamui buna jillotañede. Omoi jaiagai Jusiñamui uaina iñoñena jira, Eliseo mıcorı dıdınona jillotañede. Naie facaiseconı dama Naamán mıcorına jillotate. Cai comınımo naimie dıiñede; ia Siria railla enıruemo dıde. Ie isoıdomoi. Cue uaina iñoıacaiñedomoi—llote.

²⁸ Jesús lluana cacajano, naie ofiracomo itino eo icıritımacı.

²⁹ Naidacaillano, naimiena jino uitımacı. Naie illanodı iconımo ite. Nainomo naimiena uıllanona, iconımona naimiena ana dotaacadımacı.

³⁰ Naimiena meıneıacadımacı; iadedı nımacı motomo naimie jaıllanona, naimacımona naimie jillobillano oni jaide.

Jesúdı Janaba anamo itımie jillotaja rafue

(Mr 1.21-28)

³¹ Jesús Capernaumo jaide, Galilea railla enıruemo ite. Nainomo naimie ia, sábadoruımo judıııai ofiracomo jaide. Nainomo llofujete.

³² Illaima uai isoi naimie llofuıa jira, nainomo ite comıni naimie llofuıamona rajjıcaıdımacı. ³³ Janaba anamo illamie nainomo ite. Jesús llofuıana cacaita, Janabadı iımana ado cuırioıtate:

³⁴ —Odi Nazaret ie Jesús. ¿Bue ñeiacadio cai diga? Caina duere finuai bidio. Ona uiñoticue. Odi Jusiñamui ie Mare Fetocamiedio.

³⁵ Jesús naimiena lletade:

—Llicai. Naimiemona oni jai. —Iena cacajanona, naimaci motomo Janaba imana ana dotade; ia naimiedi bofedaiñede. Ie mei Janaba naimiemona oni jaide. ³⁶ Iena ciuanona, nana nainomo itino raijicaidimaci. Coniniri siadotimaci:

—¿Ñie isoide Jesús uai? Janabamo naimie llua mei, imamona Janabadi oni jaide.

³⁷ Jesús finoca rafue muidona, naimie mamecidi nana naie eniruemo soride.

Jesúdi Simón Pedro jifaiñona jillotaja rafue
(Mt 8.14-15; Mr 1.29-31)

³⁸ Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiñona jilloitallena, nainomo itino Jesúmo jicanote. ³⁹ Naiñaiño dine Jesús jaillanona, ie uai lluamona, naie duicodi oni jaide. Ieconí naiñaiño jillode. Abi cuariñede. Naidacailanona, guille finuanona, ie jofomo itinona ecade.

Jesúdi ailluena duidinona jillotaja rafue
(Mt 8.16-17; Mr 1.32-34)

⁴⁰ Nairuido jítoma ana itemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate. ⁴¹ Jananiaina jiai oni oretajano, jananiai dinena raite:

—Odi Jusiñamui Jitodio. —Naimiena naimaci uiñua jira, Jesús naimaci ñaiana rairuide. Naimiedi Jusiñamui Jitona uiñoticimaci.

Judeamo Jesús llofuia rafue
(Mr 1.35-39)

⁴² Ie areruido jítiramo jofue iñenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci. ⁴³ Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena llollena, Jusiñamui cuena orede. Oni jaiticue. Omoi diga fiebiñeiticue.

⁴⁴ Ie mei Judeamo ite ofiracuaimo Jesús llocana jaide.

5

Jesús muidona, naimaci ailluena lliciana ua rafue
(Mt 4.18-22; Mr 1.16-20)

¹ Jaiiruido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci. ² Ie facaise jorai fuemo Jesús mena sijide botena cide. Naimaci lloijina naimaci jocua jira, naie botemo lloiji fairaini iñede. ³ Comini ie llofuia cinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raita, botemona cominina llofue. ⁴ Llofuia mei, Simómo llote:

—Aforedinomo jai. Nainomo omoi lloijina faíno.

⁵ Simón uai ote:

—Maestro, cue nabaiñiaí digá namona naío lloiji faiticái; iadedí jaca buena oñedicái. ¿Niése ja oíticái? Iadedí o llua jira, lloijina faiticue.

⁶ Iena naimaci faia mei, ailluena lliciaína jítatimaci. Ie jira naimaci lloiji cuaranoiacade. ⁷ Iena ciuano, onolli digá imaci nabaiñiaína uaidote, naimiена naimaci canollena. Naimaci canuaibilla mei, lliciaína naga bote oruitate. Eo oruilla jira, buiacade. ⁸ Iena ciuano, Simón Pedro Jesúsno iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jeacinona finouidimiedicue.

⁹ Ailluena lliciaína naimaci ua jira, naimaci rajjicaillamona, iena naimie llote. ¹⁰ Naimie nabaiñiaímona Zebedeo jito iaímaiaí ite. Juan digá Jacobo iaímaiaí. Simómo Jesús llote:

—Cuená jaciruiñeno. Lliciaína birui ocabitomoi; iadedí cue díbeimo naimaci illena, biruimona comínina oitomoi.

¹¹ Eniruemo sijiano, naimaci raruiaí faínonocaida, Jesús digá jaidimaci.

Jesúdi efonaitimiena jillotaja rafue

(Mt 8.1-4; Mr 1.40-45)

¹² Jiaíruido Jesúsdi jiaie nairaimo ia, efonaitimie naimie díne bite. Naimie eo fodo jaide. Jesúsna naimie ciuano, naimiена raise uaiduamona, ana bitadate. Llote:

—Maestro, o jitaíadedí, cuena jillotaredío.

¹³ Jesús ie onolli oni ñuitajanona, naimiена jetade. Raite:

—Ona jillotaiacadícue. Mai o jillo. —Ieconí jillode.

¹⁴ Jesús naimiemo llote:

—Omo suide rafue jaca bumo lloñeno; iadedí Jerusalémo Jusiñamui jofomo Jusiñamui digá ñairaimamo o abina acatajai. O jillua jira, Jusiñamui Moisés micorí jaie lloga rana feca Iemona comíni o jilluana uiñoitimaci.

¹⁵ Iese Jesús naimiemo llote; iadedí Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comíni naimie díne bitimaci. ¹⁶ Bitimaci; iadedí Jusiñamui digá ñaillena, jofue iñenanomo Jesús jaide.

Jesúdi tísitaitimiena jillotaja rafue

(Mt 9.1-8; Mr 2.1-12)

¹⁷ Jiaíruido naimie llofueia, digá comíni naimie illa jofomo bitimaci. Fariseuai railla comíni bitimaci. Moisés micorí llogacinuaina llofueraini bitimaci. Galileamona digá nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie díne bite duidinona jillotate. ¹⁸ Ie facaise ie bíramo bíde tísitaitimiena Jesús díne damierie atidimaci; ¹⁹ iadedí naimaci uillífo iñena jira, ailluena comíni illa jira, riñedimaci. Naie jofo bíbanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiена ie bíramo bíde digá, comíni motomo Jesús ecimo ana ñuitadimaci. ²⁰ Iena Jesús ciuanona, tísitaitimie jilluana naimaci ñnuana Jesús uiñote. Tísitaitimiemo llote:

—Jadí, o jeacinona cue feitaja jira, iena oni jai dotadícue. Ie facai ibana jai oñeiticue.

²¹ Nainomo itinomona Moisés micorí llogacinona llofueraini itimaci. Fariseuai jiaí itimaci. Comeciaína facadimaci: “Naimie Jusiñamuiña jeare ñaite. Dama Jusiñamui jeacinona dotarede. Bimie Jusiñamuiñede;

ia Jusiñamui ifomo iacade”. ²² Naimaci comeciai facajacinona Jesús uñuanona, naimacimo jìcanote:

—¿Bue ñellena omoi comeciaina iese facadomoi? ²³ Bimiemo: “O jeacinona jai oni dotadicue” cue lloia, cue uai siñonana uññoñeitomoi; ia bimiemo: “Mai naidacaillanona macari” cue lloia, cue uai siñonana uññoitomoi. ²⁴ Monamona jaiie cue billanona, imana jaidicue. Ie jira jeacino oni dotaja uai cuemo ite. Iena omoi uññollena, tisitaitimie mo lloiticue: “Mai naidacai. O biira ferianona, o jofomo mai jai”.

²⁵ Iese naimie raillamona, tisitaitimie jillode. Ieconì naimaci motomo naimie naidaide. Ie biira feriano, Jusiñamuimo iobillacino fecajano, ie jofomo jaiide. ²⁶ Nana naiena ciolino eo raijicaidimaci. Iemona Jusiñamuimo iobillacinona fecadimaci. Eo raijicaillamona, raitimaci:

—Bie isoide siño comena jaca cioñedicaì.

Jesúdi Levína fetua rafue

(Mt 9.9-13; Mr 2.13-17)

²⁷ Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiena o jaillena, cue diga bi.

²⁸ Naidacaida, Jesús diga jaillanona, ie maijiana fañonocaide. ²⁹ Nailli ie jofomo Leví aillue rafuena finode, Jesús iena. Diga ucube oraini guisabitimaci. Diga jaiie comini jiai guisabitimaci. Jesús diga danomo guitimaci. ³⁰ Nainomo fariseuai cominidi, Moisés micori llogacino llofueraini diga, jamai bitimaci. Jesúna cianona, ie llofueoicaiganomo jìcanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jìcanotimaci. ³¹ Jesús iena cacajano, llote:

—Ecairedino médicona jitañedimaci; iadedi duidinodi médicona jitañedimaci. ³² Jusiñamui dibeimo mareuidinona uaibiñedicue; iadedi maraiñedinona uaibiticue.

Jesúmo comini guiñenana jìcanua rafue

(Mt 9.14-17; Mr 2.18-22)

³³ Naie facaise fariseuai dinena Jesúmo llote:

—Cai einamacì llua isoi, Jusiñamuina cai raise iobitallena, guiñenaruillaì illa facaiseconì guiñedicaì. Jusiñamuimo jìcabidicaì. Cai jeacino facaina sunaicabiticaì. Cai einamacì rafuedo Juan Bautista llofueoicaigano jaidimaci. Cai llofuegano iedo jiai jaidimaci; iadedi o llofueoicaigano jaca guitimaci. ¿Bue ñellena cai einamacì rafuedo jaiñedimaci?

³⁴ Jesús uai ote:

—Jaiie rafuedo iena lloiticue. Coniruedi ie aina uarui ia iobilla jira, ie nabaiñiai sunaiñedimaci. Iobillamona guitimaci. ³⁵ Jaiaruido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaìdi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ³⁶ Jaiie rafuedo iena lloiticue: Nia jocoñega comue iniroidi jacaie iniroimo jilliñega. Jilliadi joca mei, comue iniroi jacaie iniroimona fo llirite. Eo fodo cuararite. Jai maraiñeno cioite.

³⁷ Jacagomona finoca bolsa como finoca vino joneñega. Jonegadena, mairiñena jira, sirillamona igoí raire cuararite. Vino faifite. Igoí jiaí faifite. ³⁸ Como finoca vino comogomo jonelle. Iemei iena faifñeite. ³⁹ Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoí einamací rafue ifomo jiaie rafue birui íte. Iena omoímo llocabitícue. Iedo jaidicái; ia omoí einamací rafuemo omoí fibilla jira, jiaie rafuedo birui jiaicaiñedomoí —llote.

6

Sábadoruimo Jesús llofueoicaigano maijia rafue
(Mt 12.1-8; Mr 2.23-28)

¹ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, golluano, guicana jaidimací. ² Dajerie fariseuai iena ciuano, llotimací:

—Rairuica rana finosite. Moisés micorí rairuilla jira, sábadoruimo maijinidicái; iadedí trigona naimací tijiamona, caimona jai maijidimací. Caimona jeacinona jai finodimací.

³ Ie llofueoicaiganona riiduano, Jesús uai ote:

—Cuemona jeacino finoñedimací. David micorí jiaie finoca rafuemo omoí comecíai raise facañedomoí. David micorí guille iñenia, naimie aimetaia, ie nabaiñiaí diga Jusiñamui jofomo fo jaide. ⁴ Jusiñamuimo fecaca llomeniconona uanona, guitimací. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimací. David micorí iena guite; ia Jusiñamui naimacina duere finoñede. ⁵ Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

Jesúdi onollina idisarodimiena jillotaja rafue
(Mt 12.9-14; Mr 3.1-6)

⁶ Jiaie sábadoruimo judíuai ofiracomo Jesús jaillanona, llofuede. Ie facaise nainomo nabellimo idisarodimie íte. ⁷ Moisés micorí llogacinona llofueraíni, fariseuai diga, Jesúsno eruaidimací, sábadoruimo Jesús naimiena raabaca íe segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimací. Naimacimona sábadoruimo bu maijia, jeacinona finode. ⁸ Naimací comeciaina facajacinona Jesús uiñuamona, onollina idisarodimiemo llote:

—Cue ecimo naidada. —Iemei Jesús ecimo naidadate.

⁹ Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedí, birui mare rafuena finodicue. Cuena birui omoí meineiadedí, birui marañede rafue finodomoí. Sábadoruimo ¿nie isoide rafue finuana rairuidomoí?

¹⁰ Naimací eruaillanona, duidimiemo llote:

—O onollí mai oni ñuita. —Iena ñuitajanona jillode. ¹¹ Nainomo itino iena ciuanona, eo iciritimací.

—¿Niese Jesúsna nibaiitícai? —naiemona coniniri siadotimací.

Jesúdi íe doce llofueoicaiganona fetua rafue
(Mt 10.1-4; Mr 3.13-19)

¹² Nairui aneduaimo Jesús jaide, Jusiñamui diga ñaillena. Namona naio jüide. ¹³ Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode. ¹⁴ Iese mamecedimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé, ¹⁵ Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide. ¹⁶ Judas; naimiedi Jacobo jito. Judas Iscariote micori; naimiedi Jesúna gaitatimie.

Jesúdi ailluena cominina llofuia rafue

(Mt 4.23-25)

¹⁷ Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómoma bitimaci. Tiro monaillai fuemo ite. Sidón monaillai fuemo jiaie ite. Naimie lluomo cacareillena bitimaci. Naimaci duicomona jiaie jilloiacadimaci. ¹⁸ Jananiai anamo itinomona Jesús jananiaina oni orede. ¹⁹ Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

Jesús lloga rafue

(Mt 5.1-12)

²⁰ Ie llofueganomo eruailanona, Jesús llote:

—Naimie anamo omoi jai illamona, Jusiñamui omoína sedaacana rafuena omoína llofueitacue. Naimiena jitaídomoína, omoína sedaite. Comeciaina facadomoi: “Jusiñamui jitaíllacinona dani finonidicai; ia Jusiñamui caina canuamona, iena finoiticai”. Naimie comini omoi illamona, naimie omoína canoite. Iemona caimare iitomoi. ²¹ Naimie jitaíllacino omoi finuamona, Jusiñamui omoína sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoína sedaite. Ailluena comini jeacino finocana jaidimaci. Iena uiñuamona, sunaitomoi. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoi. ²² Cuemo omoi duia, duere sefuitomoi. Jiaie comini omoína enoitimaci. Omoína oni dotaitimaci. Omoína jeare ñaitimaci. Cuemo omoi duilla jira, omoína jamaitimaci; ia Jusiñamui omoína caimare itataite. ²³ Omoi isoi omoi jaiagaimona Jusiñamui facaina lloraini micoriai jiaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefuia, iocire omoi jai. ²⁴ Iese iitomoi; ia Jusiñamuina jitaíñedino ico duere sefuitimaci. Comeciaina facadimaci: “Jusiñamuina jitaíñedicai. Marena birui iticai. Nana cai comeciái jitaíllacino birui caimo ite”. Iese birui itimaci; ia Jusiñamui naimacina ico duere finoite. ²⁵ Jusiñamuimona buena birui jitaíñedino ico duere sefuitimaci. “Nana cai comeciái jitaílla rafue caimo birui illa jira, Jusiñamuimona buena jitaíñedicai” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeciaina iocire itatallena, Jusiñamuina jitaíñedicai” damierie birui raitimaci. Naimaci jeacino facaina sunaíñedimaci. Birui ite rafuena ebiruitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci. ²⁶ Naimaciri iobillamona, omoi jaiagaidi Jusiñamui facaina llorainina abi caitadinona marena

ñaitimaci. Damierie birui daje isoidimaci. Jusiñamuina iobitaiacaiñedimaci; ia cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

Jesúdi iba oñenana llua rafue

(Mt 5.38-48; 7.12)

²⁷ Jesús llote:

—Cue llwana cacajamona, iena iino. Finuamona omoina enoidinona isirui. Naimacina cano. ²⁸ Omoi jeare ñaitinona marena ñaino. Omoina jeare finodino facaina Jusiñamuimo omoi jii. ²⁹ Omoi cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoi iniroina bu bairoiaciona, omoimo naimie nia jicañenia, naimie jitailla iniroi baifemo naimiemo feca. ³⁰ Omoimo ite rana bu jicaia, iena caidiñeno feca. Omoimona rana bu bairoia, iena abido jicañeno. ³¹ Jusiñamui jitaillacinona omoi finuamona, jiaie cominina marena fino. Jiaie comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. O finoacaga ra isoi jiaie cominimo fino. ³² Naimie cominina omoi illamona, nana comini daje isoi isirui. Omoina isiruitinona omoi isiruia, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baifemo faiñedomoi. Naimaci isoi itomoi. ³³ Naimie cominina omoi illamona, nana comini daje isoi cano. Omoina canodinona omoi canoia, mare; iadedi omoina canoñedinona omoi canoñenia, Jusiñamui omoina: “Mare” raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baifemo faiñedomoi. Naimaci isoi itomoi. ³⁴ Naimie cominina omoi illamona, nana cominimo daje isoi rana feca. Omoimo ra fecadinomo rana omoi fecajia, mare; iadedi omoimo rana fecañedinomo rana omoi fecañenia, Jusiñamui omoina: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoi fecañenia, maraiñede rafuena finoraini baifemo faiñedomoi. Naimaci isoi itomoi. ³⁵⁻³⁶ Omoina gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuriñeno; ia Jusiñamui omoi raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona, maraiñedinodi naimie cominina omoi illana uiñoitimaci. Jusiñamuidi cominina duenaila isoi, cominina omoi jiai duenai.

Jesúdi jiaie cominina mameriñenana llua rafue

(Mt 7.1-5)

³⁷ Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoina duere finoite. Omoimo maraiñede rafuena bu finoia, iena feita. Iena omoi feitañenia, Jusiñamui omoimo ite maraiñede rafuena feitañeite. ³⁸ Jiaie rafuedo iena lloiticue. Rana omoi fecaia, iena raise omoi gaieia, ico ibana omoi oia, raise gaiecana feiñoitomoi. Ie isoide. Jiaimono maraiñede rafuena finoñeno; ia naimacina duenailamona,

naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoí.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoí illamona, bie rafuena cacarei. Uanaicinodo omoí jaiñenia, uisnidimie isoi iitomoí. Uisnidimie jiaie uisnidimiena ifonide. Ifo iade, nagamaiaí dafomo uaidiiaimaiaí. ⁴⁰ Fueotimie ie llofueraíma baífemo uaiñede; iadedi naimie raise fueoia, ie llofueraíma isoi jaite. Raise fueollena, cue uaimo cacarei. ⁴¹ Omoí ecimo itimiemo janore maraiñedicino illana omoí uifñoia, iemo comecina facañeno; iadedi omoímo ailluena ite maraiñedinomo nano omoí comecina faca. ⁴² Omoímo maraiñedicino illamona, ¿niese omoí ecimo itimiena mameritomoí? Omoímo ite maraiñedinomo omoí comecina facacaiñena jira, maredinona abi caitadinodomoí. Omoí comeciaina nano raise fino. Iemei omoí ecimo itimiena canorenitomoí. Naimie comecina raise canorenitomoí.

Jesúdi riará llisilla llilla llua rafue

(Mt 7.17-20; 12.34-35)

⁴³ Jesús nia llofujete:

—Mare riará maraiñede riará isoi llisiñede. Maraiñede riará mare riará isoi jiaí llisiñede. ⁴⁴ Llisillamona nie isoide riará illana uifñoicaí. Amena ie llisilla llillamona amena marena uifñooga. Llillamona, amena maraiñenana jiaí uifñooga. Eecuaimona uvas railla riarana ofñedicaí. Monaigimona higos railla riarana jiaí ofñedicaí. ⁴⁵ Ie isoide. Naimaci comeciáimo iticinomona comini ñaitimaci. Mare comeci iticinomona mareñedi mare rafuena finocabide. Maraiñede comeci iticinomona maraiñedimie maraiñede rafuena finocabide.

Jesúdi naimiena inuana ñaia rafue

(Mt 7.24-27)

⁴⁶ Jesús nia llofujete:

—Omoímona damierie cuena: “Cai Nama” raitomoí; iadedi cue llogacinona finoñedomoí. ⁴⁷ Diga comini cue dine bitimaci. Cue uaina cacadimaci. ⁴⁸ Cue uaina innotimie jofona raise finodimie isoide. Jofona raise finodimiedi ie jofona finodemo, jofona goifñellena, nofici illa dinori eo ana raite. Noci deidemo, eo jinuidemo, jofomo ille toia, jofo raise finua jira, jofo goifñede. Iena faifñede. Ie isoide. Cue lluaña innotimie faifñeite. ⁴⁹ Cue uaina innoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raifñede. Noci deidemo, eo jinuidemo, jofomo ille toia, jofo goillamona, jai eo judaisite. Iena faifñede. Ie isoide. Cue lluaña innoñedimie faifñite — llote.

7

Jesúdi capitán mullaímana jillotaja rafue

(Mt 8.5-13)

¹ Ie llua fuillamona, Jesús Capernaumo jaide. ² Nainomo romanos railla nairáimo duide illaíma ite. Cien soldaduáina sedauide. Naimiedi capitán. Judíuñedimie. Ie mullaíma eo duide. Niade fiodaiacade. Capitán naimiena eo gaide. ³ Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaímana jillotajabillena jitaide. ⁴ Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caimona maremiena jira, naimiena o canuana jitaídicaí.
 5 Cai nairaina isiruite. Ie ucube diga cai ofiracona finotate.

6 Iena cacajamona, Jesús naimaci diga jaide. Capitán jofomo iaírei Jesús ría, capitádi Jesús dine ie nabaiñaína orede, Jesúmo lllollena:

—Maestro, biñeno. Jamai bue cue isoilla jira, cue jofomo biñeno.
 7 Jamai bue cue isoilla jira, o dine jiai jaiñedicue. O illanomona o uaido cue mullaíma jilloita. 8 Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina bene o lloía, cue mullaíma jilloite.

9 Iena cacajano, Jesús rajicaide. Oni dobaidajano, naimie diga jaidinomo llote:

—Bie isoidimie cue uaina ñnotimiena jaca baiñedicue. Cai judíuai cominimona bie isoidimiena jaca iñede. Mai abído jai.

10 Capitámona bitino abído capitán jofomo rillano, mullaíma jai jilluana cioidimaci.

Jesúdi feciño jítóna jillotaja rafue

11 Jiaíruido Naín railla nairaimo Jesús jaide. Ie llofueoicaigano jiai jaidimaci. Ailluena comini jiai jaidimaci. 12 Naie nairai ie nasemo naimie iaieicaia, jai fioidaitimiena comini jino atiana ciode. Naie fioidaitimiedi conirue. Ie eidi feciño. Dajede ie jitodi jai fiodaite. Ailluena Naín itino naie feciño diga jaidimaci. 13 Jesús naiñaíñaona ciuanona, naiñaíñaona duenaite. Naiñaíñaona raite:

—Mai eeñeno.

14 Fioidaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fioidaitimie mo Jesús llote:

—Mai a rainada.

15 Iena Jesús llua mei, naie fioidaitimie ie uiga ramona a rainadate. Ie meinoconi naimie ñaite. Jesús naimiena ie eimo abído ite. 16 Naieri nana jacinaitimaci. Jusiñamuimo iobillacinona fecadimaci. Raitimaci:

—Jusiñamui facaina lloraima cai motomo ite. Naimie uai eo siño. Naimiena Jusiñamui oretaja jira, Jusiñamui caína birui canoacana jira, iobidicaí.

17 Nana Judeamo itino Jesús finoca rafuena fididimaci. Judea enirue fuemo ite nairaiáidi jiai fididimaci.

*Jesús dine Juan Bautista micori ie llofueoicaiganona oretaja rafue
 (Mt 11.2-19)*

18 Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menamiena uaidote. 19 Llote:

—Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuiriticaí?” naimie mo jicano.

20 Jesús dine iaímaiaí rillano, Jesúmo llotiaímaiaí:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabite. Juan llofuegamiena o illana uiñoacadicaí. Imieñediódona, jiaimie billemo nia ocuiriticaí. Cocomo llono.

²¹ Jesús dine iaimaia billa facaiseconi, Jesús diga isoide duicuai ilanona jillotate. Jananiai anamo itinomona jananiaina oni jiai orede. Uisnidinona uisina dane ciotate. ²² Ie jira Jesús iaimaiaimo llote:

—Cue lluna cacadomico. Cue finoca rafuena ciodomico. Juan dine abido omico jaillanona, iena naimiemo llono. “Uisnidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci”. Iese naimiemo llono. ²³ Jiai llono: “Ñibai nana cue rafuena raise cacaiñedio; ia cuena jaca nia inocana o jaia, caimare iitio”.

²⁴ Iaimaia abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimena ciodomoi? Daje uaido rafuena comecina facadimena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoifede. Nie isoide rafue naimiemo ia, cue rafuena llocana jaide. ²⁵ ¿Bue ñellena naimie dine jaidomoi? Mare iniroina jitadimena cioifedomoi. Mare iniroina jitadinona omoi cioacianadedi, illaicomini dine jaidomoi. Naimacimo ailluena ra ite. ²⁶ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ²⁷ Malaquías micori naimiema jaie cueda: “Jusiñamui raite: ‘Ero, o uicodo cue rafuena llollena, damiema oretaiticue, comini comeciaina marecinona duiñollena’ ” cueda. Malaquías Juan Bautistana cuete. ²⁸ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuate; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioifede. Iemona naimie baifemo faitomoi.

²⁹ Naimacina navui Juan bautizaja jira, nainomo ite comini iena cajano, Jusiñamuimo iobillacinona fecadimaci. Gobierno ucube orainidi jiai fecadimaci; ³⁰ iadedi fariseuai iobillacinona fecañedinomoi. Moisés llogacinuaina llofueraini jiai fecañedinomoi. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede. ³¹ Jesús llote:

—Cueno ñoñedinona lloiticue: Ero, omoina ñaiticue. ³² Jifanote uruia isoidomoi. Uruia jifanoiacania, naimaci nabaiñiaina uaiduanona, raitimaci: “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicai” raitimaci. ³³ Ie isoidomoi. Juan jirorainide. Caimare guiñede; ia naimie diga nabairiñedomoi. Naimiema gaiñedomoi. Ie jira omoimona dajerie naimiema raitimaci: “Janaba anamo naimie illamona, naimie uairico isoi ite” raitimaci. ³⁴ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cueno jiai gaiñedomoi. Ie jira cuena jeare ñaitomoi. Raitomoi: “Guilaredimie. Jiroruidimie. Jearede rafue finodino diga nabairitimedio”. ³⁵ Iese raitomoi; iadedi Jusiñamuina inotinodi cue finoca rafuena mare-nana uifotimaci.

Jesús Simón jofomo illa rafue

³⁶ Jiairuido fariseuai cominimona, ie jofomo naimie diga guillena, damiedi Jesúna uaidote. Naimiedi Simón. Naimie dine Jesús jaillanona, naimie diga guite. ³⁷ Jesús guitemo, daje riño fo jaide. Naiñaiñodi maraiñede rafuena finoraño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga. ³⁸ Judíuai aciaita jaca guisoidimaci. Jinafo dine eilli jonesiuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jai libanote. Ie mei ie eillimo frascomona soride rana totade. Naimiena naiñaiño isiruillamona, iese naiñaiño finode. ³⁹ Iena ciuanona, Simón dama comecina facade: “Bimie Jusiñamui facaina lloraimadena, nie isoide naimiena jetade riñona niade uiñote. Naimiedi naiñaiño maraiñede rafuena finorañona uiñote. Iena naimie uiñuamona, naiñaiñona jino raire orede. Naimiedi Jusiñamui facaina lloraimañede”. ⁴⁰ Jesús naimie comecina facajacinona uiñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damie mo quinientos diga ucubena fecade. Jiaimie mo cincuenta diga ucubena fecade. ⁴² Ie iade, naiena abido meidonidiaimaiaia. Ie jira ucubena fecadimiedi raite: “Dama omico meidoñega. Naiena jai feitaticue”. Ero, Simón, ¿nimeca ucubena fecadimiena eo isiruite?

⁴³ Simón dinena uai ote:

—Cue ceci raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

⁴⁴ Iemei Jesúdi riño dine dobaidajanona, Simómo llote:

—Biñaiñona ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote. ⁴⁵ Naiñaiño cue ecimo fo billanona, cue eillina diga icaiño llibanote. ⁴⁶ Naiñaiño cue eillimo soride rana totade. ⁴⁷ Naiñaiño mo eo jeacino ite; ia cuena naiñaiño eo isiruillamona, nana ie jeacinona jai oni dotajana uiñoticaia. “Jeacino cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiño mo llote:

—O jeacino jai oni dotaca. Iena jai feitaticue.

⁴⁹ Jiaino nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riño mo llote:

—Cuena o ñnua jira, o jeacinomona jai jillodio. Mai uri o jaillano o i.

8

¹ Ie facaise diga nairaimo Jesúdi mare rafuena llocana jaide. Naimie anamo comini illana Jusiñamui jitailla jira, Jesúdi Jusiñamui díbeimo naimaci comeciai iuaina meiduana llofujete. Ie doce llofueoicaigano naimie diga jaidimaci. ² Dajerie riñoniai jiai jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate. ³ Juana ite. Naiñaiño inidi Chuza. Herodes railla illaima ecimo naimie maijuide. Susana ite. Jiaie riñoniai jiai itimaci. Naiñaiñuai ramona Jesúsna canouidimaci.

Jesúdi trigona judaidimiena llua rafue

(Mt 13.1-9; Mr 4.1-9)

⁴ Diga nairaiamona ailluena comini Jesús dine billanona, naimacimo llote:

—Jusiñamui omoína sedaacana omoi fueollena, bie rafuena lloiticue. ⁵ Damiedi trigona judaiaide. Naimie judaiamona naisomo janore iduai juide. Comini nainomo jaillano, iena saitadimaci. Bai jailla mei, sillíñai iena jiai guisaibite. Ie jira sicoñede. ⁶ Nofiemo jiaie iduai juide. Sicode; iadedi jinui raise iñena jira, duide. ⁷ Eecuai illanomo jiaie iduai juide. Eecuai sicuamona, riara eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluomo cacarei. Iena ñno.

Jesús ie como lloga rafuena llofua rafue

(Mt 13.10-23; Mr 4.10-20)

⁹ Jesúmo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

¹⁰ Uai ote:

—Jusiñamuidi omoína ie sedaacana rafuena jai uiñotade. Jai iena uiñoñedomoi. Jiaie cominina iena nia uiñotañede. Ie jira bie isoidicínodo naimacimo lloticue. Cue siño finoca rafuena cidimaci; iadedi iena naimaci ñnoñena jira, uiñoño jaidimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci.

¹¹ Omoína cue como lloga rafuena llofueiticue. Naie iduai di Jusiñamui uai. ¹² Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naiemona jilloi raillanona, Taife naimaci comeciaimo cacaja uaina ñnotañede. ¹³ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci. ¹⁴ Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitailla rafuena finocana jaiñedimaci. ¹⁵ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci.

Mare jeanide comeciaimona inocana jaidimaci. Eo lliside isoidimaci. Jusiñamui jitailla rafuena sefuiruiñeno inocana jaidimaci.

Jesús ie rafue llocana jailla llua rafue

(Mr 4.21-25)

¹⁶ Jesús nia llote:

—Lamparín bu unia meinocni, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainaca. ¹⁷ Ie isoide. Cue rafue llocana jaja, comini comeciai iticinona uiñotade. Uanaicno naimaci cacajamona, damierie inotimaci. Damierie inoñedimaci. ¹⁸ Cue lluamo raise cacarei. Iena omoi inuamona, Jusiñamui omoína canoite. Omoína uiñocana jaitaite. “Jusiñamui rafuena uiñoticue” raitimiedi inoñenia, Jusiñamui naimiena faifitaite.

Jesús dibeimo itinona ñaia rafue

(Mt 12.46-50; Mr 3.31-35)

¹⁹ Cominina Jesús nia llofuia, naimie dine Jesús ei, ie amatiaia diga bitimaci; ia ailluena comini illa jira, naimiemo riñedimaci. ²⁰ Nainomo itino naimiemo llote:

—O ei, o amatiaia diga jino naidaidimaci. O diga ñaiacadimaci.

²¹ Jesús uai ote:

—Jusiñamui uaina cacajamona, iena inotino ieca cue eidi, cue amatiaidi.

Jesúdi jorai baguana llucaitaja rafue

(Mt 8.23-27; Mr 4.35-41)

²² Jiairuido botemo Jesús jailla mei, ie llofueoicaiganomo llote:

—Ruica dibeimo mai cai jailli. —Ie mei jaidimaci. ²³ Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci. ²⁴ Jesúsna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llucaitade. Ieconic aifi llucaide. Bagoñede. ²⁵ Naimacimo jicanote:

—¿Bue ñellena cuena inoñedomoi? —Naimiena jacinaillamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Jesúdi Gadara railla eniruemo illa rafue

(Mt 8.28-34; Mr 5.1-20)

²⁶ Ruica dibellemo ridemo, Gadara railla eniruemo sijidimaci. Galilea facaisemo ite. ²⁷⁻²⁹ Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raoillanomo nofie moto ifuaimo i-isoide. Ebena cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie cuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Ñiese cuena nibaiacadio? Cuena duere finoñeno.

Iese raite, Janaba naie iimamona oni jai oretajana Jesús llua jira.
³⁰ Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. ³¹ Jesúsno duere jicanoside, iraimo naimacina nia oretañellena. ³² Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúsno duere jicanotimaci. Jesús dinena:

—Jee —raite. ³³ Ieconí iimamona jaidemo, chanchuai abimo jaidimaci. Iena suidemo, iconí jillacimo joraimo chanchuai aisidimaci. Dinomo corobaiside.

³⁴ Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. ³⁵ Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamiena Jesús ecimo raillana cioidimaci. Naimie iniroina jai jitade. Naimie jai uairicoñede. Iena ciuanona, Jesúsna jaciruitimaci.

³⁶ Naie rafuena ciodinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúsno jicanotimaci. Ie jira botemo Jesús jaide, ruica dibeimo abido jaillena. ³⁸ Ieconí jaive Janaba anamo illamie Jesúsno jicanote, naimie diga jaillena; iadedi Jesús raite:

—Dama ite. ³⁹ Mai o jofomo o jai. Nainomo itinomo nana Jusifamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

Jesúdi mena duide riñona jillotaja rafue

(Mt 9.18-26; Mr 5.21-43)

⁴⁰ Ruica dibeimo Jesús abido ria, naimie abido billemo naimaci ocurilla jira, ailluena comini naimiena feiñotimaci. ⁴¹ Jairona mameciredimiedi Jesús dine bite. Naimiedi judíuai rafue ofraco sedaraima. Jesúsno duere jicanollena, ana bitadate. Naimie jofomo Jesús billena duere jicanote. ⁴² Dañaiñode ie jisa. Doce años naiñaiñodi ite. Niadedi fiodiaicade. Ie jira Jesúsno jicanuabite. Iena cacajano, naimie diga Jesús jaide. Ie llofueoicaigano jiai jaidimaci. Jesús jaillano, diga comini naimiemo ñaijisaide.

⁴³ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiño jaca buna jillotanide. ⁴⁴ Jinafo dinena billanona, Jesús iniroi fueda jetade. Iemona diailladi faionocaide. Jillode.

⁴⁵ Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicai.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñaijidimaci.

⁴⁶ Jesús uai ote:

—Damie cuena jetade. Cue abimona cue uai jaillamona, naimie jai jillode.

⁴⁷ Jaive duidiñaiñodi Jesús naiñaiño uiañuana uiañote. Ie jira Jesús dine jaciruicana bite. Naimie uicomo ana bitadajanona, nana comini uicomo

naimiēna jetaja rafuena llote. Naiñaiño ieconi jilluana llote. ⁴⁸ Jesús dīnena naiñaiño na raite:

—Ñoo, cuena o ñnua jira, jai jillodio. Mai jaillanona, uri o i.

⁴⁹ Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoñeno.

⁵⁰ Iena Jesús cacajano raite:

—O comeci jarire iñeno; ia cuena nia ñno. Naiñaiño jilloite.

⁵¹ Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. ⁵² Nana nainomo itino eecuinaidimaci. Faillñaidimaci. Jesús dīnena raite:

—Omoi eeñeno. Cuemona naiñaiñodi fiodañedesa. Jamai inide.

⁵³ Jai fiodaite di: “¿Bue ñelli inide raitio?” raillanona jaisitimaci. ⁵⁴ Jesús fo jailla mei, naiñaiño onollina llinocaida, raite:

—Jitaibici, mai naidacai.

⁵⁵ Ieconi naiñaiño joreño abido bite. Naidacaide. Jesús llote:

—Guillena naiñaiño eca. ⁵⁶ —Naiñaiño moo, ie ei diga, raiji-caidiiaimaia. Jesús iaimaiaimo llote:

—Bie rafuena bummo lloñeno.

9

Jesúdi ie llofueoicaiganona oretaja rafue

(Mt 10.5-15; Mr 6.7-13)

¹ Ie doce llofueoicaiganona naimie dine Jesús uaiduanona, naimacimo ie uaina iñonocade, jananiaina anamona cominina jilloitallena. Duicuaína oni oretallena, iena jiai iñonocade. ² Naimacimo llote:

—Omoi jaillanona, cominimo llono: “Jusiñamui facaina jaie lloraini micoríai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comecíai iuaina meido”. Duidinona jillota. ³ Omoi jaia, buena uiñeno. Omoi abina riidollena, jiguidana uiñeno. Ailluena rana omoi uiñellena, bolsana uiñeno. Llomenicono uiñeno. Ucubena uiñeno. Guille ifo meidollena, rana uiñeno. Meidolle iniroina uiñeno. ⁴ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i. ⁵ Omoína comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uiñollena, omoi eilliaina oni jaidino.

⁶ Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

Juan Bautista micorí fiodailla rafue

(Mt 14.1-12; Mr 6.14-29)

⁷ Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micorí jai jillode” dajerie railla jira, ie comeci uri iñede. ⁸ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micorí jai jillode.

⁹ Jesúna fidiano, Herodes comeci uri iñede. Comecina facade: “Juan micorí ie ifogina navuy jaitaticue. Ie muidona ¿birui bu ie rafuena fididicue?” Raise uiñollena, Jesúna cioacade.

Jesús cinco mil iññaína ecaja rafue
(Mt 14.13-21; Mr 6.30-44; Jn 6.1-14)

¹⁰ Jesús llofueoicaigano abido bia, Jesúsno naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide; ¹¹ iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciai iuaina meiduana llofueete. Duidinona jiai jillotate.

¹² Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaiamo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai iballena nibai jitaideo?

¹⁴ Cinco mil iññai nainomo illa jira, ailluena guille jitaillana uiñotimaci. Naimaci ainiai, imaci uruijai diga, jiai itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

¹⁵ Iena finodimaci. ¹⁶ Naie cinco llomeniconona, naie mena lliciai diga Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ¹⁷ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

Pedro Jesúsna llua rafue
(Mt 16.13-19; Mr 8.27-29)

¹⁸ Jiairuido Jesús ie Moomo jña facaiseconi, ie llofueoicaigano naimie diga illanona, naimacimo jicanote:

—¿Ñiese cominidi cuena raitimaci?

¹⁹ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eliadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁰ Jesús naimacimo jicanote:

—¿Ñiese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci. Jusiñamui ona orede.

Jesús ie fiodaillena llofuia rafue
(Mt 16.20-28; Mr 8.30-9.1)

²¹ Jesús naimaci como llogacino bumo lluana rairuide. ²² Llote:

—Cai judíuai illaicomini cuena eo duere finoitimaci. Cuena jitañellemona, cuena meineitimaci; iadedi darui amani illanona, fiodaillamona jilloiticue.

²³ Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite.

Bu iese jaiacania, cue dibeimo naimie iite. ²⁴ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifiñeite. ²⁵ Cue cominina bu jaiñenia, nibai eo duere sefuñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite. ²⁶ Cuen a bu meiruia, cue uaina bu meiruia, dane cue bia, naimiema meiruiticue. Cuen meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue. ²⁷ Uanaicinona omoimo lloticue. Omoimona dajerie nia fiocaiñeitomoimo, illaimana cue bairellena cioitomo.

Jesús abi meidocaila rafue

(Mt 17.1-8; Mr 9.2-8)

²⁸ Ocho digarui illanona, Jusiñamuimo jüllena, anedumo Jesús jaide. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uñede. ²⁹ Naimie jiamona naimie abi meido-caide. Naimie iniroi naie dacaiño eo userecaide. ³⁰ Ieconí menamie bairiano, Jesús diga ñaitiaimaiaí. Moisés micorí joreño ite. Elías jiai ite. ³¹ Ebire bairediaimaiaí. Jesús Jerusalémo fiocaille rafuena ñaitimaci. ³² Ie facaiseconi Pedro ie nabaiñiaí diga jai inidimaci; ia casillamona, Jesús ebirenana ciocimaci. Jesús ecimo itiaimaiaína jiai ciocimaci. ³³ Iaimaiaí jaiacania, Pedro Jesúsomo lloite:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micorí ie, jiaie Elías ie. —Iese raite; ia ie ñaia rafuena raise uñeñoñeno jamai ebena ñaite.

³⁴ Iena naimie nia lluanona, uillie billamona, naimacina ibaide. Uillie ibaibillaconi jacinaitimaci. ³⁵ Uilliemona Jusiñamui naimacimo lloite:

—Bimiedi cue Jito. Naimiema fetodicue, cue jitaille rafue finollena. Naimie lluaña omoi cacareillanona, iena ino —lloite.

³⁶ Jusiñamui llua mei, dama Jesúsna dane ciocimaci. Jesús diga itino naimaci cúa rafuena naie facaiseconi jaca bumo lloñedimaci.

Jesúdi Janaba anamo itimiema jillotaja rafue

(Mt 17.14-21; Mr 9.14-29)

³⁷ Ie areruido anedumona ana bitimacimo, ailluena comini naimacimo dafaiñeide. ³⁸ Cominimona damie ado lloite:

—Maestro, cue dajede cue jito duillana jibuisaibi. ³⁹ Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiema bofedaicabite. Naimiemona oni jaiacaiñede. ⁴⁰ Janabana oni oretallena, o llofueoicaiganomo jicanoticue; ia oretanidimaci.

⁴¹ Iena cacajanona, Jesús ie llofueoicaiganomo lloite:

—Cue uai siñonana nia inoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi inollena, ¿nie dinori omoi diga iiticue? —Naie duidimie moomo lloite—, O jito cue dine mai ati.

⁴² Naie urue billano, Janaba naimiema eniruemo ana dotade. Naimiema naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiema fecade. ⁴³ Comini iena cuanona, Jusiñamui siño uai naimiemo illari rajicaidimaci.

Jesús ie fiodaillena dane llofuia rafue

(Mt 17.22-23; Mr 9.30-32)

Naimaci nia rajjicaia, Jesús ie llofueoicaiganomo llote:

⁴⁴ —Cue lluana feitañeno. Monamona billanona, imana jaidicue; ia Jusiñamui jitailla jira, jiairuido illaicomini cuena meineitimaci.

⁴⁵ Jesús lluana raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiaí meiruitimaci.

Jesús ie llofueoicaigano moto imiena ille rafue

(Mt 18.1-5; Mr 9.33-37)

⁴⁶ Ie facaise Jesús llofueoicaigano conini uaitajanona raitimaci:

—¿Bu cai moto imiena ille?

⁴⁷ Jesús naimaci comeciai facajacinona uiñuamona, nainomo ite cominimona daje urue bai jainanocaida, naimaci motomo naimiena jonete. ⁴⁸ Raite:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiaí jai feiñote. Jamai bue isoidimiedi omoi moto imiena ille.

Jesúdi ie dibeimo itinona llua rafue

(Mr 9.38-40)

⁴⁹ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

⁵⁰ Jesús dinena uai ote:

—Naimiena rairuiñeno. Cai dibeimo itimiedi cai facaisena ite. Ie jira naimie isoidinona rairuiñeno.

Jesús dinena Jacobo, Juan iaímaiaí lletaja rafue

⁵¹ Monamo abido Jesús jaillirui iaírei ia, Jerusalémo jaiacanamo naimie comecina facade. ⁵² Ie jira dajeriena uicodo oretate. Ie inillinona jenollena, Samaria railla nairaimo jaidimaci; ⁵³ iadedi Jerusalémo naimaci jailla jira, judíuainedimona samaritanodi gaiñena jira, Jesús llofueoicaiganona feiñoiacaiñedimaci. ⁵⁴ Iena fidianona, Jacobo, Juan diga, Jesúmo jicanotiiaímaiaí:

—Nama, ¿bie comini jobaillena, monamona irai billena Jusiñamuimo coco jicanuana jitaideo?

⁵⁵ Iaímaiaímo eruaillanona, Jesús dinena iaímaiaímo riire lletade:

—Dama ite. Iena jitaíñedicue.

⁵⁶ Ie mei inillena jiaie illanomo jaidimaci.

Jesús ie llofuegamiena damie jaillena ie rafue

(Mt 8.19-22)

⁵⁷ Naisona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadicue. O llofuegamiena jaiacadicue.

⁵⁸ Jesús uai ote:

—Janorede ocainaíaidi joforedimaci. Silliñiaí jillainiairedimaci; iadedi jofonidicue. Monamona billanona, imana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comecina raise faca.

⁵⁹ Jiaimiemo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaiticue; ia cue moo nia fioldaiñena jira, o diga nia jaiñeiticue.

⁶⁰ Jesús naimiemo dane llote:

—Dama ite. Cue diga mai bi. Cuen a ñnoñedinodi o moona canoredimaci. Naimie fioldai, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie dibeimo naimaci comeciai iuaina meiduana llocana cue diga mai o bi.

⁶¹ Jiaimie Jesúmo llote:

—O llofuegamiena jaiacadicue: iadedi cue jofomo nano jaiacadicue, cue comina facadollena.

⁶² Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

10

Ie rafuena lollena, Jesús setenta digamiena oretaja rafue

¹ Ie llofueganona llofuia mei, naimacimona Jesús setenta digamiena fetode. Naga naimie jaiacana nairaiamo menamieriena oretate.

² Naimacimo llote:

—Diga comini ite, naimacina Jusiñamui rafuena ñnotallena; iadedi eo janore lloraini ite. Jusiñamuimo jicano, jiaie llorainina naimie oretallena.

³ Mai jai; iadedi abi rairuicana jai. Toica llaudaiai janallari illanomo illa isoi, omoina oredicue. ⁴ Ucubena uiñeno. Ailluena rana omoi uiñellena, bolsana uiñeno. Meidolle zapatona uiñeno. Naisomo bu omoimo dafaifia, are ñaiñeno. ⁵ Bu ie jofomo omoi ria, jofomo itinomo marena uaido.

⁶ Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimiemo lloñeno. ⁷ Nie nairaimo omoi ria, dacomo omoi ri. Omoi ecalle rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno. ⁸ Nie nairai omoi ria, omoina naimaci feiñoia, omoi ecalle rana uaitañeno guiño. ⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie dibeimo omoi comeciai iuaina meido”.

¹⁰ Nie nairaimo omoi ria, omoina naimaci feiñoñenia, ie naiso motomo jaillanona llono: ¹¹ “Omoi naisomo cai eillimo ite jearacuai jai jaidinotica, marañede rafue omoimo illana omoi uiñollena. Jusiñamui omoina sedaacade; ia iena jitañedomoi” llono. ¹² Sodoma nairai jai eo marañede. Jusiñamui iena jai euidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

Jesús ie ñnoñedinona llua rafue

(Mt 11.20-24)

¹³ Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi ñnoñedinomaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuai meiduana jiaie comini uiñotallena, ebinide iniroina jitanonona, jusefo naimaci ifogaiamo jonetimaci. ¹⁴ Jusiñamui uicomo nana comini ico ia, Corazímo

itino Tiro nairai baifemo duere sefuitimaci. Sidón nairai baifemo duere sefuitimaci. ¹⁵ Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci. ¹⁶ Omoi lluana naimaci cacaacania, cuena cacadimaci. Omoi lluana naimaci jitaiñenia, cuena jitaiñedimaci. Cuena jitaiñedinodi cuena ore-tagamiena jiai jitaiñedimaci. —Jesús naie fetocanomo iese llua mei, oni jaidimaci.

Ie setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci: —Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana cidicue. Iemona cue uai naimie uai baifemo faiana uiñoticue. ¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jai itataticue. Nana cue dibeimo iñedino omoi anamo jai itataticue. Omoina niese nibaiñeitimaci; ²⁰ iadedi omoi uaina jananiai inua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

Jesús ie Moo diga ñaia rafue

(Mt 11.25-27; 13.16-17)

²¹ Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotina bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo feaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoina naimiema uiñotadicue. Ie muidona naimiema uiñotomoi.

²³ Ie llofueicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci.

²⁴ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie inotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesús cai ecimo itimiena isiruillana llua rafue

²⁵ Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Niese Moisés micori llogacinuai iena raite?

²⁷ Uai ote:

—Moisés micori jaie cueda: “O jitailla jira, o comecina facajamona, cai Nama Jusiñamuina nana o comeci jitaillamona naimiema eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoia, Jusiñamui illanomo jaca iitio.

²⁹ Naie llofueraima Jesúmo dane jicanote:

—¿Bu cue ecimo itino?

³⁰ Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiena fatimaci. Niade ie meinianona ie ecimona jaisite. ³¹ Dallu illanona, Jusiñamui diga ñairaima naie naisona jaide. Fagamiena ciode; iadedi ecido jaide. ³² Dallu illanona, Jusiñamui jofomo maijiraima jiai jaide. Fagamiena ciuanona, ecido jiai jaide. ³³ Ja muidomo Samaria nairai imie jaide. Naie nairaina enoidomoi. Fagamiena naimie ciuanona, naimiena duenaite. Iemona naimie canoacade. ³⁴ Naimie dine jaillano, ie bofellañona manode. Jiai maitade. Ie burro emodomo jonecaida, naimiena uite. Inillinomo rilla mei, nainomo naimiena sedade. ³⁵ Ie areruido ie inia jofu namamo janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide. ³⁶ —Naie llofueraimamo Jesús dinena jicanote— ¿Fagamie ecimo itimiedi bu?

³⁷ Uai ote:

—Fagamiena duenaitimie.

Jesús raite:

—Jai raise uñotio. Mai jai. Ie isoi finocana o jai.

Jesúdi Marta iaiñuai María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiena feiñote. ³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacareillena; ⁴⁰ iadedi Martamo maijille eo illa jira, naiñaiño naimie llofuiacinona cacareñede. Ie jira Jesúmo llote:

—Nama, cue euiño cuena canoacaiñena jira, dañu maijidicue. “O euiñona cano” naiñaiñomo llono.

⁴¹ Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca. ⁴² María iemo comecina jai facade. Naiñaiño cue llofuiana nano cacaiacade. Ona canollena naiñaiñomo lloñeiticue.

11

Jusiñamuimo Jesús jia rafue

(Mt 6.9-15; 7.7-11)

¹ Jiaruido ie Moo diga Jesús ñaia, ie llofueganomona damie naimiemo llote:

—Nama, jiana caina llofue, ie llofueoicaiganona Juan Bautista micori llofua isoi.

² Jesús uai ote:

—Omoi jiaia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisa o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai inoñellena.

⁵ Iena naimacina nia llofuellena, Jesús jiaie rafuena llote:

—Naiona mona moto llomeniconna jicallena, o nabai dine o jiaia, ado lloitio: “Nabai, daje amani llomeniconna jitaidicue. ⁶ Jiaie nabai cue

jofomo como ride. Jaca cuemo buedi iñede, naimiena cue ecallena".
 7 Ie jofu jeraimona o nabai fairioite: "Cuena uaidoñeno. Cue nasedi jai
 cue ibacasa. Cue uruiai jai inidimaci. Jiai inidicue. Llomenicono omo
 fecallena casiacañedicue". 8 Ja muidomo casillano, omo iena fecaite. Ie
 nabaina o illa jira, fecañeite; iadedi o eo jitailla jira, o jitailla rana fecaite.
 9-10 Daje ra omoi faifia, iena jenodomoí. Raise jenoia, iena baitomoí.
 Damiena omoi jenoia, naimie illanomo jaidomoí. Nainomo naimiena
 baillamona, omoína feiñoite. Ie isoide. Buena omoi jitaia, Jusiñamuimo
 jica. Iena omoi jicaja jira, iena naimie cacajamona, omoímo iite.

11 'Ero, omoímona ie moomo llomenicono ie jito jicaia, noficina fe-
 cañede. Lliciaína jicaia, jaiona fecañede. 12 Jigina jicaia, acaidona fe-
 cañede. 13 Jeacinona finocabidomoí; iadedi omoi uruiaimo mare rana
 fecacabillana uiñotomoí. Cai Moo Jusiñamui jaca mareuidimie. Cai
 baifemo naimie faite. Ie muidomo naimacina canollena, naimiemo
 jicadinomo ie Joreña itataite.

Comini Jesúna jeare ñaia rafue

(Mt 12.22-30; Mr 3.19-27)

14 Jiairuido Janaba anamo illamiemona Jesús Janabana oni orede.
 Janabana nia oretañenia, Janaba anamo naimie illamona, naie iima
 ñainide. Janaba oni jailla mei, naimie ñaite. Ie jira comini rajicaidimaci;
 15 iadedi dajerie raitimaci:

—Beelzebú anamo bimie illamona, Beelzebú uaido jananiaina oni
 orede —raitimaci. Beelzebúdi Janaba comini.

16 Jiaíno naimiena facaciacasite. Raitimaci:

—Siño uai omo ia, Jusiñamuina siño rafuena finota.

17 Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo
 maijinidimaci. Oni jaidimaci. Daje isoi comeciaina lloillamo daje jofomo
 itino facañenia, danomo jainaiainidimaci. Oni jaidimaci. 18 Ie isoide.
 Beelzebú uaido jananiaina, omoi llua isoi, cue oretaia, Janaba ie díbeimo
 itino diga jai nabairiñede. Iemona naimie comini danomo iñeitimaci.
 19 Omoi comini jananiaina oni oretacabitimaci; iadedi naimaci finoca
 rafuena uaitañedomoí. Naimacimo jicano, bie isoide rafuena omoi raise
 uiñollena. Iemei cue finoca rafuena uaitañeitomoí.

20-22 Jiaie rafuedo iena lloiticue. Ero, ie rana raise riiduamona,
 mairidimie ie rana raise enoite. Ie jofomo ie ra illanona, iena raise
 sedaite. Jamai bue isoidimie ie rana finide; iadedi naimie baifemo
 mairidimie bia, naimiena emodofillamona, ie rana fiirede. Ie isoide. Jan-
 aba anamona cominina jillotacabiticue. Naimie afemo nano cue iñenia,
 cominina jillotanidicue. Naimie afemo cue illa jira, iena finoredicue.
 Jusiñamui uaido jananiaina cue oretaia, Jusiñamui rafuena cue llua
 uiñotomoí.

23 'Cue díbeimo iñedimie cuena enoide. Cue díbeimo cominina
 itañedimiedi naie cominina cuena iñotañede.

Janaba anamo illamie rafue

(Mt 12.43-45)

24 Jesús naimacimo nia llote:

—Birui bene ite marañede cominidi Janaba anamo illamie isoidimaci.
 Naimiemono Janaba oni jaia, jiaie illanona baillena, jofue iñenanomo
 jaide; iade baiñede. Baiñena jira, naimie comecina facade: "Navui cue

anamo illamie dine abido jaiticue”. ²⁵ Abido naimie bia, naie iima comeci namanidena naimie baite. ²⁶ Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiai naimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci inoñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona dañaiño Jesús mo llote:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena inuamona, jiaino eo caimare iitimaci.

Dajerie Jesús siño rafuena finuana jitailla rafue

(Mt 12.38-42; Mr 8.12)

²⁹ Ie facaise diga comini Jesús dine biñoidimaci. Naimacimo llote:

—Birui ite cominidomoi marañedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca. ³⁰ Naimiemo suide rafuemona Nínive railla nairaidi Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñoitimaci. ³¹ Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacina naiñaiño micori cacareillena, aarena jaide. Salomón micori baifemo birui uaidicue; iadedi cuena inoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena inoñedomoi?” omoina ico ñaite. ³² Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciai icinuaina meidotimaci. Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoina raiñeiticue. Jonás micori baifemo birui uaidicue; iadedi cuena inoñedomoi.

Jesús comini illa rafue

(Mt 5.15; 6.22-23)

³³ Jesús llote:

—Lamparín bu unia mei, jofo anamo bainino rainañega. Cirigai anamo rainañega. Ie rairanomo rainaca, comini nainomo bia, jofo jerai lligaiñollena. ³⁴ Omoi uisi diga rana ciodomoi. Omoi uisi marañenia, rana raise cioñedomoi. Ie isoide. Omoi comeci marañenia, marañedicinona finocana jaidomoi. Jusiñamuina uiñoñedomoi. Ie rafuena jiai uiñoñedomoi. ³⁵ Ie jira omoi comeciaina raise fino, cue rafuena omoi raise inollena. ³⁶ Nana omoi comeciai marena ia, cue rafuena inocana jaitomoi. Iena raise uiñoitomoi. Jofomo lamparín raise lligaiñua isoi, cue rafuena raise uiñoitomoi.

Jesúdi judíuai illaicominina ñaia rafue

(Mt 23.1-36; Mr 12.38-40; Lc 20.45-47)

³⁷ Cominina Jesús llofuia mei, daje fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide. ³⁸ Naimie nia guiñenia, naimaci einamaci llogacinodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comecina facade: “Naimie eo mare llofueraima. ¿Ñiese cai einamaci llogacinodo jaiñede?” ³⁹ Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciai jearede. ⁴⁰ Abi uiñoñedomoi. Jusiñamui omoi abiaina omoi comeciai diga finode. Omoi finoca rafuena uiñote. Omoi comeciaina facajacinona jiai uiñote. ⁴¹ Omoi comeciai marena ia, jiaie cominina canodomoi. Iemona Jusiñamuimona omoi abi jiai mare. ⁴² Fariseuai, omoiimo rafuena lloiticue. Nana omoi illimo ite ramona Jusiñamuimo janore jisa fecafecabidomoi; iadedi jiaie cominimo mare rafuena raise finoñedomoi. Jusiñamuina jiai raise isiruiñedomoi. Nana naie isoide rafuena omoi jiai finua. ⁴³ Comini omoiiri acarillena, ofiracomo uicomo raiacadomoi. Ñine omoi macaria: “Jamai bue isoñedica!” omoi comeciaina facajamona, jiaie comini omoina uaiduana gaidomoi. Iese omoi jailla jira, Jusiñamui omoina duere finoite. ⁴⁴ “Bainino ite raiifo emodomoi comini uiñoñeno macarillamona, naimaci abi jai jearede” raitomoi. Bainino ite raiifo isoidomoi. Omoi diga jiaie cominidi omoiimo ite jeacinona uiñoñeno nabairillamona, jeacinona jiai finodimaci. Iese omoi finocana jaia, Jusiñamui omoina duere finoite.

⁴⁵ Naie facaise Moisés llogacinuaina llofuerainimona damie Jesúmo llote:

—Iese o lloia: “Jecino finodomoi” caina jiai llotio.

⁴⁶ Jesús uai ote:

—Jusiñamuimona jiai duere sefuitomoi. Omoi einamaci llogacinuaido raise naimaci jaillena, diga rafue comini finuana jitaidomoi; iadedi iedo naimaci raise jaillena, naimacina jaca canoñedomoi. “Jusiñamuina eo raise sedadica!” comecina facadomoi. ⁴⁷ Omoi jaiagaidi Jusiñamui facaina llorainina meinetimaci. Naie lloraini micoriai raiafuai birui marena finodomoi; ⁴⁸ iadedi naimaci micoriai llogacinuaido omoi birui jiai jaiñena jira, omoi jaiagai finoca radi: “Mare” raitomoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoina duere finoite. ⁴⁹ Omoina Jusiñamui abi uiñuamona jai llote: “Cue rafuena lloillena, naimaci dne cue facaina llorainina oretaiticue. Cue rafuena eo uiñotinona jiai oretaiticue. Dajeriena meinetimaci. Jiainona duere finoitimaci”. ⁵⁰ Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite. ⁵¹ Abel micori jaie ite. Ie ama naimiena meinete. Naimie facaisemona omoi jaiagaidi diga llorainina meinetimaci. Zacarina jiai meinetimaci. Jusiñamui jofomo Jusiñamuimo toica ocaina jobaisoillano motomo naimiema meinetimaci. Omoimona Jusiñamui birui iba oite. ⁵² Omoi llofuiamona comini Jusiñamui rafuena uiñoñedimaci. Jusiñamui rafuena raise uiñoñedomoi. Jiaino iena raise uiñuana jitañedomoi. Iese omoi jailla jira, Jusiñamui omoina duere finoite.

⁵³ Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés

mícori llogacino llofueraini daje isoi uai uaitatimaci. ⁵⁴ Naimie raise uai oñedena, naimiena duere finoacadimaci.

12

Jesúdi mareuidinona abi caitadinona llofuia rafue

¹ Ie facaiseconi eo ailluena comini Jesús dine ofidimaci. Ailluena illa jira, conini eilliamo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicai” raitimaci; iadedi mareuidinona abi caitadimaci. Naimacimona abina rairui. ² Naimaci birui finoca rafuena birui bainino finodimaci; ia Jusiñamui naimaci comeciai iticinona ico uñotaite. ³ Ero, cue rafuena birui anado llocana jaidomoi; ia ico marefodo iena llocana jaitomoi.

Jesúdi jaciruiñeno llofuia rafue

(Mt 10.28-31)

⁴ Ie llofueganomo Jesús llote:

—Cue nabaiñiaidomoi. Omoina meineiacadinona jaciruiñeno. Omoi abina meineredimaci; ie iadedi omoi joreño meinenidimaci. Omoina naimaci meinia, omoi joreño Jusiñamui dine jaite. Iena uñuamona, omoi meineiacadinona jaciruiñeno. ⁵ Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiena jacirui. ⁶ Ero, dabecuiro janorede sillina fecadomoina, eo janore ibaca. Silliñiai eo janore raifide; iadedi Jusiñamui naimaci illana uñote. ⁷ Ero, niga ifotirai omoimo illana Jusiñamui jiai uñote. Naimiedi omoina sedajana jiai uñote. Silliñiai baifemo Jusiñamui isiruigamoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

Jesús naimiena janoñenana llofuia rafue

(Mt 10.32-33; 12.32; 10.19-20)

⁸ Ie llofueoicaiganomo Jesús nia llote:

—Cue rafuena omoi lluamona, jiaino omoina duere finoitimaci. Cuen a birui omoi janoñenia, nana comini Jusiñamui jaienisaí uicomo ico ia, nainomo omoina janoñeticue. “Cue cominidomoi” omoina raiticue. ⁹ Cuen a birui omoi janoia, nana comini Jusiñamui jaienisaí uicomo ico ia, nainomo omoina janoiticue. “Cue cominiñedomoi” omoina raiticue. ¹⁰ Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreño jeare ñaitimie jeacinona feitañeite. ¹¹ Cue rafuena omoi llua muidona, duere sefuitomoi. Illaicomini dine omoina llogidollena comini uia, omoi abi ridollicinomo omoi comeciaina jarire facañeno. ¹² Naie facaiseconi Jusiñamui Joreño omoi abi ridollicinona uñotaite.

Jesúdi raruiaí eo uamona abi rairuillana llofuia rafue

¹³ Nainomo ite cominimona damie Jesús llote:

—Maestro, cue moo jai fiodailla mei, cue ama doforamie cue facaina ite rana cuemo iacañede. Naimiemo llono, cuemo illena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi. ¹⁶ Iena omoi raise uñollena, jiaie rafuedo iena

lloiticue. Ucuberedimiedi ie illimona ailluena rana ote. ¹⁷ Ie jira comecina facade: “Cue illimona ailluena rana oticue; iadedi ¿ninomo iena eenoiticue? ¹⁸ Birui cuemo ite eenoracona judaiticue. Ie mei aillue eenoracona finoiticue. Nainomo cue rana eenoiticue”. ¹⁹ Ie comecina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caimare iiticue”. ²⁰ Iese comecina facade; iadedi Jusiñamui naimiemo llote: “Abi uiñoñedio. Cue llua jira, ja naiona fioidaitio. Ie mei omo ite ra omo fiebiñeite”. ²¹ Dama ramo ie comecina bu facaia, Jusiñamui jitaillacinomo ie comecina bu facañenia, faifite.

Jesúdi Jusiñamui cai sedajana llua rafue
(Mt 6.25-34)

²² Ie llofueoicaiganomo Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. ²³ Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite. ²⁴ Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoína canoite. ²⁵ Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoína a sairitarede. ²⁶ Omoi comeciaina facajamona omoi a sairíñena jira, jiaie ramo omoi comeciaina jarire finoñeno. ²⁷ Safiamo omoi comeciaina faca. ¿Niese sicodimaci? Maijiñedimaci. Iniroina tiforiñedimaci; iadedi Salomón micori naimaci isoi jai ie ñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. ²⁸ Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ñno. Jusiñamuina eo janore ñnotomoi. ²⁹ Omoi comeciaina jarire icana jaiñeno. “¿Buena guiticaí?” raiñeno. Iemo comeciaina eo facañeno. ³⁰ Jusiñamuina ñnoñedino iemo comecina facacabidimaci. Nana omoi jitaillacinona omoi Moo Jusiñamuidi uiñua jira, naimaci isoi iñeno. ³¹ Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jiaie iite.

Jesúdi Jusiñamuimo comecina facaja rafue
(Mt 6.19-21)

³² Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoína itatajamona, omoína sedaite. ³³ Omoi raruaiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Fñiriraima nainomo jaiñede. Gñireco nainomo jiaie iñede. ³⁴ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

Jesús ie abido billemo ocurillana llofua rafue
³⁵⁻³⁸ Jesús nia llofue:

—Monamona ico cue abido billemo ocuiri. Iena omoi raise cacailena, bie rafuedo iena lloiticue. Damie ie nabai ie ai ua rafue dine naiona jaide. Ie mullaiaia naimie abido billemo ocurillana ocuide. Naimie billemo naimaci raise ocuria, iniroina jitajanona, lamparinia unianona, ocuiritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci inifeno ocuria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uifnohena jira, jaca ocuricana naimaci illa. ³⁹ Ero, firiraima bille facaiseconi jofo namadi uifnotena, nia caadote, ie ra faifi raillanona. ⁴⁰ Monamona ico abido biiticue. Omoi ocuiriñena facaisemo biiticue. Ie jira cue billemo raise ocuiri.

*Jesúdi patrón ie mullaimana ie jofona sedataja llua rafue
(Mt 24.45-51)*

⁴¹ Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

⁴² Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiai ecade. ⁴³ Ie mei patrón oni jaide. Jofomo abido naimie bia, ie nanoca mullaima raise maijana fidia, naimiena raise ibaite. ⁴⁴ Iobillamona, nana ie raruiaina sedataite; ⁴⁵ iadedi naie mullaima marañenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁴⁶ Ie ocuiriñena facaise ie patrón abido billanona, naimiena meinetaite. Ie uaina inoñedinisoi, duere finoite. ⁴⁷ Naie mullaima ie patrón jitailla rafuena finuana uifnote; iadedi iena finoñede. Ie jira eo duere sefuite; ⁴⁸ iadedi marañede rafuena raise uifnoheno jiaie mullaima finoia, janore duere sefuite. Ie isoide. Jusiñamui rafuena raise uifnotino iedo raise jaiñenia. Jusiñamui naimacina eo duere finoite. Iena janore uifnotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

*Jesús muidona nana comini uri iñena rafue
(Mt 10.34-36)*

⁴⁹ Jesús llote:

—Cuena naimaci inollena, eniruemo comini dine biticue. Cuena dajerie inuamona, cue cominina jaitimaci. Cuena jaino inoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue. ⁵⁰ Cue nia eo duere sefuiticue. Iena raire suillena jitaidicue. ⁵¹ Nana cominina uri itatallena eniruemo biñedicue. Cuena inoñedinodi cuena inotinona enoitimaci. Enoillamona, cuena inotinona duere finoitimaci. ⁵² Cue billamona, daje jofomo itino diese danomo iñeitimaci. Dabecuiro comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite. ⁵³ Cue lloga rafuena damierie inua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

Jesúdi monamo ite rana llofuia rafue

(Mt 5.25-26; 16.1-4; Mr 8.11-13)

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide. ⁵⁵ Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite. ⁵⁶ Abina uifnotinona abi caitadinodomoi. Monamo eruaillamona, rafue suillana uifnotomoi; iadedi omoi ecimo suiacalle rafuena raise uifnoñedomoi. Cue lloga rafuena raise cacaiñedomoi. ⁵⁷ Iemo omoi comeciaina raise facañedomoi. ⁵⁸ Ero, omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina jonetaite. ⁵⁹ Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

13

Jesúdi comeciái iuai meiduana dana llua rafue

¹ Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori soldaduaina orede, naie cominina fallena.

² Jesús uai ote:

—¿Ñiese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi. ³ Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoidi jiai faifitomoi. ⁴ Siloé railla tidacana navui ana goillamo, dieciocho digamie saitabidimaci. Iena fididomoi. ¿Ñiese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi. ⁵ Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoidi jiai faifitomoi.

Jesúdi ie Moo comini comeciái iuai meiduamo fecuise ocurilla llua rafue

⁶ Iena comini raise uifollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede. ⁷ Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”. ⁸ Ie illina sedaraima uai ote: “Dama ite. Daje año nia seda. Riarana abina caiguiticue. Eniruena caimaretaiticue. ⁹ Jiaie año llisia, mare. Llisiñenia, iena teiticoco”. Ie isoide. Jusiñamui omoi comeciái iuai meiduamo are ocurite; ia meidoñenia, omoina duere finoite.

Jesúdi jicaidiñaiñona jillotaja rafue

¹⁰ Jiairuido sábadoruimo judíuai ofiracomo Jesús llofuate. ¹¹ Nainomo duidiñaiñodi ite. Janaba anamo naiñaiño illa jira, naiñaiño jicaide. Atona naidainide. ¹² Naiñaiñona Jesús ciuanona, naiñaiñomo llote:

—Ñoo, o duicomona jai jillodio. ¹³ —Ie mei naiñaiñona jetade. Ieconí naiñaiño atona naidadate. Ie jira Jusiñamuimo iobillacinona fecade.

14 Naie ofiraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis digarui ite maijillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo maijiñedicaí.

15 Jesús uai ote:

—Maijiñedinona abi caitadinodomoí. Sábado iruimo maijicabidomoí. Sábado iruimo omoi toiniaina imaci illanomona suiñodomoí, jinui illanomo naimaci jiruaillena. Naie isoide maijia omoimona mare. 16 Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñona canollena, sábado iruimo naiñaiñona Tafe anamona cue jillotaia, cuemona mare.

17 Iena Jesús lluamona, nana naimie díbeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue

(Mt 13.31-32; Mr 4.30-32)

18 Jesús jiaie rafuena llote:

—Jusiñamui díbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. 19 Jiaie rafuedo iena omoimo lloiticue. Mostaza raila ido eo janorede. Ie illimo damie iena rillamona, eo aillue riaradi sicode. Ailluena jira, nainomo silliniñai jicaiciaina finodimaci.

Jesús siritate rana llofuia rafue

(Mt 13.33)

20 Jesús jiaie rafuena llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. 21 Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

Jesúdi Jusiñamui dine rille llua rafue

(Mt 7.13-14, 21-23)

22 Jesús diga nairaimo llofuecana jaide. Jerusalén dine jaide. 23 Jesús oni jaillanona, damie naimiemo jicanote:

—Nama, ¿niga comini o uaina inoitimaci? —Jesús uai ote:

24 —Monamo cue Moo dine jaille nasedi janorede isoide. Naie nasedo llicana o jai. Ailluena comini naiedo jaiacanitimaci; iadedi fo jaititimaci.

25 Naie jofu nama nase ibaila mei, ¿niese fo jaitomoi? Jino naidailamona, nasena tutajanona, raitomoi: “Nama, o nase econo”. Naimie uai oite: “Omoína uiñoñedicue”. 26 Dane lloitomoi: “O diga navui guiticaí. Cai illanomo llofuetio”; 27 iadedi naimie uai oite: “Omoína uiñoñedicue. Cue cominiñedomoi. Jeacino omoi comecimo nia illa jira, mai jai”. 28 Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micorina cioitomoi; ia omoi jino illamona, duere sefuillamona, eeitomoi. 29 Diga comini Jusiñamui illanomo iitimaci. Ailluena judúaiñedino naga nairaiamona Jusiñamui illanomo biitimaci. Nainomo coninina caimare nabaitimaci. 30 Naga nairaimona Jusiñamui cominina jillotarede. Cue rafuena cacadomoí; ia cue cominina omoi jaicania, abi iedoñeno cuena inocana omoi jailla.

Jesús Jerusalémo itinomo llua rafue

(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaíma Herodes ona meineiacadé.

³² Jesús uai ote:

—Herodedi eo jifueráima. Naimie dine jai. Naimiemo llono: “Janaba anamo ite cominimona Janabana oni orecabidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite. ³³ Nia oni jaiticue. Ailluena Jusiñamui facaina lloraini micoriai nainomo jai fiodailla isoi, Jerusalémo cue rafue jiai raire fuite” llono.

³⁴ Jerusalémo itinomo comecina facajano, Jesús llote:

—Jerusalémo itino, omoímo rafuena lloiacadícue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruai sedaja isoi, diga icaíño cue anamo omoína uaidoiacadícue; iadedi omoi dinena cuena jitaiñedomoi. ³⁵ Iemona Jusiñamuidi omoi illanona jai faínonocaide. Cue Moo dine jaiticue. Cue jailla mei, cuena cioiñeitomoi. Ico cue abído bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

14

Jesúdi abina siridimiena jillotaja rafue

¹ Jiairuido sábadoruimo Jesúdi fariseo imie jofomo guisaide. Naie fariseo imiedi illaicomini. Nainomo itino Jesúmo eo eruaidimaci. ² Guille facaise naie jofomo duidimie bite. Naimie abina siridimie. ³ Nainomo itinomona damieredi fariseuai comini. Moisés micori llogacinuaina llofueraini jiai itimaci. Naimacimo Jesús jicanote:

—Sábadoruimo comena cue jillotaia, ¿omoimona jeacino finodicue? ¿Ñiese Moisés micori llogacinuai iena llote?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede. ⁵ Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare. Bimiena cue jillotaja jira, ¿ñiese cuena jeare ñaitomoi? ⁶ Iena cacajanona, uainicaidimaci.

Jesúdi guillena uaidoganona llua rafue

⁷ Jesúdi naimaci guisaibillana ciode. Jiaíno baífemo illena, jofo nama abimo nana raíacadimaci. Iena ciuamona, naimacimo Jesús rafuena llofuite:

⁸ —Rafue dine guillena omoína bu uaidoia, jofo nama abimo raíñeno, omoi baífemo itimie bi raillano. ⁹ Jofo nama abimo omoi raía, omoi baífemo itimie bia, jofo nama omoímo lloite: “Bimiemo omoi raíllanona feca”. Meidaíllanona, oni rainadaitomoi. ¹⁰ Ie jira rafue dine omoína uaidoia, naie jofomo omoi raí, oni raí. Ie mei jofo nama jitaía, omoímo lloite: “Cue abímo raí”. Ie mei nana naie itino omoi iobillana cioitimaci. ¹¹ Ie isoide. Jusiñamuidi jiaímie afemo iacadimiena jiaímie afemo iñenana itataite. Jusiñamuidi jiaímie afemo iacaíñedimiena jiaímie afemo itataite.

¹² Naimiena uaidotimie mo Jesús llote:

—Guille rafuena o finoia, naga icaíño o nabaiñiaína uaidoñeno. Naga icaíño o cominina uaidoñeno. Naga icaíño o ecimo itino ucuberedinona uaidoñeno. Naimacina o uaidotiana, jiairuido guillena ona uaidoitimaci,

naie iba o ollena; ¹³ ia rafuena o finoia, dueredinona uaido. Ñuja-ñujacaida macaritinona uaido. Uisinidinona uaido. ¹⁴ Naimacimona iba ico o oñenamona, Jusiñamui ona caimare itataite. Jiairuido fiodaillamona mareuidino jilloia, monamo Jusiñamui ona ibaite.

Jesúdi ailluena guille finoica rafuena llua rafue

¹⁵ Jesús abimo itinomona Jesús lluana damie cacajano, raite:

—Monamo Jusiñamui illanomo itimiedi marena iite.

¹⁶ Jesús uai ote:

—Iena omoi raise uinollena bie rafuena lloiticue. Damie aillue rafuena finode. Ailluena cominina uaidote. ¹⁷ Rafue illaruimo ie mullaimana orede, cominina dane uaidollena. Raite: “Mai bi. Nana guille finuadi jai fuite”; ¹⁸ ia biacaiñedimaci. Damie llote: “Enruena como ibadicue. Iena jibuisaiacadicue. O rafuemo jaiñeiticue. Ie jira cue joreñona iciñeitosia”. ¹⁹ Jiaimie llote: “Diez diga juraretana como ibadicue. Naimacina jibuisaiacadicue. O rafuemo jaiñeiticue. Ie jira cue joreñona iciñeitosia”. ²⁰ Jiaimie llote: “Riño como oticue. Ie jira o rafuemo jaiñeiticue”. ²¹ Ie nama dine naie mullaima abido jaide. Comini biacaiñenana llote. Iena cacajano, rafue namadi icirite. Ie mullaimamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisinidinona uaido”. ²² Ie mei naie mullaima jaide. Abido naimie bia, ie namamo llote: “O lluana finodicue. Ailluena comini jai bitimaci. O jofomo illino nia ite”. ²³ Rafue namadi uai ote: “Naisomo itinona bene atillena, cue jofona oruitallena, cai nairaimona jino jai. ²⁴ Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitañedino nainomo ico iñeitimaci.

Jesúdi naimie llofueganona jaiacadino rafue

²⁵ Naie facaise ailluena comini Jesús diga jai jaisoidimaci. Naimacimo llote:

²⁶ —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiai baifemo isiruilla. Cuena ie amatai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide. ²⁷ Cue llofuegamiena bu jaillamona, duere sefuicana jaite. Nibai naiemona fiodaite. Bu iese jaiacaiñenia, cue llofuegamiena naimie raise jainide.

²⁸ ‘Ero, jiaie rafuedo iena lloiticue. Jofona bu finoacania, ie ucubena bailla diese uinollena: “¿Niga raifite?” comecina nano facade. ²⁹ Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. ³⁰ Raitimaci: “Ie jofu finua tainede; iadedi fuidonide”.

³¹ ‘Ero, jiaie rafuedo iena lloiticue. Illaima jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?” Comecina facaja mei: “Emodofiñeiticue” naimie comecina facajia, ³² nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacaiñedicue; ia o diga bie rafuena raise finoacadicue”. ³³ Biemo comecina omoi faca. Ie raruiamo bu comecina eo facaia, cue llofuegamiena jainide.

³⁴ ‘Sal mare; iadedi ie caimano jai iñenia, ¿dane niese nibaiamona caimarenite? ³⁵ Jai marañede. Enruemo jonegadana, jiai marañede.

Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluomo cacarei. Iena iño.

15

Jesúdi naimiena iñnotinomona damie faifillana jitaiñena rafue

(Mt 18.10-14)

¹ Naimaci bisoilla isoi ie rafuena cacaillena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiai ofidimaci. ² Iena ciuano, fariseuai cominidi, Moisés micori llogacinuaina llofuerañi diga, Jesús joreñaña ñaitimaci:

—Bimie marañedicinona finorainina feiñote. Naimaci diga jiai guite.

³ Naimaci ñaiana uiñuanona, Jesús naimacimo bie rafuena llote:

⁴ —Omoimona damiemo cien toica llaudaiaia nibai ite. Naimacimona daje feiraite. Ie noventa y nueve llaudaiaia fainonocaida, iena jenuaite, ie baille dinori. ⁵ Baillanona, ie fecanicomo rocanocaida, iobicana biite. ⁶ Jofomo naimie ria, ie nabaiñiaia uaidoite. Ie ecimo itinona jiai uaiduanona, raite: “Cue diga iobi. Cue feiraite llaudana jai baiticue”. ⁷ Ie isoide. Cue rafuena cue lluamona, damie ie comeci jeacinona fainonocaillamona, ie comeci iuai meiduamona, monamo itino eo iobitimaci; iadedi noventa y nueve comini mareña illamona, janore iobitimaci.

Jesúdi faifide ucubena bailla llua rafue

⁸ Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille dinori. ⁹ Iena naiñaiño baia, ie nabaiñiaia uaidoite. Ie ecimo itinona jiai uaiduanona, raite: “Cue diga iobi. Cue faifide ucubena jai baiticue”. ¹⁰ Ie isoide. Cue rafuena cue lluamona, damie ie comeci jeacinona fainonocaillamona, ie comeci iuai meiduamona, Jusiñamui jaienisaia eo iobidimaci.

Jesúdi damie ie moo fainonocaila llua rafue

¹¹ Jesús llote:

—Jiaie rafuena omoimo lloiticue. Damiemo mena jito ite. ¹² Ie moomo jamamie llote: “Moo, o fiodailla mei, o raruiaimona janore feiñoiticue. O fiodaillana sedaacaiñedicue. O raruiaia cue facaina birui jitaidicue. Cuemo ine”. Ie jira ie moo naimiemo fecade. ¹³ Ie mei nano nie dinori illamona, nana ie raruiaia iraianona, jiaie eniruemo jaide. Nainomo ie ucube jamai buruemo faiaide. ¹⁴ Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite. ¹⁵ Ie jira nainomo ite patrón dine maijiaide. Naie patrón ie chanchuaina sedallena naimiena orede. ¹⁶ Naimiena jaca buna ecarainina jira, chanchuai guillamona guiacade. ¹⁷ Iese naimie duere sefuilla jira, ja muidomo abina uiñoacillamona, comecina facade: “Cue moo jofomo nana naimie mullaiaia raise guitimaci. Guille fiebicabite; iadedi bene aimeri fiodaiticue. ¹⁸ Cue moo dine abido ja jaiticue. Naimiemo lloiticue: Jusiñamui jeacinona finodicue. Omo jeare jiai finodicue. ¹⁹ Odi: ‘Cue jito’ cuena raiñeno. O mullaiaia illa isoi, cuena abido feiño”. ²⁰ Ie facaise ie moo dine jai jaide. Nia aare naimie ia, ie moo naimiena ciode. Ie jitona duenaillanona, naimie dine aiside. Naimiena caimadote. Jiai llibanote. ²¹ Ie jito

naimiemo llote: “Moo, Jusiñamuimo jeacina finodice. Omo jeacino jai finodice. Odi: ‘Cue jito’ cuena raiño”. ²² Ie moo iena cacajano, ie mullaiaimo llote: “Cue jitona naimie eruaillena, eo mare iniroina ati, naimie jtallena. Cue jitona naimie illa jira, iena jtallena, anillona ati. Naimie jtallena, zapatona jai ati. ²³ Janoreta faredretana fano. Iena raise finuanona, iena mai cai guilli. Iobillamona, caimare ebirede rafuena finoitica. ²⁴ Navui cuemona cue jito fiodaite isoide. Cajе cuemo dane abido rilla. Navui cuemona naimiedi faifide; iadedi birui naimiena dane ciodice”. Naimie llua isoi, rafuena finodimaci. ²⁵ Naie facaise nano doforamie illimo ite. Jofomo abido naimie bia, comini iraisillana cacade. ²⁶ Daje mullaimana uaiduanona, naie rafuena jicanote. ²⁷ Naie mullaima uai ote: “O ama abido jai bite. O ama ramo jiriño abido billa jira, o moo ie janoreta faredretana jai fatatate”. ²⁸ Iena cacajano, icirite. Fo jaiacaiñede. Ie jira ie moo jino bite. Naimiena fo uaidote. ²⁹ Ie moomo llote: “Ero, diga años o diga maijodice. O uaina jaca inotice; iadedi cue nabaiñiai diga, rafuena cue finollena, chivo cuemo jaca fecañedio. ³⁰ O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta faredretana fatatatio”. ³¹ Ie moo uai ote: “Moo, nagarui cue diga itio. Nana cue radi oienite. ³² Cuemona o ama navui fiodaite isoide; iadedi naimiena dane ciodice. Naimie navui faifide raitice; iadedi cajе cuemo dane abido rilla. Cue iobillanona rafuena finodice”. Bie rafuemona omoi fueollena, iena jai llotice — Jesús llote.

16

Jesúdi patrón ie mullaima finoca rafuena llua rafue

¹ Ie llofueoicaiganomo Jesús jai rafuena llote:

—Ucuberede patrón ie mullaimana ie rana sedatate. Naie patrón eneno oni illanona, ie mullaima ie rana raise sedañenana fidide. ² Naimiena uaiduanona, naimiemo jicanote: “¿Maraiñede o finoca rafuena niese fididice? Omo ite cuentas cioacadice. Cuemo ati. Cue diga jai maijiñeitio”. ³ Iena cacajano, naie mullaima comecina facade: “¿Niese nibaitice? Cue nama cuena jai dotaacade. Maijana ocuinidice. Jai cominimona ucube jamai jicajana meiruitice. ⁴ Cue finuana jai uiñoticue. Naimaci jofomo comini cuena ico feiñollena cue dotaja mei, nana cue patrón debedinona uaidoitice”. ⁵ Ie jira naimacina uaidote. Damiemo jicanote: “¿Cue patrómo niga debedio?” ⁶ Uai ote: “Cien bidones raifi aceitunamona oga aceitena debedice”. Naie mullaima raite: “O rabemo jarire ja cueno: cincuenta bidones”. ⁷ Jaiñiemo jicanote: “¿Niga debedio?” Uai ote: “Cien digagai trigo raifi debedice”. Naie mullaima dinena raite: “O rabemo ochentana cueno”. ⁸ Iena fidiano, naie mullaimamo ie patrón raite: “Jairuido marena o illemo o comecina raise facadio. Eo abina uiñotimedio” raite. Ero, Jusiñamuina inoñedinodi naimiena inotino baifemo ra fecajana baitadimaci. ⁹ Naiemona omoi fueollena, omoi llotice. Omoi ite ra diga dueredinona cano. Iemona omoi nabaiñiaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoina marena ñaitimaci. ¹⁰ Janore ra omoi illamona, Jusiñamui facaina birui omoi raise maijia, ailluena ra omoi itedena, Jusiñamui facaina jai raise maijitomoi. Janore ra omoi

illamona, maraiñede rafuena birui omoï finoia, ailluena ra omoïmo itedena, maraiñede rafue nia jiaï finoitomoï. ¹¹ Omoïmo birui ite ra diga Jusiñamui facaina omoï raise maijiñenia, naimiemona jiaie rana feiñoñeitomoï. ¹² Omoï anamo ite ra diga Jusiñamui facaina omoï raise maijiñenia, Jusiñamui ie rafue omoïmo itatañeite. ¹³ Mena patrones diga daruido buna jaca maijinide. Mena diga bu maijiacania, damiena jiaimie baifemo gaité. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiá ollemo comecina omoï eo facaia, Jusiñamui jitaillacinomo comecina raise facañeitomoï.

Jesúdi fariseuai comini diga dane ñaia rafue

¹⁴ Jesús llofuiana fariseuai comini cacajano, ucubena eo gaia jira, naimie uaina jamaidimaci. ¹⁵ Naimacimo Jesús llote:

—Omoï finoca rafuemona comini omoïna: “Mare” raillana jitaïdomoï; iadedi Jusiñamui omoï comeciá maraiñenana uiñote. Iese omoï illana Jusiñamui gaiñede. ¹⁶ Jusiñamui facaina lloraini micoriá cuegafuiaïmona Jusiñamui rafuena cacacabidomoï. Moisés micori cuegafuiaïmona iena jiaï cacacabidomoï. Juan Bautista micorimona naimie anamo omoï illana Jusiñamui jitaillana cacadomoï. Jusiñamui ðibeimo omoï comeciá iuaina meiduana cacadomoï. Iena jiaï llocabiticue. Iena ailluena ðnuamona, Jusiñamui ðibeimo birui duere iacadimaci. ¹⁷ Mona enirue diga nia ia, nana Jusiñamui llogacinuai suicana jaite.

Jesús ñima ie aina dotaja rafuena llofui rafue

(Mt 19.1-12; Mr 10.1-12)

¹⁸ Jesús llote:

—Naga aina dotadimiedi, jiañiañiño ollena, jeacinona jai finode. Dotañañiña bu oia, jeacinona jai finode.

Jesúdi ucuberedimie iaïmaiaï Lázaro ie rafuena llua rafue

¹⁹ Jesús jiaie rafuena llote:

—Cue llogacinona omoï raise uiñollena, bie rafue lloiticue. Ucuberedimie ite. Eo mare ñiroina jítade. Eo caïmare raise guicabite. ²⁰ Naimie nasemo Lázaro raillamie jamai biide. Naimiedi dueredimie. Efonaitimie. ²¹ Naimiedi ucuberedimie guiga allamona guiacade; ia guiñede. Jiconiaïdi naimie efociaïna mecabite. ²² Ie mei naimie fodiaite. Jusiñamui cominina naimie illamona, Jusiñamui jaienisá naimie joreño monamo Abraham micori joreño illanomo uitimaci. Ucuberedimie jiaï fodiaite. Comini naimiena raitimaci. ²³ Jusiñamui cominina naimie ñenamona, naimie joreño iraimo jaide. Nainomo naimie duere sefuillamona, Abraham joreñoña aarena ciode. Naimie ecimo Lázaro micori ie joreñoña jiaï ciode. ²⁴ Abraham joreñoña uaidote: “Cue moo Abraham, cuena duená. Lázaroná cue ðine oreta, ie onocá diga, jinuina cue fuemo llocatallesa, cue fuedo manare jaillena. Bie iraimona jai eo llegi cacadicue”. ²⁵ Abraham joreñodi uai ote: “Moo, o illa ðinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuïdio. ²⁶ O ðine jainidicá. O enefebetuemo itio. Cai enefebetuemo jiaï iticá. Caïmona omoï ðine bu jaiñellena, omoïmona cai ðine bu biñellena, iese ite”. ²⁷ Ucuberedimie micori joreño ðinena uai ote: “Cue moo jofomo Lázaroná oreta. ²⁸ Cuemo cinco amatiaï ite. Naimacimo riire llollena, bie iraimo naimaci riñellena, naimiena oreta”. ²⁹ Abraham joreñodi uai ote: “Naimacimo Moisés micori cuegafuiaï ite.

Jusiñamui facaina jaie lloraini micoriai cuegafuiai jiai ite. Iemo naimaci comeciaina facallesa”. ³⁰ Uai ote: “Iese lloñeno. Iemo comeciaina facañeitimaci; iadedi fiodaillamona jilluanona, naimaci dine bu jaia, naimiena ñnoitimaci. Naimaci comeciiai iuai meidoitimaci”. ³¹ Abraham joreñodi uai ote: “Moisés micori cuegafuiai, Jusiñamui facaina jaie lloraini micoriai cuegafuiai naimaci ñnoñenia, fiodaillamona bu jilloia, naimiena jiai ñnoñeitimaci” —Jesús llote.

17

Jesúdi jeacinona finoñenana llofuia rafue
(Mt 18.6-7, 21-22; Mr 9.42)

¹ Ie llofueoicaiganomo Jesús llote:

—Diga ramo omoi faicana uitinomo riitomo. Omoi ramo faitimie duere sefuite. Jusiñamui omoi ramo faitimiena duere finoite. ² Como creyentena jaidimiena ramo bu faia, naimie cimaiomo aillue nofici maianona, joraimo corobaillena naimiena dotacadena, mare. ³ Como creyentena jaidimiena ramo omoi fañellena, abina omoi rairui. O ecimo itimie ona jeare finoia, naimiemo iena llono. Ie comecina meidoiacania, naimie jearede finoca rafuena feita. ⁴ Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

Jesúdi naimiena ñnuana llua rafue

⁵ Ie doce llofueoicaigano Jesús llote:

—Ona ñnoticai; ia caina o uaina eo ñnota.

⁶ Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo sico”, naie amena omoi uaina ñnote.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemono omoi fueollena, iena lloiticue. Illimo ie mullaïma maijiamona, ie toinïai sedajamona jofomo abido naimie ria, ie patrón naimiemo lloñeite: “Mai nano guisaïbi”; ⁸ iadedi naimiemo lloite: “Cueiena guillena nano fino. Cueno eca. Ie mei guitio”. ⁹ Naie mullaïma ocuica rana finua muidona, mullaïmana naimie illa jira, ie mullaïmamo patródi iobillacinona fecañeite. ¹⁰ Ie isoide. Nana cue lluana omoi finodomoina, dani omoi maijiadi, cue cominina omoi illa jira, cuemono iobillacinona feñnoñeitomoi.

Jesúdi diez efonaitinona jillotaja rafue

¹¹ Jerusalémo ie llofueoicaigano diga Jesús jaidemo, naimie nabeimo Samaria enïrue ite. Naimie jarifebeimo Galilea enïrue ite. ¹² Nairai dine naimie riacania, diez efonaitinodi naimiemo dafaïfidimaci. Eneno oni naidaidimaci. ¹³ Naimiena ado uaidotimaci:

—Jesús, Maestro, caina duenai. Caina ja jillota.

¹⁴ Naimacina Jesús cïuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci. ¹⁵ Ie abi jilluana cïuano, naimacimona damie Jesús dine abido bite. Jusiñamuimo iobillacinona ado fecade. ¹⁶ Naimiemo iobillacinona jiai fecallena, Jesús uicomo ana bitadate. Naimiedi judiñfedimie. Samaritano imie. ¹⁷ Jesús llote:

—Diez digamiedomoi. Omoına jai jillotaticue. ¿Ninomo jiaınodi nueve digamie itimaci? ¹⁸ ¿Niese Jusiñamuimo iobillacinona fecaacaiñedimaci? Dama bimie fecade. Naimiedi judío imieñedimie.

¹⁹ Jesús naimiemo llote:

—A naidada. Mai jai. Cuen a o inua jira, jai jillodio.

Jesúdi Jusiñamui ie cominina sedajana llofuia rafue

(Mt 24.23-28, 36-41)

²⁰ Naie facaise fariseuai comini Jesúmo jicanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoına sedallena uiñoñeitomoi. ²¹ Buena ciuamona raiñeitomoi: “Jadi, Jusiñamui bene caina jai sedade”. “Jadi, batine caina jai sedade”; iadedi omoi motomo itinomona Jusiñamui dibeimo damierie illamona, Jusiñamui omoi motomo jai illana uiñoitomoi.

²² Ie llofueoicaiganomo llote:

—Jaiaruido duere sefuillamona cue diga janore jisa iacanitomoi; iadedi iese nia iñeitomoi. ²³ Damierie raia: “Ero, batine Cristo jai bairede” nainomo jaiñeno. Naimaci raia: “Ero, bene Cristo jai bairede” iena inoñeno. ²⁴ Mona borillamona mona jillacidi usare cide. Ie isoide. Cue abido bia, nana comini iena uiñoitimaci. ²⁵ Birui iese nia suiñeite. Nano duere sefuiticue. Birui ite comini cuena jiai feiñoñeitimaci. ²⁶ Abido cue billirui iaırei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci. ²⁷ Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ²⁸ Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fecauidimaci. Illimo maijuidimaci. Jofona finouidimaci. Naimaci isoilla isoi icana jaidimaci. ²⁹ Dani iemo comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci. ³⁰ Ie isoide. Abido cue billirumo comini iitimaci. Cue bia, ebena biiticue. ³¹ Naie facaise bu ie jofo emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena. ³² Iemona fueollena, Lot ai micori rafuemo comeciaina faca. Naiñaiño ie raruiamo daño comeciaina facajamona, na ie abi diga faifide. ³³ Dama ie raruiamo ie comeciaina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comeciaina bu facaia, monamo cue diga jaca iite. ³⁴ Cue bille facaise menamie daje cuartomo iniano iitiaımaıai. Damie jaite. Jiaimie fiebite. ³⁵ Mena riño danomo doberillanona iitiaıñuıai. Dañaiño jaite. Jiaıñaiño fiebite. ³⁶ Menamie illimo maijiano iitiaımaıai. Damie jaite. Jiaimie fiebite.

³⁷ Ie llofueoicaigano jicanotimaci:

—¿Ñine jaitimaci?

Uai ote:

—Urujaisai rifaide ramo ofillana uiñua isoi, nana cuena ñnotino cue abido billena uiñoitimaci. Cuemo duillamona, cue diga jaitimaci.

18

Jesúdi feciñona llua rafue

¹ Ie llofueoicaiganomo Jesús rafuena dane llote:

—Jusiñamuimo jicabi, omoi jicaca rafue omoi feiñolle dinori. Raire feiñoñenia, abina jafueño. ² Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede. ³ Nainomo naimie dine daje feciño jai-jaicabillanona, raite: “Cuena duere finodimimona cuena cano”. ⁴ Naimie dinena raite: “Dama iesede. Ona canoñeticue”. Ie mei ie comecina facade: “Jusiñamuina jaciruiñedicue. Cominina jiai isiruiñedicue; ⁵ ia naiñaiño cuemo sefuire bi-bina jira, naiñaiñona canoiticue, cue rairafaiñellena”.

⁶ Jesús llote:

—Marañede juez llua cacadomoi. Ja muidomo naiñaiñona canode. ⁷ Ero, biemo omoi comeciaina faca. Jusiñamui naie juez isoñede. Nagarui Jusiñamuimo naimaci jicaia, ¿niese naimie ie fetocanona canoñeite? Jaca canoite. ⁸ Raire fairuanona, naimacina raie canoite; iadedi abido cue bia, ¿niga cuena ñnotino iitimaci? Nibai ailluena cuena ñnoñeitimaci.

Jesúdi Jusiñamuimo menamie jia llua rafue

⁹ “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

¹⁰ —Jusiñamui jofomo, nainomo jillena, menamie jaidiaimaia. Damie fariseo imie. Jiaimie gobierno ucubena oraíma. ¹¹ Fariseo imie naidadacaida, dama anado jüde: “Jusiñamui, jiaie comini isoñedicue. Fidimaci. Marañedimaci. Naimaci añede riño diga itimaci. Cue ecimo ite ucubena oraíma isoi iñedicue. ¹² Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jüde. ¹³ Gobierno ucubena oraíma eneno naidadacaida, jüde. Monamo eruaiñede; iadedi jamai bue isoillanona, jogobena farode. Raite: “Jusiñamui, jeacinona finoraímadicue. Cuena duenai. Macaibaite” jüde. ¹⁴ Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite. Ie jira gobierno ucubena oraíma ie jofomo Jusiñamuimona jai marebicaillanona jaide; ia fariseo imie iese jaiñede.

Jesúdi naimie dine uruiai billana jitailla rafue

(Mt 19.13-15; Mr 10.13-16)

¹⁵ Naie facaise Jesús dine comini naimaci eisaiaína atisite. Ie onolli naimacimo naimie joniana jitaídimaci. “Naimacina raise cano” ie Moomo lollena jitaídimaci. Iena cuanona, ie llofueoicaigano cominina Jesús dine billana rairuidimaci; ¹⁶ iadedi Jesúsdi eisaiaína uaiduano raite:

—Uruiai cue dine billesa. Naimacina rairuiñeno. Cuena bie isoi ñnotinodi Jusiñamui cominidimaci. ¹⁷ Bie uruiai abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

Ucuberedimie Jesús diga ñaia rafue

(Mt 19.16-30; Mr 10.17-31)

¹⁸ Ie facaise illaicomini mona damie Jesús mo jicanote:

—Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

¹⁹ Jesús uai ote:

—¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano. ²⁰ Moisés micori llogacinuaina inocana jai. Jaie cuete: “O añede riño diga iñeno. Comena meineñeno. Rana fiñeno. Jiaimiena o llogidoia, tainona lloñeno. O moo uaina iño. O ei uaina iño”.

²¹ Uai ote:

—Cue uruena illa facaisemonana nana bie llogacinuaina inoticue.

²² Iena cacajano, Jesús raite:

—Daje rana nia fiñoñedio. O raise marebicaianana, omo ite raruiaina feca. Naie ucubena dueredinomo feca. Cuena o inuamona, monamo ico jaca iitio. Cue llofueoicaiganona o illena, mai cue diga bi.

²³ Jesús llua naimie cacajano, sunaicaide. Naimiemo eo ailluena ra illa jira, iena fecaacaiñede. ²⁴ Naimiemo eruailano, Jesús raite:

—Ucuberedinodi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

²⁶ Jesús llua cacadino jicanote:

—¿Iemona buca jillobiti?

²⁷ Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro raite:

—Ero, o llua isoi cai jofuena fañonocaida, o diga jaisoidicai.

²⁹ Uai ote:

—Uanaicinona lloticue: Jusiñamui cominina naimie jaillamona, ie jofona bu fañonocai, ie ana bu fañonocai, ie amatiaina bu fañonocai, ie moonu bu fañonocai, ie eina bu fañonocai, ie uruiaina bu fañonocai, ³⁰ Jusiñamuimona ailluena ibana birui feiñoite. Monamo ico jiai jaca iite.

Jesúdi ie fiodaillena dane llua rafue

(Mt 20.17-19; Mr 10.32-34)

³¹ Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, imana jaidicue. Jusiñamui facaina lloraini cuena jaie cuetimaci. Nana naie rafue ja suite. ³² Judíuaiñedinomo judíuai illaicomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci. ³³ Cuena faitimaci. Cuena meineitimaci; ia darui amani illanona, cue fiodaillamona jilloiticue.

³⁴ Naimie llua nia raise cacaiñedimaci. Naimacina iena Jesús nia raise llofueñena jira, iena raise uiñoñedimaci.

Jesúdi uisnidimiena jillotaja rafue

(Mt 20.29-34; Mr 10.46-52)

³⁵ Jericó railla nairaimo ie llofueoicaigano diga Jesús riacademo, uisnidimie naiso fuemo raillana ciode. Ucubena jamai jica-jicade.

³⁶ Ailluena comini Jesús diga jaillana naimie cacajano, naie cominimo nie isoide rafue illana jicante. ³⁷ Uai otimaci:

—Nazaret ie Jesús como bene bite.

³⁸ Ie jira naimie cuirioide:

—David micori Jitona o illamona, cuena duenai. Cueno cano.

³⁹ Uicodo jaidino naimiena lletade, naimiena llicaitallena; iadedi naimie eo cuirioide:

—David micori Jitona o illamona, cuena duenai.

⁴⁰ Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicante:

⁴¹ —¿Niese ona cue nibaiana jitaideo?

Uai ote:

—Maestro, cioacadicue.

⁴² Jesús raite:

—Mai eroda. Cueno o inua jira, jai jilloido.

⁴³ Ieconí naimie uisidi cide. Jusiñamuimo iobillacinona fecajano, Jesús diga jaidino diga naimie jaide. Naimie jilluana cuamona, nana comini Jusiñamuimo iobillacinona jiai fecadimaci.

19

Jesús Zaqueo diga illa rafue

¹ Jericómo Jesús rillanona, nainomo macaritemo, ² naie facaise nainomo Zaqueo raillamie ite. Gobierno ucubena nanoca oraíma. Naimiedi eo ucuberede. ³ Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide. ⁴ Ie jira uicodo aisicana jaide, amenamo a jaillena, naimiena cioillena. ⁵ Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofo dine jaiticue.

⁶ Ie jira raire ana bite. Ie jofomo Jesúsna iocire feñote. ⁷ Iena jiaie comini cianona, Jesús joreña jeare ñaianona raitimaci:

—Marifedicionona finoraíma jofomo naimie jaide.

⁸ Jesúsna naimie feñua mei, Zaqueo Jesús ecimo naidaita, naimiemo llote:

—Nama, atuedo cue raruaína dueredinomo biruimona fecaiticue. Bumona navui cue fíia, cuatro diga ra abido iiticue.

⁹ Jesús uai ote:

—Iese o llua jira, o comini diga Jusiñamuina jai o inuana uifñoticaí. —Jamai bitinomo llote:

—Zaqueodi Abraham micori jito; ia Jusiñamuina navui inoñede.

¹⁰ Naimie isoidino jillobitallena, biticue. Monamona billanona, imana jiaie jaidicue. Jusiñamuina inoñedinona jenuaibidicue, naimacina jillobitallena.

Illaima ie mullaíaimo ucubena fecaja rafue

¹¹ Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”. ¹² Iena naimaci raise uifñollena, Jesús bie rafue naimacimo llote:

—Illaïma jito ie nanoca illaïma ðine jiaïe nairaïmo jaide. Ie cominina sedallena, nanoca illaïmamona ie uaina feiñoïacade. Iemei abido biacade. ¹³ Nia naimie jaiñena, diez ðiga ie mullaïaina uaidote. Nagamierie daberie ucubena fecade. Naimacimo llote: “Bie ucube ðiga jiaïe ucube ocana omoi jai”. Ie mei oni jaide. ¹⁴ Ie comini naimiena enoidimaci. Jiaïnona nanoca illaïma ðine oretajano, raitimaci: “Bimie caina sedajana jitaïñedicaï”; ia nanoca illaïma ðinena naimaci lluana jaca cacaiñede. Ie jira naie nanoca illaïma naie illaïma jitomo ie uaina ite. ¹⁵ Ie uaina feiñua mei, abido ie eniruemo jaide. Rilla mei, ie mullaïaina uaidote. Nie ðiese ucubena ocana naimaci jaillana uiñoïacade. Ie jira naimacina uaidote. ¹⁶ Nano bitimie raite: “Nama, o cuemo dabe fecadiö. Dabedemona jai cuemo ite diez ðigabe”. ¹⁷ Naie illaïma naimiemo llote: “Eo marena maijidiö. Mare mullaïmadiö. Janore ra raise o sedaja jira, ona diez nairaïaina sedataitcuae”. ¹⁸ Ie mei jiaïe mullaïma billanona, raite: “Nama, o cuemo fecaca dabedemona jai cuemo ite cinco ðigabe”. ¹⁹ Illaïma llote: “Ona cinco nairaïaina sedataitcuae”. ²⁰ Ie mei jiaïe mullaïma bite. Raite: “Nama, jadi, o cuemo iga o ucube. Iniroimo tilliano, iena eenoticuae. ²¹ Ona cue jaciruillano, odi eo riimiena jira, iena jamai eenoticuae. Jiaïe cominimona ie rana bairocabidiö. O maijiñena ramona ocabitio”. ²² Illaïma ðinena raite: “Eo maraiñede mullaïmadiö. Cuena o llua isoi, ona duere finoiticuae. Cue riimienana uiñotio. Jiaïe comini ie rana cue bairuana uiñotio. Cue maijiñena motomo ra cue uana uiñotio; ia buena maijiñediö. ²³ ¿Bue ñellena bancomo cue ucube joneñediö? Bancomo itena, jiaïe ucubena ocana jaide. Ie mei abido cue bia, omo cue fecaja ucube baifemo feiñoticuae”. ²⁴ Nainomo itinomo llote: “Naie ucube naimiemona bairuano, diez ðigabe itimie feca”. ²⁵ Uai otimaci: “Naimiemo ailluena ucube jai ite. ¿Bue ñellena dane jiaïe fecaitio?” ²⁶ Illaïma ðinena uai ote: “Ailluena raredimie jiaïe rana feiñoite; iadedi janore raredimie ie rana faifite. ²⁷ Cuena enoidinona bene ati. Naimacina cue sedajana jitaïñedimaci. Naimacina meine”.

Jesús nia llote:

—Ie isoide. Iese omoïmo suiñellana, Jusiñamui ie comini sedalliruina omoi uiñoñena jira, cue jitaillacino finocana jai.

Jesús Jerusalémo jailla rafue

(Mt 21.1-11; Mr 11.1-11; Jn 12.12-19)

²⁸ Naie rafuena llofua mei, Jerusalén ðine comini uicodo ie llofueoicaigano ðiga Jesús jaide. ²⁹ Jerusalén iaieicaidemo, mena nairaïmo riacade. Betfagémo railla nairaïmo ride. Betania nainomo jai ite. Olivos railla anedumo naga nairaï iaïmaiaï ite. Ie llofueoicaiganomona mena orede. ³⁰ Raite:

—Bie nairaï illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati. ³¹ Omicomio: “¿Bue ñellena iena suiñodomico?” bu jicanoia, llono: “Coco Nama iena jitaide”.

³² Naimie llua isoi jaidiaïmaiaï. Naimie llua isoi burritona baitiaïmaiaï. ³³ Ie facaise ie nanaï iaïmaiaïmo jicanote:

—¿Bue ñellena cai burritona suiñodomico?

³⁴ Uai otiaïmaiaï:

—Coco Nama iena jitaide.

³⁵ Ie mei Jesúmo iena atidiiaimaia. Burrito emodomo iniroina jobianona, ie emodomo Jesúsdi rainadate. ³⁶ Jesús iese jaidemo, naimiēna iobitallena, illaīma isoi naimie jaillena, comini imaci iniroi diga, naiso motomo jobedimaci. ³⁷ Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacinona ado eo fecadimaci. ³⁸ Raitimaci: —¡Cai Illaīma billa! ¡Jusiñamui mamecido bitimiemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

³⁹ Naie cominimona dajerie fariseuai raitimaci:

—Maestro, o diga jaidinona llīcaillena, naimacina lleta.

⁴⁰ Uai ote:

—Naimaci llīcaia, biso fuemo ite noficidi cuena marena ñaite.

⁴¹ Jerusalémo Jesús iairei ria, iena ciuano, eede. ⁴² Raite:

—Jerusalén itino, Jusiñamui diga omoi uri illena jai biticue. Omoīna naimie cominina itataiacadicue; iadedi iena jitañedomoi. Iena jitañedomoīna, ico duere sefuiñeitomoi. ⁴³ Jiairuido omoi bacauai jobaimena finuanona, omoīna cirinoitimaci. Omoi ecido llaitimaci. ⁴⁴ Omoīna meineitimaci. Omoi uruiaīna meineitimaci. Omoi illanona judaitimaci. Jusiñamui omoi motomo birui illana omoi uiñoñena jira, iese omoimo suite.

Jesúdi Jusiñamui jofomona damierena dotaja rafue

(Mt 21.12-17; Mr 11.15-19; Jn 2.13-22)

⁴⁵ Jerusalémo Jesús rilla mei, Jusiñamui jofomo jaide. Jusiñamuimo ofomaiaīna fecallena, naimiemo toīca llaudaiaīna fecallena, nainomo comini jaisoidimaci. Naie cominina ibatajanona, ofomaiaīna, toīca llaudaiaīna diga, damierie fecauidimaci. Iena ciuanona, naimacina jino orde. ⁴⁶ Raite:

—Ie facaina lloaīma micori Jusiñamui llogacino jaie cuela: “Cue jofu ite nainomo cuemo comini jūillena” cuela. Ero, ailluena omoi ibataja jira, naimie jofona fiiriruidino jofona omoi finoca.

⁴⁷ Jusiñamui jofomo nagarui Jesús llofuate. Judíuai illaicomini di Jesúsna meineiacadimaci; ⁴⁸ iadedi niese nibañedimaci, nana comini naimie llofuiana eo jitailla jira.

20

Jesúdi ie siño uaina llua rafue

(Mt 21.23-27; Mr 11.27-33)

¹ Jusiñamui jofomo Jesúsdi cominina llofuate. Jusiñamui rafuena llofuate. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Dīese billanona, ² jīcanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

³ Jesús dinena uai ote:

—Omoimo nano jīcanoiticue. ⁴ Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

⁵ Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina inoñedomoi? ¿Bue ñellena naimie micori llua isoi bautizañedomoi?” ⁶ “Comini” cai fairioia, bene itino caina meinetimaci, Juan micoridi Jusiñamui facaina lloraïma naimaci railla jira.

⁷ Ie jira Jesús uai otimaci:

—Uiñoñedicaï.

⁸ Jesús dinena raite:

—Ie muidona cuemo nie isoide uai illana omoïmo lloñeiticue.

Jesúdi marañede maijiraini rafuena llua rafue

(Mt 21.33-44; Mr 12.1-11)

⁹ Nainomo itinomo Jesús llote:

—Jiaïe rafue omoïmo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaïnomo fecade, iena sedallena. Ie mei jiaïe eniruemo are illena jaide. ¹⁰ Uvas jai einaila facaise riaraiaina sedaraini dine daje mullaïmana orede, naimie facaise iedinona naimie feiñollena; iadedi naie sedaraini naie mullaïmana fatimaci. Uvas naimiemo fecañeno abido oredimaci. ¹¹ Ie mei patrón jiaïe mullaïmana orede. Naimiena fatimaci. Jeare finodimaci. Uvas naimiemo fecañeno abido oredimaci. ¹² Naie patrón jiaïmiena orede. Naimiena eo bofedaitajanona jino dotadimaci. ¹³ Iemei patrón comecina facade: “¿Ñiese nibaiiticue? Cue isiruiga jítone oretaiticue. Naimiena nibai jaciruitimaci. Naimie uaina inoitimaci”. ¹⁴ Riaraiaina sedaraini naimiena ciuanona, coniniri ñaitimaci: “Bimiemo bie illi fiebiite, naimie moo fodailla mei. Naimiena cai meinelli, bie illi caimo fiebillesa” ñaitimaci. ¹⁵ Naimiena jino dotajanona, naimiena meinetimaci. Iena fidia mei, ¿ñiese naie patrón nibaiite? ¹⁶ Naimie biite, naie sedarainina meinellena. Ie mei jiaïnona ie illina sedataite.

Naie rafuena cacadino raitimaci:

—Bie isoide rafue suillana jitaiñedicaï.

¹⁷ Naimacimo Jesús eruailano, llote:

—Naie illi sedaraini isoidomoi. Jusiñamui facaina lloraïma micori omoïna jaie cuete. Ie ciegafuena raise fcañedomoi. Naimie micori cueda:

Jofo finoraini jitaiñena nofici nana naie jofomo ite nofici baifemo jai uaide.

cueda. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena inuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. ¹⁸ Naie noficina nia ñaiticue. Noficimo bu eicaitaia, bofedaita; ia naie nofici bumo ana uaia, naimiena saitaite. Ie isoide. Cue llua omoi jamaia, duere sefuitomoi. Iena omoi inoñenia, ja muidomo faifitomoi —llote.

Jesúmo gobiernomo ucubena fecajana jicanua rafue

(Mt 21.45-46; 22.14-22; Mr 12.12-17)

¹⁹ Jesús como lloga rafuedo naimacina ñaïana uiñotimaci. Ie jira naie facaiseconi judiuaï illaicomini naimiena gaitaacadimaci; iadedi cominina jaciruitimaci. ²⁰ Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena

duere finollena, naimiena facaciacadimaci. Gobernadormo naimiena llogidoiacadimaci. ²¹ Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. ²² Omo rafuena jicanoiacadicaí. Dama Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

²³ Naimiena naimaci jifuiana uiñuanona, Jesús dinena uai ote:

²⁴ —Ucube cuemo acata. ¿Bu ie joreño nainomo ite? ¿Bumo jainaiaide bie cuega radi?

Uai otimaci:

—César.

²⁵ Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

²⁶ Jesúdi uai raise ua jira naimie llumona jeare rafuena uiñoñedimaci, naimiena llogidollena. Naimie lluari rajicaillamona, ll#caidimaci.

Jesús dine saduceuai railla comini billa rafue

(Mt 22.23-33; Mr 12.18-27)

²⁷ Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci. ²⁸ Jesúmo llotimaci:

—Maestro, cai facaina Moisés micori jaie cuega: “fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁹ Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiainide fiodailla. ³⁰⁻³¹ Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide. ³² Ja muidomo naie riño jiaí fiodaite. ³³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

³⁴ Jesús uai ote:

—Birui aina otomoi. Inina otomoi; ³⁵ iadedi fiodaillamona, Jusiñamui diga jaca itino jillua mei, ainitimaci. Ininitimaci; ³⁶ ia Jusiñamui jaienisaí isoi illanona, dane fiodaiñeitimaci. ³⁷ Fiodaitino jilluana omoimo lloiticue. Moisés micori jofue iñenanomo illa facaise, naimie micorimo comini ico jilloillena Jusiñamui lloite: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” lloite. ³⁸ Jai fiodaitimaci; ia naimaci joreñuai nia itimaci. Jusiñamuidi daní cajedino imaci Jusiñamuina jira, naimaci joreñuai naimie dine itimaci. Ico naimaci abiaína jiaí jillotaite. Naimiemo naimaci duillamona, naimaci abiaí diga jilluanona, naimie diga jaca iitimaci —lloite.

³⁹ Iena cacajano, Moisés micori llogacinuaina llofueraínimona dajerie raite:

—Maestro, raise llotio.

⁴⁰ Ie facaise naimiemo nie isoide rafuena dane jicanuana jaciruitimaci.

Jesús dinena fariseuai cominimo jicanua rafue

(Mt 22.41-46; Mr 12.35-37)

⁴¹ Iemei naimie ecimo itinomo Jesús jicanote:

—¿Ñiese Moisés micori llogacinona llofueraini Cristona raitimaci? ¿Ñiese naimiedi David micori jitona raitimaci? ⁴² Salmos railla cuega-fuiaimo David micori jaie cuega:

Jusiñamuidi cue Namamo llote: “Illaimana o illamona, cue nabeimo ana rai.

⁴³ Ona iinoñedino o anamo itataiticue”.

⁴⁴ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiai ie Nama.

Jesúdi judúuai illacomínina ñaia rafue

(Mt 23.1-36; Mr 12.38-40; Lc 11.37-54)

⁴⁵ Nana comini cacajano, ie llofueganomo Jesús llote:

⁴⁶ —Moisés micori llogacinuaina llofuerainimona abina rairui. Illaicomínina naimaci itimaciden, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoñedínona itimaciden, comini naimacina uaiduana gaidimaci. Comini naimaciri acarillena, ofiracomo uicomo raicadimaci. Rafue ia, naimaci jamai bue isoñedínona comequina facajanona, rafue nama ecimo raicadimaci. ⁴⁷ Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

21

Jesúdi Jusiñamui jofomo duerede feciño ucube fecajana ciua rafue

(Mr 12.41-44)

¹ Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. ² Eo duerede feciño menaruño joniana jiai ciode. ³ Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete.

⁴ Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoimo ite ucubena jai jonete. Janore jonete; ia Jusiñamuimona naiñaiñodi jiaño baifemo jonete.

Jesúdi Jerusalémo ite Jusiñamui jofu judaiana llua rafue

(Mt 24.1-28; Mr 13.1-23)

⁵ Naie facaise Jesús llofueoicaiganomona dajerie Jusiñamui jofona eruaillanona, raite:

—Mare nofici diga finoca. Eo mare ra nainomo jiai ite.

⁶ Jesús llote:

—Birui bie rana ciodomoi; iadedi ico jiairuido nana bie jofomo ite noficiai oni judaisite.

⁷ Jicanotimaci:

—Jusiñamui jofu judaisillana omo jicanoicadicaí. ¿Ñiruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸ Uai ote:

—Omoína bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairedé” raitimaci. Naimaci dibeimo iñeno. ⁹ Jobaimiai illena fidiitomo; iadedi jaciruiñeno. Iese suite; iadedi abido nia biñeiticue. ¹⁰ Daje nairai jiaie nairai diga jobairite. Daje gobierno jiaie gobierno diga

jobairite. ¹¹ Eo aillena ñuisañuai suite. Diga illanomo cominidi aime guitimaci. Duicuai eo iite. Monamo comini diga jacirede rana cioitimaci. ¹² Bie isoide rafue nia suiñenia, cuena ñnoñedino omoina llogidoitimaci. Omoina gaitatajanona, omoina duere finoitimaci. Naimaci ofiracomomo omoina uitimaci. Cárcelmo omoina jonetimaci. Cuemo omoi duilla jira, omoi duere sefuillena, illaicomini dine omoina uitimaci. ¹³ Naie facaiseconi cue rafuena naimacimo lloitemoi. ¹⁴ Omoi abina omoi riidoia, omoi llwana uicodo jarire iñeno. ¹⁵ Omoi raise lollena, omoina canoiticue. Uiñoracinona omoimo iiticue. Iemona omoi dibeimo iñedino o uaina uaitanitimaci. ¹⁶ Cuena ñnotomoi; ia ailluena cuena ñnoñeitimaci. Cuemo omoi duilla jira, omoina enoitimaci. Iemona dajerie mootiai, dajerie eitiai, dajerie amataiai, dajerie nabaiñiai omoina llogidoitimaci. Omoimona dajeriena meineitimaci. ¹⁷ Cue cominina omoi illamona, nana nairai omoina enoitimaci; iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁸ Omoi ille dinori Jusiñamui omoina raise sedaite. ¹⁹ Duere omoi sefuia, cuena fainonocaiñeno jai. Ja muidomo monamo jaca iitomoi. ²⁰ Jerusalén fueo ruicabene icaifona soldadaui ia, ie judaille facaiseconi iaiei iite. ²¹ Naiemona omoi jillobillena, duere omoi sefuillena, Judeamo omoi illamona, aneduai dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiñeno. ²² Ie facaina lloraini micoriai cuegafuiai suillanona, naie facaiseconi naimiena ñnoñedinomona Jusiñamui ibana oite. ²³ Naie rafuemona jillobillena, naie facaise urueside riño duere sefuite. Uruena nia jirode riñodi jai duere sefuite. Naie facaise comini duere sefuitimaci. Llegi caçaitimaci. ²⁴ Lloebi diga meinecana uitimaci. Jiaie nairai dine naimacina jaiadoitimaci. Judiañedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt 24.29-35, 42-44; Mr 13.24-37)

²⁵ Jesús nia llofujete:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monaillai eo baguamona, comini comeciai eo jarire iitimaci. ²⁶ Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fioidaitimaci isoi iitimaci. ²⁷ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁸ Bie isoide rafue sua, omoina cue jilloitajabillirui iaiei illa jira, cue billirui mo raise ocuiri.

²⁹ Iena omoi raise uiñollena, bie rafuena omoimo lloiticue. Higuera railla riaramo omoi comeciaina faca. Nana amenamo comeciaina faca. ³⁰ Bie eniruemo amena firuillamona, fiemona raie illana uiñotomoi. ³¹ Ie isoide. Bie rafue ico sua, Jusiñamui ie cominina raie sedajana uiñoitomoi. ³² Uanaicinona omoimo lloiticue. Nana bie rafue suille facaiseconi bie nairai nia iite. ³³ Mona fuite. Enirue jiai fuite; iadedi cue lloga uai jaca suite. ³⁴ Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cuena ñnoñedinona duere finollena, ebena abido biiticue. ³⁵ Cue bia, illaimana cue illamona, nana cominimo juez isoi lloiticue. ³⁶ Ie jira nagarui abi rairuicana jai. Naie duere sefuille

facaise omoi jilloillena, Jusiñamuimo jii. Ja muidomo monamo cue diga jaca iitomoï —llote.

³⁷ Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide. ³⁸ Nagarui jitiramo naimiena cacareillena, Jusiñamui jofomo comini bisoidimaci.

22

Judíuái illaicomini Jesúna gaitallena siadua rafue

(Mt 26.1-5, 14-16; Mr 14.1-2, 10-11; Jn 11.45-53)

¹ Naie facaise pascua railla rafue iaiei ite. Naie facaise llomenico guille rafue jiai ite. Naie rafue ia, siritate rana jaca guiñedimaci. Egip-tomona naimaci jaiagai jillobillana comecillena, naie rafue ite. ² Judíuái illaicomini Jesúna meineiacadimaci; iadedi cominina jaciruillanona, naimiena nia meineñedimaci.

³ Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie. ⁴ Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúna gaitatallena, naimaci diga ñaiaide. ⁵ Iobillanona, naimiemo ucubena fecacadimaci. ⁶ Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

Jesúdi ie fiodaille rafuena llua rafue

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Llomenico guille rafue illanona, judíuái comini toica llauda fauillarui ride. ⁸ Jesúdi Pedro iaiaiaia Juan diga oretajano, raite:

—Cai rafue guille uicodo finollesa omico jai.

⁹ Naimiemo jicanotiaiaiaia:

—¿Ninomo naimana coco finuana jitaideo?

¹⁰ Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca. ¹¹ Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono. ¹² Ie mei omicomo afebebam ite aillue cuartona acataite. Na raruiái diga ite. Nainomo cai guille fino.

¹³ Jaidiaiaiaia. Naimie llua isoi baitiaiaiaia. Pascua rafue guille finodiaiaiaia.

¹⁴ Guille facaiseconi ia, Jesús ie llofueoicaigano diga nainomo guisaide. ¹⁵ Mesamo guitimacimo, ie llofueoicaiganomo llote:

—Nia cue fiodañenia, omoi diga bie rafue guillena eo jitaidecúe. ¹⁶ Ie cominina cue Moo ico sedalle facaise ia, nana bie rafue fuite.

¹⁷ Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omoi jiro. ¹⁸ Omoína bene dane iese caimare nabaiñeiticue. Cue Moo sedajanomo omoi diga ico cue ia, nainomo omoína dane iese caimare marena nabaiticue. —Iena jirodimaci.

¹⁹ Llomeniconona llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abí facai ie. Omoí facaina fiódaitícue. Cue abímo omoí comecina facajano, iena guiño.

²⁰ Naimaci guilla fuilla mei, jiroracomo vino díga dane oruitajanona, naimacina jirotrate. Raite:

—Cue fiódailamona, dama cue díailamona, jeacino anamona jilloit-
omoi. Jusiñamuidí omoímo jáie rafue biruí itatajanona, omoí jeacino oni
dotajana jai llote. Bie vinodí naie rafue facai ie. —Iena jirodímaci.

²¹ Jesús llote:

—Ero, cuena gaitataitimíe cai díga guite. ²² Monamona billanona
imana jaidícue. Jusiñamui jitailla isoi jai jáioicaidícue; iadedí
Jusiñamuimona cuena gaitataitimíe eo duere sefuite.

²³ Iemei: “¿Nimíe Jesúsna gaitatalle?” daní coniníri siadoside.

Naimaci moto imiēna bu ille rafue

²⁴ Ie facaise coniníri siaduana raitímaci:

—¿Cai moto imiēna bu ille?

²⁵ Iena cacajanona, Jesús raite:

—Naimaci jitailla ra finollena, judíuáinédino illaímaíaidí naimaci
anamó itinona ocuicabide. “Cai anamo itinona canocabidícai” raitímaci;
²⁶ iadedí omoímo íese íñede. Omoí moto itímíe omoí moto imíeñedimíena
jailla. Omoímona bu imiēna iacania, omoí mullaímana naimíe jaicabil-
lasa. Omoímona bu imiēna iacania, omoína naimíe canocana jaicabil-
lasa. ²⁷ Ero, jáie rafuedo iena lloítícue. Naimiēna ecallena, naimiēna
canollena, patrón anamo íe mullaíai itímaci. Naimaci baífemo patrón il-
lamona, naimacina canollena, íe mullaíai facaina maíjñede. Cue anamo
itomoi; ía omoina canollena, omoí mullaíma isoi itícue. ²⁸ Biruí duere
cue sefuidícuemo, cuena faínonocaiñedomoi. ²⁹ Cue Moo cuena illaímana
jai itatate. Omoína fetodícue, ³⁰ jáíruido cue illaíma illa facaiseconi cue
ecímo omoí caímare marena íocire illena. Nainomo omoí judíuáí doce
nairaíaina sedaitomoi.

Jesúdi Pedro naimiēna januana llua rafue

(Mt 26.31-35; Mr 14.27-31; Jn 13.36-38)

³¹ Jesús llote:

—Simón Pedro, ero, Taífedí Jusiñamuimo ona jícanote, o ramo faíllena;
³² iadedí ori jai jídicue, cuena nia ínocana o jaillena. Íco cuena raise o
ínoñena mei, cue díbeímo o comeci íuai dane o meidoia, íemona jáie
creyentíai comeciaina ocuíñotaitío.

³³ Pedro uai ote:

—Nama, cárcelmo o ía, nainomo jáí íitícue. O fiódaiá, jáí fiódaitícue.
Ona faínonocaiñeítícue.

³⁴ Jesús uai ote:

—Pedro, jítiramo íitava nia ñaíñenia, dacaiño amani cuena janoítío.

Jesús fiódaiílla facaise íaireí illa rafue

³⁵ Ie llofueoicaíganomo Jesús llote:

—Omoímo íte rafuena uíñoiacadícue. Cue rafue llollena, navuí omoina
oredícue. “Ucubena uíñeno, bolsa uíñeno, meídolle zapatos uíñeno”
omoímo llotícue. Naie facaiseconi omoí, ¿bue rana jítaídomoi?

Uai otímaci:

—Cai buena jítaíñedícai.

³⁶ Jesús raite:

—Biruimona omoi duere sefuitomoi. Ie jira abina rairuicana jai. Birui ucube omoimo ia, nina omoi jai, iena uiño. Bolsa bumo ia, iena uiño. Abina riidollena, omoimo lloebi iñenia, janore iniroina feca, lloebi ollena. ³⁷ Cuenajae ciegafuijai suite. Isaías micorí cuenajae ciega: “Maraiñede rafue finoraima isoi naimie duere sefuite”.

³⁸ Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

Jesúdi Getsemanímo Jusiñamuimo jia rafue

(Mt 26.36-46; Mr 14.32-42)

³⁹ Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide. ⁴⁰ Nainomo ria, naimacimo llote:

—Táife omoína ramo fai raillano, iena omoi inoñellena, Jusiñamuimo jii —llote.

⁴¹ Naimie janorede nofici bai faia uaila dinori bai jaide. Caiñici ifodo ana raita, Jusiñamuimo jii:

⁴² —Ore Moo, o jitaia, cue duere sefuillamona cuena jillota. Cue jitailla isoi cuena finoñeno; iadedi o jitailla isoi cuena fino.

⁴³ Naimie começina ocuiñotallena, ie facaiseconi monamona Jusiñamui jaienici bite. ⁴⁴ Jesús começi jarire illamona, naimie rioci faitemo, difai diruena eniruemo uaide. ⁴⁵ Jia mei, ie llofueoicaigano dine abido bite. Ocosinaillamona, jai inidimaci. ⁴⁶ Naimacimo jicanote:

—¿Bue ñellena inidomoi? Mai casi. Táife ramo omoína fai raillano, iena omoi inoñellena, Jusiñamuimo jii.

Jesúna gaitalle rafue

(Mt 26.47-56; Mr 14.43-50; Jn 18.2-11)

⁴⁷ Nia Jesús lloia, diga comini naimie dine bitimaci. Judas Iscariote micorí naimacina ifode. Naimiedi Jesús llofueoicaigamie. Naimiena libanollena. Jesús dine iaiei bite. ⁴⁸ Jesús raite:

—Judas, cuena libanuanona, cuena gaitataiacadio.

⁴⁹ Ie llofueoicaigano naie rafuena jai ciodimaci. Jicanotimaci:

—Nama, ¿caí atica lloebi diga ona riidoiticaí?

⁵⁰ Ie facaise naimacimona damiedi Jusiñamui diga nanoca ñairaima ie mullaíma ie nabei jefona jai bonote. ⁵¹ Jesús dinena raite:

—Dama ite. —Ie jefona naimie jetajamona, naimiena jillotate. ⁵² Diga illaicomini Judas diga Jesús dine bitimaci. Naimacimo Jesús llote:

—Fuiriraimadicueta cuena omoi gaitajai billa. Omoi lloebina atidomoi. Omoi butaralluna jiai atidomoi. ⁵³ Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Táife anamo jai itomoi.

Pedrodi Jesúna janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Naimiena gaitaja mei, Jusiñamui diga nanoca ñairaima jofomo uitimaci. Pedro arena naimaci jinafona racade. ⁵⁵ Nairaibiri motomo irai bonua mei, ana raidimaci. Pedro naimaci diga jiai raide. ⁵⁶ Nainomo ite mullaíñodi irai bouamona, Pedromo eruaillano raite:

—Bimiedi Jesús diga jaisoidimie.

⁵⁷ Pedro abi janote:

—Naimiena uiñoñedicue.

58 Dallu illanona, jiaimie Pedrona cianona llote:

—Jesús ie llofueoicaigano imiedio.

Pedro dinena uai ote:

—Imieñedicue.

59 Daje hora illanona, jiaimie raite:

—Bimie galileo imiena jira, bimiedi Jesús diga ua jaisoidimie.

60 Pedro dinena raite:

—O lluana uiñoñedicue. —Iecon naimie ñaitemo, itava ñaite. 61 Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Itava nia ñaiñenia, dacaiño amani cuena janootio”. 62 Pedro jino jaillanona, eo sunaillamona, eo eede.

Jesúna jifanodua rafue

(Mt 26.67-68; Mr 14.65)

63 Ie facaise Jesúna gaitadino naimiena jifanododimaci. Naimiena jiai fatimaci. 64 Ie uisina maitimaci. Llotimaci:

—Siño jitodiosa, ¿bu o faja? caimo llono.

65 Iese jifanodocana uitimaci.

Jesúdi judíuai illaicomini dine illa rafue

(Mt 26.59-66; Mr 14.55-64; Jn 18.19-24)

66 Monaidemo judíuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofueraini ofidimaci. Naimaci dine naimiena gaitadino Jesúna uitimaci. Naie illaicomini dinena raitimaci:

67 —Ua Cristodiona, iena caimo llono.

Jesús uai ote:

—Omoimo iena cue lloia, inoñeitomoi. 68 Buena omoimo cue jicanoia, cue uaina oñeitomoi. 69 Monamona jaie billanona, imana jaidicue. Cuena omoi meiniamona, illaima isoi Jusiñamui ecimo raire iiticue.

70 Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

71 Iena cacajano, raitimaci:

—Naimie lluana jai cacadica. Jiaie comini naimiena llogiduana jai jitañedicai. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

23

Pilato dine Jesús illa rafue

(Mt 27.1-2, 11-14; Mr 15.1-5; Jn 18.28-38)

1 Judíuai illaicomini naidacaillanona, Pilato dine Jesúna uitimaci. 2 Naimiena llogidotimaci:

—Cai cominimo marañedifuena llote. Gobiernomo ucubena cai fecajana rairuide. Naimie jiai raite: “Cristodicue. Illaimadicue”.

3 Pilato dinena naimiemo jicanote:

—¿Judíuai comini illaimadio?

Uai ote:

—Jii, judíuai illaimadicue.

4 Jusiñamui diga nanoca ñairainimo Pilato llote. Nainomo bite cominimo jiai llote:

—Nicinodi naimiemo ifede.

⁵ Uai otimaci:

—Gobierno joreño comini comeciai jeare feidocana naimie uite. Nana Judeamo uite. Galileamona tainede. Bene jai caimo ride.

Herodes dine Jesús illa rafue

⁶ Iena cacajano, naimie llogidotinomo Pilato jicanote:

—¿Naimiedi Galilea imie?

⁷ —Jii —raitimaci. Galilea enirue illaima Herodes. Naie facaiseconi Jerusalémo naimie illa jira, naimie dine Pilatodi Jesúsna orede. ⁸ Jesúsna Herodes ciuanona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiai cioacade. ⁹ Jesúsno ie finoca rafuena are jicanote; iadedi Jesús dinena uaina oñede. ¹⁰ Ie facaiseconi judíuai illaicomini Jesúsna riire llogidotimaci. ¹¹ Herodes ie soldaduai diga naimiena eo jeare ñaitimaci. Illaima jítaiuga iniroina jítatitimaci. Ie mei Pilato dine naimiena abido orede. ¹² Iemona nairuido Herodes Pilato diga nabairite. Jaie conimana enoidiaimaia.

Pilatodi Jesús fiodaillana llua rafue

(Mt 27.15-26; Mr 15.6-15; Jn 18.39-19.16)

¹³ Pilatodi judíuai illaicominina, nainomo ite comini diga, uaidote.

¹⁴ Raite:

—Bimie cue dine atidomoi. Raitomoi: “Comini comeciai feidocana naimie uite”. Naimiemo jai jicanoticue; ia naimiemo nicinodi iñede. ¹⁵ Herodes cue dine naimiena como abido orede. “Naimiemo nicinodi iñede” jiai raite. Naimiena cue meinetallena, naimie jaca nicinona finoñede. ¹⁶ Ie jira naimiena cue sechedotajanona, naimiena oni oretaiticue.

¹⁷ Naie rafue facaiseconi naga año cárcelmona damiena jino jamai oretauide. ¹⁸ Pilato lluana cacajano, nana comini ado cuiiriidimaci:

—¡Naimiena oni uiño, naimiena meinellena! ¡Barrabás cárcelmona jino oreta!

¹⁹ Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. ²⁰ Jesúsna naimie jamai oretaiacana jira, comini diga Pilato dane ñaite; ²¹ iadedi cuiiriidimaci:

—¡Naimiena corai! ¡Naimiena meine!

²² Pilato dane jicanote:

—¿Ñie isoide maraiñede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuiiriidimaci:

—¡Naimiena corai! —Ja muidomo Pilato dinena:

—Jee —raite. ²⁴ Naimaci jitailla isoi Pilato fairiote. Jesúsna meinellena llote. ²⁵ Ie mei Barrabásna cárcelmona jino oretate, naimiena comini jicaja jira; iadedi Jesúsna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt 27.32-44; Mr 15.21-32; Jn 19.17-27)

²⁶ Jesúsna soldaduai oni uitemo, Simón raillamie diga dafaifidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaicaida sonotate. ²⁷ Ailluena comini Jesúsna racadimaci. Ailluena riñoniai eo eecana jaisite. ²⁸ Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itiniñuui, cue facaina eeñeno; iadedi omoi facaina mai omoi ee. Omoi uruiái facaina mai omoi ee. ²⁹ Ero, jiairuido duere sefuillemona comini raitimaci: “Oiniñuui jiaie riñoníai baifemo duere sefuñena jira, marena itimaci”. ³⁰ Jusiñamui riicaillafuemona jilloia-canamona, comini jiaí raitimaci: “Aneduai caimo jai corillana jitaídicaí”. ³¹ Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

³² Naie iaímaiaína meinellena, mena maraiñede iimana jiaí uitimaci. Gobierno llogacinona inoñediiaímaiaí. ³³ Hfocoraína eruaiílla illanomo naimaci ria, Jesúsna coraidimaci. Naie maraiñede iaímaiaína jiaí coraidimaci. Damie Jesús nabeimo. Jiaímie Jesús jarifebeimo. ³⁴ Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldadauí cuena duere finua rafuena feita —llote. Bu dajerie uille uiñollena, Jesús iniroina jifanoduanu soldadauí facasite.

³⁵ Ailluena comini eruaidimaci. Judúuai illaícominídi naimiēna jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶ Soldadauí naimiēna jiaí jifanododimaci. Ie abí isirena cacaiñellena, naimiemo vino fecajanona, ³⁷ raitimaci:

—Judúuai illaímadíodena, fiodaillamona dama o abina jillota. —Naie vino Jesús jiroñede.

³⁸ Jesús ifogi afeconi rabicimo Pilato cuetatate: “Bimiedi judúuai comini illaíma”.

³⁹ Jesús diga coraica iaímaiaímona damie naimiēna taigode:

—Jusiñamuimona bitíodena, nia fiodaíñenamona dama o abina jillota. Cocona jiaí jillota.

⁴⁰ Jiaímiedi naimiēna lletade:

—¿Bue ñellena bimienā taigodio? ¿Niese jearede rafuena nia finoacadío? Ja fiodaítio. Iemei Jusiñamui uicomo ja iítio. ¿Niese Jusiñamui uicomo o illena jaciruiñedio? ⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesúsno llote:

—Illaímana o illa facaise cuena comeci.

⁴³ Jesús uai ote:

—Uanaicino lloticue. Birui cue diga cue Moo illanomo iítio.

Jesús fiodaílla rafue

(Mt 27.45-56; Mr 15.33-41; Jn 19.28-30)

⁴⁴ Jitoma naidai jai itemo, daje amani horas mona jitiñicaide. ⁴⁵ Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide. ⁴⁶ Jesús ado llote:

—Ore Moo, cue joreñona feiño. —Ie mei naimie jai fiodaite.

⁴⁷ Soldadauí imaci capitán bie rafuena cuano, Jusiñamuina jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaíllana ciódimaci. Ie mei eo sunaillamona, jogobemo fairuanona, jofomo abido jaidimaci. ⁴⁹ Jesús nabaiñiaí bie

rafuena aarena ciódimaci. Galileamona bite riñoniai bie rafuena aarena jiai ciódimaci.

Jesús raiafomo jonia rafue

(Mt 27.57-61; Mr 15.42-47; Jn 19.38-42)

⁵⁰⁻⁵² Pilato dine José raillamie jaide, Jesús abina jicallena. Naimiedi illaicomini. Maremie. Finogamie. Jesúna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride. ⁵³ Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raíñenafomo jonete. ⁵⁴ Nairui viernes. Sábadorui rille jai iaiei illa jira, Jesús abina raiafomo raire jonete. ⁵⁵ Galileamona navui bite riñoniai racadimaci. Raiafona ciódimaci. Naimie abi finuana ciódimaci. ⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sáboruimo jafaici otimaci, Moisés micori jaie llua isoi.

24

Jesús fodaillamona jillua rafue

(Mt 28.1-10; Mr 16.1-8; Jn 20.1-10)

¹ Domingo jitiramo monaidemo, naie riñoniai raiafomo jaidimaci, iñaiñuai finoca soride rana uillena. ² Raiafo ibailla nofici oni joillana ciódimaci. ³ Fo jaidemo, Jesús abina cioñedimaci. ⁴ Uainicaidimaci. Ieconí menamie naiñaiñuai ecimo bairediaimaiai. Iaimaiai iniroi eo quenirede. ⁵ Iaimaiaina jacinallamona, ifogi ana jitadacaidimaci. Naie iaimaiai dinena jicanote:

—¿Bue ñellena fiodaitimie illanomo cagedimiena jenodomo?
⁶ Galileamo navui naimie omoimo llogacinona comeciñedomoi. ⁷ Naimie raite: “Monamona billanona, imana jaidicue. Jusiñamui jitailla jira, maraiñede rafue finoraini anamo iiticue. Cuená coraitimaci. Darui amani illanona, fodaillamona jilloiticue” raite.

⁸ Iemona ie llogacinona jai comecitimaci. ⁹ Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiai llotimaci. ¹⁰ Naie riñoniaimona María Magdalena ite. Juana ite. María ite. Naiñaiñodi Jacobo ei. ¹¹ Naie riñoniaidi iena llotimaci; iadedi ie rafuena cacadinodi iena inoñedimaci.

—Jamaifuena ñaitomoi —raitimaci.

¹² Iena cacajano, Pedro aisicana raiafomo jaide. Nainomo ria, ana jitadacaida, fo erodate. Useroi joillana cide. Iemo ie comecina facajano, jofomo abido jaide.

Mena llofueoicaiganomo Jesús bairia rafue

(Mr 16.12-13)

¹³ Jesús jilluarui mena llofuega iaimaiai Emaús railla nairaimo jaidiaimaiai. Jerusalémoma nibai once kilómetros ite. ¹⁴ Nana Jesúmo suide rafuena ñaiano jaidiaimaiai. ¹⁵ Iaimaiai ñaianona, Jesús iaimaiai diga dafaiñillanona, iaimaiai diga jaide. ¹⁶ Jusiñamuidi iaimaiaina naimiena uiñotañena jira, naimiena uiñodiaimaiai. ¹⁷ Iaimaaimo Jesús jicanote:

—¿Buena ñaitomoi? —Ieconí naidadatiaimaiai. Sunaitiaimaiai.

¹⁸ Naie iaimaiaimona damiedi Cleofas. Naimie uai ote:

—¿Ñiese Jerusalémo birui suide rafuena uiñoñedio? Nibai como ridio. Nana jiai comini iena uiñotimaci.

¹⁹ Uai ote:

—¿Ñie isoide rafue suide?

Uai otiaimaiai:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofuate. Jusiñamuimona naimiedi maremie. Cominimona naimie maremie; ²⁰ iadedi cai illaicomini naimiena gaitatimaci. Naimiena cruzmo coraitatimaci. ²¹ Jusiñamui naimie cai dine orecamiemo comecina facadicoco. Naimie cai illaimana illemo ocuiridicoco; ia naimie jai fodaite. Naimie fodaillamona darui amani jai ite. ²² Cai cominimona dajerie riñoniaibirui caina jacinaitatimaci. Jitiramo Jesús raiafomo jaidimaci; ²³ iadedi naimie abina cioñedimaci. Abido naimaci bia: “Jusiñamui jaienisaina ciodicai” raitimaci. Naie jaienisai naimacimo llote: “Naimiedi caje”. ²⁴ Iemei caimona dajerie raiafomo jaidimaci. Riñoniai llua isoi ciodimaci. Jesús abina cioñedimaci.

²⁵ Jesús dinena uai ote:

—Abi uiñoñedomico. Nana Jusiñamui facaina lloraini micoriai ciegafuiaina inoiacaiñedomico. ²⁶ Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

²⁷ Iemei Jesús iaimaiaina llofuate. Moisés micori ciegafuiaina llofuate. Jusiñamui facaina lloraini micoriai ciegafuiaina jiai llofuate. Nana Cristona ciegafuiaina llofuate.

²⁸ Emaús dine iairei naimaci ria, Jesús nia jaiacademo, ²⁹ naimiena caidiaimaiai. Raitiaimaiai:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaimaiai diga fiebillena fo jaide. ³⁰ Nailli guitimacimo, llomeniconna Jesús llinuano, Jusiñamuimo iobillacinona fecade. Iena tai ruano, iaimaiaimo fecade. ³¹ Jusiñamui jitailla jira, ieconi Jesúsna uiñotiaimaiai. Iemei iaimaiaimona naimiena jai cioicaiñena. ³² Daimaiai ñaitiaimaiai:

—Coco diga naimie ñaia, coco comeci caimare ite.

³³ Naie dacaiño Jerusalémo abido jaidiaimaiai. Jesús llofueoicaigano naimaci nabaiñiai diga danomo illana baitiaimaiai. ³⁴ Iaimaiaimo llotimaci:

—Cai Nama fodaillamona jai jillode. Simón Pedromo jai bairede.

³⁵ Ie mei naisona iaimaiai jailla rafuena llotiaimaiai:

—Cai guiticaimo, naimiena uiñoticoco —llotiaimaiai.

Jesús ie llofueoicaiganomo bairia rafue

(Mt 28.16-20; Mr 16.14-18; Jn 20.19-23)

³⁶ “Jesúsna ciodicoco” llotiaimaiaimo, ie llofueoicaigano motomo Jesús bairede. Llote:

—Jai biticue. Uri omoi i.

³⁷ Naimiena ciuamona, jacinaitimaci. “Joreño ciodicai” comeciaina facajanona, jiai jaciruitimaci. ³⁸ Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana inoñedomoi? ³⁹ Cue onollimo eruai. Cue eillimo eruai. Jesús dice. Cuen jeta, raise uiñollena. Cuemo llicisi ite. Cuemo illaici ite. Jamai joreño isoiñedicue.

⁴⁰ Iena llua mei, coraiafona naimaci cioillena, ie onolli ie eilli diga acatate. ⁴¹ Iobiacadimaci; iadedi nia raise inoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaina fecadimaci. ⁴³ Iena feiñuanona, rite. Iena ciodimaci. ⁴⁴ Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

⁴⁵ Naie facaiseconi naimacina naie cuegafuiaina raise uiñotade.

⁴⁶ Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite. ⁴⁷ Naimie muidona comeciai iuai meidumona, Jusiñamui naimaci jeacinona oni dotaite. Naimie rafue nana nairaimo damierie lloitimaci”. Omoimo biena lloiticue. Cue rafuena lllollena, Jerusalémo taineitomoi. ⁴⁸ Bie rafuena ciodomoi. Iena lloitomoi. ⁴⁹ Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi lllollena, naimie Joreño omoi comeciaina ocuiñotaite.

Jesús monamo jailla rafue

(Mr 16.19-20)

⁵⁰ Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote. ⁵¹ Iena naimacimo lluanona, monamo jaide. ⁵² Jerusalémo eo caimare abido jaidimaci. ⁵³ Jusiñamuimo iobillacino fecajano, Jusiñamui jofomo nagarui itimaci. Mai. Macaibaite. Lucadicue.

JUAN JESUCRISTO ENIRUEMO ILLA RAFUE CUIAFUE

Jesucristo rafue iese tainede

¹ Jaca bue nia iñenia, Cristo jaca ite. Jusiñamui uai naimiemo il-lamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. ² Jusiñamui diga jaca nano ite. ³ Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. ⁴ Naimie muidona iticai. Naimiena cai inuamona, jaca iiticai. Lligaiñora diga rana cai cúa isoi, caina Jusiñamuina uiñotade. ⁵ Naimiena inoñedino jitiredinomo itimaci isoidimaci. Naimaci comeciai jitirede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶⁻⁷ Naimaci comeciaina lligaiñotimiena lollena, Juan micori llucacino Jusiñamuina nana comini inollena, Jusiñamuidi Juan Bautista raillamie micorina oretate. ⁸ Juan naie lligaiñoñedimie; iadedi Juan naimiena lluaibite. ⁹ Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. ¹⁰ Naimie muidona comini comuidimaci; iadedi naimie bene billa meinocni, comini dinena naimiena uiñoñedimaci. ¹¹ Ie nairai illanomo naimie ride; iadedi nana cai nairai naimiena feiñoñedimaci. ¹² Damierie naimiena feiñotimaci. Naimiena inotimaci. Ie uaido naimiedi naimacina Jusiñamui uruiaina itatate. ¹³ Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴ Iemo caina Jusiñamuina uiñotallena, Jusiñamui Jito comena jaide. Naie facaise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai. ¹⁵ Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶ Jesucristo caina eo duenaillamona, birui caina eo canocabide. ¹⁷ Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo lluamona Jusiñamui caina duenaillana jai raise uiñoticaí. Naimiemona uanaicinona jai raise cacadicai. ¹⁸ Jaca buna Jusiñamuina cioñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi Jesúna llua rafue (Mt 3.11-12; Mr 1.7-8; Lc 3.15-17)

¹⁹ Jerusalémona Juan micori dine judíuai illacomini Jusiñamui diga ñairainimona dajerie oredimaci. Jusiñamui diga ñairaini canorainimona dajerie jai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraima biite raillamiemo ocuridicai. Cristo raillamie billemo ocuridicai. ¿Odi naimiedio? —raillanona jicanotimaci. ²⁰ Naimie dinena janoñede; ia:

—Imieñedicue —raite.

²¹ Dane naimiemo jicanodosite:

—¿Budío? ¿Elías?

Juan micorí dinena uai ote:

—Elíañedicue.

Raitimaci:

—Moisés micorí Jusiñamui facaina lloraíma ico billena jaie llote. ¿Odi naimiedío?

Juan dinena raite:

—Ieñedicue.

²² Dane jıcanotımacı:

—¿Budío? Caımo llono, caı oretatınomo caı lollena. ¿Nıese naimacımo ona lloıtıcaı?

²³ Juan dinena raite:

—Jofue iñenanomo ado llotımıedıcue. Isaías micorı jaie llua isoi llocabıtıcue: “Caı Nama bııte. Naimıe naıso atona raıse fıno”. Iese llotıcue; ıa naimıe uaina omı feıñollena, omı comecıaı raıse fıno llena ñaıtıcue.

²⁴ Juan dıne bıtınodı farıseuı comıni. ²⁵ Nıa jıcanoıacadımacı:

—Odı caı Jıllıotarımıañenıa, o Elıañenıa, o Moıses micorı llotımıeñenıa, ¿bue ñellenıa comıniıa bııtızadıo? ¿Nıe ısıode uai omı ıte? ¿Nınomona o uaina otıo?

²⁶ Juan dıne uai ote:

—Comıniıa bııtızadıcue; ıadedı omı motomo omı uıñoñegamıe jai ıte. ²⁷ Naimıe cue ıfo meıdoıte. Cue bıafemo faıte. Jamı bue cue ısıoılla jıra, naimıe ıllafomo cue rıñena jıra, naimıena canonıdıcue.

²⁸ Naıe rafuedı Betábaramo sıude. Jordán raılla ılle ruıcafebeımo ıte. Nainomo Juan bııtızauıde.

Juan micorı Jesúna dane llua rafue

²⁹ Ie areruido Juan micorıdı Jesús naimıe dıne bıllana cıuano, naimıena raite:

—Ero, Jusiñamui Jıto toıca llauda mamecıdo jai bıte. Caı jeacıno facaina faga llauda ıfomo Jusiñamui ıe Jıtona jai orede. Naimıe fallemona comıni jeacınona dotaıte. ³⁰ Navui naimıena ñaıtıcue. Llotıcue: “Cue ıfo jıaımıe meıdoıte. Jamı bue ısıodıcue; ıadedı naimıe jamı bue ısıoıñede. Cue nıa jeıcıñenıa, naimıedı jaca ıte”. ³¹ Cue dıne naimıe nıa bıñenıa, naimıedı caı Jıllıotarımıana uıñoñedıcue; ıadedı comıniıa bııtızallena bene ıtıcue, caı comıniımo naimıena lollena.

³² Juan jıaı llote:

—Monamona ucugı ısıoı Jusiñamui Joreño ana bıllana cıodıcue. Jesúmo bıate. ³³ Naimıedı caı Jıllıotarımıana nıa uıñoñedıcue; ıadedı comıniıa bııtızallena, cuena oretagımıedı jaıe cuemo llote: “Cue Joreño ana bıllana damıemo bııllana ıco cıoitıo. Cue Joreño bııllamıedı cue Joreño omıımo fecıte”. ³⁴ Naıe rafuena cıodıcue. Iemona naimıedı Jusiñamui Jıtınana llotıcue.

Jesús ıe fetıacaga comıni ıe rafue

³⁵ Ie areruido Juan micorı llofueoıcaıganomona menamıe Juan micorı dıga ıa, ³⁶ Juan micorı Jesús macarıllana cıuano, raite:

—Ero, Jusiñamui Jıto toıca llauda mamecıdo jai bıte.

³⁷ Juan micorı dıga ıtııaımaıaı naıena cacajano, Jesúna racadııaımaıaı. ³⁸ Jınafo dıne erıdajanona, Jesús ıaımaıaına cııode. ıaımaıaıımo jıcanote:

—¿Buena jıtaıdomıco?

ıaımaıaı dıne uai otııaımaıaı:

—Rabbí, ¿ni o jofo? ¿Ni nomo itio? —uai otiaimaia. Rabbí oni dobaiñuamona: “Llofueraima raillamie”.

³⁹ Jesús nai iaimaia uaina ote:

—Mai. Cue diga bi, omico uiñollena. —Ie jira jaidiaimaia. Jesús illanona ciodiaimaia. Jitoma nia a illa jira, nairuido naimie diga fiebidiaimaia. Jitirecaidemo oni jaidiaimaia.

⁴⁰⁻⁴¹ Naie iaimaia mona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai comina jilloitaraimana baiticue. Cristo raillamiena baiticue.

⁴² Ie mei Jesús dine naimiena uite. Jesús naimiena eo eruailanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobaiñuacidi Pedro.

Jesús menamie uaidua raufe

⁴³ Ie areruido Jesús Galileamo jaiacade. Felipeba baillanona raite:

—Cue llofuegamiena o jaillena, cue diga coco jaillesa, mai cue diga bi.

⁴⁴ Felipedi Betsaida nairai imie. Andrés iaimaia Pedro diga daje nairai iaimaia. ⁴⁵ Jesús naimiemo llua mei, Felipedi Natanaelna oni jenuaide. Higuera railla riarana amano naimiena baillanona, raite:

—Moisés micori jaiie cuegamiena jai baiticue. Jusiñamui lloraini micoriaidi naimiena jaiie jiai cuetimaci. Naimiedi Jesús. Nazaret imie. Ie moodi José.

⁴⁶ Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

⁴⁷ Jesúmona iaimaia iaire ia, Jesús dinena llote:

—Ero, buna jifueñegamie billa. Nanoca Israel imie bite.

⁴⁸ Natanael dinena uai ote:

—¿Bu cuena llogao? ¿Niese cuena uiñotio?

Jesús uai ote:

—Felipe ona ailli nia baiñenia, higuera railla riarana amano o illana jai uiñoticue.

⁴⁹ Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

⁵⁰ Jesús dinena uai ote:

—Amena amano o illana cue uiñua jira, cuena iñotio. Diga siño rafuena ciojotio. Bie rafue baifemo finuana ciojotio. ⁵¹ Jusiñamuimona billanona, imana jaidicue. Uanaicino omo lloticue. Mona ecorillana o cioia, Jusiñamui jaienisaie cue dine billena cioitio. Cuemona abido jaillena jiai cioitio.

2

Jinuimona Jesús vino finua rafue

¹ Menarui illanona, Galileamo Canámo imana ie ai uarafue ite. Rafue nama uaidua jira, nainomo Jesús ei jaide. ² Jesús jiai uaidoga. Ie llofueoicaiganodicaie jiai uaidogacai. ³ Vino cueillamona, Jesús ei Jesúmo llote:

—Vino jai iñede.

⁴ Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

⁵ Iemei ie eidi rafue nama mullaiaimo llote:

—Naimie omoimo lluaña fino.

⁶ Jinui nainomo eenollena, nainomo seis noficimona finoca llerodana raisoide. Naiemona jinuina ouidimaci. Mareña illena, cai einamaci llua isoi, jofomo naimaci ria, naimaci abiaia llerouidimaci. Naga lleroda ñibai cinco latas totaca. ⁷ Mullaiaimo Jesús llote:

—Naie llerodaiaia jinui diga oruita. —Pozomona jinui atiano, naie llerodamo toidimaci.

Iena finua mei, ⁸ Jesús naimacimo llote:

—Llerodamona janore jisa uanona, rafue nama ñine uiño.

⁹ Naie facaiseconi naie jinuidi vinona jaide. Rafue nama naieña facade. Naimiedi ñinomona naie vino uana uiñoñede. Dani nainomo ite mullaiaia uiñotimaci. Jirua mei, ai otimie uaiduano, ¹⁰ raite:

—Rafue bu finoa, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesús ñiño rafuena nano finode. Iemona caia ie uai siñoña uiñotade. Ie meidona naimie siño Jitonana ñnoticai.

¹² Rafue fuilla mei, Capernaumo Jesús ie ei diga, ie amatiaia diga, ie llofueoicaiganodicaia diga jaide. Nano ñigarui nainomo iticai.

Jusiñamui jofomona Jesús ñiño rana fecarainina dotaja rafue

(Mt 21.12-13; Mr 11.15-18; Lc 19.45-46)

¹³ Pascua railla rafue ñaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite. ¹⁴ Rillano, Jusiñamui jofomo diga rana fecarainina cide. Ucube ollena, nainomo juraretaiaia, toica lladaiaia, ucugiaia fecauidimaci. Ucubena meidorainidi jiaia itimaci. ¹⁵ Naimaci ocainiaia diga naimaci jino jillena, rao Jesús uanona, iena lleride. Naimaci ucubena judaide. Mesaiaia oni caitade.

¹⁶ Ucugiaia fecarainimo llote:

—Omoi ucugiaia jino uiño. Cue Moo jofomo ra feca-fecajana jitañedicue —llote.

¹⁷ Iemo Jusiñamuina lloraini micoriaia ciegafuiaia jai comeciticaia. Iese jaie cuela: “O jofona cue riiduamona, jiaia cuena meinetaitimaci”.

¹⁸ Nainomo ite judiaia illaicomini ñinena raitimaci:

—¿Ñie isoide uaido naimacina jino oredio? Siño rafuena fino, siño uai omo illana cai uiñollena. ¹⁹ Jesús uai ote:

—Bicono judaia. Darui amani maijiamona iena dane nillana fuidoiticue.

²⁰ Dane raitimaci:

—Cuarentiséis años bicomos maijidimaci, iena finollena. ¿Ñiese iena darui amani illanona, iena dane nillana fuidoitio?

²¹ Iese raitimaci; ia Jesús Jusiñamui jofona ñañede. Dama ie abina ñaite. Fiodaillamona ie jilloillena ñaite. ²² Jesús fiodaillamona naimie jillua mei, ie llofueoicaiganodicaia bie llucina comeciticaia. Ie jira naie ciegafuena ñnoticai. Jesús llucina jiaia ñnoticai.

Jesús ñiño comini comeciaimo iticino lluaña jitañena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina ñnotimaci. Coniniri raitimaci:

—Naimiedi cai Jilloitaraima. ²⁴ —Naganomo comeciaina naimaci facaja jira, naie cominina naimie uiñuamona, Jesús naimaci motomo iacaiñede. ²⁵ Naimaci comeciaino iticinuaina naimie eo raise uiñua jira, comini rafuena naimiemo bu lluaana jitaiñede.

3

Nicodemo Jesús diga ñaia rafue

¹⁻² Judíuai illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

³ Jesús dinena uai ote:

—Raise llotio; ia daje rafue omo lloticue: Uanai omo lloticue. Dane abido comonori o jeiciñenia, Jusiñamui ie cominina sedajanomo jaca initio.

⁴ Nicodemo abido jicanote:

—¿Ñiese eimie ie ei jeraimo dane iite? ¿Ñiese dane comonori jeiciite?

⁵ Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeicifello. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite. ⁶ Comemona cai comuitaia, jaca comedica; iadedi Jusiñamui Joreñodo cai comuitadedi, Jusiñamui uruedica. ⁷ Omo dane lloticue: Comonori jeicia. Ieri rajicaiñeno. ⁸ Iena o raise cacaillena, jiaie rafuedo iena lloticue. Aifidi ie jitailla dine sairide. Iena cacadio; iadedi ninena billana uiñoñedio. Nine jaillana jiai uiñoñedio. Ie isoide. Niese Jusiñamui Joreño cominina comuitajana jiai uiñoñedio.

⁹ Nicodemo dane jicanote:

—¿Ñiese biedi dane iite? Raise cacaiñedicue.

¹⁰ Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio. ¹¹ Uanaicinona omo lloticue. Abi uiñuamona omo lloticue. Cue cúa rafuena lloticue; iadedi cue lluaana ñnoñedio. ¹² Bene ite rafuena cue lloia, iena ñnoñediota, monamo ite rafuena cue lloia, iena jiai raise ñnoñeitio. ¹³ Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue. ¹⁴ Monamona biticue; ia amenamo fioidaicue. Jofue iñenanomo Moisés micori jaio joreño amenamo jaie cuinade. Jaoniai ainillamona comini fioidañellena iena cuinade. Comini ie isoi jilloillena, ie isoi cuena coraitimaci. ¹⁵ Cue fioidaillamona bu cue uaina ñnoia, monamo jaca iite.

Jusiñamuidi cominina eo isiruilla rafue

¹⁶ Jusiñamuidi cominina eo isiruilla jira, comini dine ie damiede Jitona orede. Ie Jitona naimaci ñnollena, naimiena orede. Naimiena ñnuamona, monamo jaca iitimaci. Jiai faifñeitimaci. ¹⁷ Naimacina duere finotallena ie Jitona oreñede; iadedi naimaci jeacinomona jilloillena, naimiena orede. ¹⁸ Jusiñamuidi Jesús uaina ñnotinona jaca duere fñoñeite; iadedi ie dajede Jitona uaina naimaci ñnoñena jira, Jusiñamui duere finollicino anamo jai itimaci. ¹⁹ Comini comeciaina lligañollena,

Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuabite; iadedi naimaci comeciái jítiredinomo iacana jira, jearede rafue naimaci finua muidona, naimiena jitañedimaci. Ie jira Jusiñamui naimacimo duere finollicinona anamo jai itimaci. ²⁰ Naimie finoca rafue bai raillano, naga jeacino finoraima ie comeci lligaiñuana jitañede; ²¹ ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

Juan micoridi Jesúsna dane ñaia rafue

²² Digarui illanona, Jesús ie llofueoicaiganodicaí diga, Judea railla eniruemo macaricana jaidicaí. Nainomo diga irui fiebidicaí. Llofuia-mona ñnotinona bautizacana uiticaí. ²³⁻²⁴ Nia cárcelmo iñenia, ailluena jinui nainomo illa jira, Enón railla nairaimo bautizajanomo Juan micori jiaí ite. Salim railla nairai iaírei ite. ²⁵ Naie facaise Juan micori llofueoicaigano judíuaí imie diga bautizajana siadotimaci. ²⁶ Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

²⁷ Juan uai ote:

—Jusiñamui ie uai fecañedena, Jusiñamui facaina buna jaca buena finonide. ²⁸ Cue lluaana navui cacadomoi. Lloticue: “Cai comini jilloitaraimañedicue. Cristoñedicue. Naimie billena cue llollena, Jusiñamuidi naimie uicomo cuena orede”. ²⁹ Jiaie rafuedo iena lloiticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiaí iobide. Ie isoide. Comini cue dine navui biñoidimaci. Birui Jesúsno jaioidimaci. Naimiemo jai duidimaci. Iena cue cacajamona, ieri iobidicue. ³⁰ Comini naimie uai siñona uiñuana jitaidicue. Comini cue jamai bue isoidimiena uiñuana jiaí jitaidicue. ³¹ Jamai comedicue. Ie jira eniruemo ite rafuena llocabiticue. Jusiñamui mona Jesús billa jira, cai baifemo faite. ³² Ie Moo illanomo ciua rafuena llote. Ie Moo illanomo cacaja rafue jiaí llote; iadedi eo janore comini naimiena ñnotinomaci. ³³ Naimiena ñnotinomiedi Jusiñamui uanaicinona lluaana raise uiñote. ³⁴ Jusiñamuidi ie Joreño ie Jitomo caidiñeno fecaja jira, naimie Jusiñamui uaina llocabite. ³⁵ Jusiñamuidi ie Jitona isiruite. Ie jira naga rafue naimiemo fecade. ³⁶ Bu Jusiñamui Jitona ñnoia, Jusiñamui illanomo jaca iite; iadedi bu naimiena ñnoñenia, Jusiñamui illanomo jaca iñeite. Jusiñamui ríicaillafue anamo jai ite.

4

Galileamo Jesús jailla rafue

¹⁻² Naie facaise ailluena comini Jesúsmona fueotimaci. Iemei naimie díbeido bautizadimaci. Naimacina naimie bautizallena, janore comini Juan dine jaide. Jesúsdi bautizañede. Dani ie llofueoicaiganodicaí bautizadicaí. Fariseuai bie rafuena fidiano, iena Jesús uiñua jira, ³ Judeamona Galileamo Jesús cai diga dane abido jaide.

Samaria iñaiño diga Jesús ñaia rafue

⁴ Galileamo jaillena, Jesúsdi Samaria railla enirue díbeido jaiacade. ⁵ Samariamo cai ria, Sicar railla nairaimo iaírei rillano, daje pozomo

ridicai. Naie pozodi Jacob micori jaie finoca. Jacob micori naie pozo illano ie jito José micorimo jaie fecade. ⁶ Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote. ⁷⁻⁸ Jesús pozomo fiebicailla meinona, Sicarmo jaidicai, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirolesca.

⁹ Naiñaiñodi uai ote:

—Judío imiedio. Samaria iñaiñodicue. ¿Niese cuemo jinuina jicadio? — Naiñaiño iese raite, judíuai Samaria comini diga ñairainina jira.

¹⁰ Jesús dinena dane uai ote:

—Jusiñamui omo feaacalle ra uiñotiodena, o diga ñaitimiena uiñotiona, cuemo jaca itataite jinuina cuemo jicadio. Iemei omo iena fecadicue.

¹¹ Naiñaiño uai ote:

—¿Niese bie pozomona jinuina oitio? Eo ana ite. ¿Ninomona jaca itataite jinuina oitio? ¹² Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruai micoriai jiai naiemona jirodimaci. Ie ocainaijai dajemona jiai jirodimaci. Cai usuma micori baifemo fañedio —raite.

¹³ Jesús uai ote:

—Nagamiajai bie jinui jirua mei, dane jiroacanite; ¹⁴ iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

¹⁵ Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶ Jesús dinena uai ote:

—O jofomo mai jai. O ini diga abido bene bi.

¹⁷ Naiñaiño uai ote:

—Inidicue.

Jesús dinena uai ote:

—Uanaí llotio. Ua ininidio. ¹⁸ Cinco diga inina jai faicaidio. Birui o diga itimiedi jiai o iniñede. Uanaicinona ua llotio.

¹⁹ Iemona abina uiñocaillamona, naiñaiño dinena uai ote:

—Odi Jusiñamui ie lloraímadio. Iena uiñoticue. ²⁰ Cai jaiagai bai bene ite anedumo Jusiñamuina sedauídimaci. Ie jira nainomo Jusiñamuina nia sedadicaí; iadedi omoi judíuai dinena raitomoi: “Jerusalémo Jusiñamuina cai sedauilla”.

²¹ Jesús dinena dane uai ote:

—Cuena inno. Jiaíruído bai bene ite anedumo cai Moona sedañeitomoi. Jerusalémo naimiena jiai sedañeitomoi. ²² Raise uiñofeno Jusiñamuina biruido sedadomoi; iadedi cai nairaimona cai Jilloitarama illa jira, naimiena raise uiñuana sedadicaí. ²³ Jiaíruído, ua birui, cominidi: “¿Ninomo Jusiñamuina sedaiticaí?” raillamo comeciaina facañeitimaci. Naimaci comeciái jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide. ²⁴ Jusiñamui comeñede. Naimiedi jafaici. Omoi comeciái jitaillamona naimiena omoi sedajana jitaide.

²⁵ Riño uai ote:

—Cai Jilloitarama billena uiñoticue. Naimiedi Cristo. Naimie bia, nana bie isoide rafuena caína raise uiñotaite.

²⁶ Jesús raite:

—Naimiedicue.

²⁷ Ieconí abido ridicái. Riño diga Jesús ñaia jira, rajicaidicái; iadedi: “¿Buena naiñaiño jitaide?” raillano jicanoñedicái. “¿Buena ñaitomico?” raillano jiaí jicanoñedicái. ²⁸ Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

²⁹ —Ailli pozo fuemo cue jaca cioiraininamie diga dafaifidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraíma. Naimiedi nibai Cristo.

³⁰ Ie jira Jesús dine ailluena comini bitimaci. ³¹ Naie riño ie nairai dine jailla mei, abido cai dine nia riñenia, Jesúsna raiticái:

—Maestro, mai guiño.

³² Naimie uai ote:

—Cuemo guille illana uiñoñedomoi.

³³ Coniniri siadoticái:

—Jai nibai bu ecajaibiga.

³⁴ Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue lluamona, jai guticue isoidicue. ³⁵ Comecina facadomoi: “Jusiñamui uaina nia lloñeiticái. Ico iena lloiticái”. Ie isoide. Illimo riará nia llisiñenia, comecina facadomoi: “Riará einaillena, naga amaga fivui fiebite. Naie facaise maijüiticái”. Omoimo lloticue: Omoí ecimo eruai. Riará jai einaite isoide. Naimacimo Jusiñamui rafue llollena, iena naimaci ñnollena, ailluena comini jai itimaci. ³⁶ Naie llisillamo maijüitimiedi ie ucubena feiñoite. Ie isoide. Jusiñamui rafuena damierie llocabillamona, comini iena cacadimaci. Jiaíno billamona, iena dane cacajamona, iena ñnotimaci. Naie mare rafue lloraini ibana feiñoitimaci. Jusiñamui díbeimo naimaci dajena maijia jira, dajena iobitimaci. ³⁷ Cai comini iena raicabitimaci: “Damie iduaina rite; ia jiaímie llisillana ote”. ³⁸ Ie isoide. Omoína oredicue, comini cue díbeimo itatallena. Naimacimo cue uaina nano lloñedomoi; iadedi nano jiaíno naimacimo cue uaina llotimaci. Ie jira nana omoí llofuiamona cue uaina ñnotimaci.

³⁹ Samaria iñaiño lluamona, naiñaiño nairaimona ailluena comini Jesúsna ñnotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitaraíma” raillanona Jesúsna ñnotimaci. ⁴⁰ Jesús dine naimaci rillanona, naimaci diga naimie fiebillena, Jesúsno jicanotimaci. Ie jira Jesús menarui naimaci dinomo fiebite. ⁴¹ Naimie llofuiamona, jiaíe ailluena comini naimiena ñnotimaci.

⁴² Riñoimo llotimaci:

—Daño o lluamona, navui ñnoticái; iadedi naimie uaina cai cacajamona, birui raise ñnoticái. Naimiedi comini ua Jilloitaraíma.

⁴³ Menarui illanona, nainomona Galileamo Jesús cai diga jaide.

⁴⁴ Caimo llote:

—Jusiñamuina lloraimadi ie nairai illanomo ia, naie comini naimie lluamo cacarefiacaiñedimaci; ⁴⁵ iadedi Galileamo cai rillanona, nainomo itino naimiena caimare feiñotimaci. Pascua railla rafue facaise Jerusalémo nana naimie finoca rafue navui naimaci cúa jira, naimiena caimare feiñotimaci.

Jesúdi illaicomini jitona jillotaja rafue

⁴⁶ Galileamo Jesús cai diga macaria, dane Canámo ridicái. Nainomo jinuimona vino navui finode. Nainomo cai ia, Capernaum railla

nairaimo itimie jito duide. Duidimie moodi gobierno diga maijuide. ⁴⁷ Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiodaiacana jira, ie jitona jillotallena Jesúmo duere jicanote. ⁴⁸ Jesús naimiemo llote:

—Siño rafuena omoi cioñenia, cuena ñnoñedomoi.

⁴⁹ Uai ote:

—Maestro, cue diga bi, cue jito fiodaiñellesa.

⁵⁰ Jesús uai ote:

—Mai jai. O jito jai fiodaiñeite —llote. Naie ñima Jesús uaina ñnuano, ie jofomo abido jaide. ⁵¹ Naisona naimie jaidemo, ie mullaiai diga afeedo beici dafaifide. Llotimaci:

—O jito jai jillode.

⁵² Ie jira naimie jicanote:

—¿Ñino jitoma itemo, jillode?

Uai otimaci:

—Navui are jitoma oni lluai caidemo, abi cuarilladi fainonocaide.

⁵³ Ie comecina facade: “Navui are naie facaise Jesús cuemo llote: ‘O jito jai jillode’ ”. Ie mullaiai lluaana cacajamona, naimiedi Jesúdi cai Jilloitaramana ñnote. Nana naimie jofomo itino jiai ñnotimaci. ⁵⁴ Judeamona Galileamo Jesús abido billano, siño rafuena iese jai finode.

5

Joraibimo tisitaitimie jillua rafue

¹ Digarui illa mei, cai judíuai rafue iacana jira, Jerusalémo Jesús abido jaide. ² Jerusalémo toica llaudaiai jaisoilla nase facaimo joraibi ite. Cai judíuai uaimona nai joraibi mamecidi Betesda. Naie jorai fuedo ite cinco jifocotiai. ³ Nainomo diga duidino biidimaci: uisnidimaci, ñujañujacaidino, tisitaitino. Jinuina begollena sedadimaci. ⁴ Feide isoidemona dacaiño Jusiñamui jaienicidi jinuina begotallena bite. Iemei nai jinuimo nano jaidimie ie duicomona jillode. ⁵ Duidino motomo tisitaitimie ite. Treintiocho años duide. ⁶ Naimiena ciuano, naimie are duillana uñnuamona, Jesús naimiemo jicanote:

—¿Jilloiacadio?

⁷ Duidimie uai ote:

—Jii; iadedi jinuina begoia, jaca buna ññede cue canoitena. Ie jira jaimiedi cue uicodo jinuimo jaide. Ie jirari nia jilloñedicue.

⁸ Jesús uai ote:

—Mai naidacai. O biira ferinocaida macari.

⁹ Teconi naimie jillode. Ie biira ferianona oni jai macarite.

Sábadoruimo duidimie jilloitajana siadua rafue

Sábadoruimo, judíuai jafaici ouillaruruimo, naimie jillode. ¹⁰ Ie jira judíuai illaicominidi jillodimieemo llote:

—Birui sábado. O biira abinocaida o uilla jira, Moisés micori rairuica rana jai finodio. Sábadomo maijñidicai. Birui jafaici uaruimo jaca buena jetanidicai.

¹¹ Naimie uai ote:

—Cuenta jilloitaitimie cuemo llote: “O biira mai ferinocaida macari”.

¹² Judíuai dinena jicanote:

—¿Bu iena omo llote? —Naimie uññoñena jira, uai ññede.

¹³ Jesúsdi comini motomo itabilla jira, ailluena comini illa jira, jai jillodimie ie jilloitatimiena uifioñede. ¹⁴ Ie meinoconi dallu illanona, Jusiñamui jofomo Jesús dinena naimiena baite. Llote:

—Jai jillodio. Abido dane eo duere o sefuisa, dane jeacinona finoño.

¹⁵ Ie mei judíuai illaicominimo jillodimie lluaide. Llote:

—Jesús raillamie cuena jillotate.

¹⁶ Sábadoruimo Jesús bie rafuena finua jira, judíuai illaicominidi naimiena duere finoacasite. ¹⁷ Jesúsdi abina riiduano llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote. ¹⁸ Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicomini naimie meinellena eo jitaidimaci.

Jesús ie Moo isoi finua rafue

¹⁹ Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena cuano finocabidicue. Cue Moo finua isoi finodicue. ²⁰ Cue Moo cuena isiruillanona, nana ie finoca rafuena cuena jai uifiotade. Naimie Jitona cue illa jira, bie imana cue jilloitaja baifemo jiaie siño rafuena finoiticue, omoi rajjicaillena. ²¹ Fiodaitinona jilloitallena, cue Moomo ie uai ite. Naie uai cuemo jiai ite. ²² Cue Moo juez isoi naimie inoñedinomo lloñeite; iadedi naimacimo juez isoi cue lollena, naimaci duere sefuillena, ie uai cuemo iga. ²³ Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuena omoi iobitañenia, cue Moona jiai iobitañedomoi. ²⁴ Uanaicinona lloticue. Cue uaina bu cacaia, cuena oretatimiena bu inoia, monamo jaca iite. Jearede rafue naimie finua facaina duere sefuiñeite. Faiñeite; ia monamo Jusiñamui diga jaca iite. ²⁵ Uanaicino lloticue. Jusiñamui Jitodicue. Ua birui cuena inoñedino cue uaina cacareitimaci. Cuena cacajamona, cuena inuamona, jaca iitimaci. ²⁶ Cominina jaca itatallena, cue Moomo uai ite. Comini jaca itatallena, cuemo ie uai jiai iga. ²⁷ Cuena inoñedinomo juez isoi cue lollena, naimiemo cue duillamona, ie uai cuemo jiai iga. ²⁸ Ieri rajjicaifio. Jiairuido nana jai fiodaitino diese cue lluna cacaitimaci. ²⁹ Fiodaillamona naimaci abiai jilloitimaci. Ie mei cue jitaillacinona finodino jaca illena lloticue. Cue jitaillacinona finoñedino diese duere sefuillena lloticue. ³⁰ Naimacimo cuena oretatimie jitailla isoi lloticue. Dama cue comecimo ite rafuena cue lloñena jira, bie llucacino uanaicino.

Jusiñamui ie Jito uaina comini inoñena rafue

³¹⁻³² Jesús nia llote:

—Dama cue abina cue lloiadedi, bu cuena jaca inoñede; iadedi Jusiñamui cue facaina jiai llote. Naimie llucacino uanaicino. Iena uifioticue. ³³ Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoi mo lollena, naimacina oretatomo. Juan llucacino uanaicino. ³⁴ Naimie micori cue rafuena llouide; iadedi naimie micori llogacino omoi comeci eo facajana birui jitaifio. Cuena omoi inollena, naimie mamecina jai llinotocue. ³⁵ Lamparín raise lligañua isoi, ie rafuedo Juan micori omoi comecaimo iticinona raise uifiotade. Dallu ieri iobidomo. ³⁶ Cue finoca rafue Juan micori finoca rafue baifemo faite. Cue siño finoca rafuena ñaiticue. Cuena naimie oretajamona, cue Moo uaido iena

finodicue. Ie jira naiemona naimie dinena cue billana jai uiñotomoi. ³⁷ Cue finoca rafue muidona cuena uiñotomoi; iadedi naimie llwana jaca cacaiñedomoi. Naimiena jiai jaca cioiñedomoi. ³⁸ Cuena omoi ñnoñena jira, naimie uaina feiñoñedomoi. ³⁹ Jusiñamui dine omoi rillena, Jusiñamui facaina lloraini micoriai cuegafuiaina facacabidomoi. Naifuiaidi cuena ñaite; ⁴⁰ iadedi Jusiñamui dine omoi rillena, cue uaina ñnoiacaiñedomoi. ⁴¹ Cuemo iobillacinona omoi fecallena sedañedicue. ⁴² Jusiñamuina isiruiñedomoi. Iena uiñoticue. ⁴³ Cue Moo mamecido cue billanona, cuena feiñoñedomoi; iadedi dama ie mamecido jaiemie bia, naimiena feiñoitomoi. ⁴⁴ Jaca ñnoiacaiñedomoi. Iobillacino coninimo fecadomoi; iadedi ua Jusiñamuidi omoiña “Mare” raillana jitañedomoi. ⁴⁵ “Cue Moomo omoi marañede finoca rafuena lloiticue” raillanomo começaina facañeno. Moisés micori cuegafuiaimo omoi llogiduafue jai ite. Moisés micori cuegafuiai muidona Jusiñamui dine omoi jaca illemo ocuridomoi. ⁴⁶ Moisés micori cuegafuiaina ñnotomoiña, cuena naimie micori cuia jira, cuena jiai ñnoitomoi. ⁴⁷ Naimie cuegafuiaina ñnoñedomoi. Ie jira cuena jiai ñnoñeitomoi —llote.

6

Jesús cinco llomenicomona ailluena cominina ecaja rafue

(Mt 14.13-21; Mr 6.30-44; Lc 9.10-17)

¹ Jiairuido Galilea railla jorai ie ruica ñibeimo Jesús ie llofueoicaiganodicai diga jaide. Naie joraidi jiai Tiberiana mameçirede. ² Duidinona naimie jillotauillana naimaci cuia jira, ailluena comini naimiena racadimaci. ³⁻⁴ Naie facaiseconi pascua railla rafuedi jai iaie ite. Jesús cai diga anedumo a jaillanona, dinomo ana raide. ⁵ Oni erodatemo, ailluena comini naimie dine billana ciode. Felipemo jicanote:

—Naimaci guillena, ¿ninomona llomeniconona oiticaí?

⁶ Naimiena facacillena, iena jicanote; iadedi Jesús ie finolle rana jai uiñote. ⁷ Felipe uai ote:

—Janore naimaci guillena, doscientos digarui ie maijia ucube ñiese llomenico oticaina, baiñede.

⁸ Naie facaise camona damie iena cacade. Naimiedi Simón Pedro ama. Andréna mameçirede. Naimie raite:

⁹ —Cinco cebadamona finoca jenide llomenico daje uruemo bene ite. Mena lliciai jiai naimiemo ite; ia ¿ñiese ñibaiticai? Baiñeite.

¹⁰ Jesús caimo llote:

—Cominimo llono, ana imaci raillesa.

Ie jira raitire illanomo ana raidimaci. Cinco mil ñiñiai itimaci. ¹¹ Llomeniconona Jesús ua meinocni, Jusiñamuimo iobillacinona fecajano, Jusiñamuimo jüide. Iemei cominimo caina naie llomeniconona fecatate. Comini jitailla ñierise lliciai daje isoi fecatate. ¹² Naimaci monillamona, caimo Jesús llote:

—Buena jaca faifiñellena, fiebide guille danomo irai.

¹³ Ie jira iena iraidicai. Naie cinco llomenicomona, comini guigamona fiebidemona, doce cirigaiaimo oruitaticai. ¹⁴ Jesús finoca rafuena naie cominidi cuanona, llotimaci:

—Jusiñamui facaina lloraini micoriaidi cai jilloitaraima ico billena jaie llotimaci. Bimiedi naimie.

¹⁵ Naimaci illaïmana naimie illena, naimiena gaitaacadimaci. Iena naimie uiñua jira, iena naimie jitaiñena jira, aneduaïmo naimie oni jaide.

Capernaumo Jesús abido jailla rafue

(Mt 14.22-27; Mr 6.45-52)

¹⁶ Jitoma ana itemo, jai navuidemo, ie llofueoicaiganodicai joraimo jaidicai. ¹⁷ Cai botemo cai jaillano, ruica Capernaumo jaiacadicai; iadedi Jesús nia biñede. Jesúsna sedadicaïmo, naimie biñena jirari, jai jitirena facaiseconi jai jaidicai. ¹⁸ Riire aïfi illa jira, jorai eo bagode. ¹⁹ Nibaï cinco, nibaï seis kilómetros jaidicaïmo, damie cai dine jinui emododo billana ciodicai. Bote dine naimie billana ciuanona, jacinaiticai. ²⁰ Jesús caïmo llote:

—Jesúdicuesa. Jacinaiñeno.

²¹ Iena cacajanona, botemo naimiena a billana jitaïdicai. Ieconï ruica dine cai jaiacananomo ridicai.

Comini Jesúsna jenua rafue

²²⁻²⁴ Cai jailla mei, daje bote nairuido illa jira, jinafomo fiebidino Jesús cai diga jaiñenana uiñotimaci. Cai Nama ie Moomo iobillacinona fecajanomo, cominïmo guille fecajanomo, Tiberiamona dajerie botes naie facaise iaire bite. Monaidemo, Jesúsna naimaci cioiñena jira, cai jiaï iñena jira, naie botiaïdo Capernaumo Jesúsna jenollena, jaidimaci.

Jesús: “Llomenicodicue” railla rafue

²⁵ Ruica dine Jesúsna comini baïllanona, jicanotimaci:

—¿Niruido bene ridio? ²⁶ Jesús uai ote:

—Navui are omoina cue ecajamona, iemona omoi monillamona, cuena jenodomoi. Siño rafuena cue finuana ciodomoï; iadedi cuena nia ñnoñedomoi. ²⁷ Guille raïre cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iïmana cue jaïllena, cuena oretate. Ie uai cuemo illanona, cue uaina omoi ñnuamona, Jusiñamui diga jaca iitomoi.

²⁸ Jicanotimaci:

—Nia Jusiñamui dibeïmo iticaina, ¿nie isoidifue finodicaina mare?

²⁹ Jesús uai ote:

—Naimie oretagamie uaina omoi ñnuana jitaïde.

³⁰ Naimaci dinena dane jicanotimaci:

—¿Nie isoïde rafuena finoitio? iena cai ciuano, o uaina cai ñnollesa.

³¹ Cai jaiagai jofue iñenanomo Jusiñamuïmona bite guilla ra guisoidimaci. Moïses micori iena jaïe cueda: “Jusiñamuïmona bite guiga ra naimacïmo nagarui fecauide”. Iemo jiaï birui ocuiridicai. Naïe isoïde siño rafuena o finuana jiaï cioacadicai —llotimaci.

³² Jesús uai ote:

—Uanaï lloticue. Moïses micori naïe guiga ra jaca fecañede. Cue Moo iena fecauide. Birui naimiedi monamona bite ua llomeniconona omoi moï jai fecacade. ³³ Jusiñamui fecacalle llomenico monamona jai bite. Comini iena guïllamona, jaca iitimaci.

³⁴ Llotimaci:

—Nagarui caïmo bie isoïde llomeniconona feca.

³⁵ Jesús uai ote:

—Llomenico guïllamona iticai. Omoi llomenico isoidicue. Cuena ñnuamona, monamo jaca iitomoi. Cuena ñnotimie dane aimetaïñeite.

Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comeciái jitaillacino naimacimo jaca illena ñaite —. ³⁶ Cuena ciodomoi; iadedi cuena ñinoñedomoi. ³⁷ Nana cue dibeimo cue Moo itatallinodi cuena ñinoitimaci. Cuemona naimacina jaca oni dotañeiticue. ³⁸ Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. ³⁹ Cuena oretatimiedi cue dibeimo itatallinomona buna faifillana jitañede. Jusiñamui lluaruimo fiodaillamona nana naimaci abiaina cue jilloitajana jiaí jitaide. ⁴⁰ Jusiñamui Jitona cue illana bu ñinoia, cuena bu ñinoia, monamo jaca iite. Jusiñamui lllorruimo fiodaillamona naimie abina jillotaiticue. Iese cue Moo jitaide.

⁴¹ Jesúsdi: “Monamona bite llomenicodicue” railla jira, judíuai illaicominidi naimie uaina jamaillano ñinosiñede. ⁴² Raitimaci:

—Bimiedi Jesús. José jito. Ie moona uiñoticaí. Ie eina jiaí uiñoticaí. ¿Ñiese naimiedi: “Monamona biticue” raite?

⁴³ Jesúsdi uai ote:

—Iese omoi naiñeno. ⁴⁴ Naimiena cue Moo ñinotañenia, bu cuena ñinonide. Cuena bu ñinoñenia, Jusiñamui lllorruimo fiodaillamona naimie abina jillotaiticue. ⁴⁵ Jusiñamuina lloraini micoriaí jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiaí ñinoite. ⁴⁶ Buna cue Moona jaca cioñede. Naimiemona cue billamona, dama cue cúa. ⁴⁷ Uanaicinona lloticue. Cue uaina ñinotimie monamo jaca iite.

⁴⁸ Jesús dane llote:

—Llomenico guillamona iticaí. Omoi llomenico isoidicue. Cuena ñinuamona, monamo jaca iitomoi. ⁴⁹ Jofue iñenanomo omoi jaiagai Jusiñamui mona bite rana guisoidimaci; iadedi fiodaitimaci. ⁵⁰ Birui jiaie guille ra ite. Monamona ite. Iena bu guía, monamo jaca iite. ⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomenicono guía, jaca iite. Bie llomenicodi cue abi. Comini facaina fiodaiciticue.

⁵² Iena cacajano, judíuai illaicomini coniniri naiena siadotimaci. Raitimaci:

—¿Ñiese bimie abina riiticaí?

⁵³ Ie jira Jesús dinena raite:

—Uanai lloticue. Cue abina omoi riñenia, cue diruena omoi riñenia, cue Moo diga jaca iñeitomoi. ⁵⁴ Bu cue abina ríia, bu cue diruena ríia, cue Moo diga jaca iite. Fiodaillamona naimie abi iirairuimo jillotaiticue. ⁵⁵ Cue abidi ua rille. Cue diruedi ua rille. ⁵⁶ Bu cue abina ríia, bu cue diruena ríia, cuena nabaide. Naimiena jiaí nabaicue. ⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina ríia, cue illamona, naimie jiaí iite. ⁵⁸ Bie isoide guille ra monamona jai bite. Omoi jaiagai jaie guiga ra isoñede. Jaie fiodaitimaci; iadedi bie guille ra birui bu guía monamo jaca iite. —Iese llote; iadedi naimie fiodaillamona, naimiena comini ñinuamona, Jusiñamui diga naimaci jaca illena ñaite.

⁵⁹ Capernaumo judíuai ofiracomo Jesús buena llote.

Jesús diga jaisoidino naimie lluaña siadua rafue

⁶⁰ Jesús diga jaisoidino naimie lluaña cacajano, coniniri siadotimaci:

—Bie llua eo irirede. Bu iena cacaiñede.

⁶¹ Jesúsdi naimaci iese siaduana uiñote. Ie jira llote:

—Cue lluaana raise iñoñedomoi. ⁶² Jusiñamuimona iimana jaillena jai biticue. Monamo abido ico cue jaillena cioitomoina, iena jiai nibai raise iñoñeitomoi. ⁶³ Cai joreño caimo illamona, iticai. Dani cai abi diga iñedicaí. Ie isoide. Cue llogacino Jusiñamuimo duide. Iena omoi iñuamona, jaca iitomoi; ⁶⁴ ia omoimona nana iñoñedomoi —llote. Nano dofoconimona Jesúsdi naimiena iñoñedinona uiñote. Naimiena gaitataitimiena jiai uiñote.

⁶⁵ Jesús dane llote:

—Ie jira omoimo lloticue: Cue Moo jitaiñenia, cuena jaca bu iñonide.

⁶⁶ Iena cacajano, Jesús diga jaisoidinomona, diga comini naimiena fainonocaidimaci. ⁶⁷ Ie jira ie doce llofueoicaiganodicaimo Jesús jicanote: —¿Jiai cuena fainonocaida, abido jaitomoi?

⁶⁸ Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi Jillotaraima iñede. Jaiñiemmo jaca itatajaracinodi iñede. ⁶⁹ O lluaana jai iñoticai. Jusiñamui mare Jitodio. Iena uiñoticai.

⁷⁰ Jesús dane uai ote:

—Doce digamie fetocaomoi; iadedi omoimona damie Taifemo jainaiaide —llote. ⁷¹ Caimona Judas Iscariote micorina ñaite. Judas micori Jesúsna gaitataiacadimie.

7

Jesús amatiai naimiena iñoñena rafue

¹ Jiairuido Galileamo ite nairaiaimo Jesús macarite. Judíuai illaicomini naimiena meineiacana jira, Judeamo jaiñede. ² Jifocotiaiai railla rafue iaire ite. Judíuai ie rafue. ³ Ie jira Jesús amatiai naimiemmo llote:

—O diga jaicabidino o finua rafuena raise cioillena, beno fainonocaida, Judeamo jai. ⁴ Bu ie mameci are soriacania, bainino maijirainina. Ie isoide. Siño rafuena o finoa, ailluena comini illa motomo iena fino.

⁵ Jesús amatiai naimiena iñoñena jira, iese raite. ⁶ Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai. ⁷ Comini omoína enoiñedimaci. Naimaci finoca jearede rafuena cue llua jira, cuena jaca enoidimaci. ⁸ Jerusalémo rafuemo jai. Cue jaillirui nia riñena jira, nia jaiñeiticue. ⁹ —Iese lluaano, Galileamo naimie fiebide.

¹⁰ Naimie amatiai rafuemo jailla mei, Jesúsdi naimaci jinafona dama bainino jaide. ¹¹ Nai rafuemo judíuai illaicomini Jesúsna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

¹² Nainomo ailluena comini itimaci. Comini illa motomo naimiena anado siadoside. Jiaino dinena: “Naimiedi mare” raitimaci. Jiaino dinena: “Naimiedi cominina jifujete” raitimaci. ¹³ Judíuai illaicominina iciana comini jaciruillanona, anado siadoside. Jesúsna marefodo buna ñaiñede.

Sábadoruimo Jesús maijia raufe

¹⁴ Jifocotiaiai railla rafue atuedo fuitemo, Jesús Jusiñamui jofomo jailano, llofujete. ¹⁵ Illaicomini naimie llofuiamona rajicaidimaci:

—¿Niese naimie abi uiñote? Eo rafuena uiñotimiemona jaca fueoñede —raitimaci.

16 Jesús uai ote:

—Dama cuemona oñega cue llofuiacinodi. Cuena oretatimie ie. 17 Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuimona cue uana uiñoite. 18 Bu dama ie comecimona cue oñenana jiai uiñoite. 18 Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanai llote. Maraiñedicinona finoñede. 19 Moisés micori Jusiñamui uaina jai llote; iadedi birui naie llogacinuaina nia raise inoñedomoi. Iena raise inotomoidena, cuena niade meineiacañedomoi.

20 Comini dinena uai ote:

—Nibai uairitaidio. ¿Bu ona meineiacade?

21 Jesús uai ote:

—Dacaiño sábadoruimo damiena jillotaticue. Ie jira cue uaina uaitatomo. 22 Sábadoruimo jiai maijicabidomoi. Moisés micori isaiiai abiai di-ana omoimo jai llote; iadedi naimie micori naiena nano lloñede. Naimie micori usumatiaiai naiena nano llotimaci. Sábadoruimo isana abi dellirui ia, detomoi. 23 Moisés micori llogacinona inollena, sábadoruimo isaiaina detomoi. Sábadoruimo imana raise jillotaticuemo, ¿bue ñellena cue diga iciritomoi? 24 Cominimo jamai eruailanona, naimacina jeare ñañeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

25 Ie jira Jerusalémo itino coniniri siadotimaci:

—Illaicomini bimiena meineiacadimaci; 26 iadedi beno marefodo naimie llofuete. Jaca buena lloñedimaci. Illaicominidi: “Bimiedi cai Jilloitaraima” raillano nibai comeciaina facadimaci. 27 Bimie ie billanona cai uiñua jira, naimiedi cai Jilloitaraimañedimie. Cai Jilloitaraima baireia, jaca budí naimie billanona uiñoñeite —siadotimaci.

28 Ie jira Jesús Jusiñamui jofomo naimie llofuiano llote:

—Cuena uiñotomoi. Ninena cue billana jiai uiñotomoi. Cue jitailla jira biñedicue; iadedi jiaimie cuena oretate. Naimiedi uanai llote. Naimiena uiñoñedomoi. 29 Naimiemonona cue billa jira, naimiena uiñotocue. Cuena oretate —llote.

30 Ie jira illaicomini Jesúna gaitaacadimaci; iadedi naimie fiodable facaise nia riñena jira, buna naimiena gaitañede. 31 Nairui ailluena comini naimie uaina inotimaci. Raitimaci:

—Cai Jilloitaraima bia, ¿niese naimiedi bimie baifemo jiaie rafuena fiñoite?

Jesúna gaitaiacana rafue

32 Fariseuaidi comini iese ñañana cacajano, Jesúna gaitallena, Jusiñamui diga nanoca ñairainidi ailluena policiana orede. 33 Ie jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue. 34 Cuena jenoitomoi; iadedi cuena baiñeitomoi. Cue dine binitomoi.

35 Ie jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeiticai? Judíuainedimona llofuelle-
lena, jiaie eniruemo cai comini dine nibai jaite. 36 ¿Ñiese naimie raite: “Cuena jenoitomoi; iadedi cuena baiñeitomoi”? ¿Ñiese raite: “Cue dine binitomoi”? —iese siadotimaci.

Jesúdi Jusiñamui Joreñoña ñaia rafue

³⁷ Jifocotiaia railla rafue fuillaruimo, ua rafue ie nairuimo, Jusiñamui jofomo itinomo Jesús ado lloste:

—Bu jiroacania, cue dine bi. ³⁸ Jusiñamui facaina lloraini micoriai jaie cuela: “Naimiena inotimie comecimo jaca itatate jinui isoi iite, torafomona jinui tonooilla isoi”.

³⁹ Jesúdi iese lloste; ia Jusiñamui Joreñoña ñaite. Jusúna inotinomo Jusiñamuidi ie Joreñoña ico illena ñaite. Jesús nia fiodañena jira, iena nia iñega.

Comini Jesúna dane siadua rafue

⁴⁰ Jesús lluaana comini cacajano, raitimaci:

—Jusiñamui facaina lloraini micoriai Jusiñamui facaina lloraima ico bil-lena jaie llotimaci. “Cristo nia baireñena, naimie biite” llotimaci. Bimiedi naimie.

⁴¹ Jiaino raitimaci:

—Naimiedi cai Jilloitaraima. Naimiedi Cristo.

Jiaino raitimaci:

—Cai Jilloitaraima Galileamona biñeite. ⁴² Jusiñamui facaina lloraima micori cuela: “Cai Jilloitaraimadi David micori jito. Belémo David micori illanomo jecille”.

⁴³ Ie jira daje isoi naimiemo comeciaina facañedimaci. ⁴⁴ Jiaino naimiena gaitaacadimaci; iadedi buna naimiena jetañede.

Judúai illaicomini Jesúna inoñena rafue

⁴⁵ Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúna atiñedomoi?

⁴⁶ Policías dinena uai ote:

—Naimie llofuia isoi jaca buna llofueñede. Iena jacinallanona, naimiena atiñedicaí.

⁴⁷ Fariseuai dane llotimaci:

—Cominina jifua isoi, omoina jiai jifueite. ⁴⁸ Cai illaicomini dinena naimiena jaca inoñedicaí. Moisés micori llogacinodo raise jaidicaí; ⁴⁹ ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

⁵⁰ Naie illaicominimona Nicodemo raillamie ite. Naimie naiona Jesús dine navui jaide. Fariseo imie. ⁵¹ Jesúna riiduanona, naimie lloste:

—Cai einamací llocabitimaci: “Bu duere cai finoacania, nano naimie lluaano cacarefiticaí. Jearede rafue naimie finuana cacareillano, naimiena duere finoiticaí”. Iena cai cacaiñena, naimiena duere finoñeiticaí.

⁵² Nicodemomo llotimaci:

—Galileamona bitino isoi ñaitio. Naimie llofuegamiena nibai jai jaiacadio. Jaie cuela fuiaina raise faca. Jusiñamui facaina lloraini micoriaidi cai nairaina Jilloitaraima Galileamona billena jaie cueñedimaci. Bie Jesús raillamiedi cai nairaina Jilloitaraimañedimie.

⁵³ Ie meinoconi damierie imaci jofomo jaidimaci.

8

Ie iniñede ima diga riñodi rafuetaila ie rafue

¹ Naie facaise Jesúdi Olivos railla anedumo jaide. ² Ie areruido jítiramo Jusíñamui jofomo abido dane jaide. Ailluena comini naimie dine billa jira, naimie ana raíta, naimacina llofuite. ³ Naie facaise Moisés micori llogacinona llofueraimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede ima diga naiñaiñona jai eidatimaci. Comini illa uicomo atiano, ⁴ Jesúmo llotimaci:

—Llofueraima, biñaiño ie iniñede ima diga eidaticai. ⁵ Moisés micori jaie cuela: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?

⁶ Naimiena facacillena, naimie raise uai oñenia, naimiena llogidollena, iese jicanotimaci. Iena cacajano, Jesús ana jítadacaida, eniruemo ie onocai diga cuete. ⁷ Naimiemo diga icaiño jica-jicanuano, naimie naidacaida, naimacimo llote:

—Omoimona jeacino iñedimie naiñaiñomo nano noficina fairino.

⁸ Dane ana jítadacaida, eniruemo dane cuete. ⁹ Naimie lluaana cacajano, dajerie jino jaidimaci. Nano eo einamacidi jino jaidimaci. Ie mei conrueni jino jaidimaci. Nana comini tuua mei, nainomo Jesús fiebide, naie riño diga ñaillena. ¹⁰ Eruaillano naiñaiñomo jicanote:

—¿Ni nai o llogidotino?

¹¹ Naiñaiño uai ote:

—Jaca iñedimaci. Cuena jai llogidoiacaiñedimaci.

Jesús uai ote:

—Jiai ona duere finoñeticue. Mai jai. Jeacino dane finoño.

Jesúdi comini comeciai lligaiñua rafue

¹² Jesúdi cominina dane llofuianona, raite:

—Jeacino oni jaillena, comini comeciaina lligaiñoticue. Cuena inotimie jítiredinomo jaca iñeite. Jeacino anamo jai iñedimie Jusíñamui diga ico jaca iite.

¹³ Fariseuai dinena uai otimaci:

—Dama o abina ñaitio. Ie jirari uanaicinona lloñedio.

¹⁴ Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi. ¹⁵ Abi raise uiñoño cuena jeare ñaitomoi. Iese omoína ñaiñedicue; ¹⁶ iadedi omoína cue ñaia, uanaicinona lloticue. Dama cue uaina omoína lloñedicue. Cuena oretatimie omoína jiai llote. ¹⁷ Moisés micori iena jiai jaie cuela: “Menamie daje isoí lloia, naie iaimaiaí llucinodi omoi inua” cuela. ¹⁸ Cue facaina llollena, menamie jai ite. Cue facaina lloticue. Cue Moo cue facaina jiai llote.

¹⁹ Fariseuai dinena jicanote:

—¿Ni o moo?

Jesúdi uai ote:

—Cuena uiñoñedomoi. Cue Moona jiai uiñoñedomoi. Cuena uiñotomoina, cue Moona jiai uiñotomoi.

²⁰ Jusíñamui jofomo ucube eenoracomo bicinona siadotimaci. Jesús fiodaille facaise nia riñena jira, jaca buna naimiena gaitañede.

Jesúna comini inoñenia, naie jeacino diga fiodailla rafue

²¹ Naimacimo Jesús dane llote:

—Íco oni jaiticue. Cuena jenoitomoí; iadedí cuena baiñeitomoí. Na omoímo jeacino nia ítemo, fiódaitomoí. Cue jaillínomo jainítomoí.

²² Ie jira judíuái illaícomíní dínená íená síadotímáci:

—Dama íe abína meíneíte.

“Cue jaillínomo jainítomoí?” Jesús railla jira, íese síadotímáci.

²³ Jesúsdí uai ote:

—Jusiñamuímo íte rafuemo dúíñedomoí. Naimíemo íte rafuemo dúídícue. Naimíe díbeímo íñedomoí; ía naimíe díbeímo íticue. ²⁴ Cue Jusiñamuí Jítónána omoí íínoñená jira, ná omoí jeacino díga fiódaitomoí.

²⁵ Jícanosíde:

—¿Budío?

Jesús uai ote:

—Nano omoí motomo cue íllamóna bumíedicuena omoína raícabítícue. ²⁶ Díga rafue omoímo lloíacadícue. Marañéde rafuena omoí finuána omoímo nía lloíacadícue; íadedí omoímo cuena oretatímíe uaina dama llotícue. Náí uaidí uanaícíno —llote.

²⁷ Naimíedí íe Moo Jusiñamuína llote; íadedí cacañédimáci. ²⁸ Ie jira Jesús llote:

—Cuena omoí meínía meí, bumíedicuena uíñoítomoí. Cue uaido dama lloñédicue; íadedí cue Moo cue llofúía uaido llocabítícue. ²⁹ Cuena oretatímíe cue díga íte. Naimíe jítaílle rafuena cue finúa jira, cuena fáínonocañéde,

³⁰ Íese Jesús llotemo, díga illaícomíní naimíe uaina como íínoíacadímací.

Comíní Taífe anamo ílla rafue

³¹ Jesúsdí naimíe uaina como íínoíacadínomo llote:

—Cue llúána íínocána omoí jaía, cue ua comínídomoí. ³² Uanaícínóna uíñoítomoí. Íe meí jíaímíe anamo dane íñéítomoí.

³³ Uai otímáci:

—Abraham mícorí íe uruíadícái. Jíaímíe anamo jaca íñédícái. ¿Bue ñéllena llotío: “Jíaímíe anamo íñéítomoí”?

³⁴ Jesúsdí uai ote:

—Uanaí llotícue. Jeacino finocabídomoí. Naga jeacino finoráíma íe jeacino anamo jaí íte. Omoí jeacino anamo omoí íllána ñaítícue.

³⁵ Jíaíe rafúedo íená llotícue. Íe patrón anamo ítímíemo íe patrón rafúedí dúíñéde; íadedí náíe patrón jítoímo íe rafúedí dúíde. ³⁶ Íe ísoíde.

Jusiñamuí Jítóna cue íllamóna, naimíe rafuemo dúídícue. Íe jira omoímo cue lloía, omoí jeacino anamo ua íñéítomoí. ³⁷ Abraham mícorí íe uruíadídomoí. Íená uíñotícue; íadedí cue llúána omoí raíse íínoñená jira, cuena meíneíacadómoí. ³⁸ Cue Moo díga jaíe cue íllamóna, cue cíua rafuena llocabítícue. Omoí móomóna cacaja rafuena finocabídomoí.

³⁹ Uai otímáci:

—Cái móodí Abraham mícorí.

Jesús dane uai ote:

—Abraham mícorí uruíadídomóídena, Abraham mícorí finoca rafue ísoí finódomoí. Abraham mícorí uruíañédomoí. Íe jira Abraham mícorí finoca rafue ísoí finóñédomoí. ⁴⁰ Uanaí cue llúa jira, cuena meíneíacadómoí; íadedí Abraham mícorí íese finocañéde. Cue llúacíno Jusiñamuímona otícue. ⁴¹ Jusiñamuí uruíáí finoca rafuena finóñédomoí;

íadedí omoí móo finoca rafuena finocabídomoí.

Uai otímáci:

—Jamáí náíraí íe uruíañédícái. Cái Móodí Jusiñamuí.

42 Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biñedicue; iadedi cuena oretate. ⁴³ ¿Bue ñellena cue lluaa cacañedomoi? Cacareirainidomoi. ⁴⁴ Omoi moodi Taifena jira, cue lluaa ñnoñedomoi. Naimie jitailla rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucacacabide. Naimie isoidomoi. ⁴⁵ Uanai cue llua jira, cuena ñnoñedomoi. ⁴⁶ ¿Ñie isoide jeacino finodicue? Cuemo llono. Uanai cue lliia, ¿bue ñellena cuena ñnoñedomoi? ⁴⁷ Jusiñamuina mooredimiedi Jusiñamui uaina cacade. Jusiñamui uruaiñedomoi. Ie jira cue lluaa cacañedomoi.

48 Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

49 Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ñaiamona cuena iobitañedomoi. ⁵⁰ Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi ñnoñenia, cuemo iobillacinona omoi fecañenia, cue Moo omoina duere finoite; ⁵¹ ia bu cue lluaa ua ñnoia, jaca ua fioidañeite.

⁵² Naie illaicomini dinena uai otimaci:

—Janaba illamiediona jai uiñoticaí. Abraham micori jaie fiodaite. Jusiñamuina lloraini micoriai jiai jaie fioidaitimaci; iadedi: “Bu cue lluaa ñnoiadedi, fioidañeite” raitio. ⁵³ Cai usuma Abraham micori baifemo fañedio. Jusiñamuina lloraini micoriai baifemo fañedio. ¿Bumiediota?

⁵⁴ Jesús uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi; ⁵⁵ iadedi naimiena uiñoñedomoi. Naimiena uiñoticue. “Naimiena uiñoñedicue” cue raia, omoi isoi taino lloticue. Naimiena uiñoticue. Naimiena jiai ñnoticue. ⁵⁶ Omoi usuma Abraham micori eniruemo cue ico billena jaie uiñote. Iena uiñuamona, naimie iobide.

⁵⁷ Illaicomini dinena uai otimaci:

—Odi cincuenta años nia iñedio. ¿Ñiese Abraham micorina ciodio?

58 Jesús uai ote:

—Abraham micori nia iñena facaiseconi jaca iticue.

⁵⁹ Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jaide.

9

Jesús uisimidimiena jillotaja rafue

¹ Jiairuido ie llofueoicaiganodicaí diga Jesús macaria, uisimidimiena ciode. Iese nanomona jaca naimiedi jeiciga. ² Jesúmo jicanoticaí:

—Llofueraima, ¿bue ñellena naimiedi iese jeiciga? ¿Ñie isoide ra ie moo jetajamona, naimie iese jeiciga? ¿Ñie isoide ra ie ei jetajamona, naimie iese jeiciga? Caimo llono.

³ Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuiñede. Jusiñamui uai

siñonana comini uinollena, iese jeiciga. ⁴ Nia userena jira, cuena oretatimie ie jitailla rafuena finoacadicaí. Raíre jítirenite. Ie mei bu jaca maijinite. ⁵ Eniruemo cue nia ia, comini comeciaina lligaiñoticue. —Iese Jesús lloite; iadedi jiaie rafuena ñaite. Naimie nia fiodiañenia, Jusiñamui rafuena llocana naimie jaillana ñaite. Ie fiodaillirui jai iaie iacanana ñaite. Comeciaina lligaiñuana lloite, jeacino oni jaillena.

⁶ Iena lluanona eniruena tuajano, enirue idiaí finuanona, uisinidimie uisina naie enirue diga riginote. ⁷ Raite:

—Siloé railla joraibimo mai noisai —raite. Siloé oni dobaiñuamona: “Oretarabi”.

Ie jira naimie noisaide. Uisi jai ciodigo, abido bite. ⁸ Billa mei, naimie ecimo itino, jiaí naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

⁹ Jiaíno raitimaci:

—Jii, naimie.

Jiaíno raitimaci:

—Ieñede. Naimiena eruaide isoide.

Naimie dinena raite:

—Uisinidimiedicue; iadedi jai ciodicue.

¹⁰ Naimiemo jicanotimaci:

—¿Ñiese jai birui ciodio?

¹¹ Uai ote:

—Jesús raillamie enirue idiaí finuano, cue uisina riginote. Cuemo lloite: “Siloé railla joraibimo noisai”. Ie jira noisaidicue. Jai ciodicue.

¹² Jicanotimaci:

—¿Ñinomo ite nai Jesús?

Naimie uai ote:

—Uinonedicue.

Comini uisinidimie jai jilluana siadua rafue

¹³ Navui uisinidimie jai jillua mei, fariseuai dine comini naimiena uitimaci. ¹⁴ Sábadoruimo Jesúsdi naimiena jillotaja jira, ¹⁵ fariseuai naimiemo jicanotimaci:

—¿Ñiesenamona jai ciodio?

Uai ote:

—Jesús raillamie enirue idiaí finuano, cue uisina riginote. Ie mei Siloé railla joraibimo noidicue. Iemona jai ciodicue.

¹⁶ Fariseuaimona jiaíno raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jiaíno raitimaci:

—¿Ñiese jearede ra finuidimiedi uisinidimiena jillotata? —Ie jira daje isoi comeciaina facañedimaci.

¹⁷ Ie jira navui uisinidimiemo dane jicanotimaci:

—Naimie ona jillotaja jira, ¿ñiese odi Jesúsna raitio?

Uai ote:

—Naimiedi Jusiñamui uai lloaíma.

¹⁸ Naimie moo, naimie ei iaímaiaímo nia jicanoñenia, judíuai illaícomini nai íma jaca cioñenano inosiñede. Ie jira iaímaiaína uaiduanona, ¹⁹ jicanotimaci:

—¿Bimiedi omico jito? ¿Naimie jaca uisinino jeiciga?

²⁰ Uai otiiaimaiai:

—Jii, bimie coco jito. Jaca uisinino jeiciga. Iena uiñoticoco. ²¹ Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiiaimaiai.

²² Bie rafue nia suiñenia, judíuai illaicomini navui llotimaci: “Jesúdi cai Jilloitaraima bu lloia, cai ofracomo naimiena fo billana rairuiticaí”. Iena jaciruillanona, ²³ llotiaimaiai: “Naimie jai eimiesa. Naimiemo jicano”.

²⁴ Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecañeno. Naimie jearede rafuena finouidimiena uiñoticaí.

²⁵ Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

²⁶ Jicanotimaci:

—¿Niesede ra diga finuamona odi uisina ciodio? ¿Niese ona jillotate?

²⁷ Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloticue? ¿Ie llofueganona jaiacadomoi?

²⁸ Riire uai otimaci:

—Naimie ie llofuegamiedio. Caidi Moisés micori ie llofueganodicai.

²⁹ Jusiñamui Moisés micorimo jai llwana uiñoticaí; iadedi bimiena uiñoñedicai. Naimie ninena billana jiai uiñoñedicai.

³⁰ Nai iima uai ote:

—Jadi, naimie ninena billana uiñoñedomoi; iadedi cuena jillotate.

³¹ Jusiñamuidi jearede rafuena finodino ñaia uaina cacareñede. Naie isoidino siño rafuena finoñenana uiñoticaí; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñoticaí. ³² Enirue finua facaisemona jaca buna uisinino jeicigamiena jilloitañede. ³³ Jesúdi Jusiñamuimona biñedimiedena, jaca buena finonide.

³⁴ Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofracomona naimiena jino dotadimaci.

Jesús uisinidimie diga ñaia rafue

³⁵ Uisinidimiena jino dotajana fidianona, Jesús naimiena jenode. Bailano, jicanote:

—¿Omoi cominina Jilloitaraimana inotio?

³⁶ Uai ote:

—¿Bumai naimie? Cuemo llono, naimiena cue inollesa.

³⁷ Jesús uai ote:

—Naimiena ciodio. O diga ñaite. Cue.

³⁸ Caiñici ifodo rainadajanona, iobillacinona fecallena, uai ote:

—Nama, jai o uaina inoticue.

³⁹ Jesús uai ote:

—Uisinidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedicai” raitinona jillotajabite. Jesús “Jai maredicaí” raitinomo ite jeacino naimaci uiñollena bite.

⁴⁰ Naimie ecimo ite fariseuai iena cacajano, jicanotimaci:

—¿Uisinidomoi caina raitio?

⁴¹ Jesús uai ote:

—Uisinidino isoi itomoina, omoimo ite jeacino omoi muidonañede; ia “Jai ciodicai” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiacañena jira, iese ñaite. Naimaci jeacino oni dotajana jitañedimaci.

10

Toica llaudaiaia sedaraima rafue

¹⁻² Jesús dane llofuate:

—Cue rafuena omoi raise uiñollena, toica llaudaiaina ñaiticue. Llaudaiaia jino uicabilla isoi, llaigafomo nasedo fo jaidimiedi naie llaudaiaia sedaraima; ia jinofebei dinena bitimiedi firiraima. ³ Llaigafo llaudaiaia sedaraima fo jaillena, nase sedaraimadi nase econote. Llaudaiaia naimie uaina uiñotimaci. Imaci mameciaido uaiduamona, llaigafomona jino bitimaci. ⁴ Nana ie llaudaiaia jino bia, naimacina ifode. Naimie uaina uiñuanona, naimiena racadimaci. ⁵ Naimaci uiñoñegamiëna racañedimaci; iadedi naimie uaina naimaci uiñoñena jira, naimiemona oni aisidimaci.

⁶ Bie isoidicinona Jesús llofuate; iadedi naie comini iena cacañedimaci.

⁷ Ie jira Jesús dane llofuate:

—Llaigafo ie nase isoidicue. ⁸ Damierie firirainina bitimaci. Ie jira llaudaiaia naimaci uaina cacañedimaci. —Iese Jesús llofuate; ia naimiena ñnotinona ñaite. Naimiena abi caitadinona ñaite. Naimie ñnotinona naimiena abi caitadino llogacinomo cacareñena ñaite. ⁹ Nia llofuate:

—Llaigafo isoidicue. Bu cue nasedo fo bia, jilloite. Llaudaiaia isoi fo biite. Jino jaite. Mare guille baite isoite. —Iese llofuate; ia naimiena ñnotinona marena illana ñaite. Naimiemona naimaci jitailla rafuena uana ñaite. ¹⁰ Nia llofuate:

—Llaudaiaina fiillena, meinellena, faifillena, firiraima bite; iadedi cominina jaca raise itatallena, biticue. ¹¹ Llaudaiaia marena sedaraimadicue. Mare sedaraimadi ie toiniaia facaina riiduana ie abina faifite. ¹² Janallari bia, llaudaiaia naimie ieñena jira, jamai maijidimiedi, llaudaiaina fainonocaillano, ecimona aicide. Llaudaiaina janallari gaitaacanamona, llaudaiaia tuudimaci. ¹³ Jamai ucube oiacanano, isiruiñenano, jamai maijidimie aicide. ¹⁴ Iese iñedicue. Mare sedaraimadicue. Cue llaudaiaina uiñoticue. ¹⁵ Cue Moo diga conimana coco uiña isoi, naimaci cuena jiaia uiñotimaci. Cue llaudaiaia facaina fioidaiticue. —Iese Jesús llofuate; ia naimiena ñnotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiaia fioidaiacade. ¹⁶ Nia llofuate:

—Jiaie llaigafomo jiaie llaudaiaia cuemo ite. Naimacina jiaia atiacadicue. Cue uaina cacaitimaci. Ie mei danomo nana cue llaudaiaia iitimaci. Naimacina dama sedaiticue. —Iese Jesús llofuate; ia jiaie nairaiaimo naimiena ñnotinona ñaite. Dajena naimacina sedajana ñaite.

Jesús fioidaille rafue

¹⁷ Jesús nia llofuate:

—Cue jai fioidaiacanamona, cue Moo cuena isiruite. Fioidaillamona dane jilloiticue. ¹⁸ Cue jitañenia, jaca buna cuena meineñeite. Cue jitailla jira, fioidaiticue. Siño uai cuemo illa jira, cue jitailliruimo fioidaiticue. Cuemo cue Moo siño uaidi jai illa jira, dane jilloiticue.

19 Jesús iese llofuia jira, judíuai illaicomínidi daje isoi comeciaina facañedimaci. 20 Jiaínodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

21 Jiaíno raitimaci:

—Bie isoidicinona Janaba illamie llofueñede. Janaba illamie uisinidimiena jillotanide.

Jesús ie Moo diga daje isoi comeci lloilla rafue

22 Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite. 23 Salomón micori finotaga jofo abi ibirímo Jesús macarite. 24 Naie facaise judíuai illaicomíni naimie dne bitimaci. Jicanotimaci:

—¿Niruido caímo ona lloitio? Odi cai Jilloitaraimania, caímo marefodo llono.

25 Jesús uai ote:

—Omoímo jai lloticue; iadedi ñnoñedomoi. Cue Moo mamecido cue finoca rafuemonu cuena uiñotomoi. 26 Cue toica llaudaíaimo omoí jainaiñena jira, cuena ñnoñedomoi. 27 Cue toica llaudaíai cue uaina cacadimaci. Naimacina uiñotocue. Cuena racadimaci. 28 Naimaci jaca itataticue. Jaca abina faifiñeitimaci. Cue anamona jaca budi naimacina bairoñeite. 29 Cue Moo naimacina cuemo fecade. Naimacidi jiaíno baífemo faitimaci. Naimiemonu jaca budi naimacina baiironide. 30 Cue Moo diga daje isoi comeci lloidicoco. —Iese llote; ia naimiena ñnotinona ñaite. Naie illaicomíni naimiemo jainaiñena jira, naimiena ñnoñedimaci. Iena Jesús ñaite.

31 Jesús llofuiana cacajano, naie illaicomíni noficina llinotimaci, naimiena meinellena. 32 Iena ciuanona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi?

33 Uai otimaci:

—Mare rafuena o finua muidona, ona meineñeiticai. Jamai imadio. “Jusiñamuidicue” o railla jira, ona meineitici. Jusiñamui Joreña jiaí jeare ñaitio.

34-36 Jesús dinena uai ote:

—Jaie ciegafuiana jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamuillaídomoi”. Jusiñamui ie uaina cacadinomo jaie iese llojade, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreña jeare ñaitio” raitomoi. 37 Cue Moo isoi cue finoñenia, cuena ñnoñeno; 38 iadedi cuena omoí ñnoiacañenia, cue Moo isoi cue finoi, naie rafuena ñno. Iemei cue Moomo cue jainaiállana uiñoitomoi. Cuemo cue Moo jainaiállana jiaí uiñoitomoi.

39 Iena cacajano, naimiena dane gaítaacadimaci; iadedi naimacimona jillode.

40 Ie mei Jesús Jordán railla ille ruica díbeimo jaide. Nainomo Juan micori comínina nano bautizade. Nainomo rillanona, nainomo Jesús fiebide. 41 Ailluena comíni Jesús dne bitimaci. Conínina raitimaci:

—Juan micori ñño rafuena finoñede; iadedi nana Juan micori Jesúsna llucínodi uanaicino.

42 Nainomo ailluena comínidi Jesús naimaci Jilloitaraimana ñnotimaci.

11

Betaniamo Jesús abido jailla rafue

¹ Naie facaise Betaniamo Lázaro raillamiedi duide. Naimie miriñodi Marta, María iaiñuai. ² Naie Mariadi jiairuideo Jesús eillimo caimare soride rana totade. Ie mei naiñaiño ie ifotie diga naimie eillina safenaillena dote. ³ Naie iaiñuai Jesús dine uaina orediaiñuai, naimie billena. Naimie jibuisaibillena llotatatiiaiñuai:

—Nama, o isiruigamie duide —llotatatiiaiñuai.

⁴ Jesús naie rafuena fidiano, llote:

—Jamai fiodaillena naimie duiñede. Jusiñamui uaina siñonana comini uinollena, naimie duide. Iemona comini dinena: “Ua Jusiñamui Jitodio” cuena raitimaci.

⁵ Jesúsdi Lázaron a isiruute. Ie miriño iaiñuaina jia isiruute; ⁶ iadedi Lázaro duillana Jesús fidiano, naimie dine jaiñede. Naimie illanomo menarui nia fiebide. ⁷ Ie mei ie llofueoicaiganodicaimo llote:

—Judeamo abido dane mai cai jailli.

⁸ Uai oticai:

—Llofueraima, judíuai illaicomini birui noficina ona fairinoiacadimaci. ¿Niese naimaci dine dane jaitio?

⁹ Uai ote:

—Nagarui userede. Userenia bu macaria, raise ciua jira, eicaitaiñede; ¹⁰ iadedi bu naiona macaria, raise cioiñena jira, eicaitaide. —Iese llofujete; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

¹¹ Dane llote:

—Lázaro jai inide; iadedi naimiena casitallena, jaiticue.

¹² Uai oticai:

—Nama, naimie jamai inia, nia dama casite.

¹³ Naimie jafaici uanona iniamo comeciaina facadica; iadedi Jesús naimana lloñede. Lázaro fiodaillana ñaite. ¹⁴ Ie jira Jesús caimo marefodo llote:

—Naimie jai fiodaite. ¹⁵ Nainomo cue iñena jira, cue siño uai omoi inollena, omoi facaina iobidicue. Naimie dine mai cai jailli.

¹⁶ Caimona Tomás caimo llote:

—Maiña. Naimie diga fiodaisaiticai —llote. Tomás mameci jiaicidi Dídimio. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raiafomo jai nagaamagarui illana fididicai. ¹⁸ Jerusalémona Betaniamo tres kilómetros dinori illa jira, ¹⁹ diga judíuai illaicomini eedollena, Marta iaiñuai María dine bitimaci. ²⁰ Jesús billana Marta fidiano, cai dine naisomo bite; iadedi jofomo María fiebide. ²¹ Jesúsno Marta llote:

—Nama, o bene itiona, cue iio fiodaiñede; ²² iadedi Jusiñamuimo buena o jicaia, naimie iena finoite. Iena uinoticue.

²³ Jesús dinena uai ote:

—O iio abido jilloite.

²⁴ Naiñaiño uai ote:

—Nana comini jilloilliruimo naimie jia jilloite. Iena uinoticue.

²⁵ Jesús uai ote:

—Fiodaillamona cominî abiaîna Jilloitaraîmadîcue. Jusiñamui diga jaca illena, cominîna itataraîmadîcue. Bu cuena înuanona, fiodaiadedî, iemona ico jilloite. ²⁶ Cuena înotimîena Jusiñamui illanomo jaca illena itataitîcue. ¿Iena înotio?

²⁷ Naiñaiño uai ote:

—Jî, Nama; odi cai Jilloitaraîmadîo. Odi Jusiñamui Jitodîo. Jusiñamui dinena o billamo jaie ocuridîcai.

²⁸ Iese raillanona, jofomo Marta abîdo jaide. Ie euiñona uaiduano, anado llote:

—Llofueraîma jai ride. Ona uaidote.

²⁹ Iena cacajano, raire cai dine María bite. ³⁰ Marta diga ie ñaianomo Betania ecimo Jesús nia ite. ³¹ Jesús dine María nia jaiñenia, judîuai illaîcominîdî Marîana nia eedotîmacî. Marîa jino jaillana ciuano, racadîmacî. “Raiafomo eellena naiñaiño jaide” raillanona comeciîna facadîmacî. ³² Marîa Jesús dine rillano, naimîena duenaillano, caiñîci ifodo rainadacaida, llote:

—Nama, bene itîona, niadedî cue îiodî fiodaiñede.

Jesús Lázaron a jillotaja rafue

³³ Marîa eiana Jesús ciuano, naiñaiño diga bitino eiana ciuano, naimîe comeci eo sunaite. Sunaillamona, jafaicîna faite. ³⁴ Jîcanote:

—¿Ninomo Lázaron a raîtomoî?

Uai otîmacî:

—Nama, mai jîbuisaîbî.

³⁵ Lázaron a duenaillanona, Jesús eede. ³⁶ Iena ciuanona, judîuai illaîcominî dinena llotîmacî:

—Ero. Naimîena eo isiruite.

³⁷ Jîano raîtîmacî:

—Navui uisînidîmîena jillotate. ¿Bue ñellena bimîena jilloitañede, naimîe nia fiodaiñenia?

³⁸ Iena cacajanona, ie siño uai finuana naimîci nia raise înosîñena jira, Jesús comeci dane sunaite. Oni jaillanona, raiafomo ridîcai. Nofîci motomo ite naie raiafo. Ifodî jîaie nofîcîna îbaica. ³⁹ Jesús llote:

—Nofîci oni ñuita.

Marta dinena naimîe uai ote:

—Nama, naimîe abî jai sorirede. Nagaamagarui raiafomo jai ite.

⁴⁰ Jesús uai ote:

—Cuena o înoia, Jusiñamui uai siñonana uîñoitio.

⁴¹ Iemona cominîdî nofîcîna oni ñuitadîmacî. Jesús monamo eruaillano, llote:

—Moo, cue uaina o cacaja jira, iobidîcue. ⁴² Jaca cuena cacadîo. Iena uîñotîcue; iadedî cue diga bene itîno illa muidona, iese ado llotîcue. Cuena o oretajana naimîci înollena, o diga ado ñaitîcue.

⁴³ Ie mei eo ado llote:

—Lázaro, jino bî.

⁴⁴ Nai fiodaitîmîe nia naimîe abî nana ferînuva ra diga jino bite. Jesúdi cominîmo llote:

—Naimîe abî ferînuva oni suiño. —Ie jira suiñodîmacî.

⁴⁵ Ie muidona Marîa diga bitînomona ailluena cominî Jesúna înotîmacî. Naimîe finoca rafuena ciuanona, înotîmacî.

*Jesúna meinellena, illaîcominî comeciîna facaja rafue
(Mt 26.1-5; Mr 14.1-2; Lc 22.1-2)*

⁴⁶ Jesúna iinoñedinomona damierie Jesús finoca rafuena fariseuai dine lluaidimaci. ⁴⁷ Ie jira Jusiñamui diga nanoca ñairaini, fariseuai diga, danamo ofidimaci. Jesús rafuena siadotimaci:

—¿Niese naimiena nibaiticai? Diga siño rafuena ua finocabide. ⁴⁸ Naimiena niese cai nibaiñenia, nana comini naimiena iinoitimaci. Nana comini naimie dibeimo jaiá, naimaci illaimana naimie jaillana jitaitimaci. Iemei romanos soldadaui biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaiñedicai.

⁴⁹ Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi. ⁵⁰ Iese cai nairaimo suiñellena, damie cai nairai facaina fiodaitena, mare. Iena nibai nia raise uiñoñedomoi.

⁵¹ Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

⁵² Cai comini facaina dama fiodañede; iadedi nana Jusiñamuina iinoitinona facaina fiodaite. Diga nairaimo itimaci; iadedi naimiemo dajena nana naimaci duillena, naimie fiodaite. ⁵³ Caifás lluaana naimaci cacajamona, judúuai illaicomini comeciaina nia facadimaci, naimiena meinellena.

⁵⁴ Ie jira Jesús judúuai illaicomini illa motodo marefodo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai. ⁵⁵ Pascua railla rafue iaire iacana jira, ailluena comini Jerusalémo naimaci nairaimona jaidimaci. Rafue nia taineñenia, naimacimo ite rafue oni jaillena, cai einamaci llua isoi finodimaci.

⁵⁶⁻⁵⁷ Jusiñamui diga nanoca ñairainidi fariseuai diga navui ñaitimaci:

—Bu Jesúna cioia, naimiena cai gaitallena, caimo llono.

Rafuemo bitino illamona, Jesúna jenodimaci. Jusiñamui jofomo naimaci ia, coninimo jicanododimaci:

—¿Niese comeciaina facadomoi? ¿Jesús bene biite? Cai illaicomini llua jira, nibai jai biñeite. Illaicomini lluaana fidiano, naimie biñeite.

12

Betaniamo Lázaro jofomo Jesús guilla rafue

(Mt 26.6-13; Mr 14.3-9)

¹ Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaron fodaillamona navui jillotata. ² Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticai. ³ Iemei Maríadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride. ⁴ Caimona Judas Iscariote micorina mameciredimie ite. Jesúna gaitataitimie. Llote:

⁵ —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinona fecadena, mare —llote. ⁶ Dueredinona naimie duenaiñede; iadedi naimie cai ucubena sedade. Naimiedi firiraima. Naie ucubemona fiuilla jira, iese naimie llote.

⁷ Jesús uai ote:

—Dama ite. Bie soride ra naiñaño jai eenoga cue fiodaillirui iena.
 8 Dueredino omoi diga jaca iitimaci; iadedi omoi diga jaca iñeiticue.

Ailluena comini Lázarona ciua rafue

9 Lázaró jofomo Jesús illana ailluena cai illaicomini fidiano, bitimaci. Navui fiodaillamona Lázarona Jesús jillotaja jira, Jesúsna dama cioiacañedimaci; iadedi Lázarona jiai cioiacadimaci. 10 Ie jira Jusiñamui diga nanoca ñairainidi Lázarona jiai meinellemo comeciaina facadimaci. 11 Lázaró muidona ailluena judíuai illaicomini naimaci illa díbei fainonocaida, Jesúsna innotimaci.

Jerusalémo illaima isoi, Jesús marena jailla rafue

(Mt 21.1-11; Mr 11.1-11; Lc 19.28-40)

12 Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaró diga guillarui ie areruido Jesús Jerusalémo billana naie comini fididimaci. Fiodaillamona Lázarona Jesús navui jilloitajana diga comini cioidimaci. Iena llocana uitimaci. Ie jira ailluena comini Jesús dine jaidimaci. 13 Raforona uanona, naimiena feiñollena, naimie uicomo jaidimaci. Ado cuiriisite:

—¡Cai Jilloitaraima billa! ¡Jusiñamui mamecido bitimie eo mare! ¡Cai Illaima eo mare! —cuiiriisite.

14 Jesúsdi ailli baiga burrito emododo jaide. Jusiñamui facaina lloraima micori jaie llua isoi jaide. Jaie llote: 15 “Jerusalén imaci, jacinaiñeno. O Illaima burrito emododo biite”. 16 Naie facaise bie rafuemo comeciaina facañedicaí; iadedi Jesús jillua mei, bie rafuena comeciticaí. 17-18 Lázarona Jesús jillotaja jira, ailluena comini Jesús dine jaidimaci. 19 Iena ciuano, fariseuai coniniri ñaitimaci:

—Jaca buena birui finoñedicaí. Ailluena comini Jesús díbeimo jai jaidimaci.

Judíuaiñedino Jesúsna cioiacana rafue

20 Judíuaiñedino Jusiñamuina sedallena, pascua railla rafuemo jiai bitimaci. 21 Naie facaise cai dine bitimaci. Felipedí Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadicaí.

22 Felipe iena Andrémo llote. Ie mei Jesúsno lluidiaimaiaí. 23 Jesús uai ote:

—Monamona biticue; ia jai cue fiodaille facaise ride. Comini cue uaidi siñonana uñua facaise jai ride. 24 Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodaiñenia, jaca bu jillobiñeite. Cue fiodaillemona ailluena comini jillobitimaci. 25 Ie abimo ite rafuemo comeciina dama bu facaia, ja muidomo faifite; ia cuemo ite rafuemo comeciina bu facaia, monamo jaca iite. 26 Cuen bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodí naimiena caimare itataite. 27 Cue comeci jai rucacuerite; iadedi, ¿niese raiticue? Raiñeiticue: “Moo, cue fiodaillemona cuena jillote”. Fiodaillena biticue. Ie jira raiticue: 28 “Moo, cominina o uai siñonana uñota”.

Ieconí monamona Jusiñamui llote:

—Jai iena finodicue. Dane iena fnoiticue.

29 Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaienicí lloté.

³⁰ Jesús uai ote:

—Cue facaina naie lluana cacaiñedomoi; iadedi omoi facaina iena cacadomoi. ³¹ Cuená uifioñedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafefitaite. ³² Cruzmo cue fiodaia, naimacina jilloitallena, ailluena cominina cue díbeimo itataiticue. ³³ —Naimie fiodaillana naimaci uifioñellena, iese lloté.

³⁴ Naie comini uai otimaci:

—Jusiñamui facaina lloraini micoriai jaie cuega: “Cai Jilloitaraima jaca fiodaiñeite”. ¿Níese raitio: “Jusiñamuimona biticue; ia fiodaiticue”?

³⁵ Jesús dane uai ote:

—Cue llofuaa dígori omoi comeciaina nia lligaiñoticue. Cue lluomo cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uifioñede. Ie isoide. Jeacino anamo itinodi jitiredinomo itimaci isoidimaci. Uanaicinona uifioñedimaci. ³⁶ Jeacino anamona omoi jilloillena, cue llofuaa uaido omoi comeciaina birui lligaiñoticue. Cue uaina ñno, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina ñnoñena rafue

³⁷ Jesús diga siño rafuena finode; iadedi ailluena comini: “Naimiedi cai Jilloitaraima” raillana nia ñnosíñede. ³⁸ Iemona Isaías micori jaie cuegafuiai suide. Naimie jaie cuega: Jusiñamui, cai lluaicinona cacadimaci.

O siño uaido o finoca rafuena jiai ciodimaci; iadedi ñnoñedimaci.

³⁹⁻⁴⁰ Isaías micori dane cuega:

Naimaci cioi raillano, Jusiñamui naimacina uisínidino isoi itatate. Naimaci comeciainamona abina uifioi raillano, naimaci comeciaina feitate. Naimiena ñnoi raillano, iese naimacina jai itatate. Ie jira jai ñnonidimaci. ⁴¹ Jusiñamui ie ebirede rafuena naimie ciuamona, Isaías micori iena lloté. Isaías micori Jesúsna lloté. ⁴² Isaías micori iese lloté; iadedi ailluena judíuiai illaicomini Jesús uaina ñnotimaci. Fariseuaina jaciruillanona, iena janotimaci. Naimaci ofracomona naimacina jino dotajana jaciruitimaci. ⁴³ Comini naimacina iobitajana naimaci eo jitailla jira, dotajana jitaiñedimaci. Jusiñamuimo ite iobillacinona raise oiacaíñedimaci.

Jesús ie Moona ñaia rafue

⁴⁴ Naie facaise Jesús eo ado lloté:

—Cuená ñnotimie cuena oretatimiena jiai jai ñnote. ⁴⁵ Cuená ciodimie cuena oretatimiena jiai ciode isoide. ⁴⁶ Comini comeciaina lligaiñollena biticue. Ie muidona naga cuena ñnotimie jitiredinomo jai íñede. Jeacino anamo jai íñede. ⁴⁷ Cue uaina cacajano ñnoñedimie mo juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; ⁴⁸ ia cuena bu ñnoñenia, cue uaina naimie ñnoñenia, ja muidona faífite. Cue uaina naimie ñnoñellemona, nana naimiena ñnoñedino janafefilliruimo Jusiñamui naimiena íco duere finoite. Cuená jitaiñedimie, cue uaina jitaiñedimie comini janafefilliruimo janafefite. ⁴⁹ Dama cue comeci facaja uaido lloñedicue. Cue Moo cuena oretaja muidona, cue Moo cuemo lloga uaido

lloticue. ⁵⁰ Cue Moo lloga uaidi naimie dibeimo cominina jaca itatate. Iena uifnoticue. Ie jira cue Moo cuemo lloga uaina jaca lloticue.

13

Jesúdi ie llofueoicaigano eilliaina jocua rafue

¹ Pascua railla rafue riacana areruido ia, Jesús ie Moo dine abido jaiacanana uifnote. Naimaci diga naimie nia ia, ie cominina jaca eo isiruite. ² Jesúna gaitatallena, naie facaise Taifedi Judas Iscariote micori comecina feidote. Judas micori Simón jito. ³ Jesúdi ie uai ie Moomona feifnuana uifnote. Ie Moo dinena billana uifnote. Ie Moo dine abido jaillena jiai uifnote. ⁴ Nairuido Jesús cai diga guite. Guilla meinocni, Jesús a naidacaida ie abimo ite iniroina duiñode. Abi dora diga ie moillina ferinote. ⁵ Janorede nogomo jinuina totaja mei, cai eilliaina jocode. Safenaillena, ie dora diga dote. ⁶ Simón Pedro dine naimie ria, Pedro jicanote:

—Nama, ¿cue eillina jiai jocoitio?

⁷ Jesús uai ote:

—Cue finoca rafuena birui uifnoñedio; iadedi jiairuido uifnoitio.

⁸ Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñeitio.

⁹ Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi diga, jiai joco.

¹⁰ Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

¹¹ Naimiena gaitataiacadimiena naimie uifnuua jira, iese llote.

¹² Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. ¹³ Cuen a “Cai Nama” raicabitomoi. “Cai llofueraima” cuena jiai raicabitomoi.

Iese cuena omoi raia, mare. Ie isoi iticue. ¹⁴ Omoi Namadicue. Omoi llofueraimadicue; iadedi omoi mullaima isoi iticuedena, omoi eilliaina jai jocodicue. Omoi jamai bue isoidinomona, omoi eilliaina danirie jocua.

¹⁵ Cuemona fueo. Abi iedoñeno cue isoi omoi jai. Cue afemo iñedomoi.

¹⁶ Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaina jocodicue. “Jiaimie afemo iticai” raillanomo comecina omoi facañeno.

¹⁷ Bicino omoi uifnuamona, iese omoi finoa, caimare iitomoi. ¹⁸ Nana omoina iese ñaiñedicue. Nana cue fetocanona uifnoticue. David micori jai e llote: “Cue diga gutinomona damie cuena enoidimie ite”.

¹⁹ Bie nia suiñenia, iena jai lloticue. Iena cuemo suilla mei, David micori llogacino raise inoitomoi. ²⁰ Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

Jesúdi ie gaitataitimiena lua rafue

(Mt 26.20-25; Mr 14.17-21; Lc 22.21-23)

21 Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

22 Caïmona ¿nimie naimiena gaitataite? raillanona, comecina facajano, coninimo eroridicai. 23 Cuen a Jesús eo gaia jira, Jesús abimo iticue.

24 Cuen auiduanona, Pedro cuemo llote:

—“¿Bu ona gaitataite?” Jesús mo jicano.

25 Ie jira Jesús mo jicanoticue:

—Nama, ¿bu ona gaitataite?

26 Jesús uai ote:

—Bie llomenicon a mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito.

27 Llomenicon a guilla meinocni, Taife anamo Judas micori illamona, Taife naimie comecina feidote. Jesús naimiemo llote:

—O finoacaga rana raire fino.

28 Jesús Judas micorimo llua na raise uiñoñedicai. 29 Judas micori ucubena sedaja jira, jiaïno comecina facade: “ ‘Cai jitaïlle guille ïbarisai’ Jesús naimiemo llote”. Iese lloñenia, “ ‘Janore ucube dueredinomo feca’ nïbai naimiemo llote”. 30 Guilla mei, Judas micori jino jaide. Naie facaise jai jitreñicaide.

Jesús ie fiodaïllena ñaïa rafue

31 Judas micori jaïlla mei, Jesús llote:

—Jusiñamuimona billanona, iimana jaidicue; ia cue fiodaïlle facaise jai ride. Cue fiodaïllemona cominidi Jusiñamui uai siñonana uiñoitimaci.

32 Iemona Jusiñamui uai siñonana comini uiñoïa, Jusiñamuidi cominina cue siño Jitona jiaï uiñoitaite. Iese ja finoite. 33 Cue comini, dallu omoi diga bene iticue. Jaiticue. Cue diga iacanitomoi. Judïuai illaïcominimo navui cue llua isoi, omoïmo ja lloiticue. Cue jaïllinomo nia jaiñeitomoi.

34 Ie jira jiaïe rafuena omoïmo ja lloiticue. Omoïna cue isiruïlla isoi, coninina omoi isiruï. 35 Coninina omoi isiruïllamona, jiaïe cominidi cue cominidomoina uiñoitimaci.

Pedro Jesús diga ñaïa rafue

(Mt 26.31-35; Mr 14.27-31; Lc 22.31-34)

36 Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaïllinomo cue diga ja jaiñeitio. Jiaïruido jaitio.

37 Pedro uai ote:

—Nama, ¿bue ñellena ja jaiñeticue? O jitaïa, o facaina ja fiodaiticue.

38 Jesús dinena uai ote:

—Cue facaina fiodaïcadïo. Uanai omo lloticue. Nia monaiñenia, ïtava nia ñaiñenia, dacaïño amani cuena janoitïosa.

14

Jesús ie Moo dinomo rille rafue

1 Jesús ie llofueoïcaiganodicaïna nia llofueete:

—Rucaïcueriñeno uri i. Jusiñamuïna ïnocana jai. Cuen a jiaï ïnocana jai. 2 Cue Moo illanomo diga comini illanuai ite. Iese iñedena, omoïmo jai lloticue. Omoi illinuaina raise finollena, nainomo jaiticue. 3 Fuiduanona, dane abido biiticue. Omoïna cue dine uïllena, cue dine omoi illena,

biitícue. ⁴ Cue jaillinona birui uiñotomoi. Nainomo omoi rillena jiaí uiñotomoi.

⁵ Tomás uai ote:

—Nama, o jaillinona uiñoñedícaí. ¿Niése nainomo riitícaí?

⁶ Jesús uai ote:

—Omoi naiso isoidícue. Uanaicinona llotícue. Cue Moo díbeimo comínina jaca itataticue. Cue Moo díne joide naiso isoidícue. Jaca dasode cue Moomo duide naídi. Cue Moo díne o ría, cuena ñno. ⁷ Cuena uiñotomoina, cue Moona jiaí uiñotomoi. Biruidemona naimiëna uiñotomoi. Naimiëna jai ciodomoi.

⁸ Felipe uai ote:

—Nama, o Moona caimo acata. Iemo jai macaibaite.

⁹ Jesús uai ote:

—Felipe, are omoi díga itícue; iadedí cuena nia uiñoñedomoi. Cuena ciodimie cue Moona jiaí jai ciodo isoide. ¿Niése llotío: “O Moona caimo acata”? Cue Moona jai ciodio isoidio. ¹⁰ Cue Moo díga daajedicoco. Iena nia ñnoñedio. Cue lluaí cue Moo uai. Cue lluaí cue comeci uaíñede. Cue motodo naimie maijide. ¹¹ Cue Moo díga daajedicocona ñno. Cue uaina omoi ñnoñenia, siño rafuena cue finua jira, cuena ñno.

Jesús ie Moo Joreña llua rafue

¹² Jesús nia llofute:

—Uanaí llotícue. Cuena omoi ñnoia, cue finoca rafuena jiaí finoitomoi. Cue Moo díne cue jailla jira, cue Moo Joreña omoi díne cue oretaja mei, cue finua baífemo finoitomoi. ¹³ Cue Moo uai siñonana omoi uiñollena, buena cue díbeido cue Moomo omoi jícaia, nana iena finoitícue. ¹⁴ Cue díbeido omoi jícaia, iena finoitícue. ¹⁵ Cuena omoi isirua, cue llogacinuaina ñnoitomoi. ¹⁶ Ie Joreño omoímo fecallena cue Moomo jíitícue. Naie Joreñodí omoína canoite. Omoi díga jaca iite. ¹⁷ Uanaicinona llocabite. Naimiëna naimací uiñoñena jira, cuena ñnoñedíno naimiëna feñonidimací; iadedí naimie omoi díga illa jira, naimiëna uiñotomoi. Omoi díga jaca iite. ¹⁸ Omoína fainonocaiñeitícue; ia dane biitícue. ¹⁹ Nano nigarui illanona, cuena ñnoñedíno cuena nia cioitimací. Ie mei cuena cioiñeitimací; iadedí fiodaillamona cue jillua mei, cuena nia cioitomoi. Cue jaca illa jira, jiaí jaca iitomoi. ²⁰ Fiodaillamona cue jillua mei, cue Moomo cue duillana raise uiñoitomoi. Cuemo omoi duillana jiaí raise uiñoitomoi. Omoímo cue duillana jiaí raise uiñoitomoi. ²¹ Cue llogacinuaina omoi isirua, cuena isiruitomoi. Ie jira cue Moodí omoína jiaí isiruite. Omoína jiaí isiruitícue. Omoína cuena uiñotaitícue.

²² Iscariotena mamecireñede Judas naimiëmo jícanote:

—Nama, ¿bue ñellena daní caína ona uiñotaitío; iadedí jiaie comínina ona uiñotañeitío?

²³ Jesús uai ote:

—Cuena isiruitinona cue rafuena uiñotadícue. Bu cuena isirua, cue llogacinuaina ñnoite. Cue Moo naimiëna isiruite. Iemona naimiëna nabaitícoco. ²⁴ Bu cuena isiruiñenia, cue llogacinuaina ñnoñede. Cue llogacinodí cuejeñede. Cue Moo ie. Naimie cuena oretate. ²⁵ Omoi díga nia cue illamona, bie llogacinuai omoímo jai llotícue. ²⁶ Cue Moodí omoína canollena, naga rafuena omoína llofuellena, cue facaina ie Joreña omoímo oretate. Omoína nana omoímo llogacinuaina comecitaite. ²⁷ Cue Moo díne jaitícue; iadedí omoi comeciaina uri

itataitcúe. Cuena ñnoñedino omoí comeciaina iese itatanidimaci. Jarire iñeno. Jaciruiñeno. ²⁸ Aillií cue llwana cacadomoi: “Cue Moo ñine jaiticúe; iadedí dane biitícúe”. Cue Moo ñine cue jailla jira, cuena omoí isiruia, cueri iobitomoi. Cue Moo cue afemo ite. ²⁹ Bie rafue cuemo ñia suiñena, uicodo omoímo iena jai llotícúe. Naie suia, cuena fainonocaiñeno omoí jaillena jitaidícúe. ³⁰ Omoí diga are ñia ñiañeiticúe. Cuena ñnoñedino anamo itimie cuena jai duere finoacade. Taifena ñaitícúe. Naimie anamo iñedícúe; ³¹ iadedí cue Moona cue isiruillana cuena ñnoñedino uiñollena, cue Moo cuemo llua isoi, finoiticúe. Mai cai jailli.

15

Uvas railla riará ie rafue

¹ Jesús ñia llofúete:

—Cue ñibeimo mareña omoí illena omoí raise uiñollena, jiaie rafuedo iena llofueitícúe. Uvas railla ua riaradícúe. Cue Moodí uvas railla riará sedaraima. ² Cue amena igailaidomoi. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide. ³ Cue llogacínuaído jaillamona, jai jaigaica isoidomoi. Iemona omoí comeciái jai jeanide. ⁴ Cuena nabai. Ona jiaí nabaitícúe. Naie amenamo jai ñuiñena jira, daje ñibegaise jaitaca igaidí jai llisiñede. Ie isoide. Cuena omoí nabaicabiñena, llisiñede igai isoidomoi. Ie jira cuena nabai. ⁵ Uvas railla riaradícúe. Cue amena igailaidomoi. Cuemo omoí ñuiadedí, omoímo cue ñuiadedí, eo lliside isoidomoi; iadedí cuemo omoí ñuiñena, jaca llisiñede isoidomoi. Cuemo omoí ñuiñena, cue jitailla isoi mare rafuena jaca finoñeítomoi. ⁶ Jai ñuide igailaí safenailla mei, marañena jira, jobaillena, ñanomo ofitaticái. Cuemo ñuiñedimie jai ñuide igai isoide. Jusíñamuimona ñuere sefuite. ⁷ Cuena omoí nabaia, cue uaina omoí feitañena, omoí jitaillé rana jica. Ie mei feiñoítomoi. ⁸ Eo lliside omoí isoia, cue Moo iobide. Iese omoí ia, ua cue cominidomoi. —Iese Jesús llofúete; ia ñaimie ñibeimo ñaimaci raise illena ñaite. Mare rafuena ñaimaci finocana jaillena ñaite.

⁹ Ñia llofúete:

—Cuena cue Moo isiruilla isoi, omoína isiruitícúe. Cuena nabaicabi. ¹⁰ Cue Moo llogacínuaína cue ñnuamona, ñaimie isiruillacino anamo itícúe. Cue Moo llogacínuaína omoí ñnuamona, cue isiruillacino anamo itomoi. ¹¹ Cue isoi omoí comeciái eo caimarellena, bicínuaí omoímo llotícúe.

¹² Ñane bie rafuena llotícúe. Omoína cue isiruilla isoi, coninina omoí isirui. ¹³ Ñaimaci o isiruillamona, o nabaiñiaí facaina o fiodaia, ñaimacina eo ua isiruitio. ¹⁴ Cue llogacínuaína omoí ñnoia, cuena nabaidomoi. ¹⁵ Omoína “Cue mullaiaídomoi” jaca rañedícúe; iadedí omoína “Cue nabaiñiaídomoi” birui raitícúe. Mullaiaí imaci patrón finoca rafuena uiñoñedimaci. Ie jira nana cue Moomona cue cacaja rafuena omoímo jai llotícúe. Ie jira nana cue rafuena jai uiñotomoi. ¹⁶ Cuena fetofñedomoi; iadedí omoína fetodicúe. Omoí lliside isoicabillana omoímo jai llotícúe. Ie mei buena cue mamecido cue Moomo omoí jicaia, omoímo fecaite. ¹⁷ Coninina omoí isiruillena jai llotícúe.

Comini Jesúna enoilla rafue

¹⁸ Jesús ñia llofúete:

—Cuena ñnoñedino omoína enoia, nano cuena jai enoidimaci. Iena uiñotomoi. Omoína ñia enoiñena, cuena jai enoidimaci.

¹⁹ Naimacimo jainaiaidomoina, omoina isiruitimaci; iadedi naimacimo omoi jainaiainena jira, omoina cue fetua jira, omoina enoidimaci. ²⁰ Omoimo jai lloticue. Illaina duere sefuia, naimie anamo itino jiai duere sefuidimaci. Ie isoide. Cuen comini duere finua isoi, omoina jiai duere finoitimaci. Cue llofuiacinona naimaci inua isoi, omoi llofuiacino jiai inoitimaci. ²¹ Cuen oretatimienena naimaci uiñoñena jira, cue muidona iese finoitimaci. ²² Naimacimo ite jeacinona naimacimo lloñedicuena, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. ²³ Cuen enoidimiedi cue Moona jiai enoide. ²⁴ Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacinona uiñoñedimaci. Cue siño finoca rafuena jai ciodimaci. Ie jira cuena enoidimaci. Cue Moona jiai enoidimaci. ²⁵ Naimacina David micori jai llo: “Naimacimo buena finoñedicue; ia cuena enoidimaci”. Naie ciegafuiai jai suide. ²⁶ Cue Moo ie Joreño omoimo oretaita. Ie Joreño omoina canoite. Omoina uanaicinona uiñotaite. ²⁷ Cue nano lluaruimona cue diga omoi illa jira, cue facaisena jiai raise lloitomoi.

16

Judíuai illaicomini Jesús llofueoicaiganona duere finua rafue

¹ Jesús nia llofuete:

—Danomo abido omoi jaiñellena, cue uaina omoi fañonocaiñellena, bicinuai omoimo ja lloticue. ² Omoi ofiracomona illaicomini omoina dotaitimaci. Jaiiruido omoina meiniamona: “Jai Jusiñamuina marena sedadicaí”, comeciaina facaitimaci. ³ Cuen naimaci inoñena jira, cue Moona jiai naimaci inoñena jira, iena finoitimaci. ⁴ Bie rafue omoimo suia, naie facaise cue llua omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

Jesús Jusiñamui Joreño llua rafue

⁵ Jesús nia llofuete:

—Cuen oretatimie dine ja jaiticue; iadedi omoimona buna: “¿Nine jaitio?” cuemo jaca nia jicanoñede. ⁶ Omoimo bie rafue cue llua jira, omoi comeciai eo sure ite. Ie jira cue jaillonona jicanoñedomoi. ⁷ Uanaí lloticue. Cue jaia, mare. Cue jaiñenia, omoina canoraíma omoi dine biñeite. Cue jaia, omoi dine naimienena oretaiticue. Jusiñamui Joreñodi omoi canoraíma. ⁸ Naimie bia, cuena inoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiai uiñotaite. ⁹ Cuen naimaci inoñenia, naimacina naimacimo jeacino nia illana uiñotaite. ¹⁰ Cue Moo dine abido cue jaillonona, cuena cioñeitimaci; ia iemona Jusiñamui Joreño cue uaina siñonana uiñotaite. ¹¹ Fiodaillemona jilloiticue. Iemona cuena inoñedino anamo itimiedi cue Moo janafillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafillemona jilluana uiñotaite. ¹² Diga rafue omoimo nia lloiacadicue; iadedi jai rairafaidomoi. ¹³ Jusiñamui Joreño bia, omoimo nana uanaicinuaina

llofueite. Dama ie facaina llofueñeite; iadedi ie cacajacinodo llofueite. Jiairuido suille rafuena llofueite. ¹⁴ Omoina cue rafuena uiñotaite. Ie jira cuena iobitaite. Nana cue Moomo ite uaidi cueje. ¹⁵ Ie jira bie rafuena lloticue. Jusiñamui Joreño omoina cue rafuena raise uiñotaite.

Sunaillamona caimare illa rafue

¹⁶ Jesús nia llofueite:

—Dallu illanona cuena cioñeitomoi. Ie mei dallu illanona, cuena dane cioitomoi.

¹⁷ Ie llofueoicaiganodicaimona damierie dani coninimo jicanodosite:

—¿Niese caimo llote: “Dallu illanona, cuena cioñeitomoi. Ie mei dallu illanona, cuena dane cioitomoi. Cue Moo dine jaiticue”? ¹⁸ ¿Buena caimo llote? Raise cacaiñedicai.

¹⁹ Cai jicanuana Jesús uiñuanona, naimie jicanote:

—¿Cue luana raise uiñoiacadomoi? ²⁰ Cuemo suille rafue suia, eo eeditomoi; iadedi cuena iñoñedino eo iobitimaci. Sunaitomoi; iadedi jiairuido caimare iitomoi. ²¹ Jiaie uaido iena lloticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide. ²² Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itatañeite. ²³ Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecajte. ²⁴ Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

Jiairuido Jesús marefodo llua rafue

²⁵ Jesús nia llofueite:

—Jiaie uaido bicinona omoimo jai lloticue. Jiairuido iese lloñeiticue. Omoina cue Moona marefodo lloticue. ²⁶ Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi. ²⁷ Omoina naimie isiruillamona, omoimo fecajite. Cuena omoi isiruilla jira, cue Moomona cue billana omoi inua jira, cue Moo omoina isiruite. ²⁸ Cue Moomona eniruemo biticue. Naimie dine abido jaiticue.

²⁹ Lloticai:

—Jai marefodo caimo llotio. O uaina meidocana jai uiñedio. ³⁰ Nana rafuena o uiñuana uiñoticaí. Cai comeciaino iticinona o uiñuamona, caina raise uiñotio. Iemona Jusiñamuimona o billana jai inoticaí.

³¹ Jesús uai ote:

—Cuena jai inotomoi. ³² Jiairuido, ua birui, oni tuuitomoi. Nagamiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga iite. ³³ Cuena omoi inuano, omoi uri illena, omoimo bie lloticue. Eniruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faiticue.

17

Jesús ie Moo diga ñaia rafue

¹ Jesús bicinona llua mei, monamo eruaillano, jüide:

—Moo, cue fiodaiacanarui jai ride. Cue uai siñonana uiñota. Iemei o uai siñonana jiai uiñotaiticue. ² Nana comini afemo cuena jai itatatio. Imanua cue jaillamona, nana comini afemo cuena jai itatatio. Comini comeciaino

iuaina o meidotajamona, cue fiodaillamona, ailluena comini o diga jaca iitimaci. ³ Ona nanoca Jusiñamuina uiñoitimaci. Jai cuena o oretajana jiai uiñoitimaci. ⁴ Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. ⁵ Ore Moo, enirue nia iñena facaiseconi o diga iticue. Illaïma isoi o ecimo dane ebire iacadicue. Dane cuemo ine, daje isoi coco illesa. ⁶ Comini comeciai iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena ñnocana jaidimaci. ⁷ Nana cuemo ite rafue omona feiñoticue. Iena jai uiñoitimaci. ⁸ Nana cuemo o llogacinuaina naimacimo jai lloticue. Jai ñnotimaci. Omona cue billana jiai jai ñnotimaci. Cuena o oretajana jiai ñnotimaci. ⁹ Naimaci facaina birui jiidicue. Naimacina cuena ñnotadio. Ie jira omo jai duidimaci. Ona ñnoñedinom facaina birui jiiñedicue. ¹⁰ Nana o dibeïmo itinodi cueje. Nana cue dibeïmo itinodi oie. Nana naimaciri iobidicue. ¹¹ Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci finoï raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. ¹² Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraita. Jusiñamui lloiraïma micori cuegafuiai suillena, naimie ua faifite. ¹³ O dine ja jaiticue. Cue isoi naimaci comeciai eo caïmare illena, naimacimo ailluena rafuena jai lloticue. ¹⁴ O llogacinuaina jai lloticue. Ona ñnoñedinomo naimaci jainaiaïñena jira, ona ñnoñedinom naimacina enoidimaci. Ona ñnoñedinomo jiai jainaiaïñedicue. ¹⁵ Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue. ¹⁶ Ona ñnoñedinomo jainaiaïñedimaci. Ona ñnoñedinomo jiai jainaiaïñedicue. ¹⁷ O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciainom raise itata. ¹⁸ Bene cuena o oretaja isoi, ona ñnoñedinom dine naimacina oretaticue. ¹⁹ Uanaicinona naimaci uiñuamona, naimaci comeciai marebicaillena, cuena ñnotino facaina fiodaïacadicue. ²⁰ Bimacina birui dane jiiñedicue; iadedi bimaci cue rafuena ico lloia, jiaie comini cuena ñnoitimaci. Cuena ico ñnoitino facaina birui jiai jiidicue. ²¹ Daajedicoco. Coco illa isoi, naimaci comeciaina daje isoi lloillena, nana naimaci facaina jiidicue. Daje isoi comeciai lloillamona, cuena nia ñnoñedinodi ñnoitimaci. Iemona cuena o oretajana ñnoitimaci. ²² Cuemo o iga uaidi ebirede. Naimaci comeciai lloillena, naimacimo o uai jai cue iga. ²³ Naimaciri dajedicai. O diga daajedicoco. Naimaci comeciai daje isoi lloillana jitaïdicue. Iemona cuena ñnoñedinom bene cuena o oretajana uiñoitimaci. Cuena o isiruilla isoi, naimacina o isiruillana jiai uiñoitimaci. ²⁴ Ore Moo, naimaci cue dine illena jitaïdicue. Enirue nia iñenia, illaïma isoi o ecimo ebire jai iticue. Dane ie isoi ebire birui cue ia, naimaci cuena ciuana jitaïdicue. ²⁵ Ore Moo, mareuidimedio. Jiaie comini ona uiñoñedimaci; iadedi ona uiñoticue. Cue llofueoicaiganodi o cuena oretajana jai uiñoitimaci. ²⁶ Naimacimo ona jai lloticue. O cuena isiruilla isoi coninina naimaci isiruillena, naimacimo nia lloiticue —jiiide.

*Jesúna gaitalle rafue**(Mt 26.47-58; Mr 14.43-54; Lc 22.47-54)*

¹ Jíia mei, Jesús ie llofueoicaiganodicaí diga, Cedrón railla iconi ene-febeimo ruica aceituna railla riaraiái illanomo naiona jaide. ² Jesús cai diga nainomo jaisoilla jira, Judas micori naie illanona jiaí uiñote. Jesúna gaitatallena nainomo Judas jaide. ³ Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiaí oredimaci. Soldaduidi lamparínaiiri bitimaci. Reinaíairi jiaí bitimaci. Sidaniáiri jiaí bitimaci. Judas naimacina ifode. ⁴ Jesúsdi nana naimiemo suille rafue uiñuanona, naimaci dine billano, jicanote:

—¿Buna jenodomoí?

⁵⁻⁶ Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinaillamona, abido ñajillamona, eniruemo uaidimaci. Jesúna gaitatallena, Judas micori naimaci diga ite.

⁷ Jesús dane jicanote:

—¿Buna jenodomoí?

Uai otimaci:

—Nazaret ie Jesús.

⁸ Jesús uai ote:

—Omoímo jai lloticue: “Imiedicue”. Cuena omoí jenoia, cue diga itino oni jaillena rairuiño.

⁹ Naimie ie Moomo como lloga uai suillena, iese lote. Iese ie Moomo como lote: “Cuena o ñnotaganomona jaca buna faifiñedicue”. ¹⁰ Ie daacaiño Simón Pedrodí ie lloebi llinocaida, Jusiñamui diga nanoca ñairaima mullaíma jefona jaíbonote. Naie mullaíma mamecidi Malco. ¹¹ Iena cianona, Jesús Pedromo lote:

—O lloebina eeno. Cue Moo jitailla isoi, fiódaiticue.

¹² Ie mei soldaduai, imaci capitán diga, judíuai imaci policías diga, Jesúna gaitajano, naimiena maítimaci. ¹³ Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. ¹⁴ Navui Caifás judíuai illaicomínimo llotite: “Damie nana cai comíni facaina fiódaitena, mare”.

*Pedro Jesúsna nano janua rafue**(Mt 26.69, 70; Mr 14.66-68; Lc 22.55-57)*

¹⁵ Simón Pedro Jesús jinafo racade. Jiaí racadicue. Cuena Jusiñamui diga nanoca ñairaima uiñua jira, ie nairairimo Jesús diga jaidicue; ¹⁶ iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiño jicanoticue. ¹⁷ Naiñaiño Pedromo llotite:

—Jesús llofueoicaigano imiedio.

Pedro uai ote:

—Ieñedicue.

¹⁸ Rosirena jira, naie jofo mullaíai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiaí ite.

*Jesús Anás dine illa rafue**(Mt 26.59-66; Mr 14.55-64; Lc 22.66-71)*

19 Ie facaise Anás Jesúmo ie llofueoicaiganodicaina jicanote. Ie llofuiaicinuaina jiai jicanote. 20 Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue. 21 ¿Bue ñellena birui cuemo jicanotio? Cuenacacadinomo iena jicano. Cue llofuiana uiñotimaci.

22 Iese Jesús llua jira, daje policia naimie uiecona butade. Jesúmo jicanote:

—¿Bue ñellena iese uai otio?

23 Jesús dinena naie uai ote:

—Naimie uai jeare oticuenacueno, cuemo llono. Jeare oñedicuemo, ¿bue ñellena cuena butadio?

24 Jesús uai oñede. Iemei Anásdi Caifás jofomo Jesús maianona orede.

Pedro Jesúsna dane janua rafue

(Mt 26.71-75; Mr 14.69-72; Lc 22.58-62)

25 Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

26 Naie facaise daje mullaima Pedromo llote:

—Aceitunas railla riaraiailanonomo ona cidicue —llote. Jusúna soldaduai gaitaja facaiseconi Pedro naie mullaima ie come jefona ailli jaibonote, soldaduai Jesúsna gaitaja ie daacaiño. 27 Pedro dane janote. Ieconititava ñaite.

Jesús Pilato dine illa rafue

(Mt 27.1-2, 11-14; Mr 15.1-5; Lc 23.1-5)

28 Ie mei Caifás jofomona gobernador jofomo Jesúsna jitaramo uitimaci. Naie facaise gobernadori Pilato. Naimiedi judíuainedimie. Naimaci einamaci rairuilla jira, judíuainedimie jofomo naie facaise fo jainedimaci. Fo jaiadedi, pascua railla rafue guilledi guiñega. 29 Ie jira Pilato jino bite. Naimacimo jicanote:

—¿Nie isoide rafue muidona llogidotomoi?

30 Uai otimaci:

—Bimie marañede rafue finoñedena, o dine naimiena atiñedicaí.

31 Pilato llote:

—Naimiena uiño. Omoi einamaci llogacinuaido naimiena duere fino.

Uai otimaci:

—Come meinellena caimona rairuidomoi. Naimie coraiana jitaídicaí —lloitimaci. 32 Navui Jesúsdi: “Cuenacruzmo coraitimaci” llote. Naie llucino jai suisaide.

33 Pilato fo abido jaillano, Jesúsna uaiduano, naimiemo llote:

—Judíuai illaima raillamiedio.

34 Jesús dinena jicanote:

—¿O comecina dama iese facajano llotio? Iese comecina o facañenia, jaimie omo lloga.

35 Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiai fecadimaci. ¿Nie isoide marañede rafuena finodio?

³⁶ Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicuedena, cue comini cue facaina fuiridimaci.

³⁷ Pilato uai ote:

—Ie jira odi illaimadio.

Jesús uai ote:

—Jaca railla. Uanaicino lllollena, jeicigacue. Nana uanaicinona jitaídino cue lluana cacadimaci.

³⁸ Pilatodi Jesús uaina uaitajamona, raite:

—¿Ñie uai naidi uaina?

Ie mei dane jino billano, cominimo llote:

—Jaca nicino naimiemo iñede.

Jesúna coraiacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jitaia, omoi illaima raillamiena marena oretaiticue.

⁴⁰ Comini dinena cuiriidimaci:

—Dama ite. Bimienna jitaiñedicaí. Barrabásna cárcelmona marena jino oreta. —Iese cuiriidimaci. Barrabásdi fuiriraíma.

19

¹ Ie mei Pilato Jesúna oni uillanona, naimienna sechedotade.

² Jifanodosillena, soldaduai eecuaímona finoca nuiciraina naimie ifogimo jitadimaci. Jiduirede iniroina jitatajano raitimaci:

³ —Judíuai illaimadio. —Iemei ie uiecona bucoidimaci.

⁴ Pilato dane jino billano, raite:

—Naimie omoi dine jino ja biite. Naimiemo nicinodi iñede —raite.

⁵ Ie facaise Jesús jino bite. Eecuaímona finoca nuiciraina jitaca. Jiduirede iniroina jitaca. Pilato naimacimo llote:

—Jadi, naimie.

⁶ Jusiñamui diga nanoca ñairainidi, jiaie illaicomini diga, naimienna cuano, cuiriidimaci:

—Naimienna corai.

Pilato llote:

—Naimiemo nicinodi iñede; ia oni uillanona, naimienna omoi corai.

⁷ Uai otimaci:

—Moisés micori jaie cuela: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Cai mona naimiedi maraiñede rafue jai finode.

⁸ “Naimiedi Jusiñamui Jito” comini raillana Pilato cacajano, eo jacinaite.

⁹ Jesúna dane fo uite. Jesúdi Jusiñamui Jitona naimie raise uiñollena, Jesúmo jicanote:

—¿Ñinena bitio?

Jesús uai oñede. ¹⁰ Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraitallena.

¹¹ Jesús uai ote:

—O anamo Jusiñamui cuena itataja jira, o uai ite, cuemo llolena. Ie jira omo cuena fecadino o baifemo jeacino finodimaci.

¹² Ie facaimona Pilato Jesús marena jino oretaiacade; iadedi judíuai illaicomini dinena cuiriisite:

—Bimie o jino marena oretaia, cai nanoca illaíma ie nabaiñedio. “Illaímadicue” Jesús llumona, cai nanoca illaíma díbeimo naimiedi iñede. Cai nanoca illaímadí César.

¹³ Comini llumana cacajano, Pilato Jesúsna jino atide. Ie cominimo lloranomo raide. Naie illano nofinina mameciredede. Judíuai uaido Gabatana mameciredede. ¹⁴ Pascua rafue guilla finoraruimo jitoma naidai illanona, Pilato dinena llote:

—Jadí, omoi illaíma.

¹⁵ Iemona cominidi cuiriisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaímana coraíticue?

Jusiñamui diga nanoca ñairaini uai otimaci:

—Cai illaímadí César. Jiaie illaímadí caimo iñede. Jaca dallaimade cai illaímadí.

¹⁶ Ie mei Pilato naimacimo naimiena fecade, coraillena.

Jesúna coraiacana rafue

(Mt 27.32-56; Mr 15.21-41; Lc 23.26-49)

Pilato llua jira, Jesúsna uitimaci coraillena. ¹⁷ Jesúsdi ie cruzna rocaicaida sonode. Ifocoraína eruaila mameciredede illanomo jaidimaci. Judíuai uaido naie illano Gólgotana mameciredede. ¹⁸ Nainomo naimiena coraidimaci. Naimie abimo menamie coraica. Damie Jesús nabeimo. Jiaimie jarifebeimo. ¹⁹ Cruzmo jonellena, Pilato rabricimo cuetatate: “Nazaret ie Jesús. Judíuai Illaíma”. ²⁰ Judíuai uaido cuega. Romanos comini uaido jiaí cuega. Griego uaido jiaí cuega. Jesús coraiano Jerusalén ianori illa jira, ailluena comini iena cioidimaci.

²¹ Iena ciuamona, naie rabricina meidollena, Jusiñamui diga nanoca ñairaini Pilatomo llotimaci:

—“Judíuai Illaíma” raillano jai cuetatatio. Iena meiduana jitaídicaí. Bimie dinena raisoide: “Judíuai Illaímadicue” raillanona, o cuetatajana jitaídicaí

²² Pilato uai ote:

—Jai cuetataticue. Jiaie rabricimo dane cuetatañeíticue.

²³ Jesúsna coraia mei, soldaduai naimie iniroi uanona, naga soldado digamie jonega iniroi. Nagaamaga soldaduai ite. Ie camisa fiebide. Naie daje jamai nigaroi. ²⁴ Ie jira daní coniniri ñaitimaci:

—Bie camisa cuaranoñeíticaí, daní cai fecallena. Mai. Conima jabomaiticaí, iena ollena. —Iese finuano Jusiñamuina lloraíma micori cuega-fuaí suide. Jiaie cuega: “Cue iniroi daní naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵ Cruz abimo Jesús ei, ie euíño diga ite. Cleofas aidi ite. Naiñaiño mameci María. María Magdalena jiaí ite. ²⁶ Jesús ie eina ciode. Cuena naiñaiño ecimo jiaí ciode. Cuena eo gaide. Ie jira ie eimo llote:

—Jadí, o jito isoi itimie anamo iitio.

²⁷ Cuemo llote:

—Jadí, o ei isoidiñaiño anamo iitio.

Naie dacaíño naiñaiñoña cue jofomo uillanona, naiñaiñoña sedadicue.

28 Ie mei Jesús nana rafue jai fuillana uiñuano, llote:

—Jiroacadícue. —Iese lluanona, Jusiñamuina llorai ma micori jaie ciegafuiai jai suide. 29 Nainomo llerojimo vino ite. Radosimo fibecode rana joniano, vinomo faite. Iemei Jesús mo fecade jaronollena. 30 Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jítadacaida, fiodaite.

Jesús sida diga ducia rafue

31 Pascua railla rafue guille finuarui illa jira, judíuai illaicomini Pilato dine jaidimaci. Raire fiodaillena, coraicano idaiaina uellulena naimiemo jicenuaidimaci. Sábado rafue ie nairui nia illanona, sáadorui jai raire taineacana jira, coraicano cruzmo sáadoruimo illana jitañedimaci. 32 Soldaduai jaillano, Jesús ecimo coraica iaimaiai idaiaina uellude. 33 Jesús dine billano, naimie jai fiodaillana ciodimaci. Ie jira naimie idaiaina uelluñedimaci; 34 iadedi daje soldado Jesús ciraigiconi sida diga ducide. Naifo diaide. Naifomona jinui jiai bite. 35 Nana iena ciodícue. Uanai llotícue. Omoi inollena, iena llotícue. 36 Soldaduai iese finuamona, jaie ciegafuiai jai suide. Jaie Jesúsna cuela: “Naimie illaicina tainoñeitimaci”. 37 Jiai jaie cuela: “Judíuai dinena naimaci ducitagamie mo ico eruaitimaci”.

Nofici ifomo Jesús raia rafue

(Mt 27.57-61; Mr 15.42-47; Lc 23.50-56)

38 Naie facaise Pilato dine José raillamie jaide. Cruzmona Jesús abi oni ollena, Pilato mo jicenuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicomini naimie jaciruillanona, Jesúsna bainino inote. 39 Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. 40 José, Nicodemo diga, Jesús abina useroina ferinotiaimaiai. Naimaci comini finouilla isoi, naie siorede radi iniroimo jonega. 41 Amenaiai iaie illanomo Jesúsdi coraica. Nainomo nofici ie raiafodi ite. Nia buna naifomo raiañenafo. 42 Naifo iaie illa jira, sáadorui jai riacana jira, jiaie raiafo jenollena abi juanina jira, nainomo naimiena jonetiamaiai. Nofici diga raiafo raise ibaila mei, jofomo jaidiaimaiai.

20

Fiodaillamona, Jesús jillua rafue

(Mt 28.1-10; Mr 16.1-8; Lc 24.1-12)

1 Domingo jítiramo nia monañenia, raiafomo María Magdalena jaide. Raiafo ibaila nofici oni joillana ciode. Jesús abina cioñede. 2 Ie jira aisicana Pedrona jenuaide. Cuenai jiai jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uiñoñedícue.

3 Ie mei raiafomo jaidicoco. 4 Aisicana jaidicoco; iadedi riire cue aisicana jailla jira, nano ridícue. 5 Ana bitadacaida, fo erodaticuemo, useroi joillana ciodícue; iadedi fo jaiñedícue. 6 Ie mei Simón Pedro rillano, fo jaide. Useroi joillana jiai ciode. 7 Ie ifogimo ferinoga iniroi eneno illana ciode. Raise nacuana ciode. 8 Iemei jiai fo jaidícue. Iniroina

ciuamona, Jesús jai jilluana ñnoticue. ⁹ Jai e cuegafuiaí llote: “Fiodaillamona jilloite”. Naie cuegafuiaína como raise ñnoticoco. ¹⁰ Ie mei jofomo jaidicoco.

María Magdalenamo Jesús bairia rafue

(Mr 16.9-11)

¹¹ Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo, ¹² Jusiñamuimona mena jaienici jai billana ciode. Userede ñiroi jitadiaimaiai. Jesúsna navui jonianomo ana raidiaimaiai. Damie ifogi dibeimo raide. Jiaimie eilli dibeimo raide. ¹³ Naiñaiño mo jicanotiaimaiai:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴ Naie facaise jinafo dine erocaillanona, Jesúsna ciode; iadedi naimiena uiñoñede. ¹⁵ Naiñaiño comequina facade; “Naimiedi bie illano sedaraima”. Jesús naiñaiño mo jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶ Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboní! —Naie uai oni dobaíñuamona: “Llofueraíma”.

¹⁷ Jesús uai ote:

—Cuena lliñoño cuena faicai. Cue Moo dine nia a jaiñedicue. Cue amatai dine mai jaillanona, cue rafuena lluai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

¹⁸ Ie jira María Magdalena Jesús llofueoicaiganodicaí mo luaibite:

—Cai Namana jai ciodicue. —Iemei caí mo naimie naiñaiño mo lluaana llote.

Jesús ie llofueoicaiganomo bairia rafue

(Mt 28.16-20; Mr 16.14-18; Lc 24.36-49)

¹⁹ Domingo naio Jesús llofueoicaiganodicaí jofomo ofidicaí. Judíuai illaicomínina cai jaciruillamona, nasiai nana cai ibaica. Nase econoño ieconi Jesús cai motomo billanona, caína uaiduano, llote:

—Uri omoi i.

²⁰ Ie onollina acatate. Ie ciraigina jiai acatate. Cai Namana jai cai ciuari eo iobidicaí. ²¹ Jesús dane llote:

—Uri omoi i. Cue Moo cuena oretaja isoi cue rafuena lollena, omoína oretaiticue.

²² Ie facaise caina firaiñuanona, raite:

—Jusiñamui Joreñoña omoi feiñuana jitaidicue. ²³ “O jeacínona jai dotade” bumo omoi lloia, Jusiñamui jai dotaca. “O jeacínona nia dotañede” bumo omoi lloia, Jusiñamui nia dotañega.

²⁴ Naie naio Tomásna mameciredede llofueoicaigamie cai diga iñede. Dídimona jiai mameciredede. Naimiedi gorasa. ²⁵ Naimiemo lloticaí:

—Cai Namana ailli ciodicai.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ññoñeiticue.

Jesús ie llofueoicaiganomo dane bairia rafue

²⁶ Ocho digarui illanona, Jesús llofueoicaiganodicai dane ofillano, Tomás cai diga ite. Nana nasiai ibaica; iadedi nase econoñeno ieconi Jesús cai motomo dane fo billano, uaiduano, llote:

—Uri omoi i.

²⁷ Iemei Tomásmo llote:

—Eroda cue onollimo. Naifo jeta. Ciraiği ifona jiai jeta. İnoñeno jaiñeno. Mai İno.

²⁸ Tomás uai ote:

—Cue Namadio. Cue Jusiñamuidio.

²⁹ Jesús dane uai ote:

—Cuena o cıua jira, cuena İnotio; iadedi cuena cioİnedino cuena İnoia, jiai caimare iitimaci.

³⁰ Jesús diga sıño rafuena finode. İena ciodicai. Nana naie rafuena bie rabenicomo cueñedicue; ³¹ iadedi dajerie cueticue. Jesúdi cai jilloitaraimana omoi İnollena, İena cueticue. Naimiedi Jusiñamui Jitona omoi İnollena, İena jiai cueticue. Naimiena omoi İnuano, naimie diga jaca iitomoı.

21

Jesús ie llofueoicaiganomo ane bairia rafue

¹ Diga irui illanona, Tiberiana mameciredede jorai fuemo Jesús ie llofueoicaiganodicaimo dane bairede. ² Nainomo diese iticai: Simón Pedro, Tomás, Natanael, cue ama Jacobo, cue, jiaie iaımaıai. Tomás mameci jiaicıdı Dıdimo. Natanael Galilea ie Caná nairai imie. ³ Simón Pedro caımo llote:

—Lloiji faıaiticue.

Naimie uai oticai:

—O diga jaiticai. —İese raillano, botemo jaidicai. Namona naıo lloijina faiticai; İa jaca buena oñedicai. ⁴ Monaiacademo, Jesús jorai fuemo bite; iadedi naimiena uıñoñedicai. ⁵ Jesús caımo jıcanote:

—Caimaci, İnie diese lliciaına jai otomoı?

Uai oticai:

—Jaca oñedicai.

⁶ Naimie dane uai ote:

—Omoi bote nabei dne omoi lloijina faıno.

İe jira faiticai. Aılluena lliciai naıemo jilla jira, a aıñonidicai. ⁷ İena cuamona, Pedromo lloticue:

—Cai motomo cai Namadı ite.

Pedro İena cacajano, naimie taimiena jira, İe İnıroı jıtade. Jesús dne naimie raıre rillena, joraimo daıade; ⁸ iadedi botedo biticai. Enıruue İaire İlla jira, na lliciaımo sonocana, lloijina atıdicai. Nıbaı cien metros onı ite. ⁹ Jorai fuemo cai rıa, coocımona bonoca İraına cıodıcaı. Lliciai İraımo ruıca jai ite. Llomenico jiai ite. ¹⁰ Jesús caımo llote:

—Omoi oga lliciaımona janore atı.

¹¹ İe jira Simón Pedro botemo jaıllano, lloijina llinuanona, enıruemo arı sonode. Ciento cincuenta y tres jemıerie jıtaticai. Aılluena ite; iadedi lloiji cuararıñede. ¹² Jesús llote:

—Maı guısaıbi. —Jesúna cai uıñua jira: “İBudıo?” jaca buna raıñena.

¹³ Jesúdi llomenico diga lliciaına caına ecade. ¹⁴ Fıodadıllamona jılluı facaisemona dacayıno amarı caımo Jesús jai abına baıretate.

Jesús Pedro diga ñaia rafue

¹⁵ Guilla mei, Jesús Simón Pedromo llote:

—Simón, odi Juan jitodio. —Jiai jicanote— ¿Nana o nabaiñiai baifemo cuena isiruitio?

Simón uai ote:

—Jii, Nama, ona cue isiruillana uñotio.

Jesús uai ote:

—Toica llaudaiai uruiaina omoi raise sedaja isoi, cuena ñnotinona raise seda. Naimacina cue rafuena raise llofue.

¹⁶ Dane llote:

—Simón, odi Juan jitodio. —Dane jicanote— ¿Cuena isiruitio?

Simón uai ote:

—Jii, Nama, ona cue isiruillana uñotio.

Jesús dinena uai ote:

—Toica llaudaiai uruiaina omoi raise sedaja isoi, cuena ñnotinona seda.

¹⁷ Dane jicanote:

—Simón, ¿cuena isiruitio? —Jesús naimiemo dane jicanua jira, “Jesús cue uaina ñnoñede” raillanona, Pedro comeci sunaite.

Uai ote:

—Nama, naga rafuena uñotio. Ona cue isiruillana uñotio.

Jesús uai ote:

—Toica llaudaiai uruiaina omoi raise sedaja isoi, cuena ñnotinona seda. ¹⁸ Daje rafue omo nia lloiticue. O nia conirue facai o ñiroi dama jitadio. Ie mei o jitaillanomo jaidio. O uaciroma facaiseconi o onolli oni ñuitaitio. Ie mei jiaimie o ñiroi ona jitajano, o jitañenanomo ona uite. Cue lluaña ñnocana o jai.

¹⁹ Fiodaillena Pedro uñollena, uicodo Jesús iese llote. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusiñamuina iobitade.

Jesús ie gaia llofueoicaigamiemo llua rafue

²⁰ Pedro diga Jesús nia ñaia facaise, Pedro dobaicaillanona, cuena ciode. Iaimaiai jinafona racadicue. Jesús gaiaimedicue. Navui cai guia, Jesús nia fiodaiñenia, Jesús abimo cue ia, Jesús mo jicanoticue: “¿Bu gaitatallio?” ²¹ “Cuena ñnotinona seda” Pedromo Jesús llua mei, Pedro dobaicaillanona, cuena ciuano, Jesús mo jicanote:

—Nama, ¿ñiese naimie fiodaite?

²² Jesús uai ote:

—Naimie nia itemo, cue abido bia, dama iesede. Naimie rafuedi omo ñuñede; ia cue lluaña ñnocana o jai.

²³ Ie jira creyentiaia naie lluaña fidiano cuena raitimaci:

—Naimie fiodaiñeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo ñuñede”.

²⁴ Nana rafuena ciuano lloticue. Iena cueticue. Uanaicinuaina cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

JESUCRISTO ORETAGANODI NAIMIE RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o ðine, ¿nigacino? ¿Nie isoidio? Omo jiaie rabe birui dane oretaiacadícue. Lucadícue. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue. ² Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaiie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci. ³ Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, ðiga icaiño cuarenta ðigarui naimacimo baireuide. Naimacina Jusiñamui ðibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci ðiga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai llotícue. Naiena omoi feiñollena, Jerusalémo nia fiebi. ⁵ Naimie rafuena comini ñnuamona, Juan Bautista micorí jinui ðiga bautizade; iadedi cue rafuena omoi ñnuamona, nano nigarui illanona, cue Moo ie Joreñona feiñoitomoí —raite.

Monamo Jesús jailla rafue

⁶ Ie llofueoicaigano ðiga Jesús dane ofillanona, naimiemo jicanotimaci: —Nama, ¿birui cai judíuai cominina jai sedaitio, David micorí cai usumatiai micoríai jaiie sedaja isoi?

⁷ Naimie uai ote:

—Naie rafue suille facaiseconi jaca uiñoñitomoí. Naimie siñona illamona, dama cue Moo naie rafue suilliruina uiñote; ⁸ iadedi cue Moo ie Joreñona omoi feiñua mei, siño uai omoimo iite. Ie jira Jerusalémo cuena lloitomoí. Judeamo, Samariamo, ua nana eniruemo ite nairaimo lloitomoí —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisñede. ¹⁰ Monamo nia eruaidemo, ieconi naimaci ðine Jusiñamui jaienici, mena ñma bairia isoi, bairediaimaiai. Naie iaimaiai iniroi userede. ¹¹ Raitiaimaiai:

—Galileo imaci, ¿bue ñellena monamo eruaidomoí? Omoi motomona Jesús monamo jaillana jai ciodomoí. Naimie jai jailla isoi, dane abido íco biite —raitiaimaiai.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros ðinori illanona, sábadoruimo Moisés micorí lloga ðinori macaritimaci. ¹³ Rillano imaci cuartomo jaidimaci. A ðibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite.

Naimiedi cananista comini facaisemo duide. Judas ite. Naimie jiaie Jacobo jito. Dïese nainomo itimaci. ¹⁴Naimaci jitaillamona, Jusiñamuimo jüillena, nagarui danomo ofidimaci. Jüillena, jaino naimaci diga jiaí ofisoidimaci. Diga riñoniai jiaí ofisoidimaci. Jesús ei, María, jiaí ofisoide. Jesús amatiai jiaí ofisoidimaci.

¹⁵ Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

¹⁶ —Amatai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomona naie ñaiacínodi cuega. Iena uiñoticaí. Judas micorina uiñoticaí. Naimie Jesúna gaitadinona ifode. ¹⁷ Naimiedi da cai llofueoicaigano imie. Cai diga maijuide. ¹⁸ Ie marañeno finoca rafuemonona ucubena feiñua mei, ie comeci iuaina meiduanona, naie ucubena oni judaide. Judíuái illaicomini naie ucube diga eniruena íbadimaci. Nainomo Judas micori ie cimaio cuinajanona, ie abina dama meinete. Rifaillamona, ana uailamona, ie jebegi boficaillamona, nana ie jebegi jino uaide. ¹⁹ Nana Jerusalémo itino iena fididimaci. Ie jira cai uaido naie enirue mameciredede Acéldama. Oni dobaiñuamona dirue toillanie. ²⁰ Ero, Salmos rabenicomona Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie maijille jiaimie mo iite.

Iese cuega. ²¹⁻²² Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúna bautizaja facaisemona, Jesús monamo caimona jaillarui facaiseconi, naimaci cai diga jiaí itimaci. Naimacimona damiena fetoiticaí, Jesús jilluana cai diga lollena. —Iese Pedro raite.

²³ Ie mei mena imana fetodimaci. Damiedi José Barsabas. Jiaici mameci Justo. Jiaimiedi Matías. ²⁴ Ie mei Jusiñamuimo jüidimaci:

—Nama, nana comini imaci comeciaina uiñotio. ¿Nie imana jitaideo? Caina uiñota. ²⁵ Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micori ie maijana jai fainonocai —jüidimaci. ²⁶ Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

2

Cristo oretagano Jusiñamui Joreñona feiñua rafue

¹ Pentecostés railla rafue irui ria, nana creyentiaí ñiese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. ² Danomo ia, ebena illacínomona monamona riire aifi billa isoi buena cacadimaci. Nana jofomo itino naiena jiaí cacadimaci. ³ Iena naimacimo bairede. Iena ciodimaci. Irai boua isoi eruaide. Nana naimacimo baite. ⁴ Iese Jusiñamui Joreñona feiñotimaci. Nana naimaci comeciaina namatade. Iemei diga nairai uailaido ñaitimaci, Jusiñamui Joreño naimacina ñaitatajamona. Naimaci ñaña uailaina uiñofedimaci.

⁵ Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiamona bitimaci. ⁶ Creyentiaí ñaiana naimaci fidiano, ailluena comini jino tainomo ofidimaci. Nagamíaidi ie nairai uaina cacade. Ie jira jacinaitimaci. ⁷ Eo rajicaidimaci. Coninimo jicanotimaci:

—¿Buta ñaite? Nana Galileos imaci. ⁸ ¿Ñiese naimacina cacadicaí? Cai uaido dajerie ñaiana cacadicaí —raitimaci. ⁹ Diga comini imiaí itimaci: Partos, Medos, Elamitas, Mesapotamia imaci, Judea imaci, Capadocia imaci, Ponto imaci, Asia imaci, ¹⁰ Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Roma-mona jamai macaritano jiaí itimaci. ¹¹ Judíuaí itimaci. Judíuaíñedino jiaí itimaci. Judíuaí isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci. ¹² Nana eo rajicadimaci. Daniríe jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñaí naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluomo cacarei. Naie rafuena lloiticue. ¹⁵ Omoí comeciaina omoí facaja isoi, jifaiñedicaí. Jitoma nia fuiri daidemo, bu jaca jifairainina. ¹⁶ Joel micorí bie rafuena jaie llote. Joel micorí Jusiñamui rafuena lloraima. Naimie jaie lloga rafue birui caimo jai suide. ¹⁷ Llote:

Jusiñamui caimo llote: “Jairuido bie rafue suite.

Cue Joreña diga cominimo fecajiticue.

Iedo omoí uruiaí cue lluana lloitimaci.

Iemona omoí coniruiaina nicairitaiticue.

Iemona omoí enamacina jiaí nicairitaiticue.

¹⁸ Ua nana cuena sedadinomo cue Joreña fecajiticue.

Naimaci cue lluana lloitimaci.

¹⁹ Monamo eo jacirede rafuena ico suiñotaiticue.

Eniruemo eo jacirede rafuena ico jiaí suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ iadedi birui cuemo bu jicaia, ie jeacinomona naimiena jillotaiticue”
Jusiñamui llote.

Ie Joreño caimo birui illamona, Joel micorí llogacino jai suide.

²² Caimaci, bie uaina omoí cacarei. Nazaret ie Jesúsna ñaiticue.

Jusiñamuidi omoí motomo naimiena siño rafuena jai finotate. Iena jai uiñotomoi.

²³ Jusiñamui comeci jaie facaja isoi, Jusiñamui jitailla isoi,

Jusiñamui naimiena omoímo fecade. Jesúsna coraitatomoí. Jusiñamuina

inoñedinona naimiena meineta-domoi; ²⁴ iadedi fiodaillamona naimiena

Jusiñamui jillotajano, legi ie cacajamona naimie jillobide. Naimie fio-

daite; iadedi fiodaillamona nainomo iñoñede. ²⁵ David micorí naimiena jaie llote:

Jusiñamui cue diga jaca illana uiñoticue.

Cue ecimo naimie ite, cue comeciaina ocuiñotallena.

²⁶ Ie jira cue comeci caimare ite. Eo iobidicue.

Cue marena illemo jai jiaí ocuiridicue,

²⁷ raiafomo cue joreña naimie fañonocaiña jira, ie mare Jito abi rifallana naimie jitañena jira.

28 Naimie cuena jilloitallena uiñoticue.

Cue diga naimie illa jira, cue comeci caimare iite.

29 Caimaci, cai usuma David micorina marefodo ñaiticue. David micori ñaia, dama naimie facaina ñañede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñoticai. 30 Ie ia David micori Jusiñamui rafuena llote. Naimie micoridi Jusiñamui naimiemo uanaicinona llua uiñote. Jaie Jusiñamui naimiemo llote: “O uruiaimona damie illaimana illanona, ie cominina sedajite” llote. 31 Cristona ñaite. David micori nia suiñede rafuena llote. Naimie micori Cristo jilloillena llote: “Raiafo Jusiñamui fiodaillanomo Cristo Joreño fainonocaiñeite. Cristo abi rifañeite” llote. 32 Jesúna ñaite. Jusiñamui Jesúna jai jillotate. Nana cai iena ciodicai. Ie jira iena lloticai. 33 Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi. 34 Naimie abi monamo jaiñena jira, David micori dama naimie facaina ñañede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana rai.

35 Ona ñnoñedinona o anamo itataitcue”
raite. David micori llua isoi, birui jai suide.

36 Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuai comini naiena uiñuana jitaicue.

37 Pedro llua cacajano, naimaci comeciimo riire baite. Pedromo iena jicanotimaci. Ie nabaiñaimo jiai jicanotimaci:

—Caimaci, o llua jai cacadicai. ¿Bue finoiticai?

38 Pedro uai ote:

—Omoi comeci iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreño jai feiñoitomoi. 39 Omoimo ie Joreño fecallena navui llote. Omoi uruiaimo jiai fecaite. Jiaie nairaiaia itinomo jiai fecaite. Ua nana Jusiñamui fetocanomo jiai fecaite.

40 Diga uai naimacimo Pedro llote. Raite:

—Ailluena comini marañede rafuena birui finocana jaidimaci. Fafitimaci. Naimaci isoi jaiñeno; iadedi cue llua omoi cacajamona, iena ñno.

41 Diga comini ie lloga uaina feiñuano, bautizadimaci. Nairuido nıbaı tres mil comini creyentiaına jaidimaci. 42 Cristo oretagano llofuiana fueuidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jııuidimaci.

Cristona ñnotino illa rafue

43 Cristo oretaganodi diga siño rafuena finuamona, nana comini jacinaitimaci. 44 Nana creyentiaı damacina itimaci. Naimaci raruaıaı coninimo fecauidimaci. 45 Dueredıno ia, naimacina canollena, raruaıaredıno naimaci raruaıana vendedimaci. Iemei naie ucube dueredinomo fecadimaci. 46 Jusiñamuina sedallena, nagarui Jusiñamui jofomo ofisoidimaci. Danırie imaci jofuemo Jusiñamuina jai sedauidimaci. Nainomo danomo guillanona, Jesús fiodaillana comeciuidimaci. Caimare imaci comeciıaı illamona, caidiñeno guisoidimaci. 47 Jusiñamuimo iobillacinona fecacana jaidimaci. Nana

cominidi naimacina: “Mare” raitimaci. Naimacina Jusiñamui itataja isoi, nagarui comini creyentiana jaidimaci.

3

Jusiñamui jofomo Pedro llucino

¹ Jusiñamui jofomo jiaa facaise Pedro iaiaiaia Juan diga jaide. Jitoma ana ia, comini juidimaci. ² Iaiaiaia jaillanomo jiaie comini tisitaitimiena atiana ciodiaiaiaia. Tisitaitimiena naimie jaca jeiciga. Naimiena nagarui atiano, Jusiñamui jofo ie ebiredena railla nase fuemo rainaudimaci. Nainomo naimiena rainaudimaci, fo jaidinomona ucube jica-jicallena. ³ Iaiaiaia fo jaiacania, ucube jicallena, ie onolli ñuitade. ⁴ Iaiaiaia naimiemo eruaillano, Pedro raite:

—Cocomo eruai.

⁵ Ie jira iaiaiaimo eruaide. Ra feiñoitena, ocianona sedade. ⁶ Pedro raite:

—Ucube cuemo ñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

⁷ Pedro naimie onollido llinuano, a naidanete. Ieconi naimie eillidi jillode. Ie taisicoñuai jiai jillode. ⁸ Daiacaillanona naidacaide. Macarillanona, iaiaiaia diga fo jaide. Jusiñamuimo iobillacinona fecajano, daiacaillanona macarite. ⁹ Nana comini naimie macarillana ciodimaci. Naimie iobillacinona fecajana jiai cacadimaci. ¹⁰ Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajjicaidimaci. ¹¹ Naimiedi Pedro iaiaiaia Juan diga nia llinuano, naimaci dine Salomón micori finotaga jofo abi ibirimo comini aisidimaci. Rajjicaidimaci. ¹² Iena ciuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daiamaiaia iaiaiaia uaido naimiena jilloitate” raillanona cocomo eruaidomoi. ¹³ Iena finoñedicoco; iadedi Jusiñamui iena finuano, ie Jito Jesúna iobitade. Cai usumatiaia micoriaia, Abraham, Isaac, Jacob, ua nana cai usumatiaia micoriaia bie Jusiñamuina sedadimaci; iadedi Jesúna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi. ¹⁴ Mareuidimiena jitañedomoi; iadedi come fatimiena cárcelmona jino billana jitaidomoi. Barrabás raillamiena jitaidomoi. ¹⁵ Jusiñamui dibeimo caina itatatimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco. ¹⁶ Tisitaitimie jilluana jai ciodomoi. Naimiena uiñotomoi. Jesúna naimie ñnua jira, Jesús naimiena mairitate. Naimiena raise jillotate. Iena jai ciodomoi.

¹⁷ Caimaci, ero, omoi finoca rafuena abina uiñoñoeno finodomoi. Omoi illaicomini jiai daje isoi finodimaci. ¹⁸ Jaiie Jusiñamuidi ie facaina llorainina jiairuido sulle rafuena llotatate. Naimacina Cristo llogi cajaan llotatate. Birui naie llogacino suide. ¹⁹ Omoi comeciata iuaillai meido. Jusiñamui dibeimo omoi comeciaina meido. Iemei Jusiñamui omoi jecinona dotaite. Iena jaca feitaite. ²⁰ Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi Jilloitaraima. ²¹ Jusiñamui facaina lloraini micoriaia jaiie lloga rafue sulle ñnori monamo naimie fiebiite. Jaiie Jusiñamuidi ie mare lloraini micoriaia uaido buena llote. ²² Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi damiena fetoite. Nana naimie

omoimo lluana cacarei. ²³ Bie lloraimana bu cacarefiñenia, Jusiñamui naimiena duere finoite. Iemona faifite”. ²⁴ Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci biena llotimaci. ²⁵ Jusiñamuidi cai usumatiai micoriaimo rafuena llote; ia bie rafue birui omoimo jiai duide. Jusiñamui Abraham micorimo jai llote: “Nana cominidi o uruia muidona caimare iitimaci”. ²⁶ Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi marañedicinona fainonocaitallena, omoi dine naimiena nano jai oretate.

4

Cristo oretagamaiai llaicomini motomo illa rafue

¹ Comini diga Pedro iaimaiai Juan diga ñaia facaise, Jusiñamui diga ñairainidi naie iaimaiai dine bitimaci. Jusiñamui jofona sedaraini illa ima diga, saduceuai railla comini diga jiai bitimaci. ² Fiodaillamona Jesús jai jilluana llofuetiaimaiai. Cominina iaimaiai llofuia jira, naie iaimaiai diga iciritimaci. ³ Iaimaiaina gaitajanona, jai navuilla jira, cárcelmo jonetimaci, ie jitiramo naie rafuena siadollena. ⁴ Iese suide; ia Pedro llogacinona cacadinomona ailluena comini naiena innotimaci. Cinco mil digamie creyentiaina jai itimaci.

⁵ Icoiti Jerusalémo nana judíuai illaicomini siadollena ofidimaci. ⁶ Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci. ⁷ Naimaci motomo Pedro iaimaiai Juan diga atianona, iaimaiaimo jicanotimaci:

—¿Bu uai diga biena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue. ⁹ Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi. ¹⁰ Jesucristo uai diga jillode. Omoi biena uiñuana, ua nana judíuai comini biena uiñuana jitaidicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tisitaitimie jai benoconi naidaillana ciodomoi. ¹¹ Omoi jofo finoraini isidomoi. Omoi jitañede noficidi jiaie nofici baifemo jai jaide. Jesúsdi naie nofici isoide. Naimie rafuena omoi jitañena jira, naimiena meinetomoi. ¹² Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

¹³ Jaciruiñeno marefodo llofuetiaimaiai. Nainomo itino iena cajano, comecina facadimaci: “Abina uiñoñediaimaiai. Jamai bue isoidiaimaiai”. Ie jira rajicaidimaci; iadedi Jesús llofueoicaigaiaimaiaina illana uiñotimaci. ¹⁴ Jilloitagamie iaimaiai diga naidaillana ciodimaci. Ie jira naimaci uai iñede. ¹⁵ Naie rafuena siadollena, naie illaicomini iaimaiaina bai oredimaci. ¹⁶ Coninimo jicanotimaci:

—¿Niese naie iaimaiaina nibaiticai? Nana Jerusalémo itino iaimaiai siño rafuena finuana jai fididimaci. Iena janonicai. ¹⁷ Jiaie comini iena fidi raillano, Jesús rafuena iaimaiai llofuiana rairuiticai.

¹⁸ Ie mei iaímaiaína naimaci dñe dane uaidotímaci. Iaímaiaímo Jesús rafuena llofueñellena riire llotímaci. ¹⁹ Pedro iaímaiaí Juan diga naimaci uai ote:

—Ie rafuena coco llovena Jusiñamui jitaide. Omoi uaina coco ñnoia, Jusiñamui jitailla rafuena finoñeíticoco. Cocomo llono. ¿Bu uaina ñnoíticoco? ¿Jusiñamui? ¿Omoi? Cocomo iese llono. ²⁰ Daímaiaí coco ciua rafuena llotícoco. Daímaiaí coco cacaja rafuena llotícoco —raite.

²¹ Iaímaiaína jacinaitajamona, iaímaiaína jino oretatímaci. Iaímaiaína duere finoñedímaci, nainomo ite comini icirinaiñellena. Jusiñamuimo nana nainomo itinodi iobillacinona fecadímaci, tisitaitímie jai jillua jira. ²² Jai jillodímie mo cuarenta años baífemo ite. Siño uaido naimie jillua jira, comini iobidímaci.

Naimacina Jusiñamui canollena, naimiemo jñacino

²³ Iaímaiaí jino jailla mei, iaímaiaí nabaiñiaí dñe jaidíiaímaiaí. Illaicomini iaímaiaímo lluaña llotíiaímaiaí. ²⁴ Naimaci iena cacajano, Jusiñamuimo damie llua isoi jñidímaci:

—Ore Moo, mona finodio. Eniruena finodio. Monailaina finodio. Nana naiemo ite rana jiaí finodio. ²⁵ Cai usuma David micorina raise uñotícaí. Naimiedi ona sedadímie. Naimiena bie rafuena o Joreño jaie llotatajamona, naimie llote:

¿Bue ñellena Jusiñamui diga judíuainedino iciritímaci?

¿Bue ñellena Jusiñamuimo comini tainomo comeciaina facadímaci?

²⁶ Illaicomini ofidímaci, Jusiñamui diga fuirillena.

Jusiñamui facaisena iñedímaci.

Cristo facaisena jiaí iñedímaci

llote. ²⁷ Naie rafue birui bene suide. Bie nairaimo Herodedi, Poncio Pilato diga, judíuainedino diga, judíuai comini diga, ofide. O mare Jito Jesús facaisena iñedímaci. Naimacimo o oretagamie facaisena iñedímaci.

²⁸ Naimaci ofillamona, nana o jitaile rafuedi, o jaie lloga rafue diga, jai suide. ²⁹ Nama naimaci jaciruitajacinona jai uñotio. Cai comeciaina ocuñota, o rafuena jacitaiñeno cai lollesa. ³⁰ Duidinona jilloita. O mare Jito Jesús uaido caina siño rafuena finota —jñidímaci.

³¹ Jusiñamuimo jñacino fuilla meinocni, naimaci ofiracodi jaidísite. Jusiñamui Joreño nagamíiaí comecimo namatade. Iemona Jusiñamui uai jacitaiñeno llocana jaidímaci.

Creyentiaí damacina illa rafue

³² Nana creyentiaí damacina itímaci. Naimacimo raruaí ia, dajena naimacimo duide. ³³ Naie facaise siño uaido naimie oretagano cai Nama Jesús jilluana llofueuidímaci. Iemona cominidi naimacina: “Mare” raitímaci. Nagarui Jusiñamui naimacina eo canode. ³⁴ Naimaci dñe buna buena jaca jitaíñedímaci. Ucube ollena, enirueredino imaci eniruena fecadímaci. Ucube ollena, joforedino imaci jofona fecadímaci. Ucubene atianona, ³⁵ Cristo oretaganomo fecadímaci. Ie mei dueredinomo imaci jitailla isoi fecauidímaci. ³⁶ Naimaci motomo José mamecíredímie ite. Cristo oretagano jitaca mamecídi Bernabé. Ie mamecí oni dobaiñuamona firadotímie. Naimie nairaidi levita. Naimiedi Chipre railla uiasi imie. ³⁷ Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

5

Ananías micori ie ai micori diga Jusiñamuina jifuia rafue

¹ Naie facaise Ananías ie ai diga iaímaiaí enirruena jiaí fecade. Ie ai mamecidi Safira. ² Naie iba naimiemo dabeí fiebide. Ie ai iena uifote. Atuedo atianona, Cristo oretaganomo fecade, “Nana ucube atidicue” rail-lanona. ³ Jusiñamui Joreño Pedrona naie rafuena uifotajamona, Ananíamo Pedro jicanote:

—¿Niese Taife o comecimo namatade? Jusiñamui Joreñomo taino llotio, dabeí ucube omo fiebilla jira. ⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina maraiño facadio? Cominimo taino llotio. Jusiñamuimo tainona jiaí llotio.

⁵ Ananías bie uaina cacajano ieconi fiodaillamona oni caide. Nana iena ciodino eo jacinaitimaci. ⁶ Iemei nainomo ite conirueniaí naimiena feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uifoteno bite. ⁸ Pedro naiñaíño jicanote:

—¿Nie diese o fecaca o enirue? Cuello llo.

Naiñaíño uai ote:

—Jii, ie diese coco fecaca.

⁹ Pedro jicanote:

—¿Bue ñellena Jusiñamui Joreño jifuetomico? Ero, o ini raiafomo jonetino saisia jai nasemo cacade. Naimaci ona jiaí jino ja uitimaci.

¹⁰ Naimie ecimo ieconi naiñaíño fiodaillamona, oni caide. Conirueniaí fo billano, naiñaíño fiodaillana ciodimaci. Jino uillano, ie ini abimo dafomo jonetimaci. ¹¹ Iena fidiama, nana creyetaí eo jacinaitimaci. Nana bie rafuena fididinodi jiaí eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finodimaci. Naie facaise nana naimacidi Jusiñamui jofomo Salomón micori finotaga jofu abi ibirimo ofisoidimaci. ¹³ Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴ Jaciruitimaci; iadedi creyetaína ailluena comini jaidimaci. Ailluena iñiaí, ailluena riñoniaí, diese creyetaína jaidimaci. ¹⁵ Imaci biramo duidinona jonecaida, naisomo atidimaci. Pedro nainomo macarillano, o lloti naimie joreño naimacimo ibaillamona, “Jillobiticaí” raillano, atidimaci. ¹⁶ Jerusalémo ie fuemo ite nairaiaimona comini biadedi, duidinona jiaí atidimaci. Janaba anamo ite cominina jiaí atidimaci. Nana jillodimaci. Ie isoi Cristo oretagano siño rafuena finoudimaci.

Cristo oretagano duere sefuilla rafue

¹⁷ Cristo oretagano finoca rafueri Jusiñamui diga nanoca ñairaíma eo uradoide. Nana naimie díbeimo itino jiaí eo uradoidimaci. Saduceuaí railla cominimo duidimaci. ¹⁸ Eo uradoillamona, Cristo oretaganona gaitajano, cárcelmo jonetimaci. ¹⁹ Naíona Jusiñamui jaienididi cárcel nasena econote. Cristo oretagano jino atiano, naimacina raite:

²⁰—Jusiñamui jofomo mai abido jai. Cominimo Jusiñamui dine naimaci ille rafuena llo.

²¹ Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga bil-lano, danamo ofillena illaicominina uaidote. Cárcelmo policiaiana oretate, Cristo oretaganona atillena. ²² Cárcelmo jaidemo, naimacina cioñedimaci. Abido billanona, llotimaci:

²³ —Cárcel ie nase jaca ibaicana ciodicai. Raise llaveca. Nase fuemo jaca soldaduai itimaci; iadedi econoticaimo, jaca buna cioñedicai.

²⁴ Jusiñamui jofo nanoca sedaraima, Jusiñamui diga ñairaini diga, bie llwana cacajano, uainicaidimaci. Comecina facadimaci: “¿Nie isoide rafue naimacimo jai suide?”

²⁵ Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶ Iena cacajano, Jusiñamui jofo nanoca sedaraima ie policías diga jibuisaide. Cristo oretaganona atide. Fecuisse atide, comini dinena policiaiana noficiado fairinoi raillano. ²⁷ Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

²⁸ —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecabia, “Cai illaicomini Jesúna meinetimaci” llotomoi.

²⁹ Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina inoiacadicai. ³⁰ Cai usumatiai micoriai Jusiñamuina sedavidimaci. Naie Jusiñamuidi Jesúna jai jillotate. Jesúna meinel-lena, cruzmo coraidomoi; ia Jesúna omoi meinia mei, ³¹ Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jai jai itatate. Cai judíuai comini comeciai iuai meidollena, naimaci jeacinuai dotallena, iese naimiena itatate. ³² Bie rafuena llofuecabiticai. Jusiñamui Joreño uaido iena jai llofueticai. Jusiñamuina inotinomo Jusiñamuidi ie Joreño jai fecade —raite.

³³ Iena cacajano, illaicomini eo iciritimaci. Cristo oretaganona meineiacadimaci; ³⁴ ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina inotinomaci. Cristo oretaganona dallu bai oni oretaganona, naimie llote:

³⁵ —Caimaci, omoi bie cominimo omoi finolle rafuemo comeciaina raise faca. ³⁶ Jiaie Teudas micori illaimana jaiacade. “Jai uaina baitimiedicue” raillano, naimie dibeimo cuatrocientos inñiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. ³⁷ Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jai fiodaite. Naimie micori dibeimo itino oni tuusite. ³⁸ Ie jira ja omoimo lloiticue: Bie cominina fainonocai. Jamai cominimona naimaci llogacino iade, jamai cominimona naimaci finuacino iade, ieconi duite. ³⁹ Jusiñamuimona bie rafue ia, jaca niese nibañeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie llwana feñuano, ⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; ⁴¹ iadedi illaicomini illanomona Cristo

oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina ridoñena jira, jiai caimare itimaci. ⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

6

Creventiaina canollena, siete digamie diáconuaina illena, fetua rafue

¹ Naie facaise ailluena comini creventiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci. ² Ie jira naie doce oretaganodi creventiái danomo ofillena, nana naimacina uaidotimaci. Naimacimo llotimaci:

—Jusiñamui uaina lollena, ra fecalle diga, abi juanide. Jusiñamui uaina llofuaina cai fainonocaiadedi, marañede. Ra jamai cai fecaiadedi, jiai marañede. ³ Ie jira, amatai, omoimona siete digamiena feto. Inoganona feto. Jusiñamui Joreño nana comecimo namatadinona feto. Eo abi uinotinona feto. Ie isoide iñiaina feto. Bie ra fecarainina maijuitimaci. ⁴ Ie mei cai abi juarenite, Jusiñamuimo cai jillena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo ñnote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicolás Antioquía nairai imie. Judíuai comini isoi naimiedi Jusiñamuina ñnote.

⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatal-lena.

⁷ Naie facaise Jusiñamui uaidi cominido uinotacana jaide. Jerusalémo ailluena comini creventiaina jaidimaci. Jusiñamui diga ñairainimona creventiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide. ⁹ Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; ¹⁰ iadedi naimaci uaitalle uaidi ñede. Naimacimo Esteban uai isoiduaidi ñede. Jusiñamuimona ie uaina ua jira, Esteban abina uifüano ñaite. ¹¹ Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

¹² Iese llumona, comini comeciaina feidocana jaidimaci. Illaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci. ¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. ¹⁴ Naimiedi Jesús bie jofona judaïllena lloste. Moisés micori caimo llogafuiaï fainonocaillena jiai lloste. Iena cacadicaï.

¹⁵ Iemo nana illaïcomini naimiemo eruaïdimacimo, naimie uieco Jusiñamui jaienicï isoi eruaïde.

7

Esteban micori abi riïdua rafue

¹ Jusiñamui diga nanoca ñairaima Esteban micorimo jicanote:

—¿Ua ie isoi naimaci llucino ite?

² Naimie uai ote:

—Caimaci, cacarei. Cai jaiagaimona cai fueollena, naimaci micoriaïna lloiticue. Jusiñamui maremiëna jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano ³ lloste: “O eniruëmona mai jai. O cominimona mai jai. Omo cue acatalle eniruëmo jaitio”. ⁴ Ie jira Caldea railla eniruëmona naimie micori jaide. Harámo rillanona, diga iruillaï nainomo ite. Naimie moo micori fiodailla mei, omoi birui illa eniruëmo Jusiñamui naimie micorina oretate. ⁵ Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaïmo fecajiticue” jiai lloste; iadedi naie facaise Abraham micori uruenide. ⁶ Jusiñamui jiai lloste: “O uruiaï jiaie comini eniruëmo jaianiïtimaci. Egiptomo jaianiïtimaci. Naimacina duere finoïtimaci. Cuatrocientos años legi cacajitïmaci. ⁷ Naimacina maijitaite nairaina duere finoïticue. Ie mei o uruiaï naie eniruëmona biïtimaci. Bie illanomo cuemo iobillacinona fecajitïmaci” lloste. ⁸ Ie cominina naimaci jaïllena, Jusiñamui Abraham micorimo iisaïaï diese abina diana lloste. Ie facaise Abraham micori Isaac micorina comuitate. Ie jeiciamona ocho digaruï illamona, Abraham micori naimie micorina dete. Isaac micori Jacob micorina comuitate. Jacob micori doce uruiaïna comuitate. Naimaci micoriaïmona cai doce diga nairai comuidimaci.

⁹ Caimaci, José micorina Jacob micori uruiaï micoriaï uradoïllamona, Egipto cominimo naimiëna fecadimaci; ¹⁰ iadedi Jusiñamui naimiëna eo sedade. Ie legi ie cacajamona naimiëna jillotate. Naimiëmo uiñoracinona fecade. Ie jira Faraón micori naimiëna jiai gaide. Faraón micori di Egipto illaïma. Ie muidona Faraón Joséna fetode, nana Egiptomo itinona sedallena. Ie jofona jiai sedatate. ¹¹ Naie facaiseconi nana Egipto comini aime guitïmaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiaï micoriaï naimaci illanomo guïllena baiñedimaci. ¹² Egiptomo guille illana Jacob micori fidiano, guille ollena, nano facaise ie uruiaï micorina nainomo oretate. ¹³ Ie mei José ie amatiaina naimiëna uiñotade. Faraón di José comini illana fidide. ¹⁴ Ie jira José di ie moona uaidote. Nana ie cominina uaidote. Setenta y cinco digamië ite. ¹⁵ Ie jira Egiptomo Jacob micori jaide. Nainomo fiodaite. Ie uruiaï micoriaï nainomo jiai fiodaïtimaci. ¹⁶ Siquem railla nairai illanomo naimaci comini naimaci micoriaïna uïllano, nofici ie raïafomo jonetïmaci. Siquemmo Abraham micori naïfona Emmor uruiaï micoriaïmona jaie ibade.

17 'Caimaci, Jusiñamui Abraham micorimo lloga rafue suille iairei illa facaiseconi, Egiptomo cai cominidi eo jebuidimaci. Abraham micorimo: "Egiptomona o urui ai biitimaci" Jusiñamui jaie llote. 18 Naie facaise jiaie illaima Egiptona sedade. José micorina uiñoñede. 19 Ie jira cai cominina jifuiano maijtauide. Uruiai fiodaillena, naimacina imaci uruiaina fainocaitate. 20 Ie facaiseconi Moisés micori jeiciga. Jusiñamuimona naimie micori eo ebire eruaide. Ie moo jofomo daje amani fivui ite. 21 Ie mei naimiedi fainonocaiga. Faraón jisa micoridi naimie micorina uanona, naiñaiño jito isoi naimie micorina uiuicaide. 22 Naimie micori nana Egipto comini uiñuacinona fueote. Illaima uai isoi naimie uaidi ite. Eo abina uiñotimie.

23 'Caimaci, naimie micori cuarenta años illa facai, ie comini dine ie jaillemo ie comecina facade. Naimie cominidi cai judúuai comini. 24 Egipto imiemona damie legi cacajana ciuano, naimiena riidote. Riidianona, Moisés micoridi Egipto imiena meinete. 25 Moisés micori comecina facade: "Cue muidona Egiptomona Jusiñamuidi cue cominina oretaité". "Cue comini buena uiñotimaci" raillanona comecina facade; ie iadedi iena uiñoñedimaci. 26 Ie arediruido Moisés micoridi mena come iaímaiaí fuirillana ciode. Iaímaiaína marena itataiacade. Raite: "¿Bue ñellena conimana duere finoacadómico? ¿Bue ñellena o come diga fuiridómico?" 27 Duere finoacadimie naimiena oni ñuitade. Jicanote: "¿Bu odi cai illaimana jonegao? ¿Bu caimo ona llotatate juez isoi? 28 ¿Na are Egipto imie o meinia isoi cuena jiaí meineiacadio?" 29 Iena cacajano, come fajana naimie llinua jira, jacinailanona, Moisés micori aiside. Madián railla eniruelo jamai ua illafuena ite. Dinomo ie aina ua mei, nainomo mena jitona comuitate.

30 'Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. 31 Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote: 32 "O usumatiaí imaci Jusiñamuidicue. Abraham, Isaac, Jacob, imaci Jusiñamuidicue" llote. Jacinailamona Moisés micori abi docaide. Jaciruillanona, erodañede. 33 Jusiñamui naimiena raite: "Jamai bue o isoilla jira, o zapatona duiño. Benomo cue illa jira, o naidaillanodi eo mareno. 34 Egiptomo cue comini legi cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue" llote; 35 iadedi comini dinena Moisés micorina jaie jitaíñenamona, naimiena raitimaci: "¿Bu illaimana odi jonegao? ¿Bu o juezna jonegao?" Comini dinena naimiena jitaíñedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiaí itatate. 36 Egiptomona Moisés naimacina atide. Egiptomona nia ia, diga siño rafuena finode. Jiairede monaillai fuemo naimaci rillanona, siño rafuena jiaí finode. Jofue iñenanomo cuarenta años siño rafuena finocana jaide.

37 'Caimaci, Moisés micoridi cai judúuai cominimo llote: "Omoimona Jusiñamuidi damiena ie rafue lloraímana ico oretaité, naimie cuena oretaja isoi". 38 Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiaí micoriaí diga naie jaienici facaina Moisés ñaite. Caimo fecallena, naimiedi cominina itatate uaina feiñote; 39 iadedi cai usumatiaí micoriaí naimiena

ñnoiacaññedimaci. Naimiena jitaññedimaci. Egiptomo abido jaillemono naimaci comeciai facadimaci. ⁴⁰ Ie jira comini dinena Aarón micorimo llotimaci: “Egipto eniruemona Moisés caina atide; iadedi naimie cai diga illana ja uiñoññedicaí. Cai facaina Jusiñamuina eruaide jiraraina fino, Egiptomo abido caina ifollena”. ⁴¹ Iemo jurareta urue joreñaona finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. ⁴² Ie jira Jusiñamui naimacimona oni jaillanona, naimacina fainonocaide. Iemona jitomana sedauidimaci. Fivuina jiai sedauidimaci. Ucuaina jiai sedauidimaci. Jusiñamui rafue lloraima ie rabenicomo buena jaie iese cuela:

Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiiai fecaññedomoi;

⁴³ iadedi cuemo omoi comeciaina facañño Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoína oretaiticue”

cuela. Naie facaise cai usumatiai micoriai Jusiñamuina jitaññedimaci.

⁴⁴ 'Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofo aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuela noficidi naicomo eenoga. ⁴⁵ Josué diga bie eniruemo naimaci billa facaise, cai usumatiai micoriai naicono atidimaci. Bie enirue jiaie nairaiaimo jainaiaide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. ⁴⁶ Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: ⁴⁷ ia Salomón micoridi jofona Jusiñamui iena finode; ⁴⁸ iadedi Jusiñamuidi iima finoca jofomo i-iñede. Jusiñamui facaina lloraima micoridi Jusiñamuina iese cuete:

⁴⁹⁻⁵⁰ Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaññedicue” raite.

⁵¹ 'Ero, omoi comeciai jaiarede. Omoi comeci iñoññede. Jefonidomoi isoidomoi. Ie jira Jusiñamui Joreño anamo iacaññedomoi. Omoi usumatiai micoriai isoi itomoi. ⁵² Omoi usumatiai micoriaidi nana Jusiñamui rafue lloraima micorina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúsna ñaiticue. ⁵³ Jusiñamui jaieniciaimona Moisés micori llogacinona feññotomoi; iadedi iena iñoññedomoi.

Judíuai Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite. ⁵⁵ Jusiñamui Joreño nana Esteban micori comecimo namatajamona, monamo eruaillano, naimiedi Jusiñamui ebirenana ciode. Naimiedi Jusiñamui nabeimo Jesús naidailana ciode.

⁵⁶ Raite:

—Mona ecuaillana ciodicue. Jusiñamui Jito Jusiñamui nabeimo naidailana ciodicue.

⁵⁷ Esteban lluana cacajano, jefo oroisite. Eo cuiirillano, naimie dine aisicaidimaci. ⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside. ⁵⁹ Estebana nofici diga fairinuano, Estebadi Jusiñamuimo ado juide:

—Cue Nama Jesús, cue joreño feiño.

⁶⁰ Ieconí caiñici ifodo rainadacaida ado juide:

—Naimaci bie jeacino finua muidona, ibana oñeno.

Iese naimie jia mei, fiodaite.

8

Saulo creyentiaina duere finua rafue

¹⁻² Saulo dinena Esteban meiniana jiai jitaide. Cristo rafuena eo ñnotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiaí duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiañodi Samaria railla eniruemo jaidimaci; iadedi Cristo oretagano nine jaiñedimaci. ³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiai gaitade.

Felipe Samariamo illa rafue

⁴ Tuficaida jaidino naga illanomo Jesús rafuena llocana uitimaci. ⁵ Samariamo Felipedi daje nairaimo jaide. Nainomo Cristo rafuena llofueuide. ⁶ Ailluena cominidi Felipe llofuiana eo raise feiñotimaci, naimie siño rafuena finua jira. ⁷ Felipedi diga jananiai anamo ite cominimona jananiaina oretate. Riire cuirioillano, jaidimaci. Ailluena tisitaitinona jillotate. Ailluena ñuja-ñujacaidinona jiai jillotate. ⁸ Ie jira naie nairaimo ite comini eo iobidimaci.

⁹ Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

¹⁰ Nana comini naimiena ñnotimaci. Abina uiñoñedino ñnotimaci. Abina uiñotino jiai ñnotimaci. Raitimaci:

—Naimie uaidi Jusiñamui ie. Naimiedi siño jito —raitimaci. ¹¹ Iese naimacina are jifuate. Naimaci rajicailla jira, naimaci naimiena cadimaci. ¹² Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciaí iuaina meiduaana llote. Naimaci Felipe llofuiana ñnotimaci. Inuamona, Felipe naimacina bautizade. Iñiaina bautizade. Riñoniaina jiai bautizade.

¹³ —Jiai ñnoticue —Simóni raite. Naimie bautizaja mei, Felipe diga jaiocaide. Felipedi diga siño rafuena finua jira, Simón naiena ciuano, rajicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaímaiaí Juan diga, batine oredimaci.

¹⁵ Iaímaiaí rillano, naimaci Jusiñamui Joreñona feiñollena Jusiñamuimo jidiáimaiaí, ¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreñona nia feiñoñedimaci. ¹⁷ Ieconí iaímaiaí onolli naimacimo joniano, Jusiñamui Joreñona feiñotimaci.

18 Naimaci Jusiñamui Joreño feiñuana Simóndi ciuano, ucubena iaímaiaimo fecaacade. 19 Raite:

—Cuemo omico uaina ine, bummo cue onollina cue joniamona, naimie Jusiñamui Joreñona feiñollena.

20 Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena jamai fecade. 21 Bie rafuedi omo duiñede. Jusiñamuimona o comeci nia maraiñede. 22 O comeci iuai meido. Naimie o comecimo ite maraiñede facajacinuaina oni dotallena, cai Namamo jica. 23 Omo ailluena maraiñedicino illana uiñoticue. O comeci eo uradoide. Maraiñedicinona o comecimo namaredio.

24 Simón uai ote:

—O llua cuemo suiñellena, o Nama diga cue facaina ñaíno.

25 Cristo rafuena iaímaiaí llua mei, Jerusalémo abido bitiaímaiaí. Abido billano, Samariamo diga comini illanuaimo Jesús ie mare rafuena llocana bitiaímaiaí.

Etiopía imie creyentena jailla rafue

26 Naie facaise Jusiñamui jaienisaímona damie Felipemo llote:

—Beicido joide naido mai jai. Jerusalémona Gazamo joide naísona jai —llote. Naie naiso jofue iñenanodo joide. 27 Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuiude. Naiñaiño mamecidi Candace. Naimiedi nana naiñaiño gobierno ucubena sedade. 28 Naimie jai abido jaillano, ie carretamo raíta, Isaías micori cuega rabenicono ado facade. 29 Jusiñamui Joreño Felipemo llote:

—Naimie dine iaírei jai. Carreta dine jai.

30 Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uiñotio?

31 Naimie uai ote:

—¿Ñiese uiñoticue, bu cuena canoñenia?

Felipemo jicanote, naimie diga a jaillano danomo raillena.

32 Naimie facaca cuegafue iese raite:

Toica llauda fallena uilla isoi, naimiena uitimaci.

Toica llauda itirai garedino dine eeñena isoi, naimie ñaiñede.

Ie abina riidollena, uaina oñede.

33 Maraiñede rafuena naimie finoñede; ia naimiena duere finodimaci.

Naimie uruiaí iñededí, ¿bu naimie rafuena lloite?

Meinia meinocóni, naimie jai iñede.

34 Etiopía imie Felipemo jicanote:

—¿Bie lloíaima bu iena llote? ¿Dama naimie iena llote? ¿Jiaimiena iena llote? Cuemo llono.

35 Iemei Felipedi bie cuegafuiamona naimiemo Jesús ie mare rafuena llote. 36 Naísona jaidiaímaiaímo, jinui illanomo ridiaímaiaí. Etiopía imie dinena raite:

—Ero, bie jinui itemo, ¿bue ñe cuedi bautizañellícue?

37 Felipe uai ote:

—O comecimona o ñnoia, cuemona mare.

Naimie uai ote:

—Jesucristodi Jusiñamui Jitonana ñnotícue.

³⁸ Naimie ie carreta jorodate. Iemei jinui dine jaidiiaimaia. Felipedi naimiena bautizade. ³⁹ Jinuimona iaimaia bia, Jusiñamui Joreño Felipena oni uite. Etiopía imie Felipena dane cioñede; iadedi Etiopía imie iobicana jaide. ⁴⁰ Jusiñamui Joreño Azotomo Felipena uite. Cesarea dine naimie jaillanona, naga nairaiaimo Jesús ie mare rafuena llocana uite. Ie mei Cesareamo ride.

9

Saulo creyentena jailla rafue (Hch 22.6-16; 26.12-18)

¹ Naie facaise Saulo cai Nama Cristona ñnotinona eo duere finoacade. Icirillamona, naimacina meineiade. Ie jira Jusiñamui diga nanoca ñairaima dine jaide. ² Judíuai comini naie ñairaima anamo illamona, creyentiana duere finollena, Saulo cartana naimiemo jicajaide. Damascomo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. Fiñiai baia, riñoniai baia, naimacina Jerusalémo atiacade. ³ Cartana ua mei, naimie jaillano, Damascomo iaie ia, ieconi monamona damie naimie abina quetiñote. ⁴ Eniruemo naimie ana uaillano, monamona damie naimiemo lluaana cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadio. ⁶ Naidacai. Damascomo mai jai. Nainomo o finolle rafue omo lloiticue.

⁷ Saulo diga jaidinodi ñaiñeno naidaidimaci. Naie uaina cacaidimaci; iadedi buna cioñedimaci. ⁸ Ieconi Saulo naidacaide. Ie uisi ecoricaillamona, erodatemo, jai buena cioñede. Ie onollina llinocaida, naimiena Damascomo uitimaci. ⁹ Darui amani cioñede. Jusiñamuimo comecina facajamona, guiñede. Jiai jiroñede.

¹⁰ Damascomo Ananiana mameciredimie ite. Naimiedi creyente. Inñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

¹¹ Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jüde. ¹² Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

¹³ Ananías uai ote:

—Nama, diga cominimona naimiena fididicai. Jerusalémo naimiedi marañede rafuena ona ñnotinomo finode. ¹⁴ Jusiñamui diga nanoca ñairaima uai naimiemo ite, nana bene ite creyentiana gaitallena.

¹⁵ Cai Nama naimiemo llote:

—Mai. Naimie jai cue fetoca, judíuaiñedinomo cue rafuena lollena, illaicomínimo cuena lollena, judíuai comínimo cue rafuena jiaí lollena. ¹⁶ Cuen naimie jai inua muidona, naimie nie isoi llegí cacajite. Naimiemo iena lloiticue.

¹⁷ Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itío. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

¹⁸ Ieconí Saulo uisimona lliciaí ico isoide ra uaide. Dane ciuana, naidaide. Ie mei jai bautizaga. ¹⁹ Ie mei jai guite. Dane mairide. Diga irui Damascomo ite creyentiaí diga naimie ite.

Damascomo Saulo illa rafue

²⁰ Judíuai ofiracomo naimie jaillanona, Jesús ie rafuena llofuede. “Jesúdi Jusiñamui Jito” raillanona llofuede.

²¹ Nana naimiema cacadinodi rajicaide. Raitimaci:

—Bimie Jerusalémo Jesúsna innotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús dibeimo jai ite.

²² Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofuia jira, judíuai dinena iena uaitanidimaci.

²³ Digarui illa mei, judíuai comeciaina facadimaci, naimiema meinellena. ²⁴ Naimie aisií raillano, aremona nairai nasiaina sedadimaci. Naiona nasiaina jiaí sedadimaci, naimiema meinellena; iadedí Saulo iena fidiano, ²⁵ naiona creyentiaí naimiema oni uitimaci. Naimie jillobillena, llaigafó jinofebeimo cirigaimo rainajanona, naimiema ana ñuitadimaci.

Jerusalémo Saulo illa rafue

²⁶ Jerusalémo naimie jaide. Naimie ria, creyentiaína nabaiacade; ia naimiema jaciruitimaci. Creyentena naimie jaillana inoñedinomaci. ²⁷ Ie jira Bernabé naimiema Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo lluana jiaí llote. Damascomo naimie ia, Jesúsna jacitaiñeno llofuiana jiaí llote. ²⁸ Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. ²⁹ Iena cacajanona, griego uaina ñaite judíuaídi naimie llofuiana uaitatimaci. Naimiema meineiacadimaci. ³⁰ Creyentiaí iena fidiano, Cesareamo Saulona uitimaci. Ie mei Tarsomo naimiema oredimaci.

³¹ Judeamo, Galileamo, Samariamo nana creyentiaí uri itimaci. Cai Namana inocana jaidimaci. Cai Namana jaciruoicaída jaidimaci. Jusiñamui Joreño naimiaci comeciaina eo ocuiñotade. Ailluena comini creyentiaína jaidimaci.

Eneas jillua rafue

³² Naie facaise diga illanuaímo Pedro macarite. Lidamo ite creyentiaí dine ride. ³³ Nainomo damie biiramo biidena ciode. Naimiedi Eneas. Ocho años tisaillamona biide. ³⁴ Naimiema ciuano, Pedro naimiemo llote:

—Eneas, Jesucristo ona jai jillotate. Mai naidacai. O biira ferí. —Ieconí naimiedi naidadate. ³⁵ Nana Lidamo ite comini, nana Sarónmo ite comini diga, naimiema jilluana ciuanona, creyentiaína jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaiño ite. Griego uaimona oni dobaiñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. ³⁷ Naie fafaise naiñaiño duicotaide. Ie mei fiodaite. Naimaci einamací finua isoi, ie nabaiñiai naiñaiño abina jocodimaci. Iemei aneba ie cuartomo naiñaiñona jonetimaci. ³⁸ Lidamona Jope iaire ite. Pedro Lidamo creyentiai illana fidiano, menamie naimie dine oredimaci. Iaimaiaina llotatatimaci:

—Buena sedaño cai dine raire bi.

³⁹ Ie jira Pedro naidacaida, naie iaimaiiai diga jaide. Naimie ria, aneba ie cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci. ⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raita, Jusiñamuimo jüide. Abido dobaicaida, naiñaiñomo erodate. Raite:

—Tabita, mai rainaicai.

Ieconí naiñaiño uisi oni erodate. Pedrona ciuano, a rainadate. ⁴¹ Naiñaiño onolli llinuanona, a naidanete. Ie mei Pedrodi feciñuaina, jiaie creyentiai diga, uaidote, naiñaiño jai cajenana naimaci cioillena. ⁴² Nana Jopemo ite comini naie rafuena fididimaci. Ie jira ailluena comini cai Namana inotimaci. ⁴³ Jopemo Pedro diga irui Simón jofomo ite. Simóndi ocaina goina cuidoraima.

10

Cornelio comeci iuai meidua rafue

¹ Cornelio raillamiedi Cesareamo ite. Naimiedi capitán. Italiamona bite soldaduai naimie anamo itimaci. ² Naimiedi Jusiñamui llogacinodo jaide. Nana ie comini diga Jusiñamuina inote. Judúuai cominimo ailluena rana jamai fecauide. Jusiñamuimo jüuide. ³ Jitoma ana ia, naimiemo jai nicañilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

⁴ Naimiena Cornelio jaciruioicaida eruaide. Jicanote:

—Nama, ¿buena jitaideo?

Naimie uai ote:

—Jusiñamui o jüacinuaina jai cacade. Jusiñamuidi duerede cominina o canuana jiai feitañede. ⁵ Mai, Jopemo damierie o mullaiaimona oreta, Simón raillamiena atillena. Naimie jiaie mamecidi Pedro. ⁶ Naimiedi igoí cuidoraima jofomo ite. Naie cuidoraima mamecidi Simón. Monailai fuemo naimie jofo ite.

⁷ Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai inote. ⁸ Nana naimiemo Jusiñamui jaienici lluana naimacimo llua mei, Jopemo oretate. ⁹ Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jüllena. ¹⁰ Naimie aimetaite. Guiacade. Guillena comini finodemo, naimiemo nicañilla isoi ite. ¹¹ Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite. ¹² Naiemo jiaiforie eruaide ocainaiiai ite. Diga eniruemo jorode raniai ite. Diga nuicinai jiai ite. Nana Moisés micori firmadoga rille radi ite. ¹³ Naimiedi monamona damie lluana cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micori fimaidoga rille rana jaca riñedicue.

¹⁵ Monamona damie lluana dane cacade:

—Jusiñamui jai fimaidoñede. Ie jira iese lloñeno.

¹⁶ Dacaiño amani iese suide. Ie mei naie radi monamo abido jaide.

¹⁷ Pedro ie comecina facade: “¿Ñiese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride.

¹⁸ Simón Pedrona naie jofomo illana jicanotimaci. ¹⁹ Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode. ²⁰ Naidacaida, ana jai. Naimaci diga buena sedaño mai jai. O dine naimacina oredicue.

²¹ Pedrodi comini dine ana jaide. Raite:

—Omoi jenocamiedicue. ¿Bue ñiaibitomoi billa?

²² Uai otimaci:

—Cornelio raillamie anamo iticai. Corneliomo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina inotimie. Nana judíuai comini dinena naimiedi mareuidimie.

²³ Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiai naimie diga jiai jaidimaci. ²⁴ Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote.

²⁵ Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena. ²⁶ Pedrodi naimiena a naidanete. Raite:

—Mai a naidada. Cue jiai jamai imadicue.

²⁷ Naimie diga ñaiano fo jaidiaimaiai. Ailluena comini ofillana ciode.

²⁸ Naimacimo llote:

—Moisés micori judío imie judíuñedimie nabairillana rairuide. Iena uiñotomoi. Judíuñedimie jofomo illana jiai rairuide. Ie areruido Jusiñamui nicairilla isoidifuenta cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoina cue jearuillana jai jitañede. ²⁹ Ie jira buena sedaño biticue, cuena o uaidua jira. ¿Bue ñellena cuena uaidotomoi? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jidicue. Ieconí Jusiñamui jaienici cuemo bairede. Naimie iniroi quenirede. ³¹ Cuena raite: “Jusiñamui o jiana cacade. Naimiedi duerede cominina o canuana feitañede. ³² Ie jira Jopemo damieriena oreta, Simón Pedrona uaidollena. Jiaie Simón jofomo ite. Simóndi igoi cuidoraíma. Ie jofo monaillai fuemo ite”. ³³ Iemona ona uaidoticue. O comece marena jira, bene bitio. Jai nana bene iticai. Jusiñamui cai diga jiai ite. Cai Nama nana omo lluana cacareillena, bene iticai.

Corneliomo Pedro llua rafue

³⁴ Pedro uai ote:

—Jusiñamui nana comini naimie inuana jitaillana jai uiñoticue.

³⁵ Naga nairaimona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide. ³⁶ Cai judíuai cominimo Jesucristo lluamona, Jusiñamui dibeimo cai illena jai uiñoticai. Iemona Jusiñamui diga cai uri illana jai jiai uiñoticai. Jesúsdi nana cai

Nama. Bie rafuena navui janore fididomoi. ³⁷ Nana Judeamo bie rafue llocana jai jaide. Juan micori bautizajana llua mei, Galileamo Jesús naimie llofuiana tainede. ³⁸ Jusiñamuidi ie Joreñoa Jesús fecade. Jesús Nazaret imie. Naimiemo ie uaina jiai fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. ³⁹ Judíuai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; ⁴⁰ iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiai ciodicai. ⁴¹ Nana comini naimiena cioñedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guticai. Naimie diga jamai jirodicai. Naimiena cai raise uñua jira, Jusiñamui caina fetode, naie rafuena llolena. ⁴² Cominimo bie rafuena llua caimo llote. Jusiñamui Jesúsna jai fetode, naimiena ñnoñedinona duere finollena. Nia fiodañedinona duere finoite. Jai fiodaitinona jiai duere finoite. Ie jira Jesús rafuena llocana jaidicai. ⁴³ Jesús muidona naga naimiena ñnotimie ie marañedicinodi Jusiñamui dotalle. Iena nana Jusiñamui facaina lloraini micoriai jaie llotimaci.

Judíuaiñedino Jusiñamui Joreñoa feñua rafue

⁴⁴ Pedro biena nia llofueia, Jusiñamui Joreño nana bie rafuena cacadinomo bite. ⁴⁵ Iena cuanona, Pedro diga bite creyentiai rajjicaidimaci. Naimacidi judíuai comini. Judíuaiñede cominimo Jusiñamui ie Joreño jai fecaja jira, rajjicaidimaci. ⁴⁶ Jusiñamui Joreño naimacimo illamona, judíuaiñedinodi jiaie nairai uailaido ñaitimaci. Naie ñaia uailaina uñoñedimaci. Jusiñamuimo iobillacinona jai fecadimaci. Pedro diga bitino iena cacajano, rajjicaidimaci. Iemei Pedro raite:

⁴⁷ —Cai feñua isoi, Jusiñamui Joreñoa jiai feñotomoi. Omoi bautizallena jaca budi rairuifeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

11

Jerusalémo Pedrodi naimiemo jai suide rafuena llote

¹ Judeamo ite Cristo oretagano, jiaie creyentiai diga, judíuaiñede comini Jusiñamui uaina feñuana fididimaci. ² Pedro Jerusalémo abido ria, judíuai comini naimiena icidimaci. ³ Jicanotimaci:

—¿Bue ñellena judíuaiñedino jofomo jaidio? ¿Bue ñellena naimaci diga gutio?

⁴ Pedro uai uanona, naimacimo naie rafuena nagacinuaina llote:

⁵ —Jopemo navui cue ia, Jusiñamuimo cue jiaia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride. ⁶ Nainomo eruaidicuemo, diga rana ciodicue: ocainaiaina, eniruemo jorocana jaidinona, nuicinaiaina. Iena ciodicue. ⁷ Monamona damie cuemo llua cacadicue. Raite: “Pedro, naidacaillanona, fajanona, rino”. ⁸ Naie uai oticue: “Nama, dama ite. Moisés micori fimaidoga rille rana jaca riñedicue”. ⁹ Monamona dane cuemo llote: “Jusiñamui iena jai fimaidoñede. Ie jira iese lloñeno”. ¹⁰ Dacaiño amani iese suide. Ie mei monamo nana abido dane jaide.

11 Ieconi daje amani iima cai illa jofomo ridimaci. Cesaremona cue dine damie naimacina orede. 12 Jusiñamui Joreñodi naimaci diga buena sedaño cue jaillena cuemo llote. Cue diga seis creyentiaí jiaí jaidimaci. Cuen auidotimie jofomo jaidicai. 13 Nainomo cai rilla mei, naimie ie jofomo Jusiñamui jaenicina navui ciuana caimo llote. Naie jaenici naimiemo llote: “Jopemo cominina oreta, Simón Pedrona atillena. 14 O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote. 15 Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite. 16 Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreñona birui feiñoitomoi”. 17 Cai Nama Jesucristona cai inuamona, Jusiñamuidi ie Joreñona caimo navui fecade. Naimacimo daje isoi birui fecademo, ¿niese Jusiñamui dibeimo iñeiticue?

18 Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuaiñede comini comeciaí iuai meiduana jai jitaide. Naimie dibeimo naimaci illana jai jitaide. Ie jira naimieri iobidicai.

Antioquíamo ite creyentiaí illa rafue

19 Esteban micorina duere finua facaise, creyentiaí tuficaida jaidimaci. Feniciamo damierie jaidimaci. Chipremo damierie jiaí jaidimaci. Antioquíamo damierie jiaí jaidimaci. Dani judíuai cominimo naimaci rafuena llotimaci; 20 iadedi tuficaidinomona jiaíno Chripremona billanona, Cirenemona billanona, Antioquíamo rillano, judíuaiñedinomo cai Nama Jesús rafuena llotimaci. 21 Cristo uai naimacimo illamona, ailluena comini inotimaci. Cai Nama dibeimo jaidimaci. 22 Jerusalémo ite creyentiaí iena fidiano, Antioquíamo Bernabéna oretatimaci. 23 Naimie ria, naimaci marena illamona, naimiedi Jusiñamui naimacina dueruillana uíñote. Ie jira iobide. Imaci comeciaí ocuiñocana inocana jaillana naimacimo llote. 24 Naimiedi maremie Jusiñamui Joreño nana naimie comecimo namatadimie. Jusiñamuina eo inotimie. Naie facaise ailluena comini creyentiaína jaidimaci.

25 Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. 26 Daje año creyentiaí diga nabairillanona, naimacina llofuetiaímaiaí. Antioquíamo creyentiaídi cristianona nano mameciredimaci.

27 Iemei Jerusalémona Antioquíamo damierie Jusiñamui rafuena lloraini bitimaci. 28 Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaímana illa facaiseconi iese jai suide. 29 Ie jira Antioquíamo ite creyentiaídi, Judeamo ite creyentiaímo, ucubena oretaiacadimaci. 30 Nagamíai imacimo illa dierise ucubena oredimaci. Creyentiaína llofueraímo Bernabé diga, iaímaiaí Saulo diga, naie ucubena oredimaci.

12

Herodes Agripadi creyentiaína duere finua rafue

¹ Naie facaise Herodes railla illaimadi creyentiaimona damieriena gaitatate, naimacina duere finollena. ² Lloebi diga Jacobo cimaiona jaitatate. Jacobodi Juan ama. ³ Ieri judíuai illaicomini iobidimaci. Iena uiñuamona, Herodes Pedrona jiai gaitatate. ⁴ Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaína orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaidimaci. Naie llomenico guilla rafue fuilla mei, comini illa uicomo naimiena meineiacade. ⁵ Ie jira Pedro cárcelmo fiebide; iadedi creyentiaimaimie facaina eo jidimaci. ⁶ Herodes naimiena meineicanarui naio Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci. ⁷ Ieconí cai Nama ie jaienici cárcelmo bairede. Cárcelmo lligaiñote. Naimiena casitallena, jaienici Pedro ciragína jetade. Raite:

—Raíre naidacai.

Ie mei naimie onollimo ite lloeodi oni uaide. ⁸ Jaienici naimiena raite:

—O iniroina jita. O zapatona jiai jita— Iena jitaja mei, naie jaienici dane raite—. O iniroi o abímo ferino. Cue diga mai bí.

⁹ Naie jaienici jinafona Pedro jino jaide. Pedrodi naie jaienici naimiemo finoca rafuena uiñoñede.

—Nacairilla isoi comecina facadicue —raite. ¹⁰ Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaimaimiai. Daje calle jaillanona, jaienici naimiena fainoocaide. ¹¹ Iemona Pedro naimiemo suide rafuena jai uiñoacaide. Raite:

—Cue Nama ie jaienicina uanai oretate. Herodemona cuena jillobitade. Judíuai illaicomini cue meinellena cue sedajamona cuena jillobitade.

¹² Iena jai naimie uiñuano, María jofomo jaide. Maríadi Juan Marcos ei. Jusiñamuimo jillena, naicomo ailluena comini ofidimaci. ¹³ Rillanona calle fuemo ite nasena tute. Daje mullaiño bite. Naiñaiño mamecidi Rode. ¹⁴ Naimie uaiduamona, naiñaiño Pedro uaina uiñote. Iobilla jira, nase econoñede; iadedi abido fo aiside. Pedro nasemo illana llote. ¹⁵ Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

¹⁶ Pedro nasena nia tua jira, nasena econuabitimaci. Econuamona naimiena naimaci ciuamona, rajicaidimaci. ¹⁷ Fo jaillano, Pedro ie onolli jaidide, naimaci llucaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jainomo jaide.

¹⁸ Monaidemo, Pedro nainomo iñena jira, soldaduai rajicaillanona, siadotimaci. ¹⁹ Herodes iena fidiano, naimiena jenotate. Naimiena baiñena, soldaduaímo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

Herodes micorí fodailla rafue

²⁰ Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci dibeimo naimie illena. Herodes eniruemona naimaci guille billa jira, uri illena naimiemo jicanote. ²¹ Naie cominina Herodes feñollena, ie ebirede iniroina jitade. Naimacina feñollena, ie rairabicimo raide. Iemona raíta, rafuena are llote. ²² Iena cacajano, comini ado cuiridimaci:

—Jamai ilmadi ñaiñena. ¡Jusiñamui ñaia!

²³ “Jusiñamuiñedicue” naimie raiñena jira, ieconi cai Nama jaienici naimiëna iracotaitate. Jusiñamuimo iobillacino naimie fecañena jira, aiai naimiëna aite. Iemona naimiedi fodaite.

²⁴ Naie facaiseconi Jusiñamui uai llocana jaide. Ailluena comini iena innotimaci.

²⁵ Iaimaiai uiga ucube illanona, Bernabé, Saulo diga, Jerusalémona Antioquíamo abido bitiaimaiai. Juan Marcos jiai atidiiaimaiai.

13

Bernabéna, iaimaiai Saulo diga, fetua rafue

¹ Antioquíamo creyentiai motomo Jusiñamui facaina lloraini itimaci. Llofueraini jiai itimaci: Bernabé, Simón. Simóndi jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiai ite. ² Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

—Bernabé iaimaiai Saulo diga feto, cuejena. Cue rafuena iaimaiai llollena, iaimaiaina jai fetodicue.

³ Jusiñamuimo naimaci jia mei, Jusiñamui iaimaiaina fetuana naimaci uifnuamona, naimaci onolli iaimaiaimo jonia mei, iaimaiaina naimacimona oni oretatimaci.

Pablo, iaimaiai Bernabé diga, Chipremo illa rafue

⁴ Iaimaiaina Jusiñamui Joreño oretaja jira, Seleuciamo jaidiaimaiai. Nainomona botedo Chipremo jaidiaimaiai. Chipredi uiasi. ⁵ Chipremo ria, Salaminamo judiaiai ofiracuaimo Jusiñamui uaina llofuetiaimaiai. Juan Marcos iaimaiai diga jiai jaide. ⁶ Nana naie uiasimo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraima. “Jusiñamui rafuena lloticue” raite; iadedi taino lloraima. ⁷ Gobernador diga maijuide. Gobernadori Sergio Paulo. Gobernadoridi abina uifnotimie. Jusiñamui uaina cacacana jira, naimie Bernabé iaimaiai Saulo diga uaidote. ⁸ Barjesús ie jiaie mamecidi Elimas. Naie iaimaiai llofuiana uaitate. Gobernador inuana jitaiñede. ⁹ Saulodi jiaie mameci Pablo. Pablo dinena naimiëna eo eruailano, Jusiñamui Joreño nana Pablo começimo namatajamona, ¹⁰ naimiemo llote:

—¡Eo jifueraimadio! ¡Eo marañedio! ¡Taife dibeimo itio! Nana mare rafue dibeimo iñedio. Cai Nama ie mare uanaicinona dobairaidodio. ¹¹ Cai Nama ie uaido ona ja iracotaitaiticue. Nano nigarui useredinona cioiñeitio.

Ieconí naimie cioiñede. Cominina jenuaide, ie onollido llinocaida ie uillena. ¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaite.

Jesús rafuena llocana jaidiiaimaia

¹³ Pafomona botedo Pablo ie nabaiñiai diga jaide. Perge railla nairaimo ride. Perge Panfilia railla eniruemo ite. Juan Marcos iaimaiaina faionocaida, Jerusalémo abido jaide. ¹⁴ Pergemona Antioquíamo jaidiiaimaia. Pisidia railla eniruemo Antioquía ite. Sábadoruimo judíuai ofiracommo jaillano, ana raidiiaimaia. ¹⁵ Moisés micori cuegafuena facaja mei, Jusiñamui facaina lloraini micoriai cuegafuena facaja mei, judíuai ofiraco sedadino iaimaiaimo llotimaci:

—Caimaci, cominimo fue omico lloiacania, mai llono.

¹⁶ Pablo naidadajano, ie onollina jaidide, comini lliacaillena. Raite:

—Jusiñamuina sedallena bene itomoi. Omoimona damierie judíuidomoi. Jiaino judíuaiñedomoi; iadedi judíuai isoi Jusiñamuina sedadomoi. Cue lluomo mai cacarei. ¹⁷ Iemona omoi fueollena, cai jaiagai rafuena lloiticue. Cai judíuai comini Jusiñamuina birui sedadica. Naimiedi cai jaiagaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide. ¹⁸ Jofue iñenanomo cuarenta años naimacina canode. ¹⁹ Canaán eniruemo siete nairaina cuenode. Cai jaiagaimo, naimaci uruijai diga, naie eniruena fecade, naimaci iena. ²⁰ Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitañedimaci. Samuel micoridi Jusiñamui facaina lloraima. ²¹ Illaimana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatiai micorina sedade. ²² Naimie ifo meidollena, naimaci illaimana illena, Jusiñamui David micorina fetode. Naimiedi Isai micori jito. Jusiñamui naimie micorina llote: “Bimie eo cue comecido jaidimie. Nana cue jitaile rafuena finoite”. ²³ Jusiñamui llua isoi, David micori uruiaimona Jesúsdi cai judíuai comini Jilloitaraimana jaide. ²⁴ Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona faionocaida, Jusiñamui dibeimo omoi comeciai iuaillai meido. Iena omoi meidoia, comini iena uinotallena, mai omoi bautizallomoi”. ²⁵ Juan micori ie llofuia fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoieñedicue. Jamai fue isoidicue. Jamai fue cue isoilla jira, naimiena cue canuana uifoeñedicue”.

²⁶ Caimaci, cai eirue jito Abraham micorimona comuidicai. Jusiñamuina birui sedadica. Ie jira cai jeacinomona naimie jilloitalle rafue caimo duide. Jesúsna ñaiticue. ²⁷ Jerusalémo itinodi, cai illaicomini diga, Jesúsna jaie meinetimaci. Naga sábado Jusiñamui facaina lloraini micoriai cuegafuina facadimaci; iadedi iena raise cacaiñedimaci. Jesúsna naimaci meiniamona, Jusiñamui lloraini micoriai cuegafuina jai suitatimaci. ²⁸ Jesús marañede rafuena finoñede; iadedi naimiena meinetimaci. Pilatomo jicanotimaci, naimiena meinellena. ²⁹ Nana Jusiñamui facaina lloraini micoriai cuegafuina suilla mei, cruzmona naimie ana uano, nofici ie raiafomo naimiena jonetimaci; ³⁰ iadedi fiodaillamona Jusiñamui naimiena jillotate. ³¹ Galileamona Jerusalémo naimie diga jaidino naimiena diga icaño ciodimaci. Iemei cominimo naimie rafuena jai llocabitimaci. ³² Jusiñamui cai jaiagaimo jaie lloga rafue jai suide. Iena omoimo ja lloiticoco. ³³ Jusiñamuidi cai jaiagaimo

llogafue birui jai suide. Jesúna cai dine jai orede. Naiena salmos dosmo cuega: “Jusiñamui llote: ‘Cue jitodio. Birui ona Jilloitaraimana itataticue’”.³⁴ Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiai raite: “Davidmo cue llogacinona omoi facaina jaca finojiticue”.³⁵ David micori jiaie salmomo iena cuete: “O mareuidimie jaca rifaillana jitaiñedio” raite.³⁶ Jusiñamui David micorina ñaiñede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide;³⁷ iadedi Jusiñamui Jito abidi ie isoi rifaiñede.

³⁸ ‘Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi maraiñedicinomona omoina jillotañede;³⁹ iadedi Jesúna birui omoi ñnoia, omoi jeacino anamona jilloitomo. ⁴⁰ Abina omoi rairui, Jusiñamui facaina lloraini micoriai jaie cuegafuiai omoimo sui raillano. Jaie cuetimaci:

⁴¹ Ero, Jusiñamui uaina jamaidomoi. Ieri rajjicaidomoi; iadedi faifidomoi.

Omoi motomo siño mare rafuena birui finodicue.

Bu omoimo iena iese lloia, bie rafuena ñnoñeitomoi.

Ie isoi omoimo suiñellena, Jesúna birui omoi mai ñno.

⁴² Ie mei Pablo llícaide. Iaimaiaí jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane llollena.

⁴³ Comini jino jailla mei, ailluena comini Pablo, iaimaiaí Bernabé diga, ñaicana jaidimaci. Judíuai iese jaidimaci. Judíuaiñedinó iese jiai jaidimaci. Naie judíuaiñedinodi judíuai isoi Jusiñamuina ñnotimaci. Pablo, iaimaiaí Bernabé diga, ñaicana jaillanona, naimacimo llotiaimaiaí:

—Jusiñamui omoina duenaillana omoi jai uíñua jira, Jesús rafuena mai omoi ñno.

⁴⁴ Jiaie sábadoruimo ailluena comini ofidimaci, Jusiñamui uaina cacareillena. ⁴⁵ Ailluena cominina ciuano, judíuai comini dinena eo uradoidimaci. Pablo joreñona ñaitimaci. Naimie llofuiacinuaina uaitatimaci; ⁴⁶ iadedi Pablo, iaimaiaí Bernabé diga, jaitaiñeno llofuetiaimaiaí:

—Omoimo Jusiñamui uaina nano lloiacadicoco. Iena jitaiñedomoi. Jusiñamui diga omoi jaca illena jitaiñedomoi. Ie jira judíuaiñedinó dine jaiticoco. ⁴⁷ Iese Jusiñamui jaie llote:

Judíuaiñedinomo ona oretaiticue, naimacimo cue rafue llollena, naga eniruemo ite cominimo jeacinomona jilluana llollena.

⁴⁸ Iena cacajano, judíuaiñedinó iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci. ⁴⁹ Nana bie eniruemo cai Nama Jesús uaina llocana jaide; ⁵⁰ iadedi judíuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniaí mameciaí are soride. Illaicomini fuemo faicana uitimaci. Ie jira Pablo, iaimaiaí Bernabé diga, duere finodimaci. Naimaci illanomona iaimaiaina jino dotadimaci; ⁵¹ iadedi jioracuai iaimaiaí eillimona jaidinotiaimaiaí, naimacimo ite jeacinuaina naimaci uíñollena. Ie mei Iconio railla nairaimo jaidiaimaiaí; ⁵² iadedi Antioquíamo ite creyentiaí eo iocire itimaci. Jusiñamui Joreño nana naimaci comecimo namatade.

14

Iconiomo Pablo, iaimaiai Bernabé diga, illa rafue

¹ Iconiomo judúuai ofiracomo, iaimaiai Antioquíamo jailla isoi, jaidiaimaiai, Cristo rafuena duere llotiaimaiai. Ie jira ailluena comini creyentiaina jaidimaci. Judúuai cominimona ailluena inotimaci. Judúuaiñede cominimona ailluena jiai inotimaci; ² iadedi inoñede judúuaidi judúuaiñedinona fuemo faitimaci. Naimacimo creyentiaina tainona llotimaci; ³ iadedi nainomo are fiebidiaimaiai. Cai Nama facaisena jacitañeno llotiaimaiai. Cai Nama Jesús iaimaiaina siño rafuena finotate. Ie jira cominidi cai Nama Jesús naimacina dueruillana fididimaci; ⁴ iadedi nana comini naiena inoñedinomaci. Comeciaina daje isoi loisiñede. Damierie judúuai facaisena itimaci. Damierie naie iaimaiai facaisena itimaci. ⁵ Judúuaiñedinodi, judúuai diga, naimaci illaicomini diga, naie iaimaiaina duere finoacadimaci. Noficina iaimaiaina fairigiacadimaci. ⁶ Iena fidiano, Licaoniammo ite nairaimo aisicano jaidiaimaiai. Litra railla nairaimo jaidiaimaiai. Derbe railla nairaimo jiai jaidiaimaiai. Naie nairai ecimo ite eniruemo jiai jaidiaimaiai. ⁷ Nainommo Jesús ie mare rafuena llofuetiaimaiai.

Listramo iaimaiaimo suilla rafue

⁸ Listramo damie tisitaite. Nanomona naimie iese jeicia jira, jaca macariñede. ⁹ Pablo llofuiana naimie raise cacajamona, “Jusiñamui cuena jillotarede” raillanona, tisitaitimie inote. Pablo dinena naimiemmo eruailano, naimie inuana uiñote. ¹⁰ Naimiemmo ado llote:

—A naidada.

Iemei daiacaida naimie macarite. ¹¹ Ailluena comini Pablo finoca rafuena cidimaci. Naimaci uaido ado cuiriidimaci:

—Iñiaiai isoi Jusiñamui cai dine bite.

Naie cominidi Júpter railla jusiñamuina sedauidimaci. Mercurio railla jusiñamuina jiai sedauidimaci. ¹² Ie jira Bernabé mamecidi jiaicina jonega Júpter. Pablo mamecidi jiaicina jonega Mercurio, naimie ñairaimana illa jira. ¹³ Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretiaina abina finoduanona, Júpter facaina ñairaima naimacina atide. Ailluena comini diga bite. Juraretiaina fallena, “Naie iaimaiaidi cai Jusiñamui” raillano, iaimaiaimo fecacadimaci. ¹⁴ Iaimaiai iena cuanona, “Comini marañede rafuena finoacade” raillano, iaimaiai iniroina cuaranotiaimaiai. Comini motommo aisicana jaidiaimaiai. Ado llotiaimaiai:

¹⁵ —Nabaiñiaiai, ¿bue ñellena cocomo iese finodomo? Jamai imadicoco. Omoi isodicoco. Jusiñamuina omoi sedallena, jamai rana omoi sedañellena, mare rafuena omoimo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiai finode. Nana nainommo ite rana jiai finode. ¹⁶ Jai Jusiñamuidi nana omoi judúuaiñedino omoi jitailla rafuena finuana rairuiñede; ¹⁷ iadedi naimie finoca rafuemonna naimiena uiñoredomoi. Omoi facaina mare rafue naimie finocabide. Noci deitate. Omoi riarra sicutate. Omoimo guille itatate. Iemona omoi comeciaina caimare itatate. Iemona Jusiñamuina uiñoredomoi.

¹⁸ Iese Pablo llote; iadedi iaimaiaimo juraretiaina fecajana jaca fainonocaiacañedinomaci. ¹⁹ Nano nigarui illamona, Pisidiammo ite Antioquíamona judúuai comini bitimaci. Iconiomona jiai bitimaci. Judúuai

dinena fuemo faiamona, naimaci dibeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fiodaitimiena naimie eruaila jira. ²⁰ Naimiena iese faionocaila mei, creyentiai naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide. ²¹ Naie nairaimo Jesús ie mare rafuena llotiiaimaiai. Diga comini creyentiaina jaidimaci. Ie mei Listramo abido jaidiiaimaiai. Iconiomo abido jiai jaidiiaimaiai. Pisidiamo ite Antioquíamo jiai abido jaidiiaimaiai. ²² Creyentiai comeciaina ocuifnotadiiaimaiai. Cristona nia inuana llotiiaimaiai. Raitiiaimaiai:
—Jusiñamui dine cai nia riñenia, eo duere sefuiticai.

²³ Naga creyentiai illanomo creyentiaina sedarainina fetodiiaimaiai. Guiñeno Jusiñamuimo jia mei, guiñena facaise mei, naimiena naimaci jai inua jira, cai Nama illa anamo naimacina faionocaidiiaimaiai.

Siriamo ite Antioquíamo abido jaidiiaimaiai

²⁴ Pisidiamo jaillanona, Panfliamo ridiiaimaiai. ²⁵ Pergemo Cristo uaina llua mei, Ataliamo jaidiiaimaiai. ²⁶ Nainomona botedo Siriamo ite Antioquíamo abido ridiiaimaiai. Nano naie iaimaiai illanomo abido ridiiaimaiai. Nainomona iaimaiai navui nia jaiñenia, creyentiai dinena Jusiñamui iaimaiaina duenaillana uiñuamona, iaimaiaina oredimaci. Jusiñamui rafuena iaimaiai lollena, iaimaiaina oredimaci. Naie maijia fuilla jira, jai abido bitiaimaiai. ²⁷ Iaimaiai rilla mei, creyentiaina ofitaiiaimaiai. Nana Jusiñamui iaimaiaimo finoca rafuena llotiiaimaiai.

—Jusiñamuidi judíuaiñedino naimiena inuana jai jitaide —llotiiaimaiai.
²⁸ Dinomo creyentiai diga are itiaimaiai.

15

Jerusalémo Moisés micori llogacinona siadua rafue

¹ Antioquíamo Jerusalémona janore comini billano, creyentiaina iese llofuetimaci:

—Moisés micori caimo llua isoi, omoi abina omoi detatañenia, jeacinomona jillobiñeitomoi.

² Ie jira creyentiai uri iñedimaci. Pablo, iaimaiai Bernabé diga, Jerusalémona bitino llofuiana eo uaitatíiaimaiai. Ie muidona creyentiai dinena iaimaiaina, jiaie creyentiai diga, Jerusalémo jaillena fetodimaci. Cristo oretagano diga, Jerusalémo ite creyentiaina sedaraini diga, bie rafuena siadoiacasite. ³ Creyentiai naimacina oretaja mei, Fenicia railla enirue dibeido jaidimaci. Ie mei Samaria railla enirue dibeido jiai jaidimaci. Creyentiai illanuaimo llofuecana jaidimaci. Judíuaiñedino creyentiaina jai jaillana naimacimo jiai llotimaci. Ie jira naie creyentiai caimare itimaci.

⁴ Jerusalémo ria, creyentiaidi naimacina feiñotimaci. Cristo oretagano itimaci. Creyentiaina sedaraini jiai itimaci. Naimacimo nana Jusiñamui iaimaiaimo finoca rafuena llotiiaimaiai. Cristo rafuena iaimaiai llofuamona, judíuaiñedino Cristona inuana llotiiaimaiai. ⁵ Iena cacajano, fariseuai dibeimo ite creyentiaimona jaino naidaita raitimaci:

—Moisés micori llogacinuaina inuamona, judíuaiñede creyentiai abina diana jitaidicai.

⁶ Bie rafuena siadollena, Cristo oretaganodi, creyentiai sedaraini diga, danomo ofidimaci. ⁷ Iena are siadua mei, Pedro naidacaillano, raite:

—Amatiai, judúuaiñedinodi cuemona Jesús ie mare rafuena cacailena, jaie omoimona Jusiñamui cuena fetode. Iena uiñotomoi. Cue llofuiamona ñnotimaci. ⁸ Nana comini comeciaina naimie uiñuamona, judúuaiñedino naimiena ñnuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judúuaiñedinona jitaillana jai uiñoticaí. ⁹ Jusiñamuidi naimacina cai isoi jai feiñote. Naimiena naimaci ñnua jira, naimie naimaci comeciainona jeacinona jai dotade. ¹⁰ ¿Bue ñellena Jusiñamuina ñnoiacañedomoi? Jusiñamui jitaillacino omoi finoacaiñena jira, naimie omoína duere finuana jitaídomoi. Cai jaiagai Moisés micori llogacinodo jaidimaci; iadedi iena raise ñnoñedimaci. Nana ie llogacinona jaca finonidimaci. Iedo jaie jiai jaidicaí; iadedi iena jiai finonidicaí. ¿Bue ñellena iedo birui cai jaillana jitaídomoi? ¹¹ Jesucristo caina duenaila jira, cai jeacinomona jilloiticaí. Judúuaiñedino cai isoi jilloitimaci.

¹² Iena cacajano, nana ofidino uai llícaidimaci. Iemei Bernabé lluana cacadimaci. Pablo lluana jiai cacadimaci.

—Jusiñamui judúuaiñedino motomo cocona siño rafuena finotate — llotiaimaiaí.

¹³ Iaímaiaí ñaía mei, Jacobo raite:

¹⁴ —Amatiai, cuemo cacarei. Judúuaiñedinomo Jesús rafue Simón Pedro nano lua rafuena jai cacadicaí. Creyentiaína naimaci jaillena, Jusiñamui naimacina jai fetode. ¹⁵ Jusiñamui facaina lloraini micoriaí iena jaie cuetimaci:

¹⁶⁻¹⁸ Jusiñamui jaie llote: “David micori illaíma isoi illaímana illena, cue jitona ico oretaiticue.

David jicori jito illaímana birui iñede; iadedi David micori ifomo illaímana cue Jito iite.

Iemona judúuaiñedino cuena ñnoitimaci.

Naimaci cue cominina jaillena jiai jitaídicue.

Iena cue llua jira, iena finoitícue” llote.

¹⁹ Ie muidona cue comeci raite: Judúuaiñedinomona creyentiaína jaidinona duere finoñeiticaí. ²⁰ Naimacimo rabena oreta, dama buena llollena: “Jiraraimo fecaca llicisina riñeno. O aiñede riño diga iñeno. O iniñede ñma diga iñeno. Llerinoga rana riñeno. Diruena jiai riñeno”.

²¹ Jaiemona naga sábado naga judúuai ofiracomo judúuidi Moisés micori cufafuiaímona naie isoide lletarafuena cacadimaci. Ie jira naie isoide rafuedo ña jaiticaí; iadedi jiaie Moisés micori lletarafuedo jaiñeiticaí.

²² Ie mei Cristo oretaganodi, creyentiaína sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiaí comeciaina facajano: “Jee” raitimaci. Pablo, iaímaiaí Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baífemo rafuena baitadiaímaiaí. ²³ Rabena cuetimaci, iaímaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoímo cueticaí. Jerusalémo iticaí. Cristo oretaganodicaí. Creyentiaína sedarainidicaí. Omoidi cai amatiai. Omoímo jai cueticaí. Judúuaiñediomoi; iadedi cai amatiaídomoi. ²⁴ Cai motomona jiaie comini naimaci llofuiado omoína uri itatañenana fididicaí. Omoi jeacinomona omoi jilloillena, Moisés micori llogacinodo omoi jaillana jitaídicaci. Ie jirari omoi comeciaini rucaicuerite. Naimacina oretañedicaí. ²⁵ Danomo cai ofilla

mei, menamiēna fetodicaī, omoimo oretallena, Bernabé, iaīmaiaī Pablo diga. Bernabéna isiruiticaī. Pablona jiaī isiruiticaī. ²⁶ Iaīmaiaī caī Nama Jesucristo muidona navui niadedi fioidaitiaīmaiaī. ²⁷ Ie jira Judas, iaīmaiaī Silas diga, oretaiticaī. Omoimo bie rabe cuja isoi lloitiaīmaiaī. ²⁸ Jusiñamui Joreño caimo illamona, bie rafuena omoimo lloiticaī. Ailluena rafue omoi finuana lloñeiticaī. Dani bie rafuena finojitomoi. ²⁹ Jiraraimo fecaca rana riñeno. Diruena riñeno. Llerinoga rana riñeno. O aññede riño diga iñeno. O iniñede iima diga iñeno. Iese omoi iñenia, marena iitomoi. Macaibaite” cuetimaci.

³⁰ Ie mei Antioquíamo jaidimaci. Ailluena comina ofitaja mei, naimacimo cartana fecadimaci. ³¹ Iena facajano, naie llucanori iobidimaci. ³² Judas Jusiñamui facaina lloraima. Silas daje isoide. Diga rafuena creyentiaimo llofuetiaīmaiaī. Naimaci comeciaina jiaī ocuiñotadiaīmaiaī. ³³ Diga irui nainomo illa mei, iaīmaiaīna oretatinomo creyentiaī iaīmaiaīna marena abido oretatimaci.

³⁴ Nainomo Silas comecina facajano, fiebide. Ie jira Judas dama abido jaide. ³⁵ Antioquíamo Pablo, iaīmaiaī Bernabé diga, caī Nama Jesús rafuena llofuellena fiebidiaīmaiaī. Diga comini jiaī iese llofuetimaci.

Pablo jiaie eniruemo ite creyentiaī dine dane jailla rafue

³⁶ Diga irui illa mei, Pablo Bernabémo llote: p —Naga navui coco llua nairaimo creyentiaī dine abido mai coco jai. Caī Nama ie mare rafuena dane lloiticoco. Nie isoi naimaci illana jibuiticoco.

³⁷ Bernabédi, naie iaīmaiaī diga, Juan Marcos uiacade. ³⁸ Panfiliamo iaīmaiaīna navui Juan fañonocaide. Iaīmaiaī diga llofuellena jaiñena jira, Pablo naimiēna dane uiacaiñede. ³⁹ Riire ñaitiaīmaiaī. Comecina daje isoi lloñediaīmaiaī. Ie jira dajena jaiñediaīmaiaī. Bernabé Juan Marcona uillanona, Chipremo aillue botedo jaidiaīmaiaī. ⁴⁰ Ie mei Pablo Silana uite. “Jusiñamui omicono canoite” creyentiaī dina raillanona, iaīmaiaīna oredimaci. ⁴¹ Siria railla eniruemo Jesús rafuena llocana jaidiaīmaiaī. Cilicia railla eniruemo jiaī llocana jaidiaīmaiaī. Creyentiaī comeciaina ocuiñotacana jaidiaīmaiaī.

16

Timoteo iaīmaiaī diga jailla rafue

¹ Nano Derbemo Pablo, iaīmaiaī Silas diga, ridiaīmaiaī. Iemona Listramo ridiaīmaiaī. Nainomo Timoteo railla creyente ite. Naimie eidi judía iñaiño. Jiaī creyente. Ie moo micoridi griego imie. ² Listramo ite creyentiaī, Iconiomo ite creyentiaī diga, naimiēna: “Mare” raitimaci. ³ Pablodi Timoteona uiacade, naimie diga jaillena. Timoteo moo micori griego imiēna jira, naimie abina nia detatañede; iadedi nainomo ite judiaī illa jira, Moisés micori llua isoi, Pablo Timoteo ie abina dete. Judiañedimie naimaci motomo ia, naimaci motomo inide. ⁴ Naga nairaimo naimaci jaillanona, Jerusalémo siadogacinona creyentiaimo llote. Jerusalémo Cristo oretagano, creyentiaīna sedaraini diga, navui naicinona siadotimaci. Creyentiaī naie lluaña ñnollena, iena llocana jaidimaci. ⁵ Ie jira creyentiaī ñnocana jaidimaci. Nagarui ailluena comini creyentiaīna jaidimaci.

Pablo nicairilla ra isoidena ciua rafue

⁶ Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci. ⁷ Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide. ⁸ Ie jira Misiamona ecido jaillano, Troas railla nairaimo jaidimaci. ⁹ Nainomo naie naiona Pablo nicairilla ra isoidena ciode. Daje Macedonia imiedi uicomo naidaita naimiemo jica-jicanode. Raite: “Macedoniamo ruica o bi. Caina canuaiibi”. ¹⁰ Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uifoticue, iena omo cuellena. Macedoniamo ruica dine cai jaille botena jenodicai. Comecina facadica: “Jusiñamuidi caina uaidote, nainomo ie mare rafuena cai lollena”.

Filipomo illa rafue

¹¹ Ie jira Troamona Samotraciamo monaillaido atona ie mamedo jaidicai. Ie icotidiruido Neápolis railla nairaimo ridicai. ¹² Dinomona Filipomo duide naisodo jaidicai. Macedoniamo ite. Naie enirue fa-
caise ie nanoca nairai Filipos. Naie nairaidi Romamona bitino nairai. Diga irui nainomo iticai. ¹³ Sábadoruido naie nairaimona nasedo jino jaidicai. Comecina facajamona: “Dinomo nibai comini oficabidimaci, Jusiñamuimo jüllena”, ille fuemo jaidicai. Nainomo dañaiñorie riñoniai billanona, dinomo ana raicicai, naiñaiñuaimo Cristo rafuena lollena. ¹⁴ Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluaña feiñotade. Naie facaise creyentena jaide. ¹⁵ Naiñaiño ie jofomo itino diga bautizaja mei, caimo llote:

—Cuedi cai Namana cue jai iñuana omoi uifñuamona, cue jofomo mai bi, nainomo omoi fiebillesa. —Duere caina uai-uidode.

¹⁶ Jusiñamuimo jiranomo jairuido jaidicaimo, daje jitañomo dafaifidicai. Naiñaiñodi jainomona ibacañaiño. Janaba anamo naiñaiño jai ite. Iemona naiñaiño jairuido sulle rafuena llouide. Naie rafuena lluaña ibatajano, naiñaiño namaiaidi ailluena ucubena feiñouidimaci. ¹⁷ Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llo-
cabitimaci.

¹⁸ Diga irui naiñaiñodi iese cuiri-cuirisoide. Icirillamona, Pablo abido doбайдacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño lluañomona ucubena jai oñenana naiñaiño namaia jai uifñua jira, Pablo, iaiaiaia Silas diga, gaitadimaci. Iaiaiaiaina plazamo illaicomini illanomo sonocana uitimaci. ²⁰ Dinomo iaiaiaiaina illaicomini dine atidimaci. Iese iaiaiaiaina llogidotimaci:

—Naie iaiaiaiaidi cai nairaina uri itatañediaiaiaia. Iaiaiaia judíuai comini. ²¹ Romanuai cominina cai illa jira, iaiaiaia llogacinuaina cai iñoia, iedo cai jaia, marañede.

²² Iena cacajano, nana comini naie iaiaiaiaina fanaisitimaci. Illaicominidi naie iaiaiaia iniroina cuaranuanona duiñode. Rasi diga, iaiaiaiaina diga icaiño fatatatimaci. ²³ Iaiaiaiaina eo faja mei, cárcelmo jonetimaci. Cárcelna sedaraimamo iaiaiaiaina raise sedallena llotimaci.

24 Iese llua jira, iaímaiaína llaveracomo fo iaímaiaína uite. Donoramo iaímaiaí eilliaí ñuitajano, raise donode.

25 Naíona dafernoí facai Pablo, iaímaiaí Silas díga, Jusiñamuimo ifuerillacinona ro-rodiaímaiaí. Jiaí júdiaímaiaí. Jiaíe llavecano naíena cacadímaci. 26 Jamai ebena illacinomona ñuisañodi suide. Cárcel illanodi jaidisite. Naíe facaiseconi nana nasiadi ecocorinaite. Ie dacaiño nana llavecano imaci donua radi oni ecoride. 27 Cárcelna sedaraíma casidemo, cárcel ie nasiá ecocorinaillana cíode. “Llavecano jai aisidímaci” raillamo naimie comecina facade. Ie jira ie lloesi aifñoicaída, dama abí faitaacade. “Illaícominí bí, ¿bue lloiticue?” raillamona comecina facade; 28 íadedí Pablodí eo riire cuirioide:

—¡O abína dama meineño! Bene nana iticaísa.

29 Lamparína atillena cárcelna sedaraíma jícajanona, jarire fo jaide, Pablo iaímaiaí Silas díne. Jacinaillano, naimie abidí docaillamona, iaímaiaí uicomo caíñici ífodo ana raínadate. 30 Iaímaiaína jino ua meí, nai iaímaiaímo jícanote:

—¿Buena fínojitícue, cue jeacinomona cue jilloillena?

31 Uai otiaímaiaí:

—Coco Nama Jesúsna íño. Iese na o jofomo ite cominí díga o jilloillesa.

32 Iemeí naimíena Jesús ie rafuena llofuetiaímaiaí, nana ie jofomo itino díga. 33 Naíe facaise iaímaiaí bofellañoña jocode. Iemeí naimíedi, nana ie cominí díga, bautizaga. 34 Guillena, ie jofomo naíe iaímaiaína uite. Jusiñamuina jai íñua jira, na ie cominí díga, naimie caímare ite.

35 Ie oni monaidemo, illaícominídí dajerie policíana cárcelmo oretatímaci, nai iaímaiaína jino orellena. 36 Cárcel sedaraímadí naíe rafuena Pablomo llote. Raite:

—Omíco jaillena, illaícominídí omícona oredímaci. Mai marena jai.

37 Íadedí policíamo Pablodí llote:

—Cocodí romanuaí cominídí coco; íadedí cocomo ite rafuena raise uifñoño cocona marefodo fatímaci. Cárcelmo cocona jonetímaci. Jai bainino cocona jino oretaiacadímaci. Iese jino jaiñeítí coco. Naimacímomo llono: “Cocona jino ollena bí”.

38 Illaícominímomo policías naíena lluaíbitemo, illaícominídí naíena cacaíjanona, eo jacinaite, romanuaí cominína iaímaiaína jira. Cai nanoca illaícominídí romanuaí nairaí cominína jamai ebena duere fínuana rairuidímaci. 39 Ie jira naíe iaímaiaí díne illaícominídí jaidímaci, iaímaiaína: “Dama díno iesede” raillena. Jino atía meí, nairaímona jino iaímaiaí jaillena oredímaci. 40 Cárcelmona jino billano, Lidia jofomo fo jaidiaímaiaí. Creyentiaína cíuano, naimací comecíana ocuifñotallena, naimacína dane llofuetiaímaiaí. Ie meí oni jaidiaímaiaí.

17

Pablo, iaímaiaí Silas díga, Tesalónicamo illa rafue

1 Anfípólís railla nairaímomo macaritiaímaiaí. Apolonia railla nairaímomo macaritiaímaiaí. Ie meí Tesalónica railla nairaímomo ridiaímaiaí. Dínomo júdíuaí ofiracodí ite. 2 Pablo fíbilla ísoí, nainomomo fo jaide. Daje amaní sábadoruímomo Jusiñamuina cuegafuaímona naimacína llofue. 3 Iese naimacína llofue:

—Cristo llegí cacacite. Fiodaillamona naimie jilloite. Naimíedi Jesús.

4 Naíena cacadinomona ailluena ínotímaci. Pablo, Silas iaímaiaí díbeímo jaidímaci. Jusiñamuina ínote grieguaimona ailluena cominí

creyentiaina jaidimaci. Ie emodoconi ailluena nanocañaiñuaidi creyentiaina jiai jaidimaci; ⁵ iadedi judíuaidi uradoillano, jamai itinomona eo maraiñede iñiaina uaiduanona, ailluena cominina ofitatimaci. Ie jira naie nairai uri iñedimaci. Iaimaiaina comini uicomu uillena, Jasón jofomo binaisite. ⁶ Iaimaiaina baiñenano, Jesóna, jiaie creyentiaí diga, illaicomini illanomo aiñoicaida uitimaci. Cuiñisite:

—Naga nairaimo cominina uri itatañediamaiaí. Benomo jai bitiaíamaiaí. Jai benomo billanona, Jasón ie jofomo iaimaiaina feiñote. ⁷ Cai nanoca illaima ie llogacinona jai iñoñedimaci. Ie anamo jai iacaiñedimaci. Raitimaci: “Jiaie illaima anamo iticai. Jesús raillamie anamo iticai”.

⁸ Judíuai iese llumona, cominidi uri iñedimaci. Ilaicominidi jiai uri iñedimaci. ⁹ “Naie iaimaiaí dane biñeitiaíamaiaí” illaicominimo creyentiaí raillano, illaicominidi Jasón jiaie creyentiaí diga, jino oretatimaci.

Bereamo Pablo, iaimaiaí Silas diga, illa rafue

¹⁰ Naie naio creyentiaídi Pablona, iaimaiaí Silas diga, Bereamo raire oretatimaci. Dinomo rillano, judíuai ofiracomo jaidiaíamaiaí. ¹¹ Nainomo ite judíuai eo mare. Tesalónicamo ite judíuai isoñedimaci. Bereamo itinodi Cristo rafuena iocire feiñotimaci. Niedi uanaicini raillanona, nagarui Jusiñamuina cuegafuinaína facadimaci. ¹² Ie jira naimacimona ailluena iñotimaci. Judíuaiñedinomona ailluena nanocañaiñuaidi iñotimaci. Ailluena iñiaí jiai iñotimaci; ¹³ iadedi Bereamo Pablo Jusiñamui ie uaina jai llwana Tesalónicamo ite judíuaidi fidiano, dinomo jaidimaci. Cominina fuemo faillena, jaidimaci. ¹⁴ Naie facaise creyentiaídi Pablona oni oretatimaci. Monailai fuemo duide naisona oretatimaci. Silas, iaimaiaí Timoteo diga, fiebidiaíamaiaí. ¹⁵ Pablo uigamací naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaimaiaí Timoteo diga, raire cue dine billesa” llono.

Atenamo Pablo illa rafue

¹⁶ Atenamo iaimaiaí rillena Pablo sedademo, naie nairaimo ailluena jiraraiaina ciode. Iena cianona, Pablo comecidi jeareficaide. ¹⁷ Naiena ciua mei, judíuai ofiracomo judíuai diga coniniri Jusiñamui rafuena siadote. Jusiñamuina jai iñote judíuaiñedino diga coniniri iena jiai siadote. Plazamo nagarui jamai itino diga coniniri iena jiai siadote. ¹⁸ Jamai comecina facadinomona damierie naimie diga jiai ñaitimaci. Epicúreo railla rafuedo jaisoidimaci. Estoico railla rafuedo jiai jaisoidimaci. Damierie naimacimona raitimaci:

—¿Buena nai ñaillareuidimie caimo lloiacade?

Jiaino raite:

—Jiaie nairai jusiñamuillaicaímo lloiacade isoide.

Jesús fiadaillamona jilluana Pablodi llouilla jira, iese raitimaci. ¹⁹ Ie jira naimiena naimaci siadouillanomo uitimaci. Naie illano Areópagona mameciredede. Jicanotimaci:

—¿Nie isoide o comocinuai? Caimo llono, cai uiñollena. ²⁰ Eo feiredicinuaina cacadicaí. ¿Buena nai llofuaiacinodi llote? Iena uiñoiacadicaí.

²¹ Nana Atenamo ite comini, jiaie illanomona bitino diga, jamai ailli como imaci fidia rafuena ñaiñaidimaci. Jamai ailli fidia rafuena cacacadimaci. Jiaie rafuena finoñedimaci.

²² Jicanua mei, Areópago railla illanomo Pablo naidacaida llote:

—Atenas imaci, omoimo rafuena lloiacadicue. Omoi jusiñamuillaina eo sedacabidomoi. ²³ Cue macarillamona, omoi jusiñamuillaina sedaja jiraraina ciodicue. Daje jirarai abimo iese cuega: “Uiñoñega Jusiñamuina sedadica!” cuega. Uiñoñeno naimiēna sedadomoi. Ja omoimo naimiēna lloiticue. ²⁴ Jusiñamui biniēna jaie finode. Ie emodoconi Jusiñamuidi nana biniemo itinona jiai finode. Naimiedi mona ie Nama. Enirue ie Nama. Ie jira iima finoca jofomo naimie iñede. ²⁵ Naga jitaille rana naimiemo illa jira, naimiēna canonicai. Naimie nana cominina comuitate. Jiai nagarui jafaici cai uadi caimo iga. Uanai nana rana caimo iga. ²⁶ Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiai jonega. ²⁷ Iese jonega, naimaci naimiēna jenollena. Jenuano, nibai naimiēna baitimaci. Caimona naimie are iñede. ²⁸ Naimie jaca illa jira, cai jiai iticai. Jiai cajedica. Ie isoi omoi rafue lloraini jiai llotimaci: “Naimie ie uruaidica!”.

²⁹ Naimie caina comuitaja jira, Jusiñamuidi jirarai isoiñedena uiñotica. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Iima ie onolli diga finoca ra isoiñede. ³⁰ Cominidi abi uiñoñeno jeacino jaie finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciai iuai meidollena jitaide. ³¹ Naimaci comeciai iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúsna naimie jai jilloitaja jira, iena uiñotica.

³² Fiodaillamona Jesús jilluana cacajano, damierie jaisitimaci. Ieconi jianodi raite:

—Jiairuido o lluaana dane cacajitica.

³³ Iemei naimaci motomona Pablo jino jaide. ³⁴ Naie cominimona damierie naimie dibeimo jaidimaci. Inotimaci. Naimacimona damie Areópagomo siaduidimie. Ie mamecidi Dionisio. Jiaiñaiño inote. Naiñaiño mamecidi Dámaris. Daje facaiseconi jiaie cominidi inotimaci.

18

Corintomo Pablo illa rafue

¹ Atenamona Corinto railla nairaimo Pablodi jaide. ² Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaimaia. Romamona Claudio nana judíuai cominina jai oretate. Ie jirari bitiaimaia. Roma ie nanoca illaimadi Claudio. ³ Pablo iaimaia daje isoi maijia jira, Pablo iaimaia jofomo fiebide. Iaimaia conima diga maijide. Chivos itirai ie nilla iniroina tiforisoidimaci, naiemona jofona finollena. ⁴ Naga sábadoruimo judíuai ofiracomo llofuede, judíuaina inotallena, judíuaiñedinona iena jiai inotallena. ⁵ Macedoniamona Silas, iaimaia Timoteo diga, bitemo, Pablodi nagarui Jusiñamui uaina llofueuide. Judíuaimo: “Jesúdi cai jilloitaraima” llouide; ⁶ ia naimie uaina inosiñedimaci. Jiai naimie jinafomo jeare ñaitimaci. Naimaci comeciai jeare cúa jira, Pablo ie iniroina jaidinote, naimacina raillano:

—Dani omoi muidona Jusiñamui omoina duere finojite. Cue muidonañeite. Jai judíuaiñedino dine jaiticue, naimacina cue llofuellena.

⁷ Iese raillano, oni jaide. Justo jofomo jaide. Naimiedi Jusiñamuina ñnoudimie. Ie jofo judíuai ofiraco ecimo ite. ⁸ Crispodi, nana ie jofomo itino diga, cai Nama Cristona ñnote. Naimiedi judíuai ofiraco ie sedaraima. Ailluena Corintomo ite comini creyentiaina jaidimaci. Ie mei naimacidi bautizaga. ⁹ Daje naiona Pablo nicaírilla isoidemona, Pablomo cai Nama Jesucristodi llote:

—Mai jaciruiñeno. Faicaíñeno cue rafuena llocana jai. ¹⁰ O diga iiticue. Budi ona maraiñeno finoñeite. Bie nairaimo ailluena cominidi cue dibeimo jaitimaci.

¹¹ Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

¹² Corinto railla nairaidi Acaya railla eniruemo jainaiaide. Naie facaise Acaya ie gobernadori Galión. Naie facaiseconi damierie judíuai comini Pablona faiacadimaci. Galión dine naimiena uitimaci. ¹³ Raitimaci:

—Cai illaima llogacino isoi bimiedi cominina Jusiñamuina sedallena llofueñede.

¹⁴ Pablo uai oiacademo, judíuaimo Galióndi llote:

—Judíuai, cacarei. Naimie maraiñede rafuena finodena, naimie omoina jifuetena, omoi lluomo nia cacarefidicue; ¹⁵ iadedi jamai naimie uailai cuemo llotomoi. Omoi usumatai micoriai mameciai cuemo jiai llotomoi. Omoi einamaci llogacinuaina cuemo jiai llotomoi. Iena omoi coniniri siadotomoi. Bie isoide rafuena siadoiacaiñedicue.

¹⁶ Iemona naimiedi nainomona naimacina oni orede. ¹⁷ Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibaiñede.

Antioquíamo Pablo abido jailla rafue

¹⁸ Naifue suilla mei, nainomo Pablo are fiebide. Ie mei creyentiaina facaduano, Priscila iaimaiai Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. ¹⁹ Efesomo rillanona, iaimaiaina fainonocaide. Judíuai comini Jusiñamui rafuena siadollena, Pablodi judíuai ofiracomo fo jaide. ²⁰ Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue— ²¹ Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide. ²² Cesareamo sijiano, Jerusalémo macarite. Creyentiai dine jaide. Ie mei Antioquíamo jiai macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiai imaci comeciaina ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai cuegafuiai raise uiñote. ²⁵ Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofueite; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuena jiai uiñoñede. ²⁶ Judíuai ofiracomo naimie llofuia, jaitaiñeno llofueite. Priscila, iaimaiai Aquila diga, naiena cacadiiaimaiai. Ie jira naimiena oni eneno uitiaimaiai. Ie uiñoñega rafuena eo raise naimiena

llofuetiiaimaia. ²⁷ Acayamo Apolodi jaiacana jira, creyentiaidi naimie comecina ocuiñotajano, naimiena oresite. Acayamo ite creyentiaimo rabemo cuetimaci. Jusiñamui naimacina dueruilla jira, creyentiaina jai jaidimaci. Naimiena marena feiñollena iese cuetimaci. Nainomo naimie rillanona, creyentiaina eo canode. ²⁸ Judíuai diga marefodo jiai eo ñaite. Iemona naimaci uai ollinodi ifede. Naimiedi Jusiñamui cuegafuiaimona Jesúdi cai Jilloitaraimana llofujete.

19

Efesomo Pablo illa rafue

¹ Corintomo Apolo nia itemo, nairaiaí onifedo joide naído jailla mei, Pablo Efesomo ride. Dinomo rillanona, creyentiaina baite. ² Naimacimo jicante:

—¿Cristona omoi inuaruimo Jusiñamui Joreñona feiñotomoi?

Uai otimaci:

—Jusiñamui Joreñona nia jaca cacaiñedicai.

³ Dane jicante:

—¿Ñie isoi omoi bautizagomoi?

Uai otimaci:

—Juan micori lloga rafue facaina bautizagacai.

⁴ Pablo uai ote:

—Mare. Juan llote: “Omoi comeciaí iuaina meido. Iemei bautizal-lomoi”. Ie ifo meidoitimiena comini inollena llote. Jesúsna inollena llote. Jesús rafuena omoimo raise lloiticue.

⁵ Iena cacajano, cai Nama Jesús dibeido bautizadimaci. ⁶ Naimacimo Pablo ie onollina joniaimona, Jusiñamui Joreñona feiñotimaci. Ie mei naimaci uiñoñega nairaí uaido ñaitimaci. Jusiñamui Joreño naimacimo llua rafuena jiai llotimaci. ⁷ Nibai nana naimacidi doce iñiaí.

⁸ Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui dibeimo naimaci comeciaí iuaina meiduana Pablodi jacitaiñeno eo llouide. Nainomo daje amani fivui fiebide. ⁹ Naimacimona jianodi Pablo uaina uaitatimaci. Jiai inoiacaiñedicaci. Naimaci inoñena ira, ofiracomo bitinomo: “Cristo rafuedi maraiñede” llouidimaci. Ie jira Pablodi creyentiaí diga naimacimona eneno oni jaide. Tiranno ie lloracomo nagarui Pablodi llofueuide. ¹⁰ Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

¹¹ Jusiñamuidi Pablona siño rafuena finotate. ¹² Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jilllodimaci. Janaba anamo itinodi jiai jilllodimaci. ¹³ Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiaí anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

¹⁴ Esceva ie siete jitotiaídi iese finoacadimaci. Escevadí Jusiñamui diga ñairaima. ¹⁵ Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

16 Ieconi Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiai diga jino aisidimaci.

17 Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. 18 Ie jira ailluena creyentiaidi billano, imaci navui marañede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. 19 Ailluena icorilla rafuiaí illabiaí atianona, marefodo jobaidimaci. Niga raifi rabiaí jobaillana facadimaci. Cincuenta mil ucube diese facai rabiaína jobaidimaci. 20 Cai Nama Jesús uaina eo llocana jaide. Cominidi naie uai siñonana uñotimaci.

21 Naie rafue illa mei, Pablodi comecina facajano raite: “Macedoniamio cue macarillamona, Acayamo cue jiaí macarillamona, Jerusalémo riacadícue”. Ie emodoconi naimiedi raite: “Nainomona Romamo jiaí jaicadicue”. 22 Naimie nia Asiamo nano nigarui illanona, mena canoramona Macedoniamio oretate. Timoteona, iaímaiaí Erasto diga, oretate.

Efesomo ite comini marañede rafue finoacadimaci

23 Naie facaiseconi Pablo nia oni jaíñenia, Jesucristo rafue muidona Efesomo ite cominidi marañede rafuena comuitatimaci. 24 Demetrio raillamie platamona diga rana finouide. Naimiedi Diana ie jofu joreñuaina finouide. Naimie anamo ailluena maijuidimaci. Dianadi naimaci jusiñamui. 25 Naimie isoi maijuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uñotomoi; 26 iadedi Pablo raillamiedi diga cominina jai llofue: “Comini finoca raniaidi jusiñamuillañede”. Naie llofuiamona ailluena comini naimie dibeimo jaidimaci. Dama Efesomo iese suiñede; iadedi ua nana Asiamo iese suide. 27 Ie jira abina rairuicadicai, cai maijille faifi raillano, comini Diana jofona jiaí sofei raillanona. Cominidi naiñaiñona ebiruillana feítaitimaci. Naiñaiñori rajicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai nana bie eniruemo ite nairaídi naiñaiñona sedacabidimaci. Ie jira abina rairuicadicai.

28 Iena cacajano, eo iciritimaci. Riire cuiridimaci:

—¡Efeso ie Diana eo ebirede!

29 Daniríe siaduamona, nana comini eo faillíñaidimaci. Iemo nana comini dajena naimaci ofiracomo fo raire jaisite. Gayona, iaímaiaí Aristarco diga, gaitajano uitimaci. Naie iaímaiaídi Pablo ie nabai iaímaiaí. Iaímaiaí comuillanodi Macedonia. 30 Pablo ofiracomo jiaí fo jaicade; iadedi creyentiaídi naimie fo jaillana rairuidimaci. 31 Illaicomínimona damíerie nabaiñiaí naimiemo fo jaillana jiaí rairuidimaci. 32 Fo itinomona damíerie daje rafuena ebena cuiridimaci. Jiaíno jiaífuena ebena cuiridimaci. Eo faillíñaidimaci; ie iadedi bue ñellena naimaci ofillana raise uñoñedimaci. 33 Comini motomona judíuai dinena damíe uicomo oredimaci. Ie mamecidi Alejandro. Cominina llícaítallena, ie onolli jaidianona, cominimo lloiacade; 34 iadedi naimie judío imièna naimaci uñuanona, nana daacaíño cuiridimaci. Mena horas raifi cuirí-cuiridimaci:

—¡Efeso ie Diana eo ebirede!

³⁵ Iemei naie nairai rabe cueraimadi cominina llicaitatate. Naimaci llicaiilla meinoconi, naimie luacinona cacadimaci. Raite:

—¡Cacarei! Cai nairaidi Dianana sedacabidicai. Naiñaiño ebirediñaiño. Naiñaiñoña eruaide jiraraidi monamona jaie uaide. Iena jiai sedacabidicai. Nana bie eniruemo ite comini iena uñotimaci. Bu naiena uñofedimiena jaca ifede. ³⁶ Bu cue luana jaca uaitañeite. Ie jira omoi llicai. Comeciai facañeno buena finoñeno. ³⁷ ¿Bue ñellena Gayo iaiaiaia Aristarco diga, benomo atidomoi? Iaiaiaiaidi cai jusiñamui joreñoña ñañediiaiaiaia. Naiñaiñoña jeare finoñediiaiaiaia. ³⁸ Demetrio, ie maijiraini diga, iaiaiaiaina llogidoiacania, cominina llogidoraco ite. Diga jueces jiai ite. Coniniri nainomo iena siado; ³⁹ iadedi jiai nicino omoimo ia, cai illaicomini ofia, biena siaduanu, caimo lloitimaci. ⁴⁰ Birui bie rafue cai finua jira, illaicomini nibai caina duere finoitimaci. ¿Niese cai nibaille? Illaicomini caimo biena jicanoia, ¿niese raiticai?

⁴¹ Naie luu mei, ofidinona jino orede. Iemei jai jono tuudimaci.

20

Macedoniamo Pablo dane jailla rafue

¹ Efesomo ite rafue suilla mei, Pablodi creyentiaina uaidote. Naimaci comeciaina ocuiñotafuena llote. Iemei naimacina naimie facaduanu, Macedonia railla eniruemo jaide. ² Nainomo ite nairaiamo macarite. Comecina ocuiñotallena, naimacina llofuecana jaide. Iese Macedonia-mona Grecia railla eniruemo risaide. ³ Nainomo daje amani fivui illa mei, Siriamo botedo abido jaiacade; iadedi judiuaidi naimiena meinea-canana Pablo fidiano, Macedoniamu abido macarite. ⁴ Jaiino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaiaiaia Segundo diga, jaide. Tesalónica nairai imie iaiaiaia. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaiaiaia Trófimo diga, jiai jaidiiaiaiaia. Asia imie iaiaiaia. ⁵ Coco uicodo naimaci jaillano, Troamo cocona sedadimaci. ⁶ Llomenico guillaruilla railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fiodaillana começillena, danomo ofidicaimo, Pablodi caina llofue. Icoiti naimie jaiacana jira, Pablo are ñaite. Naiona jitoma daferui illa facai nia ñaite. ⁸ Cai ofillanomo ailluena lamparinaia ite. ⁹ Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana cioidimaci. ¹⁰ Ie jira Pablo ana jaide. Naimie emodomo jítadacaida, naimiena meniñote. Cominimo llote:

—Omoi rucaicueriñeno. Naimie cajede. Jafaicina nia faite.

¹¹ Abido a jaidimaci. Jesús fiodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. ¹² Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

¹³ Pablodí Troamona Asón railla nairaimo arido jaiacana jira, botedo jaidicai. Iese uicomu Asónmo jaidicai. Nainomona Pablona botedo uiacadicai. ¹⁴ Ie jira Asónmo naimiena cai baillanona, cai diga botemo bite. Ie mei Mitilene railla nairaimo jaidicai. ¹⁵ Nainomona dane monaillaido cai jaillano, ie areruido Quío railla nairaimo ruicafebellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai. ¹⁶ Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla eniruemo naimie are iacaiñena jira, Pablo comecina facade: “Efeso ecido monaillaido jaitica!”.

Efesomo ite creyentiai sedarainimo Pablo llua rafue

¹⁷ Creyentiaina sedarainina uaidollena, Miletomona Efesomo Pablo cartana orede. ¹⁸ Naimie dine naimaci rillanona, Pablo naimacimo llote: —Asiamo nano cue rillaruímona, niese omoi diga nagarui cue illana uifotomoi. ¹⁹ Cai Nama diga abina iedoñeno maijuuidicue. Eecana sure maijidicue. Judúuai cuena duere uifodosia jira, ie facaiseconi dueredicue. ²⁰ Cuemo ite marecinona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoína llofueuidicue. Omoi jofuemo omoína jiai llofueuidicue. ²¹ Judúuaina llofueticue. Judúuaiñedinona daje isoi llofueticue. Jusiñamui díbeimo omoi comeciai iuaina meiduaana lloticue. Cai Nama Jesúsna omoi inuana jiai lloticue. ²² Jusiñamui Joreñodí cuena jai jaicaitaja jira, Jerusalémo birui jaiticue. Nainomo ramo cue jirille rafuena uifnoñedicue; ²³ iadedí Jusiñamui Joreño naga nairaimo cuemo llote: “Llaveracomo ona gaitajano ona jonesiite. Duere sefuitio”. ²⁴ Cue ille dinori are illemo comecina facañedicue. Dama cue ille dinori fuidoiacadicue. Cai Nama Jesúsmona cue feiñoga maijiana fuidoacadicue. Mare rafuena omoimo lloiacadicue. Jusiñamui omoína duenaillana jiai lloticue. ²⁵ Jusiñamui anamo omoi illa rafuena omoimo jai lloticue. Jai dane cue uiecona cioiñeitomoi. Iena uifnoticue. ²⁶⁻²⁷ Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue comeci mare. Jusiñamui uaido omoi jaiñenia, cue muidonañeite. ²⁸ Mai omoi abi rairui. Jusiñamui Joreñodí omoína creyentiaina sedatate. Naimacina raise seda. Jusiñamui díbeimo itinona llofue. Naimie Jito fodailla muidona, naimacina ote, naimie iena. ²⁹ Naimacidi toica llaudaiai isoidimaci. Nia abina raise uifnoñedimaci. Cue jailla meinoconi, taino llorainidi, janallari isoi, omoimo biite. Naimaci nana omoi sedaca cominana ramo faite, danomo abido naimaci jaillena, jiconiai llaudaiai gaitaja isoi. ³⁰ Omoimona uanañedicinona llorainidi iite. Creyentiaina ramo faitimaci, omoi lluacinona fainonocaillena, naimaci díbeimo illena. ³¹ Ie jira abina rairui. Bie rafuena feitañeno. Daje amani fiemona nana omoína jai llofueticue. Naiona omoína llofueticue. Aremona omoína jiai llofueticue. Omoína cue duenaillamona, eianona omoína llofueticue. ³² Mai. Cai Nama illa anamo omoína fainonocaiticue. Naimie uaimona naimie omoína duenaillana jai uifnotomoi. Naie uaidí omoína jiai ocuiñotaite. Iemona Cristona inocana jaitomoi. Nana naimie fetocano diga naimie illanomo íco jaci itomoi. ³³ Jiaíno ie ucubena jaca nicidoñedicue. Bu ie iniroillaina jaca jiai oiacañedicue. ³⁴ Cue jitaille rana dama cue maijiano oticue. Cue diga jaidino imaci jitaille jiai dama cue maijiano oticue. Iena nana

omoidi uifnotomoi. ³⁵ Iese cue illamona omoina llofueticue. Iese maijiano duerede cominina canocana jaiacadicaí. Cai Nama Jesús ie llogacinona uifnoticaí. Naimie raite: “Raruaiana cai feiñoia, iobidicaí; iadedi cai eo iobiacania, jaiinomo raruaiana fecadicaí”. ³⁶ Naie llua meino, naimaci diga caiñici ifodo rainadajano, Jusiñamuimo jüide. ³⁷ Nana naimacidi eo eedimaci. Pablona caimaduanona, naimiena llibanotimaci. ³⁸ “Cuenana daña cioñeitomoi” naimacimo llua jira, eo sunaitimaci. Ieconí naimie diga botemo jaidimaci.

21

Jerusalémo Pablo jailla rafue

¹ Naimacina cai facadua meinoconi, suiñodicaí. Cos railla nairaimo atona jaidicaí. Ie are Rodas railla uiasimo ridicaí. Iemei Pátara railla nairaimo ridicaí. ² Nainomo Fenicia railla eniruemo jaiacade botena baiticaí. Nai botemo cai jailla mei, suiñodicaí. ³ Chipre railla uiasina cai ciojia, cai nabei dibeimo ite. Iemei Siria railla eniruemo jaidicaí. Tiro railla nairaimo sijidicaí. Botedo uiga raruaiana nainomo joneacadimaci. ⁴ Tiromo ite creyentiaí cai baillanona, siete digarui naimaci diga iticaí. Jerusalémo naimiena judúuai meineñellena, nainomo naimie jaiñellena, Jusiñamui Joreño naimacina Pablomo llotatate. ⁵ Digarui illa meinomo oni jaidicaí. Naie nairaimona nana naimaci cai diga jaidimaci. Riñoniaí, naimaci uruiaí diga, jaidimaci. Caiñici ifodo monaillai fuemo ana rainadajano Jusiñamuimo jüidicaí. ⁶ Naimaci facadua meinoconi, botemo jaidicaí. Naimaci imaci jofuemo abido jaidimaci. ⁷ Tiromona Tolemaida railla nairaimo jaidicaí. Creyentiaína uaiduano, darui naimaci diga iticaí. ⁸ Ie are jaillano, Cesareamo cai ria, Felipe jofomo jaidicaí. Felipedi Jesucristo ie rafuena lloiraíma. Jerusalémo diáconuaina creyentiaí jaie fetua facaise, Felipena fetodimaci. ⁹ Naimie dinomo fiebidicaí. Naimiemo cuatro jisa ite. Naiñaiñuai nia iima abina uifnoñede. Jusiñamui naiñaiñuaimo llucacinona llocabitimaci.

¹⁰ Digarui nainomo cai illamo Judeamona damie bite. Naimie mameci Agabo. Jusiñamui facaina lloiraíma. ¹¹ Caimo ria, naimiedi Pablo cinturóna aiñode. Naie diga ie eillina maite. Ie onollina jiaí maite raillano:

—Jusiñamui Joreño raite: “Jerusalémo judúuai illaicomini bie cinturón jainaoide iimana daje isoi maitimaci. Judúuaiñedinomo naimiena fecajitimaci” raite.

¹² Naiena cai cacajano, naie comini diga, Pablona caididicaí, naimie Jerusalémo jaiñellena. ¹³ Pablo uai ote:

—¿Bue ñellena eedomoi? ¿Bue ñellena cue comecina ocuiñotañedomoi? Cue maiana jaca jitaicue. Ua cue fiodaillana jaca jiaí jitaicue. Cue Nama Jesús muidona cue fiodaiadedi, damamai fiodaiticue.

¹⁴ Cai lloga uai naimie iinoñena muidona, raiticaí:

—Cai Nama jitaillé rafuena finuana jitaicicaí. —Iemei llicaidicaí.

¹⁵ Nano nigarui illanona, cai raruaiana finuano, Jerusalémo jaidicaí. ¹⁶ Cesareamo ite creyentiaímona jiaíno cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo diga Pablo ñaia rafue

¹⁷ Jerusalémo cai ria, creyentiaídi caina caimare uaidotimaci. ¹⁸ Ie are Pablo, cai diga, Jacobo dine jaide. Nana creyentiaína sedaraini

nainomo jai ofidimaci. ¹⁹ Uaidua mei, Pablo nagacinuaido Jusiñamui judíuaiñedinomo finoca rafuena llote:

—Cue llofuiamona ailluena judíuaiñedino creyentiaina jaidimaci — llote.

²⁰ Naie rafuena cacajano, Jusiñamuimo iobillacinona fecadimaci. Iemei naimiemo llotimaci:

—Ama, ero, judíuaiñemona ailluena comini jai creyentiaina jaidimaci; ia nana naimaci Moisés micori llogacinodo eo jaidimaci. ²¹ O finoca rafuena jai fididimaci. Ona comini ñaiana jai fididicai. Jiaie nairai motomo ite judíuaina Moisés micori llogacinona fainonocaillana llofuetio. Naimaci uruiái abina deñenana llofuetio. Moisés micori llogacinuaido jaiñellena llofuetio. ²² Ie jira ¿niese nibaiticai? O rillana jai fididimaci. ²³ Ie jira omo cai lluaana fino. Cai ecimo cuatro iima jai ite. Nie isoide rafuena Jusiñamuimo jai llotimaci. ²⁴ Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomoí. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicai. ²⁵ Judíuaiñedino Moisés micori llogacinodo jaillena lloñeiticai. Naimacimona creyentiaina jaidinomo navui cueticai: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cueticai.

²⁶ Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui llollena. Jusiñamuimo nagamiíai rana fecajaruína jai llote. Siete digarui illanona, Moisés micori llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillai fuiacanaruillaímo Asiamona damierie judíuaidi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona, ²⁸ cuiriidimaci:

—Caimaci, caína cano. Bimie naga illanomo llofuiamona, cominina raise itatañede. Moisés micori llogacinuaido jaiñede. Bifona raise sedañede. Judíuaiñedino bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona ciodimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai cominimona judíuñedimie Jusiñamui jofomo jaillana marañede. ³⁰ Asiamona bitino cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. ³¹ Pablona meineiacania, soldaduai ie comandantedi nana comini ieillana fidide. ³² Ieconí naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci. ³³ Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

³⁴ Nana ieidinodi jiaiforie llotimaci. Ie jira naie rafuena naimie jaca uiñoñede. Ie muidona cuatelmo naimiena uillena llote.

³⁵ Cuartel tidabacuimo naimaci ria, comini jarire jailla jira, soldaduai Pablona uitimaci. ³⁶ Ailluena comini racadimaci. Ocuioisite:
—¡Naimiena meine!

Pablo ie abi riidua llua rafue

³⁷ Cuartelmo jaiacania, Pablo comandantemo llote:

—O diga ñaiacadieue.

Raijicaillamona, naimie uai ote:

—Griego uaido ñaitio— ³⁸ Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedicue. Judío imiedieue. Ciliciamo ite Tarso railla nairaimona bitieue. Naie nairai mamecidi are soride. Cominimo cue llollena, omo jicanoiacadieue.

⁴⁰ —Jee —raite. Pablo tidabacui muidomo naidaide. Cominina llucaitallena, ie onollina jaidide. Comini llucaila mei, Pablo judíuai uaido naimacimo llote:

22

¹ —Caímaci, einamací, cue abi riiduacinomo mai omoi cacarei.

² Naimie judíuai uaido llua naimaci cacajano, llucaidimaci. Ie jira Pablo llote:

³ —Judío imiedieue. Ciliciamo ite Tarso railla nairaimo jeicigacue. Bene omoi nairaimo escuelamo jaidieue. Gamalielmona fueotieue. Moisés micori llogacinuaina eo raise facadieue. Jusiñamui rafuedo birui omoi isoi jaidieue. ⁴ Jesucristo inotinona jaie eo duere finodieue. Diga creyentiaina maianona, cárcelmo joneticue. Iñiaina duere finodieue. Riñoniaina jiai duere finodieue. ⁵ Jusiñamui diga nanoca ñairaima cuena uiñote. Nana omoi illaicomini cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judíuaimo cuetimaci. Damascomo jaidieue, nainomo ite creyentia maiano, Jerusalémo atianona, naimacina duere finollena.

Pablodi Jesúna ñnuana llua rafue

(Hch 9.1-19; 26.12-18)

⁶ Omoimo bie rafuena lloiticue. Jerusalémona jaidieue; iadedi Damascomo cue iaireicaia, jítoma naidai iacania, ieconi monamona damie cue abina eo quetiñote. ⁷ Eniruemo ana uaidieue. Monamona damie cuemo llua naca cadieue: “Saulo, Saulo, ¿bue ñellena cuena duere finodio?” ⁸ Jicanoticue: “¿Budío?” Monamona damie uai ote: “Nazaret ie Jesús dieue. Cuena duere finodio”. ⁹ Cue diga itinodi cue quetiñua rana ciodimaci; iadedi cue diga ñaitimiena cacaiñedimaci. ¹⁰ Raitieue: “Nama, ¿bue ñeitieue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

¹¹ Cuena eo quetiñua jira, cioñedicue. Cue diga itino cue onollido llinocaida, Damascomo cuena uitimaci. ¹² Nainomo Ananías raillamiedi ite. Jusiñamuina eo inote. Moisés micori llogacinuaido eo jaisoide. Nainomo ite judíuaidi naimiena: “Mare” raitimaci. ¹³ Naimie cuemo bite. Cuemo llote: “Saulo, ama, mai oni eroda”. Ieconi dane erodajanona, naimiena ciodieue. ¹⁴ Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uiñollena, ie mare Jitona o cioillena,

naimie uaina o cacareillena. ¹⁵ Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio. ¹⁶ Mai cue lluaana iino. Naidadajanona, o jecino oni dotallena, Jusiñamuimo jica. Ie mei bautiza” raite.

Judíuaiñedinomo Pablo jailla luu rafue

¹⁷ Ie mei Jerusalémo abido cue billa mei, Jusiñamui jofomo Jusiñamuimo cue jiaia, nicairiticue isoidicue. ¹⁸ Cai Namana cioidicue. Cuemo llote: “Jerusalémona raire mai jai. Cominidi o cuena lluaana feiñoñeitimaci”. ¹⁹ Uai oticue: “Nama, naga judíuai ofiracomo ona inotinona fauidicue. Cárcelmo naimacina joneuidicue. Nama, Jerusalémo itino iena uñnotimaci. ²⁰ Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiena meinetino iniroina sedadicue”; ²¹ iadedi cue Nama cuemo llote: “Mai jai. Judíuaiñedinomo ona are oretaiacadicue”.

Comandante anamo Pablo illa rafue

²² Bie lloga dinori comini Pablo lluaana cacadimaci. Iemei cuiridimaci: —Bie isoide iima illana benomo jitañedicaí. ¡Naimiena meine!
²³ Cuirillamona naimaci iniroina jaidisite. Icirisiano eniruena jiai fadosite. ²⁴ Judíuai uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimiena cuartelmo uifio. Naimiena fano. Naimiemo ite rafuena caimo naimie llollena, naimiena duere fino.

²⁵ Naimiena maiano naimiena fallena, Pablodi nainomo ite capitámo jicanote:

—¿Juez nia lloñenia, romano nairai imiena fajana mare? Romano nairai imiedicue.

²⁶ Capitán iena cacajano, comandante dine jaide. Iena llote. Jicanote:

—¿Niese nibaiiticaí? Bimie romanuai nairai imie.

²⁷ Iena cacajano, comandante bite. Pablomo jicanote:

—¿O Romano nairai imiedo?

Pablo uai ote:

—Jii.

²⁸ Comandante dinena raite:

—Romanuai nairai imiena cue jaillena, eo ibadicue.

Pablo uai ote:

—Romanuai nairai imiena jeicigacue.

²⁹ Ieconí naimiena duere finoacadino naimiemona raire oni jaidimaci. Pablo romanuai nairai imiena jira, naimiena jai ebena maia jira, comandante jiai jacinaite. Comecina nibai facade: “Iese naimiemo cue finua jira, ie ibana ollena, cue illaimamo cuena jiai llogidoite”.

Illaicomini motomo Pablo illa rafue

³⁰ Comandantedi judíuai Pablona llogiduana ua raise uifioiacade. Ie jira ie are Pablona suiñollena llote. Jusiñamui diga nanoca ñairaini, nana judíuai illaicomini diga, ofillena llote. Pablona atiano, naimaci motomo uillanona, naimiena naidanete.

23

¹ Ie abina riidollena, Pablo naie judíuai illaicomini motomo ite. Naimacimo eruailano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue comece mare.

² Ananíadi Jusiñamui diga nanoca ñairaima. Pablo lluana naimie gaiñenamona, Pablo ecimo itinona Pablo fueña farotate. ³ Pablo dinena naimiemo llote:

—Jusiñamui o fueña faroite. Mareuidimiena abina caitadio. Moisés micori llogacinuai muidona benomo itio, cuemo lollena; iadedi cue finoca rafueña raise o uiñoñoeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micori iena jaie cuiana uiñoticue. “Illaicominiña jeare ñaiñeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

⁶ Cominimo Pablo eruailamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacino mo ocuiriticue. Ie jira bene cuena llogidoiacadomo.

⁷ Naimie iena lloia, naimaci comeciái daje isoi lloñedimaci. ⁸ Saduceuai cominidi fariseuai comini isoi ñinoñedimaci. “Fiodaillamona jilloñeiticaí” saduceuai comini raillana ñinoside. “Jusiñamui jaienisaí ñede. Comini joreñuai ñede” raillana ñinoside; iadedi fariseuai comini dinena nana naie rafue illana ñnotimaci. ⁹ Ie jira eo failliñaidimaci. Fariseuai motomona jiaíno naidadajanona, llote:

—Bimiemo jeacino ñede. Jusiñamui jaienici naimiemo ñibaí jaie llumona, bie rafue naimiemo ite.

¹⁰ Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiema uillena llote.

¹¹ Ie are naiona caí Nama Pablomo bairedi. Raite:

—Comecína ocuiño. Jerusalémo cuena o llua isoi, Romamo cuena jiai llotio —raite.

Pablona meineiacana rafue

¹² Monaidemo, judíuaimona jiaíno comeciaina facadimaci: “Pablona nia caí meineñenia guiñeiticaí. Jiroñeiticaí”. ¹³ Cuarenta baifemo ite comini iese comeciaina facadimaci. ¹⁴ Naimaci judíuái illaicomini dine jaillano, raitimaci:

—Daní comeciaina facadicaí: Pablona nia caí meineñenia, jaca buena guiñeiticaí. ¹⁵ Omoí dine Pablona atillena, naimiemo eo raise jicanua isoi, comandantemo jicano. Pablo iaírei bia, naimiema caí meinellena, ocuidoiticaí.

¹⁶ Pablo enaise naie rafueña fidiano, cuartelmo jaide, Pablomo lollena. ¹⁷ Iena cacajano, Pablodi capitána uaidote. Raite:

—Bie conirueña comandante dine uiño. Naimie diga ñaiacade.

¹⁸ Ie jira naimiema uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

¹⁹ Naimie onollina comandante llinocaida, baí ie atianona, naimiemo jicanote:

—¿Bue cuemo lloiacadio?

²⁰ Naimie uai ote:

—Íco are Pablona illaicomini dine uillena, naimiemo eo raise jicanua isoi, omo jicanollena, judíuái daní comeciaina facadimaci. ²¹ Naimaci

jitailla isoi finoñoeno. Cuarenta digamie baifemo naimiena reiduno sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

²² Comandante coniruenta facaduanu raite:

—Jaca bumo cuemo o lluaana lloñoeno.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduaina uaido, imaci raruiaí finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiaí uaido. ²⁴ Jiaie caballona ati, naie emodomo rainadacaida Pablo jaillesa. Félix railla gobernador dine naimiena raise uiño —llote. ²⁵ Cartana jiaí cuete. Iese cuete: ²⁶ “Félix, omo cueticue. Claudio Lisiasdicue. Cai mare gobernardio. ¿Nigacino? Cue uai o dine oredicue. ²⁷ Damie o dine oredicue. Judíuai naimiena meineiacana jira, soldaduái diga naimiena gaitataticue. Naimiena gaitataja mei, naimiedi romanuai nairai imienana fididicue. ²⁸ Judíuai illaicomini dine naimiena uiticue, naimaci llogiduacinona raise cue uiñollena. ²⁹ Naimaci einamaci llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacañedicue. ³⁰ Jiaíno naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiaí lloiticue. Naimaci naimiena omo lloitimaci” cuete.

³¹ Comandante llua isoi, soldaduái naiona Pablona Antípatrismo uitimaci. ³² Ico are eillido jaide soldaduái cuartelmo abido bitimaci; ia Pablo caballuaido jaidino diga oni jaide. ³³ Cesareamo railla nairaimo rillanona, gobernadormo cartana fecadimaci. Naimie dine Pablona jiaí uitimaci. ³⁴ Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

³⁵ Gobernador dinena raite:

—O llogidotino bia, o rafuena cacajiticue.

Soldaduaimo jiaí llote:

—Omoi anamo Herodes railla illaíma micori jofomo naimiena seda.

24

Félix dine Pablo riidua rafue

¹ Dabecuirorui illa mei, Ananías bite. Naimiedi Jusíñamui diga nanoca ñairaima. Jiaie illaicomini diga bite. Tértulo raillamie jiaí bite. Naimiedi llogidoraima. Gobernadormo Pablona llogiduáibitimaci. ² Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio. ³ Jobillamona, nana cai iena feiñoticaí. ⁴ Ona iciacañedicue; iadedi o fue maria jira, cue lluaamo dallu cacarei. ⁵ Bimiedi eo cai abina aruire finode. Nana eniruemo ite judíuaina uri itatañede. Naimiedi Jesús raillamie rafuedo jaidino illaíma. ⁶ Jusíñamui jofona jeare naimie finoiacana jira, naimiena gaitadicaí. Moisés micori llogacinuaido naimiena duere finoacadicaí; ⁷ iadedi comandante Lisias ride. Caímona naimiena riire bairode. Naimiena cai llogidollena, o dine cai billena caímo llote. ⁸ Pablomo o jicanoiacania, naimiemona bie rafuena uiñoitio. Nana naimiena cai llogiduacinona uiñoitio.

⁹ Judíuai illaicomini, Tértulo llua isoi, dacinodo llotimaci.

¹⁰ Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue. ¹¹ Doce digarui illanona, Jerusalémo como birui ridicue. Iena uññoiacadiosa jiaie cominimo jicano. Jusiñamuina sedallena, Jerusalémo iticue. ¹² Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiai uaitañedicue. Naisomo uaina jiai uaitañedicue. Cominina uri itatañenana lloñedicue. ¹³ Nie isoide rafuena cue finuana cioñedimaci. Ie jira cuena raise llogidonidimaci; ¹⁴ iadedi jiaie rafuena lloiticue. Cai usumatiai Jusiñamuina sedadimaci. Naimiena jiai sedadicue. Nana Moisés llogacinuaina inoticue. Nana Jusiñamuina lloraini micriai cuegafuaina inoticue. Bimacimona jiaie llogacinuaido jai jaidicue. Bimacimona uanaiñedinodo jaidicue. ¹⁵ Fiodaillamona comini ico jilloillena inoticue. Jusiñamuina inotino jilloitimaci. Jusiñamuina inoñedino jiai jilloitimaci. Beno itino iena jiai inotimaci. ¹⁶ Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. ¹⁷ Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajabidicue. ¹⁸ Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. ¹⁹ Naie facaise Asiamona jiaie judíuai bitimaci. Cuemo nicino ia, ¿bue ñellena naimaci bene biñedimaci, cuena llogidollena? ²⁰ Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. ²¹ Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

²² Félixdi Jesús dibeimo itino rafuena raise uñña jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite.

²³ Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie dine jaillena rairiñede.

²⁴ Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiamaiai. Jesúna inuana cacadiiamaiai. ²⁵ Jecino finoñellena, dama ie jitailla rafuena finoñellena, jairuido Jusiñamui riicailafue anamo iñellena cacadiiamaiai. Pablo llofuiamona Félix jainaite. Ie jira raite:

—Jai macaibaite. Cue abi juarelliruido ona dane uaidoiticue.

²⁶ Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena. ²⁷ Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fañonocaide.

25

Festomo Pablo llua rafue

¹ Naie provinciamo darui amani rilla mei, Cesareamona Jerusalémo Festo jaide. ² Nainomo Jusiñamui diga nanoca ñairainidi, jiaie judíuai

illaicomini diga, Festomo Pablona llogidotimaci. ³ Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo começiana facadimaci. ⁴ Festo uai ote:

—Pablo Cesareamo fiebiite. Raire nainomo abido jaiticue. ⁵ Omoi illaicominimona damierie cue diga jaitimaci, nicino naimiemo ia, naimiena llogidollena.

⁶ Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote. ⁷ Pablo billa mei, Jerusalémona bite judúuai naimie ecimo ofidimaci. Diga fododicionona naimiena llogidotimaci; iadedi tainuaido llogidotimaci. ⁸ Pablo uai ote:

—Judúuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

⁹ Iena cacade; iadedi Festo judúuaina iobitaacana jira, Pablomo jicanote:

—¿Jerusalémo cue diga jaiacadío? Nainomo nana bie rafuena siadoiticue.

¹⁰ Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue lolle. Judúuaimo jaca buena finoñedicue. Iena raise uifotio. ¹¹ Romanuai railla nairai illaicomini llogacinona cue inoñenia, damamei jearede rafuena cue finoia, cue fi-daillemo jaca ocuridicue; iadedi cuemo nicino inenia, cuena meinellena bu cuena judúuaimo fecañeite. Cue rafue naimie siadollena, Romamo cai nanoca illaima dine jaiacadicue.

¹² Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaimaia. Agripadi naie enirue illaima. ¹⁴ Diga irui nainomo itiaimaia. Naimiemo Festodi Pablo ie rafuena llote:

—Félix Pablona cárcelmo bene fainonocaide. ¹⁵ Jerusalémo navui cue ia, Jusiñamui diga nanoca ñairaimadi, judúuai einamaci diga, naimiena llogidote. Naimiena duere finollena cuemo jicanotimaci. ¹⁶ Naimaci uai oticue: “Cai Romanos cominidi llogidogamiena jamai tainomo duere finoñedici; iadedi llogidogamiedi ie llogidotino uai nano cacareitici. Ie mei ie abi ridollicinomo jiai cacareitici”.

¹⁷ Ie jira naimaci cue dine benomo navui bia, ie are cominimo cue llouillanomo raicue. Pablona cue dine uaidoticue. ¹⁸ Naimiena llogidotinodi lloia, naimiena marañede finoca rafue cue facaja isoi, llogidoñedimaci. ¹⁹ Dani naimaci inuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. ²⁰ Bie rafuena raise cue uifnoñenia, naimiemo navui jicanoticue: “¿Jerusalémo jaiacadío, nainomo bie rafuena siadollena?”; ²¹ iadedi Pablo nainomo jaiacañede. Cai nanoca illaima dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaima dine naimiena cue nia oretañenia.

²² Agripadi Festomo llote:

—Naimie ñaiana cacaadicue.

Festo uai ote:

—Íco are naimie ñaiana cacareitio.

²³ Ie jira ie are Agripa, iaímaiaí Berenice diga, gobernador ofiracomo bitiaímaiaí. Finobillano ebire bitiaímaiaí. Soldaduai imaci illaícominí jiaí bitimaci. Naie nairaimo ite nanoca cominí jiaí bitimaci. Ofilla mei, Festo Pablona atillena llote. ²⁴ Festo llote:

—Agripa, nana beno itino, bimiena ciodomoi. Jerusalémo ailluena judíuai naimiena llogidotimaci. Bene cue dine jiaí bitimaci. Naimie meini-ana eo jitaidimaci; ²⁵ iadedi naimiemo nicinodi iñenana jai uiñoticue. Naimiena meinellena cue llollena, nicinodi naimiemo iñede. Augusto dine naimie jaillena naimie jicanua jira, naimiena oretaiticue. ²⁶ Nicinodi nia iñede, cai illaímamo cue cuellena. Ie muidona omoi dine naimiena jai atidicue. Agripa, naimie ñaíamo raise cacarei. Naimiemo cai jicanua mei, níbaí nicino naimiemo illana uiñoiticaí. Iemona Augustomo cueiticaí. ²⁷ Augusto dine llavecamié cue oretaia, naimiemo nicino iñenia, cuemona maraiñede.

26

Pablo ie abina dane riidua rafue

¹ Naie facaise Agripa Pablomo llote:

—Mai llono. O abí riiduacínona cacaacadicue.

Pablo: “Jii” raillanona, ie onolli a ñuitade. Raite:

² —Agripa, bene o illa jira, cuemona mare. Cue fue baillafuedo o uicomo cue abina riidoiticue. Judíuai cominí diga rafuena cuena llogidotimaci. ³ Nana cai judíuai rafuena raise uiñotio. Nana cai einamaci rafuena jiaí uiñotio. Cuemo raise cacarei. ⁴ Jerusalémo naimaci motomo cue illa jira, diga judíuai cue coniruenamona cuena uiñotimaci. ⁵ Cuena naimaci lloiacania, fariseo imiēna cue illana are uiñotimaci. Jiaie cominí baifemo fariseuaidí cai einamaci llogacínuaína inotimaci. ⁶ Jusiñamuidí cai usumatiaí micoriaimo fiodaillamona cominí ico jilloillena jaie llote. Ie suillemo jai ocuridicue. Ie jira llogidoracomo birui jai iticue. ⁷ Nagarui Jusiñamuina naimaci eo sedajamona, cai doce nairaidí naie llogacino suillemo jiaí nia ocuridimaci. Ore illaíma, bie ocurillacino muidona judíuai illaícominí cuena llogidotimaci.

⁸ ¿Bue ñellena Jusiñamuidí cominí fiodaillamona jillotajana inoiacaiñedomoi? ⁹ Jaie ie isoidicue. Nazaret ie Jesúna inotinona diga jearede rafuena jaie finoacadicue. ¹⁰ Jerusalémo iena finodicue. Cárcelmo ailluena Jesúna inotinona joneticue. Jusiñamui diga nanoca ñairainí uaido iena finodicue. Naimacina meinelle cai illaícominí raia: “Jee” raisoidicue. ¹¹ Diga judíuai ofiracomo, diga icaiño, naimacina duere finodicue. Naimaci Jesúna jeare ñaiana jitaidicue. Naimaci diga cue eo icirilla jira, jiaie eniruemo ite nairaimo jiaí jaidicue, naimacina duere finollena.

Pablodí Jesúna inuana llua rafue

(Hch 9.1-19; 22.6-16)

¹² Ie jira Damascómo jaidicue. Jusiñamui diga nanoca ñairainí uaido jaidicue. ¹³ Ore illaíma, jitoma naidai ia, monamona quetiñotena ciodicue. Naidí jitoma baifemo quetiñote. Cue abina quetiñote. Cue diga itino abina jiaí quetiñote. ¹⁴ Eniruemo cue ana uaia, damie llua ana cacadicue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maíga jurareta suiñoacana isoi.

le isoidio. Ricaillamona, cuena duere finoacadio”. 15 Uai oticue: “¿Budiota?” Cai Nama cuemo llote: “Jesúdicue. Cuena duere finodio. 16 Mai a naidacai. Cue rafuena o llofuellena ona fetodicue. O birui cúa rafuena lloitio. Ona cue uiñotalle rafuena jiai lloitio. 17 Naimaci ona duere finoia, omoi cominimona ona jillotaiticue. Judíuaiñedinomona ona jiai jillotaiticue; iadedi judíuaiñedino dine ona oretaiticue, 18 naimaci comeciai tainomo iñellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiñedinomo jai itimaci isoidimaci. Jusiñamuina uiñuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci ñnuamona, nana cuena ñnotino diga cue illano ico jaca iitimaci”.

19 'Ore Agripa, monamona cue cacaja rafuena ñnoticue. Jesúdi Jusiñamui Jitona ñnoticue. 20 Damascómo itinomo iena nano lloticue. Ie mei Jerusalémo itinomo iena jiai lloticue. Diga Judeamo itinomo iena jiai lloticue. Judíuaiñedinomo iena jiai lloticue. Lloticue: “Omoi comeciámo iticinona meido, Jusiñamui dibeimo omoi illena. Omoi comeciámo iticinona omoi meidua mei, mare rafuena finocana jai”. 21 Ie jira judíuai illaicomini Jusiñamui jofomo cuena gaitadimaci. Cuena meineiacadimaci; 22 iadedi Jusiñamui cuena canode. Ie jira birui bene iticue. Illaicominimo beno nia lloticue. Illaicominiñedinomo jiai nia lloticue. Dama Jusiñamui facaina lloraini micoriai ico suille cuegafuena birui lloticue. Dama Moisés micori ico suite cuegafuena jiai birui lloticue. Jaiie rafuena lloñedicue. 23 Jaiie cuetimaci: “Cristo legi cacajite. Fiodaillamona jilloite. Naimiedi nano dofoconi jilloitimie. Iemona cai judíuai comini jeacinomona jilloillena uiñoitimaci. Iemona judíuaiñedino jeacinomona jilloillena uiñoitimaci”. Ie jira bie rafuena llocana jaidicue.

Crezentena Agripa jaillena Pablo jitailla rafue

24 Iese Pablodi abi riiduano, Festo riire llote:

—Pablo, odi uairico isoidio, eo comecina o facaja jira.

25 Pablo uai ote:

—Uairicoñedicue. Festo, odi cue illaimadio. Cue llucinodi unaicino. Ebena ñai-ñaiacaiñedicue. 26 Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede. 27 Ore Agripa ¿Jusiñamui lloraini cuegafuina ñnotio? omoi jicanoticue. Iena o ñnuana jai uiñoticue.

28 Agripa dinena uai ote:

—Dallu o ñaiamona, cuena crezentena nibai itataiacadio.

29 Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoi bie lloeo diga maiana jitañedicue.

30 Iemona Agripa naidacaide, Festo diga, Berenice diga. Nana raidino jiai naidacaidimaci. 31 Jino jaillano, Pablo joreñaona siadotimaci:

—Bimie jaca buena finoñede, naimiena cai meiniana lloillena. Buena finoñede, cárcelmo illena.

32 Agripa Festomo llote:

—Naimie cai nanoca illaima dine jaillana jicanoñedena, niadedi naimie jino marena oreca.

27

Romamo Pablo jailla rafue

¹ Italiamo Augusto dine Pablo oretajana Festo llua mei, Pablona jiaie llavecano diga capitámo fecade. Naie capitádi Julio. Augustona mameciredede batallómo jainaiáide. ² Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai. ³ Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaille rana ote. ⁴ Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai. ⁵ Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia. ⁶ Naie bote Roma dine jaiñena jira, capitádi jiaie botena jenode. Capitádi Alejandriamona bite botena baite. Naie bote Italiamo jaiacade. Ie jira naie botemo cai jonecaida, caina uite. ⁷ Diga irui fecuise sefuire jaillano, Gnido railla nairai iaieise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai. ⁸ Uiasi iaieise iese sefuicana jaillanona, Maregobe railla illanomo ridicai. Lasea railla nairai jiai ianori ite.

⁹ Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maijidinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticaí. Botena jiai nibai faifiticaí. Cai nibai jiai faifiticaí —llote.

¹¹ Iese llote; iadedi naie bote piloto oni jaiacade. Naie bote nama jiai oni jaiacade. Capitán iaímaiaí lluaa Pablo lluaa baifemo ñnote. ¹² Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niédi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruáide. ¹³ Beici dinena aifidi bia, “cai jitailla aifidi bite” raillanona, suiñodicai. Creta iaieí monaillai fuemo jaidicai. ¹⁴ Ie mei raie cai dine eo riire aifi bite. Naie aifi noci deisoilla dinena bite. ¹⁵ Botena oni uite. Botena atona eronenidicai. Ie muidona jamai ebena jaidicai. Aifidi caina iese uite. ¹⁶ Janorede uiasi fuemo aifi raise iñenanomo jaidicai. Nai uiasi mameci Claudia. Faifiñellena bote ie janorede nocae sefuire a aiñodicai. ¹⁷ A aiñua mei, rao diga botena ruica maíticaí. Sirte railla conillie illanomo cai joodai raillano, velaiaina duiñodicai. Iemei aifi jamai uigacai. ¹⁸ Ie areruido aifi riire illa jira, cargana oni dotadicaí. ¹⁹ Dane ie are bote ie raruiai, cai onolli diga, oni dotadicaí. ²⁰ Diga irui jitoma bainide. Diga irui ucuaí jiai bainide. Aifi eo riire nia ite. Cai jillobiñellemo jai ocuirñedicai.

²¹ Diga irui cai guiñena mei, Pablo naimacimo llote:

—Nabaiñiai, cue uaina navui ñnotiomoidena, niadedi bie isoi sefuñedicai. Cretamo cai fiebidicaina, bie isoi sefuñedicai. ²² Omoi comeciaina ocuiño. Bie botedi faifite; iadedi caimona jaca buna faifiñeite. ²³ Jaie naiona Jusiñamui jaienicidi cuemo bairedede. Jusiñamui jainaiaidicue. Naimiena sedadicue. ²⁴ Naie jaienicidi cuemo llote: “Pablo, jaciruiñeno. Romamo o nanoca illaíma dine iitio. Jusiñamui ona duenailla

jira, nana o diga jaidino jilloitimaci". ²⁵ Ie jira omoi comeciaina ocuiño. Cuemo llua isoi, naimiedi bie rafuena suite. Jusiñamui iena finuana inoticue. ²⁶ Nibai uiasimo jutadaiticai.

²⁷ Catorce digarui naio illamona, Adria railla monaillaimo jamai cai jaia, naiona daferui facai marineruaidi: "Enirue iaire ite" railanona comeciaina facadimaci. ²⁸ Ie jira ie aforedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. ²⁹ Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci. ³⁰ Naie facaise marineruai botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

³¹ Iena ciuano, Pablo capitámo llote. Soldaduaimo jiai llote:

—Botemo bimaci fiebiñeniadedi, jilloñeitomoi.

³² Ie jira soldaduaidi nocae maia raona jaitadimaci. Jai dinomo nocaena fainonocaidimaci. ³³ Nia monaiñenia, Pablo nana caimo llote:

—Guiño. Catorce digarui illanona, jai guiñedomoi. ³⁴ Ie jira guiño, omoi mairillesa. Ua faifñeitomoi.

³⁵ Iese naimie raillanona, Jusiñamuimo iobillacinona fecade, nana comini illa uicomo. Llomenicono tairuano, guite. ³⁶ Nana naimaci comeci ai ocuiñocaida, jiai guitimaci. ³⁷ Botemo doscientos setenta y seis diese iticai. ³⁸ Cai monillamona, fiebide trigona monaillaimo oni fadodicai, bote meenaiñellena.

³⁹ Ie oni monaidemo, erodatemo, naie eniruena uiñoñedicai. Igobemo conillici illana cidicai. Nainomo jamai ebena sjiacadicai. ⁴⁰ Ie jira lloelluna nainomo oni fainonocaidicai. Datarabe maiana suiñodicai. Vela aifimo sebiñoticai. Monaillai fuemo enirue dine jai jaidicai. ⁴¹ Iemei jaiciridifomo ridicai. Eniruemo jodate. Bote muido eniruemo jai aire jodate. Eo baguamona jillaci taicosite. ⁴² Naimaci iamona jillobi raillano, soldaduai llavecanona meineiacadimaci. ⁴³ Pablona jillotaicana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai. ⁴⁴ Jiaino bote ie rabicido juicaida icana jai. Jiaino bote ie raruiaido juicaida icana jai. —Iese eniruemo nana marena ridicai.

28

Maltamo naimaci illa rafue

¹ Jai cai jillua mei, Malta railla uiasimo cai illana uiñoticai. ² Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. ³ Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide. ⁴ Jaio naimie onollido lliillana Malta comini ciuano, coniniri ñaitimaci:

—Nibai bimie comena meinetimie. Monaillaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. ⁶ Comeciaina facadimaci: "Naimie onolli raire sirite. Iemei raire fiodaite". Are sedaja mei, naimiedi jaca niese ifñede. Ie jira dane comeciaina facajano raitimaci:

—Naimiedi nibai Jusiñamui.

⁷ Naie illanomona uiasi illaïma enirue iaïre ïte. Naimie mamecidi Publio. Caina marena feiñote. Darui amani ie jofomo caina marena itatate. ⁸ Publio moo duide biide. Abi cuaride. Jeraina feide. Ie jira naimie ðine Pablo jaide. Jusiñamuimo jiaa mei, ie onolli naimiemo joni-ano, naimiena jillotate. ⁹ Bie rafue suilla jira, naimie ðine nana uiasimo ïte duidino bi-bidimaci. Naimacina jillotate. ¹⁰ Ie jira caïmo iobillacinona eo fecadimaci. Cai oni jaiadedi, cai jitailla ra caïmo fecadimaci.

Romamo Pablo rilla rafue

¹¹ Daje amani fivui illa mei, Alejandriamona bite botedo jaidicai. Naie uiasimo nana rollime facaiseconi naie bote ïte. Mena jusiñamui iaïmaïaï joreño bote muidomo ïte. Damie Cástorna mameciredede. Jiaïmie Póluxna mameciredede. ¹² Naie botedo oni cai jaïllanona, Siracusamo sijidicai. Darui amani nainomo iticai. ¹³ Nainomona jaïllano Regiomo sijidicai. Darui illa mei, aïfi beici ðinena billa jira, ie areruido Puteolimo ridicai. ¹⁴ Sijia mei, nainomo creyentiaïna baiticai. Naimaci ðiga siete ðigarui cai illana jitaïdimaci. Ie mei Roma ðine jaidicai. ¹⁵ Romamo nia cai riñenia, nainomo ïte creyentiaï cai billana fididimaci. Cai ðine bitimaci. Foro de Apio raïlla nairaiïmo damierie bitimaci. Jiaïno Tres Tabernas raïlla nairaiïmo bitimaci. Naimacina ciuano, Pablodi Jusiñamuimo iobillacino fecade. Ie comecina jiaï ocuiñote. Cai ðiga Romamo jaidimaci. ¹⁶ Romamo cai ria, capitán llavecana ie illaïmamomo fecade. Cárcelmo Pablona naie illaïma oreñede; iadedi Pablo ie ibauiga jofomo eneno oni orede. Aisii raïllano, daje soldado nainomo naimiena sedade.

Romamo Pablo llofua rafue

¹⁷ Darui amani illa mei, Pablo Romamo ïte nanoca judiuaïna uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamacï llogacinuaïna jaca ïnoticue; ¹⁸ iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaïllafue cuemo iñena jira; ¹⁹ iadedi judiuaï: “Dama ïte” raïlla jira, cai nanoca illaïma ðine jaïllena jicanoticue; iadedi cue nairai ðiga jaca iciriñedicue. ²⁰ Omoi ðiga ñaïllena, omoïna cioacadicue. Fiodaïllamona ico comini jillollena cue llofuecabilla jira, bie lloeo ðiga maigacue.

²¹ Uai otimaci:

—Judeamona jiaïno ona cuega cartana jaca feiñoñedicai. Caimo o rafuena lollena, jaca buna biñede. Bene jaca bu ona jeare ñaïñede. ²² Ie jira omona naie rafuena cacaacadicai. Naga illanomo comini o llofuiana uaitajana uiñoticai. Creyentiaïna jeare ñaitimaci. Iena fididicai. Ie jira caïmo iena raise llono.

²³ Naimie ðine dane billiruina llotimaci. Ie mei aïlluena comini naimie jofomo bitimaci. Naimie anamo naimaci illana Jusiñamui jitaïlla jira, Jusiñamui ðibeïmo naimaci comeciaï iuaina meïduana llofuede. Moisés micori llogacinuaïmona, Jusiñamui facaina lloraïni micoriaï cuegafuaïmona, Jesúna llofuede. ²⁴ Jiaïno naimie llofuiana ïnotimaci. Jiaïno ïnoñedimaci. ²⁵ Nana naimaci comeciaïna daje isoi lloïñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorina cai usumatiaïmo raise llotatate. Omoi usumatiaï micoriaï illa isoi nia itomoi. Isaías micoridi omoïna jai cuega rafue jai suide. Naimie micori cuete:

²⁶ Jusiñamui llote: “Bie cominì dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisnidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona’ ”.

²⁸ Jusiñamui rafuena omoi ñnoñena muidona, judúuaiñedinodi Jusiñamui naimacina jilloitaiacanana jai fididimaci. Naimaci iena cacareitimaci.

²⁹ Iese naimie llua mei, judúuaidi coniniri siadocana abido jaidimaci.

³⁰ Mena años Pablo ie jofomo ite. Ie illa dinori naie jofona ibauide.

Nainomo nana naimie dine bite cominina feiñote. ³¹ Naimie anamo

naimaci illana Jusiñamui jitailla jira, Jusiñamui dibeimo naimaci comeciai

iuaina meiduana llofujete. Marefodo llofujete. Naimiedi cai Nama Jesu-

cristo rafuena llofujete. Jaca budi naimie llofuiana rairuiñede. Teofilo,

jaca digacino omo jai lloticue. Mai. Lucadicue.

ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo Pablo cartana orede

¹ Romamo ite creyentiai, omoi dine cartana oredicue. Pablodicue. ¿Nigacino? Jesucristo dibeimo maijidicue. Jusiñamui fetocamiedicue. Ie mare rafuena cue lollena, cuena orede.

² Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiai cuega. Iemona birui facacabidicai. ³ Bie rafuedi Jusiñamui Jitona llote. Naimie jaie ite usumadi cai illaïma David micori. ⁴ Naimie Jusiñamui Jitonana uiñoticaï. Jusiñamui Joreñodi siño rafuedo caina iena uiñotade. Jusiñamui Jito fiodaïllamona, Jusiñamuidi ie Jitona jillotate. Jusiñamui Jitodi Jesucristo. Cai Nama. ⁵ Caina duenailanona, caina oretate, naga nairaïaina naimiena hnotallena, naimiena naimaci iobitallena. ⁶ Naimacimona itomoi. Naimiemo omoi duïllena, Jesucristo omoïna jai fetode.

⁷ Romamo ite creyentiai, Jusiñamui isiruiganodomoï. Naimie isoi mareuidinona omoi illena, fetocanodomoï. Cai Moo Jusiñamui, cai Nama Jesucristo diga, omoïna duenaite. Iena uiñocana mai omoi jai. Iaimaïaï omoïna uri jai itatatiïaïmaïaï. Iena omoi uiñocana mai omoi jai.

Roma dine Pablo jaiacade

⁸ Diga comïni, diga illanuaïmo, Jesucristona omoi hnuana jai fididimaci. Ie jira nano dofoconi omoi facaina Jesucristomo iobillacinona fecaacadicue, Jusiñamuïmo iena naimie fecallena. ⁹ Jusiñamuïmo cue jïïa, omoïri jïidicue. Jusiñamui iena uiñote. Naimie Jito rafuena cue lluanona, cue comecimona naimiena sedadicue. ¹⁰ Jusiñamuïmo cue jïïa, naimiemo jicadicue, cuena canollena. Naimie jitaïa, omoi dine ja muidomo cue riiticue. Iena jicadicue. ¹¹ Omoïna eo cioacaducue. Jusiñamui Joreño uai cuemo illamona, omoi comeciaina ocuiñotaïacadicue. ¹² Jesucristona omoi hnuamona, naimiena cue hnuamona, coninïna cai comeciaina ocuiñotaiticai.

¹³ Cue amatiai, diga icaiño omoi dine jaiacadicue. Iena omoi uiñuana jitaïdicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaïe nairaïaï jai hnotimaci. Omoi dine Jesucristo rafuena lluaïacadicue, iena omoïmona dajerie hnollena. ¹⁴ Nana comïni dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaiñedinomo iena jiai lloiacadicue. Abina uiñotinomo iena lloiacadicue. Abina uiñofedinomo iena jiai lloiacadicue. ¹⁵ Ie jira omoïmo Jesucristo rafuena eo lloiacadicue.

Jesucristo rafue siño

¹⁶ Jesucristo rafueri iobidicue. Naie rafuedi siño. Jusiñamuidi naga iena hnotinona naimaci jeacinomona jillotate. Judïuaïdïno nano iena cacadimaci. Ie mei judïuaïñedinomo iena jai cacadimaci. ¹⁷ Naie rafuemona Jusiñamui caina feïñuana uiñoticaï. Jusiñamui caina marebicaitajana uiñoticaï. Naimiena cai hnuamona iena uiñoticaï. Jusiñamui facaina lloraima micori jaie cuega: “Jusiñamuïna hnuamona marebicaidimiedï Jusiñamui dibeïmo ico jaca iite” cuega.

Comini jecinona finoiadedi, dani naimaci muidona

18 Nana Jusiñamuina jitañedinodi naimie duere finollifue anamo jaitimaci. Iena uiñoticaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci. 19 Jusiñamui naimacina naimiena uiñotaja muidona, imaci comeciainona Jusiñamui illana uiñotimaci. 20 Enirue finua facaisemona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedicaí” rainidimaci. 21 Jusiñamui uiñotimaci; iadedi naimie uaina inoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciái jai tainomo ite isoide. Jai marebificañedimaci. 22 “Abina uiñoticaí” raitimaci; iadedi abina uiñoñedimaci. Jamai ebe isoidimaci. 23 Jusiñamui jaca ite. Naimie uai siño. Naimiena sedaacañedimaci; iadedi jiaie rana sedaacadimaci. Fiodairuide imana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

24 Ie jira Jusiñamui naimacina fainonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci. 25 Jusiñamui ie uanaicinona jitañedinomaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

26 Iese naimaci illa jira, naimaci jitailla meirede rafuena finollena, Jusiñamui naimacina fainonocaide. Coniñona aifuedotimaci. 27 Naimaci jitailla jira, conimana aifuedotimaci. Naimaci maraiñede finoca rafuemonona duere sefuillemona ibana feiñoitimaci.

28 Jusiñamuina naimaci uiñoiacañena jira, maraiñede rafuemo naimaci comeciái facallena, Jusiñamui naimacina fainonocaide. Naimaci finorainiga rafuaina finocana jaidimaci. 29 Naga isoide maraiñedicinona finouidimaci. Naga isoide jearedicinona finouidimaci. Jiaie comini rana nicidoudimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñaillaredimaci. 30 Jiaie comini joreñona ñaoidimaci. Jusiñamuina jaca gaiñedimaci. Cominina jeare ñaoidimaci. Abina iedoudimaci. Abina biruidimaci. Diga jearede rafuemo comeciaina facauidimaci. Naimaci moo uaina inorainidimaci. Naimaci ei uaina inorainidimaci. 31 Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiaí dueruirainidimaci. Iese jaisoidimaci. Iese nia jaicabidimaci. 32 Jusiñamuidi jai lote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” lote. Jusiñamui llwana uiñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macaí mare iese imaci finua” raitimaci.

2

Jusiñamuidi maraiñede rafuena finodinona duere finoite

1 Ero, omoi judúuaimona damie comecina nibai facade: “Bie isoide maraiñede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeticue” raillamo naimie comecina facade; iadedi naie isoide maraiñede rafuena naimie finua jira, Jusiñamui naimiena jiai duere finoite. 2 Jusiñamuidi uanaicinona uiñuamona, maraiñede rafuena finodimiena duere finoite. Iena uiñoticaí. 3 “Jusiñamui duere finollicino anamona jilloñeticimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiai duere finoite. 4 Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie díbeimo o illana naimie jitaide. Naiena jamaiñeno. 5 O comeci jiaairena jira, o comeci Jusiñamui díbeimo meidoiacaiñedio. Ie jira ico eo duere sefuitio. Ie riicailifuemona Jusiñamuidi nana naimiena inoñedinona duere finoite. Iena Jusiñamui finoia, Jusiñamuimona mare. 6 Nagamiiaí imaci finua ille dinori Jusiñamui naimacina duere finoite. 7 “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite. 8 Maraiñede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona inoñedimaci. 9 Jusiñamui naga jeacinona finodimiena eo duere finoite. Judúuai comini ua duere finoite. Judúuaiñedinono cominina jiai duere finoite; 10 iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judúuaimo iese ua finoite. Judúuaiñedinomo iese jiai finoite, 11 naga nairaina daje isoi naimie finua jira.

12 Judúuaiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judúuai Moisés micori llogacino anamo itimaci; iadedi iena naimaci inoñena jira, jiai jaca daje isoi duere sefuitimaci. 13 Moisés micori llogacinona cacajamona, Jusiñamuimona jaca buna marebicañede; iadedi iena inuamona marebicaide. 14 Judúuaiñedinodi Moisés micori llogacino anamo iñedimaci; iadedi naimaci comeciaí facajamona, marecinona finuana uiñotimaci. Marecinodo jaillana jiai uiñotimaci. 15 Moisés micori llogacino anamo naimaci illa isoi, naimaci comeciaimona marecinona naimaci finoiadedi, iena uiñotimaci. Ie jira maraiñedicinona naimaci finoiadedi, iena jiai uiñotimaci. 16 Biena llofuecabiticue. Ico Jusiñamui llua jira, Jesucristodi cominimo imaci comeciaimo iticinona juez isoi lloite. Maraiñedicinona finouidinomo duere finollicinona lloite. Marecinona finouidinomo duere finollicinona lloñeite.

Moisés micori llogacinodo judúuai comini raise jaiñedimaci

17 Abina ieduamona, omoimona damierie raitomoi: “Judúuai imacidicaí. Moisés micori llogacino anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi. 18 Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi. 19 Jusiñamuina uiñoñedinona llofueiacadomoi. Naimiena naimaci uiñoñena jira, jitreidinomo itimaci isoidimaci. Uanaicinona naimacimo omoi lluamona, naimaci comeciaina lligaiñoiacadomoi. Naimacina uanaicinona uiñotaiacadomoi. 20 Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena

nia raise uifnoñedinona llofueiacadomoí. Moisés micorí llogacinomo nana uifnuacino illa jira, naiemo uanaicino illa jira, iese iacadomoí. ²¹ Jiaie cominina llofueiacadomoí; iadedi çniese omoí comeciaino fueoiacaiñedomoí? “Rana fiñeno” llotomoí; iadedi fiidomoí. ²² Omoí aiñede riño diga iñenana llotomoí; iadedi ie isoi finodomoí. Jusiñamuina eruaide jiraraina gaiñedomoí; iadedi naie ra illanuaimona naie jiraraina fiidomoí. ²³ Moisés micorí llogacinori abina iedotomoí; iadedi iena omoí iñnoñena jira, Jusiñamuina jeare finodomoí. ²⁴ Iena Isaías micorí jiaie cuete: “Omoí muidona judíuainoñedinodi Jusiñamuina jeare ñaitimaci” cuete.

²⁵ Jusiñamui dibeimo jai omoí illana jiaie comini uifnollena, omoí abina detatatomoí. Moisés micorí llogacinona omoí iñnoiadedi, omoí abina detatajadi mare; iadedi naicinona omoí iñnoñenia, abina detatañedino isoi jai itomoí. Jusiñamui dibeimo iñedomoí. ²⁶ Moisés micorí llogacinona judíuainoñedino iñnoiadedi, naimaci abina detatañenia, Jusiñamuimona naimie dibeimo ite judíuai isoidimaci; iadedi abina detatañedimaci. ²⁷ Moisés micorí llogacinuaina uifnotomoí. Omoí abiaina detatatomoí; iadedi Moisés micorí llogacinona judíuainoñedinodi iñnua jira, Moisés micorí llogacinuai omoí iñnoñena jira, Jusiñamuimona omoí baifemo uaidimaci. ²⁸ Omoí jeiciamona Jusiñamui ua cominiñedomoí. Omoí abiaina detatajamona, Jusiñamui ua cominiñedomoí; ²⁹ iadedi omoí comeciaino marena illamona, Jusiñamui ua cominidomoí. Abi detataja jira, Jusiñamui cominiñedomoí; iadedi omoí comeciaino marena illa jira, Jusiñamui cominidomoí. Raise naimiena iñnotinodi cominimona iobillacinona feiñuana jitañedimaci; iadedi Jusiñamuimona iobillacinona jitañidimaci.

3

¹ Bie cartana omoí feiñuanona, iena facallemona, damierie comeciaina facaite: “Judíuaidicai; ia naiemona, çniese jiaie comini baifemo faiticai? Cai abiaina detataticai; ia naiemona jaca buena oñedicai”. ² Ie jira omoímo lloiacadicue: “Judíuaina cai illana eo mare”. Jusiñamuidi dani caimo ie rafuena llote. Jiaie cominimo lloñede. ³ Cai cominimona dajerie Jusiñamui rafuena iñnoñedimaci; iadedi Jusiñamuidi ie lloga rafuena jaca finode. ⁴ Comini tainona llotimaci; iadedi Jusiñamuidi uanaicinona jaca llote. David micorí iena jiaie llote:

O lloga uaimona uanaicinona o llouillana uifnoticai.

O finoca rafuena jiaie comini uaitaia, o dinena jaca anafenodio.

Iena uifnoticai.

⁵ Dane damierie comeciaina facaite: “Jusiñamuidi mareuidimie. Cai baifemo uaide. Cai marañedicinona cai finuamona caina Jusiñamui jitaia, jiaie cominidi Jusiñamui jaca mareuillana uifnotimaci. Cai illa muidona Jusiñamuina iese uifnotimaci. Ie muidona naimiedi cai jeacino facaina caina duere finoñena, jiaie cominina naimiena cai uifnotaja jira”. Omoimona iese dajerie comeciaina facadimaci; ⁶ iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiaie duere finonite.

⁷ Taino cue lloia, iena naimie oni dotaia, naimiedi mare rafuena finuana cominidi uifnotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena.

⁸ Omoimona dajerie cuena ñaitimaci: “Bimie raite: Jusiñamui marenona finuana raise cai uifnollena, marañedicinona finocana cai

jailla' ". Iese cue lloñena jira, Jusiñamui naimacina duere finoia, cuemona mare.

Jeacinona nana cai finodicaí

⁹ Judíuaidicaí; iadedi jeacinona nana comini finua jira, jiaie nairai baifemo fañedicaí. Judíuaidicaí; iadedi jeacinona finodicaí. Judíuainfedinodi jeacinona jiai finodimaci. ¹⁰ Jusiñamui facaina lloraini micoriai iena jaie cuete:

Marebicaidino jaca iñede. Nana comini marañedimaci.

¹¹ Jaca buna Jusiñamuina raise uiñoñedimaci. Naimiena raise uiñoiacañedimaci.

¹² Mare rafuedo nana jañedimaci. Marañedincinona finooidimaci.

Jaca buna marecinona finoñedimaci.

¹³ Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

¹⁴ Naimaci fuiái eo borede.

¹⁵ Icirillamona jiaie cominina raire meinetimaci.

¹⁶ Níne naimaci jiaia, diga marañede rafuena comuitatimaci.

¹⁷ Uri illana uiñoñedimaci.

¹⁸ Jusiñamuina jaciruiñedimaci

jaie iese cuete. ¹⁹ Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci ridolle uai iñede. Nana comini Jusiñamui duere finollicino anamo itimaci. Iena uiñoticaí. ²⁰ Moisés micori lloga uaina inuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

Jesucristona cai inuamona jillobidicaí

²¹ Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedicaí; iadedi Moisés micori iena jaie llote. Jusiñamui facaina lloraini micoriai iena jiai llotimaci. ²² Jesucristona cai inuamona, Jusiñamuidi caina marebicaitate. Nana Jesucristona inotinona marebicaitate. Nie isoide cominina cai ia, caina marebicaitalena, caina daje isoi feiñoite. ²³ Nana caidi jeacinona finodicaí. Jusiñamui caina jitailla isoi, marena iñedicaí. ²⁴ Caina naimie duenaillamona, naimie jitailla jira, Cristo Jesúsna cai inuamona, caina marebicaitate.

²⁵ Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai inoia, caina duere finoñeite. Jusiñamuina mareuidimiena uiñoticaí.

²⁶ Naimiena iese oretajamona, Jesúsna inotimiena Jusiñamuidi marebicaitaja jira, Jusiñamuina mareuidimiena uiñoticaí.

²⁷ Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai inuamona, jillobidicaí. Ie jira cai finoca rafueri abina iedoñedicaí.

²⁸ Moisés micori lloga uaina cai inuamona, marebicaiñedicaí; iadedi Jesucristona cai inuamona marebicaidicaí.

²⁹ Jusiñamuidi dani judíuai imaci Mooñede; iadedi naimiedi nana comini imaci Moo. ³⁰ Cai Moodi jaca damiena jira, naimiena naimaci inua jira, judíuaina marebicaitate. Naimiena naimaci inua jira, judíuainfedinona jiai marebicaitate. ³¹ Cai inuamona cai marebicaila jira, Jusiñamui

facaina lloraini micoriai jaie lloga uaina caitañedica; iadedi iena ua ñnocana jaidica.

4

Abraham micorimona fueotica

¹ Abraham micori rafuena ja ñaiacadie. Naimie marebicaillafuena omoimo lloiacadie. ² Ie finoca rafuemonanaimie micori marebicaidena, naimie micori abina iedote; iadedi ie finoca rafuemonanaimie micori marebicaifede. Ie jira Jusiñamuimona naimie micori abina iedoiacaiñede. ³ Iena Moisés micori jaie cuela: “Jusiñamuina Abraham micori ñnua jira, Jusiñamuidi naimie micorina jeacinona jaca finoñedimienaisoitate. Naimie micorina marebicaitate” cuela. ⁴ Maijillena buna damie ocuiadedi, ibajana jamai fecañeite; iadedi maijia facaina fecaite. ⁵ Ero, ie maijiamona jaca bu jeacinona jaca finoñedimienaisoiacaiñede. Jusiñamuina naimaci ñnua jira, Jusiñamuidi marañedinona marebicaitate. ⁶ Bie rafuena David micori jiai jaie cuela: Ie maijiamona bu marebicaifena jira, Jusiñamui marebicaitagamiedi iocire iite.

⁷ Naimaci marañedinona Jusiñamui dotajamona, iocire iitimaci. Jusiñamui naimaci jeacinona dane abido ietañeite.

⁸ Naie jeacinomo Jusiñamuidi comecina dane facañeite.

Naimiedi jai feitaite.

Ie jira iocire iitimaci.

⁹ Dani abina detatatino iocire illena lloñede; ia abina detatañedinomoiena jiai llote. Jusiñamuina Abraham micori ñnua jira, Jusiñamui naimienamarebicaitate. ¹⁰ Naimie micori abina nia detatañenia, naimie micori marebicaide. ¹¹ Naimie micori marebicailla mei, Jusiñamui dinena Abraham micorimo abi detatajana llote. Abraham micori ie abina detatajamona, Jusiñamuina naimie micori ñnuana uiñotica. Ie abina detatajamona, judío imienajai jaide; iadedi Jusiñamuina ñnuamona, naimie micori marebicaide. Ie jira Abraham micoridi nana Jusiñamuina ñnotinomo. Nana comini abiaina detatañedimaci; iadedi naimaci ñnua jira, Jusiñamui naimacina marebicaitate. ¹² Cai comini abiaina detatatimaci; iadedi cai moo Abraham micori isoi naimaci ñnua jira, Abraham micori isoi marebicaidimaci. Ie jira Abraham micori nana naimaci moo.

Abraham micori ñnuamona, Jusiñamui lloga uaidi suide

¹³ Abraham micorimo Jusiñamuidi: “Nana enirue omo iiticue” llote. “O uruaiamo iena jiai iiticue” llote. Moisés micori llogacinona Abraham micori ñnua jira, iese Jusiñamui lloñede; iadedi Jusiñamui lloga uaina Abraham micori ñnua jira, iese Jusiñamui llote. Abraham micori ñnua jira, Jusiñamuidi naimienamarebicaitate. ¹⁴ Moisés micori lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimienanotinomo: “Nana eniruena omoimo iiticue” llote. ¹⁵ Moisés micori lloga uaina naimaci raise ñnoñenia, Moisés micori lloga uaido jaidino Jusiñamui ricacillifue anamo itimaci; iadedi Moisés micori lloga uai iñedena, Jusiñamuimona buna duere sefuiñeite.

¹⁶ “Eniruena omoimo iiticue” naimienanotinomo Jusiñamuidi llote. Duenaillamona llote. Nana Abraham uruai micoriaimo iena llote. Dani Moisés micori lloga uaido jaidinomo lloñede; iadedi Abraham isoi

innotinomo jiai llote. Abraham micori isoi cai jailla jira, naimiedi cai moo.¹⁷ Jusiñamui iena jaie llote: “Ona diga nairai imaci moona jai itataiticue” llote. Jusiñamui fiodaitinona jilloitarede. Nia iñede rana ie uaido jiai comuitate. Ie jira Jusiñamui Abraham micorimo llua isoi, suide. Jai fiodaitino illa isoi Abraham micori abi illa jira, Jusiñamui naimie abina mairitate. Ie ai oiniñomo urue comuillena llote.

¹⁸ Jusiñamui Abraham micorimo jiai llote: “Ailluena uruai omo iite. Diga nairai omona jebuite” llote. Abraham micoridi naie inorainiga rafuena innote. ¹⁹ Jaca innote; iadedi cien años naimie micorimo illamona, naimie jai eeiroma. Naimie micori aidi, Sara micoridi, oiniñona jira, nainiñño uruedi comuñede. ²⁰ Abraham micoridi Jusiñamui llua innote. Inocana jaillano, iobillacinona Jusiñamuimo fecade. ²¹ Abraham micoridi Jusiñamui lloga uaina finuana eo innote. ²² Ie jira Jusiñamui naimiena marebicaitate.

²³ Naie rafue jaie cuega; iadedi dama Abraham micorimo duiñede; ²⁴⁻²⁵ iadedi caimo jiai duide. Jusiñamuina innotinona marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fiodaite. Caina marebicaitallena, naimiena jai jillotate.

5

Jai cai marebicaidicai

¹ Jusiñamuina cai inuamona cai marebicaila jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. ² Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuiridicai; ³ iadedi duere cai sefuiaidedi, jiai iobidicai. Duere sefuillamona, cai comeciai ocuiñocana cai jaillana uiñotical. ⁴ Cai comeciai ocuiñuamona facacifidicai. Facacifillamona, Jusiñamuimo ocuiridicai. ⁵ Jusiñamui caina isiruilla jira, tainomo ocuiriñeticai. Ie Joreña caimo fecade. Ie Joreño cai comeciamo illa jira, ie Joreño Jusiñamuidi caina naimie caina isiruillana uiñotade.

⁶ Cai jeacinomona dani jillonidicaimo, Cristo cairi fiodaite. Maraiñedicai; iadedi naie facaiseconi cairi fiodaite. ⁷ Maraiñedimie facaina caimona jaca buna fiodaiacaiñede. Caimona nibai damie maremie facaina fiodaite; iadedi nana comini iese fiodaiacaiñedimaci. Maraiñedimie facaina jaca buna fiodaiacaiñede; ⁸ iadedi nia maraiñedicaimo, Jusiñamui caina isiruillamona, Cristo cairi fiodaite. ⁹ Cristo cairi fiodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite. ¹⁰ Cai dinena Jusiñamuina cai enoilla facaiseconi naimie jito cairi fiodailla muidona, ie jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uiñotical. ¹¹ Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

Adán micori finoca rafue

¹² Bie rafue jai suide. Adán micori jeacinona finuamona, nana caimo jeacnodi jai comuide. Jeacino caimo illa muidona, cai jeacino ite diga nana fiodaicana jaidicai. ¹³ Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede. ¹⁴ Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana

comini fiodaicana jaidimaci. Adán micori isoi jeacinona finoñedimaci; iadedi fiodaicana jaidimaci. Adán micoridi Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

¹⁵ Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena. ¹⁶ Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicai; iadedi marebicaidicai. ¹⁷ Dama Adán micori jeacinona finuamona, cai jeacino ite diga nana cai fiodaicana jaidicai. Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui diga jaca iiticai.

¹⁸ Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairedimaci. ¹⁹ Adán micori Jusiñamuina inoñenamona, nana comini jeacinona finodimaci. Jesucristo Jusiñamuina inuamona, ailluena comini marebicaitimaci.

²⁰ Jusiñamui Moisés micorimo rafuena llote. Iena comini inoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite. ²¹ Jeacino anamo jaiie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicaillamona, cai Nama Jesucristo muidona, Jusiñamui diga jaca iiticai.

6

Jesucristomo cai duillamona, jeacino anamo jai iñedicai

¹ Jeacino anamo jai iñedicai; iadedi omoimona damierie comecina faquite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uiñoitica?”. ² Iese comecina façaño. Jeacino anamo jai cai iñena jira, jeacinona finocana cai jaiñena. ³ Biena uiñotomoi. Cristo Jesús dibeimo cai illamona, nana caidi bautizagacai. Cristo fiodailla jira, cai comeciaino ite jearedicino anamo jai iñedicai. ⁴ Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie dibeimo cai illamona, cai jeacino anamona jillodicai. Cai comeciaino jaiie rafue birui illa jira, jaiie rafuedo jai jaidicai.

⁵ Cristo fiodaite; iadedi naiemona jillode. Naimie dibeimo cai illanona, cai comeciaino ite jearedicino anamona cai jillua jira, Cristo ie mare rafue anamo birui iticai. ⁶ Cristo fiodailla jira, cai comeciaino ite jearedicino anamo jai iñedicai. Caimo jai jainaiñena jira, jeacino finocana cai jaiñena. ⁷ Jeacino anamo jai cai iñena jira, jeacinona finocana cai jaiñena. ⁸ Cristo fiodaite; iadedi jillode. Naimie fiodailla jira, cai jearedicino anamo jai iñedicai. Naimie jillua jira, jaiie rafuedo birui jaidicai. ⁹ Fiodaillamona Cristo jillua jira, naimiedi dane fiodaiñeite. Naimie fiodaitemo, cai jeacino facaina naimiedi jai fiodaite. Jai dane

fiodaiñeite. ¹⁰ Jeacino facaina jeacinona oni dotallena, naimie dacaiño fiodaite; iadedi ie Moona jaca iobitanona, naimie ie Moo dibeimo jaca iite. ¹¹ Ie jira jeacino anamo iñenanomo omoi comeciaina faca. Cristo Jesús dibeimo jai omoi illanona, Jusiñamui jitailla rafuena finollemo omoi comeciaina faca.

¹² Jeacinona finocana jaiñeno. Omoi comeciai jeacinona finoacania, iena iñoñeno. ¹³ Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina iño. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaitino isidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isidomoi. Jaie naimiemo duiñedomoi; ia birui naimiemo jai duidomoi. ¹⁴ Moisés llogacinuai anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micori llogacinodo jaiñedomoi; iadedi jeacino omoi finoñellena, omoina Jusiñamui duenailamona, naimie omoina birui canocabide.

Patrón anamo itinomona cai fueolle

¹⁵ Moisés micori llogacino anamo jai iñedica; iadedi omoimona damierie comecina facade: “Moisés micori llogacino anamo cai iñenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jaiñena. ¹⁶ Biena uiñotica. Patrón anamo bu ia, ie patrón comeci jitailla rana finode. Ie ocuica rana iñote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico iñeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi. ¹⁷ Jeacino anamo jaie itomoi. Iemei omoimo jiaie comini Jesucristo rafuena jai llotimaci. Iena cacajanona, iena raise iñotomoi. Ie jira Jusiñamuimo iobillacinona fecadicue. ¹⁸ Jeacino anamona jai jillobillamona, marecinona finocana jai jaidomoi.

¹⁹ Cue lluana omoi raise cacaillena, bie isoide rafuena lloticue. Omoi comeciai railla jira, jeacinona navui finodomoi. Marañedicinona finocana navui jaidomoi. Cristo dibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitailla isoi marena iitomoi.

²⁰ Jeacino anamo navui omoi ia, Jusiñamui jitailla isoi, marecinona finoñedomoi. ²¹ Jeacinona navui omoi finuamona mare rafuena oñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico iñeitimaci. ²² Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie diga iitomoi. ²³ Jeacinona finocana omoi jaia, omoi jeacino ite diga fiodaitomoi. Jusiñamui illanomo ico iñeitomoi; iadedi cai Nama Jesucristona omoi iñuamona, Jusiñamuidi omoina jaca itaite. Naimie illanomo ico iitomoi.

7

Enrede riñomona cai fueolle

¹ Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai

anamo iñede. Ie fiodailla mei, jai iñena jira, nainomo duiñede. ² Ie isoide. Nana naimie ille dinori, inirede riño ie inimo duide. Iese Moisés micorí jaie llote. Ie ini fiodailla mei, ie inimo jai duiñede. Naimie anamo naiñaiño jai iñena jira, jiaimiena naiñaiño oia, ie inina illena, Jusiñamuimona mare. ³ Ie ini nia fiodaiñenia, jiaimie diga naiñaiño ia, ie ini abimo jeacinona jai finode, Moisés micorí lloga uai naiñaiño inoñena jira. Ie ini fiodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

⁴ Ie isoide. Cristo fiodailla jira, Moisés micorí llogacinuai anamo jai iñedicaí. Iemo jai duiñedicaí. Ie jira Cristomo jai duidicaí. Jusiñamui jitailla rafuena finocana caí jaillena, fiodaillamona Cristo jai jillode. ⁵ Jusiñamuina nia caí inoñenia, caí jitaill rafuena finocana jaidicaí. Moisés micorí llogacinona uiñoticaí; ia caí maraiñede jitailla rafuena finocana jaidicaí. Caí jeacino ite diga fiodaicana jaidicaí; ⁶ ia Moisés micorí llogacino jai saide. Caímo jai duiñede. Navui ie anamo iticaí; iadedi birui ie anamo jai iñedicaí. Jusiñamuina caí sedajamona, Jusiñamui Joreño rafuedo jai jaidicaí. Moisés micorí cuegafuiaido jai jaiñedicaí.

Cue comecimo ite maraiñedicino

⁷ “Moisés micorí llogacino maraiñede” lloñeiticaí; iadedi naie llogacino iñedena, jeacinona uiñoñedicue. Jiaimie mo ite rana cue niciduana maraiñenana jaie uiñoñedicue. Moisés micorí jaie llote: “Jiaimie mo ite rana nicidoñeno” llote. Ie jira naiemona niciduanana maraiñenana uiñoticue. ⁸ Naie llogacino muidona cue comeci jeacinona finoacade. Ie muidona rana nicidoticue. Naie llogacino iñedena, jeacino finuana uiñoiacaiñedicaí. Naie llogacino iñedena, jeacino anamo iñedicaí. ⁹ Moisés micorí llogacinona nia cue uiñoñenia, caimare uri iticue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue. ¹⁰ Nano cue comecina facadicue: “Naiedo cue jaillamona, Jusiñamui diga ico jaca iiticue”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede. ¹¹ Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona oticue. Naimie dibeimo Moisés micorí llogacino cuena itatañede; ia naimie dibeimona cuena itatate.

¹² Iese ite; iadedi Moisés micorí llogacinodi mare. Jusiñamuimona ite. ¹³ Naie llogacino mare. Naie rafue muidona fiodaíñeiticue; ia jeacino muidona fiodaíticue. Jeacinona cue finua jira, Jusiñamui illanomo ico jaca iñeiticue. Naie mare llogacinomona jeacino cue finuana eo maraiñenana uiñoticue.

¹⁴ Jusiñamui Joreño Moisés micorína naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana iticue. ¹⁵ Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidicue. ¹⁶ Cue maraiñede finoacaiñega rafuena cue finojade, Moisés micorí llogacino marenana uiñoticue. ¹⁷ Cue comeci iena dama finoñede; iadedi cue comecimo ite jeacino cuena finotate. ¹⁸ Cue comecimo marecino iñede. Mare rafuena finoacadicue; iadedi iena finonidicue. ¹⁹ Cue mare finoacaga rafuena finoñedicue; iadedi cue maraiñede finoacaiñega rafuena finodicue. ²⁰ Cue finoacaiñega rafue cue finojade, cue comeci iena dama finoñede; iadedi cue comecimo ite

jeacino cuena iena finotate. ²¹ Biese cuemo suicabide. Mare rafuena cue finoacaniadedi, jeacinona finocabidicue. ²² Cue comeci Jusiñamui lloga uaina gaide; ²³ iadedi cue comecimo maraiñede rafuena illana uifnoticue. Cue comecina namataacade. Cuena jeacinona finotaiacade.

²⁴⁻²⁵ Eo dueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuiticue. Jusiñamui illanomo ico jaca ifneiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

8

Jusiñamui Joreño cai comeciaina namatacana cai jailla

¹ Cristo Jesús duidinodicai. Ie jira Jusiñamuidi caina duere finoñeite. ² Jeacino anamo jai cai ifna jira, caina duere finoñeite. Jeacinona cai finuamona, Jusiñamui illanomo ico jaca ifneticai. Duere sefuiticai; iadedi naiemona Jusiñamui Joreño caina jai jillotate. Jesucristomo cai duillanona, caina jaca itataite. ³ Moisés micori llogacinona cai raise ifnoñena jira, jeacinomona dani jillonidicai. Ie jira Jusiñamuidi ie Jitona orede, ifmana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fiodaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate. ⁴ Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

⁵ Cai comecimo ite maraiñede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai. ⁶ Maraiñede jitaillicinomo comeciaina facacabidino Jusiñamui diga ico jaca ifnetimaci; iadedi Jusiñamui Joreño jitailla rafuedo jaidino Jusiñamui diga jaca ifnetimaci. Jiai jaca uri ifnetimaci. ⁷ Jiaino Jusiñamuina enoidimaci. Jusiñamui lloga uaina jitaifnetimaci. Iena ifnonidimaci. ⁸ Iese ifino Jusiñamuina iobitanidimaci.

⁹ Iese ifnedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño ifnenia, Cristomo nia duiñede. ¹⁰ Jeacinona omoi finua jira, fiodaitomoi; iadedi Cristo omoimo illa jira, omoi joreñuai Jusiñamui illanomo jaca ifnetimaci, Jusiñamui omoina marebicaitaja jira. ¹¹ Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiodaide, Jusiñamuidi ie Joreño uaido omoi abiaina jiai jillotaite.

¹² Cue amatiai, iese caimo suite. Ie jira cai comeciaino ite maraiñedinodo cai jaiñelli. ¹³ Naicinodo cai jaia, Jusiñamui illanomo ico jaca ifneticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca ifneticai.

¹⁴ Nana Jusiñamui Joreño namatadinodi Jusiñamui uruai. ¹⁵ Jusiñamui Joreño feiñoñedomoi, naimiena omoi jaciruillena; iadedi Jusiñamui uruaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: "Cai Moo" raillanona, Jusiñamuina uaidotomoi. Ie jira naimiena jai jaciruifnedomoi. ¹⁶ Cai comeciaina Jusiñamui

Joreño uñotajamona, cai comeciãmona Jusiñamui uruiãidicãina jai uñoticãicã. ¹⁷ Naimie uruiãidicãina jira, ie uruiãimo fecaacalle ra caimo jai duide, Cristo jai duilla isoi. Naimie ðibeimo cai illanona, Cristo isoi cai duere sefuilla jira, naimie isoi ie Moo illanomo ico iiticãicã.

¹⁸ Biena uñoticue. Bene birui duere sefuidicãicã; iadedi iemo cai comeciãina cai facañena, monamo ico eo marena jaca cai illena jira. ¹⁹ Iese cai illemo nana Jusiñamui finoca radi iocire birui ocuridimaci. ²⁰ Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci, ²¹ naimaci rifallamona ico naimaci jillua jira. Ie mei Jusiñamui uruiãidicãina isoi marena iitimaci. Dane fioidañeitimaci. ²² Biena uñoticãicã. Nana Jusiñamui finoca radi danomo eo duere sefuicãina nia jaidimaci. Marena illemo nia ocuridimaci. ²³ Dani naimaci duere sefuicãina jaidimaci; iadedi jiaicã duere sefuidicãicã. Jusiñamuidi ie Joreño caimo fecaja jira, ico cai marena illena uñoticãicã. Monamo Jusiñamui uruiãina ico cai illemo ocuridicãicã. Cai fioidãia, fioidallamona cai abiaãina jillotaite. Jiaifo eruãite cai abiaãimo meidollemo ocuridicãicã. Ie mei cai abiaãi dane fioidañeitimaci. ²⁴ Naiemo cai ocurillamona, cai jeacinomona navui jillobidicãicã. Bumo ie jitailla ra ia, iemo naimie ocuriñede. Ie feiñoñega ramo ocuride. Ie isoidemo ocuridicãicã. ²⁵ Caimo suiñede rafuemo cai ocurilla jira, iemo fecuise ocuridicãicã.

²⁶ Birui duere cai sefuia, ico marena cai illemo ocuridicãicã. Jusiñamui Joreño cãina jiaicã canode. Jusiñamuimo cai jiaãia, naimiemo cai jicanua rafuena cai raise uñoñenia, ie Joreño cai facãina ñãite. Naimiedi cai jino botanide uaina Jusiñamuimo llote. ²⁷ Jusiñamui cai comeciãina uñote. Naimie jitaillacãina ie Joreño jiaãia jira, iena uñote. Jusiñamui cominidicãicã. Ie Joreño cai facãina ñãiana cacade.

Jusiñamui cãina isiruite

²⁸ Jusiñamuina isiruitinodicãicã. Naimie jitailla jira, naimie cãina fetode. Jusiñamuidi caimo suide rafuena marena suicãina jaitate. Iena uñoticãicã. ²⁹ Cãina isiruillanona, cãina fetode. Nano dofoconimona cãina naimie Jito isoi cai illena itatate. Naimie Jitodi cai ama doforãmiena. ³⁰ Cãina iese jaie itatajamona, birui cãina uaidote. Cãina uaiduanona, cãina jeacãina jaca finoñedino jai isoitate. Cãina jeacãina jaca finoñedino jai isoitajamona, naimie illanomo ico cai ia, ebire iiticãicã.

³¹ Iese cãina itataja jira, Jusiñamuidi cai facãina illa jira, bu cai facãina iñellena, damamai iesedicãicã. ³² Jusiñamuidi ie Jitona duere sefuillamona jillotañede; iadedi namie jitailla jira, cai facãina ie Jitona orede, cairi fioidallena. Ie muidona naimie ðibeimo marena cai ille rafuena caimo jiaicã iite. ³³ Jeacãina navui finodicãicã; iadedi Jusiñamuidi cãina jeacãina jaca finoñedino jai isoitaja jira, Jusiñamui fetocãinodicãina jira, jaca buna cai jeacino facãina naimiemo llogidoñeite. ³⁴ Ie jira cai jeacino facãina jaca buna cãina duere finotañeite. Cristo Jesús jaie fioidaite; iadedi fioidallamona naimie jillode. Jusiñamui beicãimo naimiedi birui ite. Cai facãina naimie ñãite. ³⁵ Cristo cãina isiruite. Jaca buna Cristo cãina isiruillacãina baionide. Jiaie comini duere cãina finoia, cãina jeare finoia, aime cai guãia, cai iniroinia, jacirede rafue caimo ia, jiaie comini cãina meineia, Cristo cãina nia isiruite. ³⁶ Iena Jusiñamui facãina llorãima micori jaie cuega:

Jusiñamui muidona caina jaca meinetimaci, mercadomo toica llaudaiaia fallena illa isoi cuega. ³⁷ Cristo caina isiruilla jira, caina naimie canuamona, naga bie isoide rafue caimo sua, cai comeciaia ocuiñocana cai jailla. ³⁸ Jusiñamui caina isiruite. Naimiemona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaiaidi, Taifedi, Janabadi Jusiñamui isiruillacinomona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomona caina baironide. ³⁹ Monamo ite radi Jusiñamui isiruillacinomona caina baironide. Eniruemo ite radi Jusiñamui isiruillacinomona caina baironide. Nana Jusiñamui finoca radi Jusiñamui isiruillacinomona caina baironide. Cai Nama Cristo Jesúmo cai duilla jira, Jusiñamui caina isiruillana uiñoticaia.

9

Jusiñamuidi judíuaia railla cominina fetode

¹⁻² Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uiñotajamona, iena uiñoticue. Cue cominiri sunaiticue. ³ Cue cominiri Cristo rafuena ñnoiacañedimaci. Ie muidona Jusiñamui ricaiñifue anamo birui itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amataia. ⁴ Israel railla cominidimaci. Jiaicidi judíuaia railla cominidimaci. Jusiñamuidi naimacina fetode, ie uruina. Jusiñamui siño finoca rafuena ciodimaci. Iena naimaci ñnollena, Moisés micorimo Jusiñamuidi rafuena jiaia llote. Naimiena sedallena jiaia llote. Naimaci dine naimaci jilloitaraimana oretallena jiaia llote. ⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaiaicue.

⁶ Cai cominimo Jusiñamuidi ie uaina llote; iadedi nana cai cominiri iena ñnoñena jira: “Jusiñamui ie lloga uaina finoñede” raiñeiticai. Jusiñamuina naimaci raise ñnoñena muidona, nana Israel micorimona comuide cominidi Jusiñamui duiñedimaci. ⁷ Nana Abraham micorimona comuidinodi naimiemo duiñedimaci. Jusiñamui iena jiaie llote: “Dama Isaacmona comuidinodi ua Abraham uruiaia”. ⁸ Naie lluamona nana Abraham micorimona comuidinona ie uruiaiañenana uiñoticaia. Jusiñamui lloga uaina ñnotinodi naimie ua uruiaia. ⁹ Jusiñamuidi Abraham micorimo jiaie llote: “Jiaie año bie facaiseconi o dine abido biiticue. Naie facaiseconi o ai Saradi jitona jocoite” llote. Ie mei iese suide.

¹⁰ Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaiaiaia micorina jocode. Nano doforamiedi Esaú micori. Jiaimiedi Jacob micori. ¹¹⁻¹³ Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraia micori Jusiñamui lluaia jiaia cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaiaiaia micori nia jeicñenia, iaiaiaia micori marecinona nia finoñenia, iaiaiaia micori marañedicinona nia finoñenia, Jusiñamuidi iaiaiaia micorina iese llote. Ie finoca rafuemoa Jacob micorina fetode; iadedi Jusiñamui jitaiaia jira, Jacob micorina fetode.

14 “Jusiñamuidi dama Jacob micorina fetuana maraiñede” raiñeiticai. Jusiñamuidi maraiñedicinona jaca finoñede. 15 Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitañenanona duenaiñeiticue” llote. 16 Comini naimiena jitaillanona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaiñe. 17 Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodice, cue uai siñonana jiaie comini uiñollena, nana cominido cue mameci sorillena”.

18 Jusiñamui iese ite. Naimie dinena ie jitaillanona duenaiñe. Naimie jitailla jira, jiaie cominina naimiena inotañede.

19 Nibai comeciaina facadomoi: “Cominina iese Jusiñamui itataia, ¿bue ñellena naimacina duere finoacade?” 20-21 Iese comeciaina facañeno. ¿Ñiese nainona naimiemo ducañitomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. 22 Ie isoide. Nana comini dajena eruaiñeiticai. Ie jitailla isoi, jiaiforie Jusiñamui caina comutate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiaie uiñotaacade; iadedi naimacina nia duere finoñede. 23 Cominina Jusiñamuidi jiaie duenaiñe jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate. 24 Jusiñamui caina iese itatate. Da judiuaia iese itatañede; ie iadedi judiuañedinona jiaie iese itatate. 25 Jusiñamui iena jiaie lluaana Oseas micori jiaie cuete:

Cue cominiñedinodi cue cominina jaitimaci. Isiruiñeganona isiruiticue.

26 Dane jiaie cuete:

Navui cue cominiñedomoi; iadedi jiaie comini omoina ico lloitimaci:

“Naimacidi jaca cajede cai Jusiñamui ie uruiaidimaci” lloitimaci cuete. 27 Isaías micori railla lloraima jiaie cuete: “Monailai fuemo conillie eo ite. Ie isoi Israel micori uruiái eo jebuitimaci; iadedi Jusiñamuidi nana naimacina jillobitañeite. Dajeriena jillotajanona, 28 jiañonomo ie lloga uaina raire finoite. Naimacina duere finoite” cuete. 29 Isaías micori jiaie cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jiaie cuenode.

Gomórramo ite comini micoriaina jiaie cuenode.

Naimaci micoriái isoi iñedicai, nana cai cominina naimiedi duere finoñena jira.

Judiuaidi Cristo rafuena jitañedinaci

30 Biemo comeciaina faca. Judiuañedinodi Jusiñamui jitailla isoi, marena illana navui uiñoiacañedinaci; iadedi iena jai uiñotimaci. Jesucristona naimaci inuamona, marena illana jai uiñotimaci. 31 Jusiñamui jitailla isoi marena naimaci illena, judiuaidi Moisés micori llogacinodo jaidimaci; iadedi Moisés micori llogacinona naimaci raise inoñena jira, marena illana jaca uiñoñedinaci. 32 Naimaci finoca rafuemonona marena iacadimaci. Marena naimaci illena, Jesucristona inoiacañedinaci. Naimie muidona marena iñeitimaci. 33 Isaías micori iena jiaie cuete: Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.
 Naimiena naimaci inoñenia, fafitimaci;
 iadedi naimiena inotinodi tainona inoñeitimaci.
 Suubicaiñeitimaci” llote.

10

¹ Cue amatiai, judíuai comini jilluana eo jitaidicue. Jusiñamui diga cue ñaia, iena jicadicue. ² Jusiñamui jitaillacinona eo finoacadimaci. Iena uifnoticue. Iena finoacadimaci; iadedi iena finuana raise uifnoñedimaci. ³ Jusiñamui naimacina marena itatallena uifnoñedimaci. Naimaci finoca rafuemon marena iacadimaci. Jusiñamui llua isoi jaiacaiñedimaci. ⁴ Nana Cristona inotimiedi Moisés micori llogacinodo naimie marena illena jai jaiñede. Cristona inuamona, Jusiñamui jitailla isoi, naimie marena jai ite.

⁵ Moisés micori jaie cuete: “Naimie marena illena, cue lluado jaidimiedi jaca iite, cue lluana naimie raise inoia” cuete. ⁶ Iese jaie cuete; iadedi jaca buna iese inoñede. Cristona inuamona, marena Jusiñamui jitailla isoi, birui iticai. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticai. ⁷ Fiodaitino dine jaiticai, Cristona cai jillotallena’. Iese comeciaina facañeno” llote. Cristodi eniruemo jaie bite. Fiodaite; ia naiemona jai jillode. ⁸ Jusiñamui uai llote: “Naie rafue cai dine jai ite. Iena jai uifnoticai”. Cai jilloillena Cristona cai inuana birui lloticai. ⁹ Jiaie cominimo: “Cristodi cai Nama” omoi lloia, Cristo fodaillamona Jusiñamui naimie jillotajana omoi inoia, jilloitomoi. ¹⁰ Cai comecimona cai inua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

¹¹ Isaías micori iena jaie cuete: “Cristona inotinodi tainona inoñeitimaci. Suubicaiñeitimaci” cueda. ¹² Naie rafuedi nana cominina ñaite. Judíuaina ñaite. Judíuaiñedinona jai ñaite. Jusiñamui anamo nana cominidi itimaci. Nana naimiemo jicanotinona jaca duenaite. ¹³ Cristodi naga naimiemo jicanotimiena jillotaite; ¹⁴ iadedi Cristona naimaci nia inoñenia, naimiemo jicanonidimaci. Cristo naimaci facaina fodailla rafuena naimaci nia cacaiñenia, naimiena inonidimaci. Naimacimo naie rafuena jiaie comini lloñenia, iena cacaiñeitimaci. ¹⁵ Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidicai” cuete.

¹⁶ Iese cuete; iadedi ailluena comini naie rafuena nia jitañedimaci. Isaías micori iena jai jaie cuete: “Jusiñamui, ailluena comini cai lluana inoiacaiñedimaci” cuete. ¹⁷ Cai lluamona Cristo rafuena cacadimaci. Cristo rafuena cacajamona, damierie naimiena inotimaci.

¹⁸ Judíuai comini naie rafuena jai cacadimaci. Jusiñamui facaina lloraima micori iena jaie cuete:

Naga eniruemo ite cominimo Jusiñamui lloraini micoriaidi naie rafuena jai llotimaci

cuete. ¹⁹ Judíuai comini naie rafuena cacadimaci; iadedi iena inoñedimaci. Moisés micori iena jaie cuete:

Jusiñamuidi llote: “Cue rafuena naimaci feiñua jira, judíuaiñedino diga uradoitomoi.

‘Naimaci abina uifnoñedimaci’ raitomoi;
 iadedi cue rafuena naimaci feiñua jira, naimaci diga iciritomoi” llote.

20 Isaías micorí marefodo jiaí cuete:

Jusiñamui llote: “Cuena jenoñedino cuena jai baitimaci.

Naimacina cue jilloitallena cuena jicanoñedino mo jai bairedicue” llote.

21 Jusiñamui judíuai cominina jiaí llote: “Naimacina cue dine jaca uaidoticue; iadedi ñnoiacañedimaci. Cuena jitañedimaci” llote.

11

Judíuai cominimona dajerie ñnoitimaci

1 Jusiñamuidi judíuaina fainonocailamo omoi comeciaina facañeno. Judío imiedicue. Abraham uruai micoriaimona comuidicue. Benjamín railla nairai imiedicue. 2 Naimacina jaie naimie fetua jira, Jusiñamui judíuaina fainonocañede. Elíamo jaie ite rafuena uiñotomoi. Jusiñamuimo naimiedi judíuaina llote: 3 “Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuena jiaí meineiacadimaci”. 4 Jusiñamui dinena uai ote: “Dama iñedio. Siete mil iñiaí cue dibeimo nia eenoticue. Baal railla jiraraina jaca sedañedimaci. Cuena nia sedadimaci” llote. 5 Birui ie isoide. Naimacina duenaillamona, naimacina Jusiñamui fetua jira, dajerie Jusiñamui dibeimo itimaci. 6 Naimacina duenaillamona, naimacina fetode. Naimaci finoca rafue muidona naimacina fetofede. Naimaci finoca rafue muidona naimacina fetodena, naimacina duenaillamona naimacina fetofede.

7 Ie jira iena iese lloiticue. Ailluena judíuaidi marena Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena ñnoiacañedimaci. 8 Jusiñamui facaina lloraini micoriaí iena jaie cuela: “Jusiñamuidi naimacina abina uiñotañede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacia, iena cacañedimaci. Birui iese nia itimaci” cuela. 9 David micorí iena jiaí llote:

Naimacimo aillue ra illamona, Jusiñamui naimacina duere fñoite.

10 Naimaci comeciái Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

Judíuaiñedynomona dajerie ñnoitimaci

11 Naimie rafuena judíuai comini jitañena jira, Jusiñamui naimacina duere finode; iadedi naimacina sofeñede. Jusiñamuina judíuai ñnoñena jira, Jusiñamuidi judíuaiñedynomona jai jillotate. Naimacina jai jillotate, judíuai dinena judíuaiñedynomona uradoillena. Uradoillamona Jusiñamuidi naimaci naimiena ñnollena jitaide. 12 Cristona judíuai jitañena jira, Jusiñamuimona judíuaiñedynodi diga marecinona birui feiñotimaci. Cristo dibeimo ico judíuai ia, Jusiñamuimona judíuaiñedino ailluena feiñoitimaci.

13 Judíuaiñedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ññaticue, 14 cue comini cuena uradoillena, Cristona dajerie ñnotallena. 15 Cristona naimaci nia ñnoñena jira, judíuaiñedino jai ñnotimaci. Cristona ico judíuai ñnoia, Jusiñamui diga jaca iitimaci. 16 Janore jisa juillirua marenia, nana juilliruaídi mare. Riara ie jainauai marenia, nana ie igaillai mare. Judíuaidi ie isoidimaci. Naimaci jaiagai micoriaí jainauai isoidimaci. Naimaci jaiagai marenia, naimacidi jiaí mare. Birui ite judíuaidi igaillai isoidimaci.

¹⁷ Taide igailaidi ie amenamo jai duiñede. Ie isoidimaci. Naimacimona Cristona jaino ñnoñena jira, Cristomo jai duiñedimaci. Sotaca riará isoi, naimaci ifomo itomoi. Ie jira Jusiñamuimona rafuena jai feiñocabitomoi. ¹⁸ Naimaci ifomo omoi illa jira, abina uradoiñeno. Igaillaimona jainao cajellena, ie ijina oñede; iadedi iemo duilla jira, jainaomona igaillai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feiñocabitomoi.

¹⁹ Comeciaina facadomoi: “Taide igaillai ifomo iticai isoidicai. Jusiñamui judíuaina oni dotade, caina fetollena”. ²⁰ Uanaicinona comeciaina facadomoi. Naimaci ñnoñena jira, Jusiñamuidi naimacina oni dotade. Omoi ñnua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui. ²¹ Naimiema naimaci ñnoñena jira, judíuaina duere finode. Naimiema omoi ñnoñenia, daje isoi omoina duere finoite. ²² Biemo comeciaina faca. Naimiema ñnoñedinona jai duere finode; iadedi omoina duenaite. Naimiema ñnocana omoi jaiá, naimie omoina nia duenaite. Iese omoi jaiñenia, naimie omoina dotaite. ²³ Judíuái Cristona ñnoñeno navui jaidimaci: iadedi Cristona naimaci birui ñnoia, naimie ñbeimo Jusiñamui naimacina itatarede, igai riaramo sotaja isoi. ²⁴ Ailli riarana cueticue. Naie amenamo nano duiñedomoi. Judíuái nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judíuaina abido oite.

Eo ailluena judíuái jilloitimaci

²⁵ Bie rafuena omoi uiñuana jitaidecúe. Iena navui uiñoñedicai. “Judíuái baifemo faiticai” omoi raiñellena, biena omommo lloticue. Diga judíuái Cristona birui ñnoiacaiñedimaci. Jusiñamui jitailla diese judíuáiñedinno jillua facaisena, iese iitimaci. ²⁶ Ie mei eo ailluena judíuái jilloitimaci. Jusiñamui facaina lloraini micoriai iena cuetimaci: Jerusalémóna cai Jilloitaraíma biite.

Jacob micori uruiaimona jeacinona dotaite.

²⁷ Naimaci jeacinona oni dotajanona, Jusiñamui jaie lloga uai suite.

²⁸ Cristona birui ñnoiacaiñedimaci. Jusiñamuina enoidimaci. Jusiñamuina naimaci jitañena jira, naimie omoina fetode. Ie jira jillodomoi; iadedi Jusiñamuidi judíuaina nano jaie fetode. Naimaci jaiagai micoriaímo ie lloga uaina jira, naimacina nia isiruite. ²⁹ Jusiñamui ie lloga uaina saiñede. Naimacina fetua jira, naimacina fañonocaiñeite. ³⁰ Jusiñamuina navui ñnoñedomoi; iadedi Jusiñamuina naimaci ñnoñena jira, Jusiñamui omoina jai duenaite. ³¹ Jusiñamuina jai ñnoñedimaci; iadedi omoina naimie duenaila isoi, Jusiñamuidi naimacina ico jai duenaite. ³² Jusiñamui nana cominina naimiema ñnoñenana uiñotade, naimacina naimie duenailena. ³³ Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicai. Naimie finoca rafuena raise jai uiñoñedicai. ³⁴ Jusiñamui facaina lloráima micori iena jaie cuete: “Jaca buna cai Nama Jusiñamui comeci facajacinona uiñoñede. Jaca buna naimiemo ie finoca rafuena lloñede. ³⁵ Jaiñruido ñbana feiñollena, jaca buna naimiemo rana fecañede” cuete. ³⁶ Naga ra naimiemo illa jira, naga ra naimiema bite. Naga rana finode. Naimiemo iobillacinona cai fecacabillasa. Iena jitaidecúe.

12

Jusiñamui anamo raise omoi i

¹ Cue amatiai, omoimo bie rafuena lloiticue. Jusiñamui caina duenaila jira, omoi jeanide comeciamona, naimie jitailla rafuena omoi finuamona naimie anamo raise omoi i. Naimie jitailla isoi omoi i. Naimiedi omoi iese illana gaide. Omoi comeciamona naimiena raise omoi seda. ² Cristona uiñoñedino isoi omoi iñeno; iadedi omoi comeciai iuaina meiduanona, jiaie rafuedo mai omoi jai. Ie mei Jusiñamui jitailla rafuena finuana uiñoitomo. Mare rafuena finuana uiñoitomo. Naimiena iobitajacinona jiai uiñoitomo. Eo mare rafuedo jaillana uiñoitomo.

³ Jusiñamui cuena duenailamona, bie rafuena omoimo cue llollena, naimie uai cuemo ite. “Jiaie comini baifemo faiticue” raillamo o comecina facañeno; iadedi: “Nie isoidimiedicue” o raillamo o comecina raise faca. Jusiñamuimona o feiñoga diese inuacinomo o comecina faca. ⁴ Nagamie ie abimo diga ra ite. Ie onolli ite. Ie uisi ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiaide. ⁵ Ie isoide. Cristona jai inotikai. Aillosiedicai; iadedi daajena naimiemo jainaiaidicai. Dani caimo jiai jainaiaidicai.

⁶ Jusiñamuidi daje isoide uaina naimie dibeimo cai majillena, caimo fecañede. Ie jitailla diese caimo fecade. Ie jira omoi feiñoga uaido naimie facaina maji. Rafuena omoimo Jusiñamui lloia, iena raise llono. Roracomo omoi majillena Jusiñamui lloia, nainomo raise maji. Omoi llofuellena Jusiñamui lloia, naimie rafuena raise llofue. ⁷ Roracomo majiacinona uiñotimiedi nainomo raise majia. Llofuiacinona uiñotimiedi raise llofua. ⁸ Comeci ocuiñotajacinona uiñotimiedi comini comeciaina ocuiñotacana jailla. Rana fecajacinona uiñotimiedi rana caidiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiailamona, iese coninina canocana jaiticai.

Cristo rafuedo cai jailla

⁹ Omoi comeciamona nana cominina isirui. Marañedicinona gaiñeno; iadedi mare rafuedo omoi jai. ¹⁰ Coninina isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

¹¹ Cristo rafuena sefuiruiñeno finocana omoi jai. Cai Namana iocire seda.

¹² Naimie dine omoi illemo iocire omoi ocuiri. Duere omoi sefua, omoi comeciaina ocuiño. Jusiñamui diga ñaicabillanona omoi jai.

¹³ Jiaie creyentiai rania, naimacina cano. Omoi jofuemo creyentiai ria, naimacina nafue.

¹⁴ Jusiñamui dibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoñeno.

¹⁵ Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

¹⁶ Daje isoi omoi comeciai lloillamona uri omoi i. Abina birioicaiñeno. Jamai bue isoidino diga nabairi. “Jiaie comini baifemo uiñotikai” raiñeno.

¹⁷ Jiaie comini omoina jeare finoia, naimacina daje isoi jeare finoño. Hbana oñeno. Omoi marena illana jiaie comini uiñollena, marena omoi i.

¹⁸ Omoimona rafuena suiñoño. Nana comini diga uri omoi i. ¹⁹ Cue isiruigano, bu omoina jeare finoia, ibana oñeno. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina

duere finodicue. Ibana oiticue' ” cuete. ²⁰ Ibana oñeno. Jusiñamui facaina lloraima iena jaie jiaí cuega: “Omoí enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoimo eruaite. ²¹ Jiaie comini omoína jeare finoia, iciriñeno; iadedi naimacimo mare rafuena fino. Iese omoí finoia, naimacina omoí díbeimo itatait-omoí.

13

¹ Nana illaicomínina naimaci ifomo Jusiñamuidi itataja jira, illaicomíni lloga uaina nana cai inua. ² Illaicomíni uaina bu inoñenia, Jusiñamuina jiaí inoñede. Ie mei Jusiñamui naimiena duere finote. ³ Mare rafuena finodinodi illaicomínina jaciruiñedimaci; iadedi maraiñede rafuena finodino naimacina jaciruitimaci. Omoína duere finoñellena, mare rafuena finocana omoí jai. Iese omoí jaia, omoína marena ñaitimaci. ⁴ Jusiñamui facaina omoína canodimaci. Maraiñede rafuena omoí finoia, naimacina jacirui. Omoína duere finollena, naimacimo uai ite. Maraiñede rafuena finodimiena Jusiñamui facaina duere finoitimaci. ⁵ Ie jira naimaci uaina ino, Jusiñamuimona omoí duere sefuiñellena. Omoína: “Mare” jiaí raitimaci. ⁶ Gobierno omoína ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷ Gobierno omoína ibataia, iena iba. Illaicomínimo iobillacinona feca. ⁸ Ra omoí oia, ibaño jaiñeno; iadedi coninina omoí isirui. Jiaie comínina isiruitimiedi nana Jusiñamui lloga uaina jai finode. ⁹ Moisés micori diga lletarafuena jaie cuete: “O añede riño diga iñeno. O iniñede ima diga iñeno. Jiaimiena meineño. Rana fiñeno. Jiaimiemo ite rana nicidoño” cuete. Jiaí lletarafue ite: “Dani omoí abiaína omoí isiruilla isoi, jiaie comínina omoí isiruilla”. Bie lletarafuena omoí inoia, nana lletarafuena jai inotomoi. ¹⁰ Jiaie comínina omoí isiruia, naimacina jeare jai finoñedomoi. Jiaie comínina omoí isiruia, nana Jusiñamui lloga uaina jai inotomoi.

¹¹ Iena birui cai finua. Jesucristo billiruidi iaírei jai ite. Naimiena cai nano inua facaiseconi, naimie billiruimo cai comeциаína facadica; iadedi nagarui naimie billirui iaírei iñoicaide. ¹² Jesucristo nia dane biñena jira, eniruemo cai illa jira, jitiredinomo iticai isoidicai. Naimie bia, naimie diga cai illemona, useredinomo raíre ja iticai isoiticai. Ie jira jeacinona finocana cai jaillana mai cai faínonocaili. Jesucristo rafue anamo raise cai illesa. ¹³ Cai marena illana nana comíni uifollena, mare rafuena finocana cai jailla. Jearede rafuena cai finoñena. Cai jifaiñena. Cai añede riño diga cai iñena. Cai fuiriñena. Cai abina uradoiñena. ¹⁴ Iese cai iñena; iadedi naimie caína namatallena, cai Nama Jesucristona raise cai nabailli. Cai jearede navui jitaillacinona finoacanamo cai comeциаína facañena.

14

Jiaie creyentena jeare ñaiñeno

¹ Cristona inotimiena omoí dine biade, naimiena raise feiño. Naimie Cristona nia raise inoñenia, naimiena nafue; iadedi omoí isoi naimie inoñenia, conima uina caitañeno. ² Dajerie naga rana gutimaci; iadedi jiaimie difai guiga rana guite. Naimie riñede. Ie comeциаí facade: “Cue riia, jeacinona jai finoiticue”. ³ Naga rana guíñedimiena miñeno. Naga rana gutimiena miñeno. Jusiñamuidi naimacina jai feiñote. Ie jira

miiñeno. ⁴ Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi raillanona, Jusiñamuidi naimacina canoite.

⁵ Dajerie creyentiai comeciaina facadimaci: “Judíuái rafue finuaruillai Jesuñamuina sedajiticaí, nairuillai jiairuillai baifemo uaila jira”. Jiaino raitimaci: “Nagarui daje isoide” raitimaci. Nagamie ie comecina raise facajamona, ⁶ cai Namana iobitallena, nagamie ie jitaillarui mo cai Namana sedaite. Naga rana gutimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

⁷ Cristomo cai duilla jira, daní cai jitailla rafuena finonidicaí. Cai fiodailliruina jiai llonidicaí. ⁸ Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticaí. ⁹ Cristodi fiodaite. Ie mei jillode. Ie jira naimie anamo iticaí. Cai cajenia, naimie anamo iticaí. Cai fiodaia, naimie anamo jiai iiticaí.

¹⁰ Naimie baifemo omoi iñena jira, jiaie creyentena miiñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iiticaí. Jusiñamuidi maraiñedinona duere finoite. Maredinona duere finoite. ¹¹ Isaiás micori jai e iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

¹² Nainomo Jusiñamuimo nana cai finouiga rafuena lloiticaí. Ie jira jiaie creyentiai diga marena omoi i.

Jiaie creyentena jeacino finoi raillano, mare rafuedo cai jailla

¹³ Ie jira jiaie cominina cai miiñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla. ¹⁴ Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue ríia, jeacinona finoñedicue. Iena uiñoticue; iadedi jiaimie comecina facade: “Biena cue ríia, jeacinona jai finodicue”. Naimie comecina iese facajamona, iena naimie ríia, naimiemona jeacinona jai finode. ¹⁵ O riga ra muidona jiaie creyente comeci maraiñeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañellena. ¹⁶ Ie jira o jitailla rana finoñeno. Jiaie comini ona miiñellena, naie rana riñeno. ¹⁷ Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite. ¹⁸ Iese cai jaia, Cristona raise sedadicaí. Jusiñamuina iobitadicaí. Jiaie comini caina marena jiai ñaitimaci.

¹⁹ Ie jira uri icana cai jailla. Daní cai comeciaina ocuiñocana cai jailla. ²⁰ Omoi ríiacaga ra muidona, jiaie cominina Jusiñamuina fainonocaitañeno. Naga radi mare, rillena; iadedi bue isoide omoi ríia muidona, jiaimie Jusiñamuina fainonocaia, jeacinona jai finodomoí. ²¹ Bue isoide omoi ríia muidona, jiaimie jeacino finoí raillanona, iena riñeno. Bue isoide omoi jirua muidona, jiaimie jeacino finoí raillanona, iena jiroñeno. Bue isoide omoi finua muidona, jiaimie jeacino finoí raillanona, ie isoide omoi finoñeno. Naimiedi Cristomo jai duide. ²² Mare ra omoi finoia, omoi comeciaymona iena uiñotomoí. Jusiñamuidi omoi

comeciaina uñña jira, iena marefodo lloñeno. Omoi comeciaimona jeacinona omoi finoñenana uñnotomoi. Ie jira iocire itomoi. ²³ “Nie isoide ra cue riia, jeacinona finodicue” raillanomo bu iese comecina facaia, iena naimie riñena. Iena naimie riia, Cristona naimie raise ñnoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

15

Jiaie creyentena cai canua

¹ Cristo rafuedo raise jaidicai; iadedi jiaino Cristo rafuedo cai isoinia jaiñedimaci. Naimacina cai canua. Ie jira dani cai jitaille rafuena finoñeiticai; ² iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena. ³ Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete. ⁴ Naiemona cai fueollena, naiemona cai comecai ocuiñotallena, Jusiñamuina jaie ciegafuiaidi caimo ite. Naiemona Jusiñamui illanomo cai illemo ocuridicai. ⁵ Jusiñamui cai comeciaina ocuiñotade. Naimie coniniri omoina uri itatajana jitaidicue. Cristo Jesús llua isoi, omoi uri illana jitaidicue, ⁶ daje isoi omoi comecai lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

Judúuaiñedinodi Cristo rafuena jiai cacadimaci

⁷ Jiaie illanomona creyente omoi roracomo bia, Cristo caina feiñña isoi, Jusiñamuina iobitallena, naimiena raise omoi feiño. ⁸ Iena nia lloiticue. Judúuaina canollena, Jusiñamui lloga uaina fuidollena, Cristodi bite. Jusiñamui tañona lloñede. Jusiñamui naimaci jaiagai micoriaimo ico suille rafuena jaie llote. Eniruemo billanona, Cristo iena fuiduabitte. ⁹ Judúuaiñedino Jusiñamuina iobitallena, Jusiñamui naimacina duenailla jira, Cristodi bite. David micori Cristo llua jaie cuete: Judúuaiñedino motomo cue illamona ona iobitaitimaci. Ruamona cue muidona ona jiai iobitaitimaci.

¹⁰ Moisés micori jiai cuete:

Judúuaiñedino, Jusiñamuimo duide comini diga iobi.

¹¹ David micori jiai cuete:

Nana judúuaiñedino, Jusiñamuimo iobillacinona fecu.

Nana comini naimiemo iobillacinona fecacabillasu.

¹² Isaías micori cuete:

Isaí micori uruaimona damie comuitajamona, naimiedi judúuaiñedinona sedaite.

Naimie naimacina jillobitallena, naimiemo ocuritimaci.

¹³ Jusiñamui iemo omoina ocuritate. Naimiena omoi ñnuanona, naimie omoina caimare itatajana jitaidicue. Uri itatajana jiai jitaidicue. Iemei Jusiñamui Joreño naimie siño uai diga omoi jilluamo omoina ocuritaite.

¹⁴ Cue amatiai, omoina uñnoticue. Eo maredomoi. Cue lloga rafuena eo uñnotomoi. Coninina llofueredomoi. ¹⁵ Iena omoi começillena, dafuerie rafuena omoimo marefodo cueticue. Jusiñamui cuena fetuanona, ie rafuena cue lloillena, cuena orede. ¹⁶ Judúuaiñedinomo Jusiñamui ie mare

rafuena cue lllollena, Cristo Jesús facaina maijidicue. Jusiñamui dibeimo naimacina cue itatajana, Jusiñamui naimacina feiñollena, naimacimo lloticue. Jusiñamui Joreñodi naimacina jiai maretate.

¹⁷ Jusiñamui dibeimo cue maijia jira, Cristo Jesús muidona cue maijari iobidicue. ¹⁸ Cue maijiana marefodo lloiticue. Judíuainedina Jusiñamuina ñnotallena, Cristodi cuena canode. Cue lluaana cacadimaci. Cue illana cioidimaci. ¹⁹ Cristodi cuena siño rafuena finotate. Jusiñamui Joreño uaido cuena finotate. Iemei Cristona jai ñnotimaci. Jerusalémona Ilríco railla enirue dinomo Cristo ie mare rafuena ailluena cominimo raise jai lloticue. ²⁰ Nainomo Cristona nia uññoedino dine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue. ²¹ Isaías micori biena jaiete:

Cristo rafuena nia cacaiñedinodi iena cacaitimaci.
Naimiena uññoitimaci
cuete.

Romamo Pablo jaiacade

²² Nainomo cue maijiacana jira, Romamo omoi dine nia jaiñedicue. ²³ Diga nairaimo Cristo rafuena bene jai cue llua jira, cue maijille bene jai iñede. Diga años omoi dine cue jaiacana jira. ²⁴ Españamo cue jaia, omoi dine jaiticue. Omoi diga nano nigarui caimare ñaiticue. Ie mei Españamo cue jaillena, cuena canoitomoi. ²⁵ Omoi dine jaiticue; iadedi Jerusalémo ite creyentiaina cue canollena, nainomo nano jaiticue. ²⁶ Macedoniamoi ite creyentiaidi ucubena ofitatimaci. Acayamo ite creyentiaidi ucubena jiai ofitatimaci. Jerusalémo ite duerede creyentiaina canoacadimaci. Jerusalémo ite creyentiaina canollena, iena birui uiticue. ²⁷ Iena feaacadimaci. Judíuainedimaci; iadedi judíuaina canoacadimaci, naimacimo Cristo rafuena navui judíuai llua jira. Ie jira naimacina birui canodimaci. ²⁸ Naimacimo bie ucubena raise cue fecaja mei, Españamo cue jaillemona, omoi dine nano jaiticue. ²⁹ Omoi dine cue ria, naimie rafuena cue lllollena, Cristo cuena raise canoite.

³⁰ Cue amatiai, cai Nama Jesucristomo omoi duilla muidona, Jusiñamui Joreño coniniña omoina isiruitaja muidona, Jusiñamuimo omoi jiaia, cue facaina jiai omoi jii. ³¹ Judeamo ite creyenteñedinomona cue jillobillena, Jerusalémo ite creyentiamoi cue feaacalle ucubena naimaci raise feiñollena, cue facaina omoi jii. ³² Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue. ³³ Jusiñamui omoina uri itatajana jitaidicue.

16

Romamo itinomo Pablodi ie uaina orede

¹ Febe raillañaiño omoi dine jaite. Naiñaiñoona omoi uññuana jitaidicue. Naiñaiñodi creyente. Cencrea railla nairai iñaiño. Cristo dibeimo maijiano, nainomo ite creyentiaina canocabide. ² Cristomo omoi duilla muidona, jiaie creyentiaina cai feiñoiacacabilla isoi, naiñaiñoona raise feiño. Diga cominina naiñaiño canua jira, naiñaiño jitaillie diese cano. Curna jiai canode.

³ Priscila dine cue uaina oredicue. Naiñaiño ini Aquila dine cue uaina jiai oredicue. Cristo Jesús facaina cue diga maijidiiaimaia. ⁴ Cue facaina niadedi fioidaitiaimaia. Ie jira iaimaiairi iobidicue. Diga nairaimo judíuaiñede creyentiaidi itimaci. Cuemona Cristo rafuena cacadimaci.

Cue facaina iaimaia niadedi fiodailla jira, iaimaiairi jiai iobidimaci. ⁵ Iaimaia jofomo rollena bitino dine cue uaina oredicue. Epeneto dine cue uaina jiai oredicue. Cue isiruigamie. Asia railla eniruemo itinomona naimiedi Cristona nano inotimie.

⁶ María dine cue uaina oredicue. Omoina canollena, omoi motomo maijide. ⁷ Andrónico dine cue uaina oredicue. Junias dine cue uaina oredicue. Naie iaimaiaidi cue comini. Cárcelmo danomo navui iticai. Jesucristo oretaganodi iaimaiaina marena ñaitimaci. Naimiena nia cue inoñena facaise Cristona inotiaimaia.

⁸ Amplias dine cue uaina oredicue. Cristomo naimie duilla jira, naimiedi cue isiruigamie. ⁹ Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie. ¹⁰ Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itino dine cue uaina oredicue. ¹¹ Herodión dine cue uaina oredicue. Naimiedi cue comini. Narciso cominimona dajerie inotimaci. Naimaci dine cue uaina oredicue. ¹² Trifena dine cue uaina oredicue, Trifosa dine cue uaina oredicue. Cai Nama facaina maijidiaiañuai. Pérsida dine cue uaina oredicue. Cue isirugañaño. Cai Nama facaina eo maijide. ¹³ Rufo dine cue uaina oredicue. Cai Namana eo raise inote. Naimie ei dine cue uaina jiai oredicue. Naiñañodi cue ei isoide. ¹⁴ Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentiai dine cue uaina oredicue. ¹⁵ Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpas dine cue uaina oredicue. Nana naimaci illanomo ite creyentiai dine cue uaina oredicue.

¹⁶ Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

¹⁷ Cue amatiai, daje rafuena nia lloiticue. Omoi comeciai daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiño. ¹⁸ Cai Nama Jesucristo facaina maijinedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci. ¹⁹ Ailluena cominidi Cristona omoi inuana uiñotimaci. Ieri iobidicue. Marecinona finuana raise omoi uiñuana jitaicue. Marañedicinona omoi finuana jitañedicue. ²⁰ Jusiñamuidi omoina uri itatate. Naimie omoina canoite, Taifena anafitallena. Cai Nama Jesucristo omoina duenaillesa.

²¹ Omoi dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

²² Terциodícue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

²³ Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

²⁴ Erasto ie uaina orede. Naimiedi bie nairai ie ucube eenoraíma. Cuarto ie uaina orede. Naimiedi jiai creyente.

Jusiñamuimo iobillacinona jaca cai fecajasa

²⁵ Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie

uiñotañede; ²⁶ iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini inollena, nana cominido bie rafuena llocana birui jaide. Jusiñamuidi jaca ite.

²⁷ Jusiñamuidi naga rana uiñote. Naimiemo Jesucristo mamecido iobil-lacinona jaca cai fecajasa. Mai. Macaibaite. Pablodicue.

CORINTOMO ITE CRISTONA HNOTINOMO PABLO NANO ORETAGA RABE

Corintomo ite creyentiaimo Pablo cartana orede

¹⁻² Corinto railla nairaimo ite creyentiai, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue lllollena, cuena fetode. Sóstenes cue diga illa jira, omoi dine coco uaina oredicoco. Jesucristo díbeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoína jai marebicaitate. Jusiñamui omoína fetode, naimie iena. Ua nana cai Nama Jesucristona sedadinodicaidi Jusiñamui iena. ³ Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoi jai. Iaimaiaí omoína uri jai itatatiaímaiaí. Iena omoi uiñocana mai omoi jai.

Cristo muidona Jusiñamuimona ailluena feiñoticaí

⁴ Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoína jai duenaite. Ie jira naimiemo omoi facaina iobillacinona jaca fecadicue. ⁵ Jusiñamui omoína duenaillamona, ie rafuena omoi lllollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoína eo canode. Omoína naimiemo ite rafuena raise uiñotade. ⁶ Ie muidona Cristo rafuena raise ñnotomoi. Cristo rafuena cai jino llumona, naimiemo raise ñnofidomoi. ⁷ Ie muidona Jusiñamuimona omoimo jaca buena fiebiñede, naimie díbeimo omoi raise maijillena. Naimie díbeimo omoi raise maijiamona, naimie díbeimo jiaie creyentiaína raise itatacana jaidomoi. Cai Nama Jesucristo abido billemo iocire omoi ocuirillanona, Jusiñamuimona ailluena rafuena feiñotomoi. ⁸ Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo ññena muidona, omoína duere finoñeite. Naimie bia, naimacimo jeacino nia illa jira, naimiema ñnoñedinona duere finoite. ⁹ Jusiñamui ie lloga uaina jaca finoite. Naimie ñnogamie. Naimie Jitona omoi nabaillena omoína fetode. Naimie Jitodi cai Nama Jesucristo.

Naimaci comeciái daje isoi lloíñedimaci

¹⁰ Cue amatiaí, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciái daje isoi lloillana jitaídícue. Daje isoi omoi comeciái facajana jitaídícue. ¹¹ Cloé raillamie cominimona bie rafuena cue fidia jira, iese omoimo lloticue. “Omoi comeciái daje isoi ññedomoi” naimie llote. ¹² Omoimona damierie raitomoi: “Dani Pablo llofuia díbecinodo jai jaidicaí”. Damierie raitomoi: “Dani Apolos raillamie llofuia díbecinodo jai jaidicaí”. Damierie raitomoi: “Dani Pedro llofuia díbecinodo jai jaidicaí”. Damierie raitomoi: “Dani Cristo llofuia díbecinodo jai jaidicaí” raitomoi. Nana iese itomoi. Iemona omoi comeciái daje isoi ññedomoi. Cloé cominimona iese fididícue. ¹³ Ero, diga omoi Jilloitaraini ññede. Omoi jeacinomona omoi jillobillena, dama Cristo illa. Omoi facaina cruzmo cuedi fiodañedícue. Cue díbeimo omoi illena cue bautizañegaomoi. ¹⁴ Omoína cue bautizañena jira, omoimo ite rafue cuemona comuiñena jira, iobidícue. Dama Crispona bautizadícue. Gayona jiaí bautizadícue. ¹⁵⁻¹⁶ Estéfanos jofomo ite cominina bautizadícue.

Jiaie cominina cue bautizajana começiñedicue. Ie muidona: “Pablo facaina bautizadicaï” llonidomoi. Daje isoi omoi começiaï lloiñenia, cue muidonañede. ¹⁷ Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraïma isoi omoïmo cue llofueticuedena, cue lloga rafuemo omoi começiaïna facañedomoi. Ie jira eo abina uiñoraïma isoi omoïmo llofueñedicue. Cristo fiodaïllamona, omoi jeacinomona naimie omoïna jillotate. Iena omoi feitañenana jitaïdicue.

Cristo finoca rafuemona Jusiñamui uai siñonana uiñoticaï

¹⁸ Cristona ñnoñedinomona cruzmo Cristo fiodaïlla rafuedi jamaïfue. Naimaci faïficana jai jaidimaci. Jusiñamuïmona naie rafue illa jira, caïmona naie rafuedi siño. Naie uaidi diga comini começiaï meïdorede. Caïdi naie rafuena ñnotinodicaï. ¹⁹ Ero, Jusiñamui facaina lloraima micori Cristona ñnoñedinona jaiete:

Jusiñamui llote: “Abina uiñoraini imaci uiñuacinona saitaiticue.

Abina baitadino imaci baitajacinona saitaiticue” llote.

Ie muidona naie isoide comini jilloñenana jai uiñoticaï.

²⁰ Naie isoide comini uiñuacinomona jaca jillonidicaï. Abi uiñoraïma uiñuacinodi Cristo fiodaïlla rafue baïfemo faïñede. Moïseï micori cuegafuena uiñoraïma uiñuacinodi Cristo fiodaïlla rafue baïfemo faïñede. Uaina uaitatimie birui ite uiñuacinodi Cristo fiodaïlla rafue baïfemo faïñede. Jusiñamuidi naimiena uiñoñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñoticaï. ²¹ Ie jitaïllacino diese Jusiñamui finua jira, naimaci abi uiñuacinomona naimiena ñnoñedimaci. Ie jira naimie mare jitaïllacinomona, naimiena ñnotinona jai jillotate. Naimaci jeacinomona naimacina jai jillotate. Cristo rafuena caï llamona ñnotimaci. Jusiñamuïna ñnoñedinodi naie rafuena: “Jamaïfue” raitimaci.

²² Siño rafuena naimaci cioacana jira, judúuai raïlla cominidi iese raitimaci: “Siño rafuena Jusiñamui finoa, omoi lloga rafuena ñnoiticaï” raitimaci. Grieguai raïlla comini dinena raitimaci: “Omoi lloga rafuena caï abina uiñuacino ie isoi itena, iena ñnoiticaï” raitimaci; ²³ iadedi Cristo rafuena llocana jaidicaï. Cruzmo naimie jai fiodaïllana lloticaï. Ie jira judúuaidi caï lloga rafue muidona iciritimaci. Naïena oia-caïñenano iciritimaci. Damie naimaci illaïmana jaillemo ocuiridimaci. Naimaci ocuirillamie fiodaïllamo naimaci começiaïna facañedimaci. Cristo fiodaïlla jira, raitimaci: “Naimiedi caï ocuirïñenamie” raitimaci. Judúuaiñedino dinena raitimaci: “Omoi lloga rafuedi jamaïfue” raitimaci. Ailluena comini caï lloga rafuena jitaïñedimaci; ²⁴ iadedi Jusiñamui damierie judúuaina jai fetode. Dajerie judúuaiñedinona jiaï jai fetode. Cruzmo Cristo fiodaïllamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiaï uiñotimaci. ²⁵ Jusiñamui Cristona orede, caï jeacino facaina naimie fiodaïllena. Jusiñamuïna ñnoñedinomona Cristo finoca rafuedi jamaïfue. Ebinidifue. Caïmona Cristo finoca rafuedi Jusiñamui ñnoñedino uiñuacino baïfemo faïte. ²⁶ Cue amatiaï, Jusiñamui omoïna navui fetode; iadedi ¿nie isoidomoi? Jamaï bue isoidomoi. Omoi começiaïna iemo faca. Jusiñamuïna ñnoñedinomona abina uiñoñedomoi. Omoi creyentiaï dibeïmo eo abi uiñotino raise iñedimaci. Omoi creyentiaï dibeïmo illaïcomini raise iñedimaci. Omoi

creyentiaí díbeimo ucuberedino raise iñedimaci. Jusiñamui ie isoidinona eo fetode; ²⁷ iadedi abina uiñoñedino raillanodomoina fetode, eo abina uiñotino dinena meidaillena. Illaicominiñedinona jiaí fetode, illaicomini dinena meidaillena. ²⁸ Jamai bue isoidinona fetode, jamai bue isoñedino baifemo faillena. Jusiñamuimona jamai bue isoñedinodi jamai comini. ²⁹ Ie muidona jaca buna Jusiñamui uicomo abina iedoñena. ³⁰ Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñotícaí. Cristo fiodailla jira, Jusiñamui cai jeacinona feitate. Iemona jeacino cai finoñellena, caina canocabide. Jusiñamuidi jeacino anamona caina jiaí jai jillotade. ³¹ Jusiñamui facaina lloraima micori iena jaie cuete: “Bu abina iedoiacania, nana Cristo finoca rafue diga naimie abina iedua” cuete.

2

Pablodí cruzmo Cristo fiodailla rafuena llocabite

¹ Cue amatiaí, omoi dine navui cue rillamona, Jusiñamuimona cue feiñoga rafuena llofuetícue. Omoi baifemo eo abina uiñotícueneda, iese niade llofueñedicue. ² Daje rafuemo cue comecina facacabidícue. Ie jira omoimo dama Jesucristo rafuena llofueiacadícue. Cruzmo naimie fiodailla rafuena llofueiacadícue. ³ Omoi motomo navui cue ia, meiruiocaillamona jacinaioidícue. Jusiñamui facaina cue raise jino lloñeni raillano jaciruioidícue. ⁴ Comini abi uiñuacínodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoína cue lloga rafue siñonana uiñotade. ⁵ Jusiñamuidi cue iese llofuiana jitaide. Comini abina uiñuacínona omoi cacajamona, Cristona iñoñedomoi; iadedi Jusiñamui omoína jillotaja jira, jai iñotomoi.

Jusiñamui Joreñodo bie rafuena uiñotícaí

⁶ Comini abi uiñuacínodo llofuecabiñedicue; iadedi Jusiñamuimona ite abi uiñuacínodo llofuetícue. Cristona raise iñofidínomona abi uiñuacínodo llofuetícue. Cristo facaina llorainidi cue isoí jiaí llofuecabitímaci. Cominimo jai ite uiñuacínodo llofueñedicai. Illaicomini uiñogacínodo llofueñedicai. Ico faífitímaci. Ico jiaí uainicaitímaci. Ie jira naimaci uiñogacínodo llofueñedicai; ⁷ iadedi Jusiñamuimona abi uiñuacínona cai feiñuamona, iedo llofuetícaí. Nano dofoconi, enirue nia finoñenia, naimie começi iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede. ⁸ Birui ite illaicomínidi Jusiñamuimo ite rafuena nia uiñoñedimaci. Iena uiñotímacidena, cruzmo cai ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caina iena uiñotade. ⁹ Jusiñamui facaina lloraima micori iena jaie cuela: Jaca buna naimiena iñotino facaina Jusiñamui finoca rafuena cioñede. Jaca buna iena cacaiñede. Jaca buna iemo comecina facañede cuela. Jusiñamui rafuena uiñoñedino naie rafuena jaca uiñoñeitímaci; iadedi naimiena isiruitino naie rafuena uiñotímaci. ¹⁰ Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui começimo iticinona jiaí uiñote.

¹¹ Jaca budí jiaimie começimo iticinona uiñoñede. Dama naimie iena uiñote. Ie isoide. Jaca budí Jusiñamui começimo iticinona uiñoñede. Dama

naimie Joreño iena uiñote. ¹² Jusiñamuimona ie Joreñoa jai feiñoticai. Jiaie cominimona naie Joreñoa feiñoñedicai. Jusiñamui Joreñodi caina Jusiñamui caimo caidiñeno fecaca rafuena uiñotade. ¹³ Omoimo naie rafuena llofuecabiticai. Cominimona fueoga uaido llofueñedicai; iadedi Jusiñamui Joreño caimo llofuia uaido llofueticai. Ie jira Jusiñamui Joreño ite cominimo naie rafuena llofuecabiticai. ¹⁴ Jusiñamuina ñnoñedinodi Jusiñamui Joreñomona iticinona feiñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci. ¹⁵ Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñoñedimaci. ¹⁶ Jusiñamui facaina lloraïma micori iena jaiie cueda: “Jaca buna Jusiñamui comecimo iticinona uiñoñede. Budi naimiena jiai llofuenide” cueda. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

3

Danomo Jusiñamui ñibeimo maijidimaci

¹ Cue amatai, Jusiñamui Joreño anamo itinona omoi raise itomoidena, omoïna llofueñedicue. Omoi jitaillacinodo nia omoi jailla jira, omoïna llofueticue. Cristo rafuedo janore jai jaidomoi. Jusiñamui uruiaïna jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaïna omoi jailla mei, Cristo rafuedo eo jaiñedomoi. ² Feinide rafuena navui llofueticue. Eo feirede rafuena omoïmo llofueñedicue. Omoïna iena nia llofueñedicue. Omoi uruiaï janore moonailla mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jaiñena jira, Jusiñamuimona nia moonaiñedino isoidomoi. ³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloñedomoi. Jusiñamuina ñnoñedino isoi nia itomoi. Jamai ebe isoi nia itomoi. ⁴ Omoïmona damerie: “Pablo llofuia ñibecinodo jaidicai” raitomoi. Jiaïno: “Apolos raillamie llofuia ñibecinodo jaidicai” raitomoi. Iese omoi raia, Jusiñamuina ñnoñedino isoi itomoi. Ie jira iese raïñeno.

⁵ Jamai bue isoidicue. Apolos jiai jamai bue isoide; iadedi Jusiñamui ñibeimo coco maijiamona, Cristo rafue coco llofuïamona, iena ñnotomoi. Jusiñamui cocomo llua isoi, ie rafuena lloticoco. ⁶ Naie rafuena cue llofuïamona nano ñnotomoi. Ie mei Apolos iena dane llofue. Iese llofueuidicoco; iadedi dama Jusiñamui omoïna naie rafuena ñnotacana jaide. ⁷ Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoïna ñnocana jaitate. ⁸ Daje uaina Apolos ñiga maijidicue. Coco maijia diese Jusiñamuimona coco ñbana feiñoticoco. ⁹ Jusiñamui facaina maijidicoco; iadedi naimiedi omoïna ñnocana jaitate. Naimiedi omoi comeciaina marena itatacana jaitate. ¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoïmo navui llofueticue. Cue lluamona Cristona ñnotomoi. Birui jiaïmie omoïna naie rafuena jai llofue. Omoi comeciïmo naie rafue raise itabillena, omoïna llofue. Bu omoïna llofueïa, omoi comeci marena illacinomo naimie comecina facajanona, omoïna naimie llofuecabilla.

11 Omoï jeacinomona omoï jilloillena, jaca daje rafue ite. Jiaie rafuedi iñede. Iena omoïmo jai llofueticue. Naie rafuedi Jesucristona ñaite. 12 Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciäimo raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedi naimaci comeciäimo raise itabiñede. 13 Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidino llwana lloite. Naimaci llogacinona eo facaciite. 14 Ie mei Cristo rafuena raise atona llotinodi Jusiñamuimona ibana feiñoitimaci. 15 Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jiai faifitimaci; iadedi faifñeitimaci. Jusiñamui diga jaca iitimaci; iadedi tainomo maijidimaci.

16 Jusiñamui ie illano omoï comeciäimo illana uiñotomoi. Naimie Joreño omoïmo illa jira, Jusiñamui ie illanodi omoï creyentiaï. 17 Cristo ðibeimona omoï creyentiaïna bu abido danomo itataia, Jusiñamui naimiena duere finoite. Jusiñamui omoïmo jai illa jira, naimiemo jai duidomoi. Ie jira naimie ðibeimona omoïna itatatimiena duere finoite.

18 Bie rafuedo omoï raise jaillena, ðani omoï abiaïna jifueñeno. Creyenteñedinu uiñuacinodo jaiñeno. Omoïmona bu iedo jaiacania, naimiemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoï jaillena, creyenteñedinu uiñuacinodo omoï jaiñeno. 19 Jusiñamuimona naimiena ñnoñedinu uiñuacinodi jamaifue. Jusiñamui facaina lloraima micori jaiie cueda: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”. 20 Jiai cueda: “Jusiñamuidi abi uiñotino railla comini imaci comeciäi facajacino jamaifuena uiñote”. 21 Ie jira omoï llofuerañiri abi iedoñeno. Jusiñamuimona nana rafue omoïmo jai illa jira, naimaci abi uiñuacinodo abina iedoñeno. 22 Marena omoï comeciäi illacino jitai raillano, Cristo omoï ðine caïna oretate. Cueda oretate. Apolona oretate. Pedrona oretate. Naiemona omoï ra ollena, omoï jitai raillano, eniruedi ite. Omoï jitai raillano, birui nana omoïmo ite rafuedi suide. Omoï jitai raillano, jairuido nana omoïmo iite rafuedi suite. Nia omoï fiodañenia, Cristo omoïna canoite. Omoï fiodaia, naimie ðine jaitomoi. Naiemona marena omoï comeciäi illacino jitai raillano, ua nana rafue omoïmo jai ite. 23 Cristomo omoï jainaiaïlla jira, naimie anamo itomoi. Jusiñamuimo Cristo jainaiaïlla jira, naimie Jusiñamui jitailla rafuena jaca finocabide. Ie jira naimie jitaillacinona finocana omoï jai.

4

Cristo fetocano naimie ðibeimo maijide

1 Caïmo omoï comeciäina faca. Cristo ðibeimo maijidiçai. Jusiñamui rafuena llocana jaidicai. Iena jaiie uiñoñedicai; iadedi naimie caïna uiñotaga rafuena birui llofueticai. 2 Ero, naga patrödi naimie ðibeimo maijidino naimie lloga uaina ñnuana jitaide. Ie isoide. Jusiñamuidi ie facaina lloraini naimiena naimaci ñnuamona naimie rafuena raise llwana jitaide. 3 Cueda uaina omoï uaitañenia, iena omoï uaitaia, jiaïno iena uaitaia, iemo comeciäina facañedicue. 4 Cueda nicino ia, iena uiñoñedicue;

iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite. ⁵ Ie jira: “O lluacino mare” cuemo lloñeno. “O lluacino marañede” cuemo jiai lloñeno. Cai Nama nia abido biñenia, iena cuemo omoi lloñeno. Naimie bia, nana comini comeciaino ite rafuena uiñotaite. Naimaci comeciaino ite jitaillacinona uiñotaite. Iemona naimaci maijia dinori Jusiñamuimona iobillacinona feiñotimaci. Naie facaise cuemo ite rafuena lloite. Ie jira nia cuemo lloñeno.

⁶ Cue amatiai, naie rafuena omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina ciegafue llua isoi, omoi illana jitaidicue. Omoi llorainiri tainomo iobiñeno. Omoi Cristo facaina llorainimona damie jiaie lloraima baifemo faiamo omoi comeciaina facañeno. ⁷ Nana omoi llofuerañidi daje isoidimaci. Jusiñamuimona nana naimacimo ite uaina feiñotimaci. Dani naimaci comeciainona iena naimaci oñena jira, ie diga abina iedoñeno.

⁸ “Nana Jusiñamuimona iticinona jai feiñoticaí. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticaí” omoi comeciaina facadomoi; iadedi nia iese iñedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue. ⁹ Jusiñamuidi nana omoína cue baifemo faitatate raillanomo cue comecina facadicue. Cristo rafuena llorainidicaí; iadedi cue baifemo omoi faiamo cue comecina facadicue. Omoimona jamai bue isoidicaí. Nana comini duere cai illamo raise eruaidimaci. Jusiñamui jaienisaidi duere cai illamo jiai eruaidimaci. ¹⁰ Cristo rafuena cai llua muidona, omoimona ebe isoidicaí. “Cristo rafuena raise ñnuanona, iedo raise jaidicaí” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi. ¹¹ Cai guille buedi jaca iñede. Iniroinidicaí. Jiaie comini caina duere finodimaci. Jofonidicaí. ¹² Cai ra ollena, cai onelli diga duere maijidicaí. Comini caina jeare ñaitimaci; iadedi ibana oñedicaí. Naimaci diga marena ñaiticaí. Caina duere finodimaci; iadedi uai oñeno ibana oñedicaí. ¹³ Cai joreñona jeare ñaitimaci; iadedi cai dinena naimaci diga marena ñaiticaí. Naimacimona jamai bue isoidicaí. Iese caimo naimaci comeciainia facadimaci; ia Cristo ñibeimo ie rafuena nia llocana jaiacadicaí.

¹⁴ Bie carta cue cuiamona, omoína meiruitaiacaiñedicue; ia omoína nia llofueiacadicue. Isiruiga uruaidomoi isoidomoi. Ie jira bie rafuena omoi raise uiñuana jitaidicue. ¹⁵ Omoína Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruaina jai jaidomoi isoidomoi. ¹⁶ Ie jira omoimo cue llogacinodo mai omoi jai.

¹⁷ Iedo omoi jaillena, omoína canollena, omoi dine Timoteona jai oredicue. Naimiena isiruiticue. Naimiedi Cristo ie ñnogamie. Cuemona Cristo rafuena naimie cacajanona, iena ñnote. Ie jira naimiedi cue jito isoidie. Creyentiai illanomo cue ia, Cristo rafuena jaca llofidicue. Naie rafuedo cue jitailla isoi, iedo omoi raise jaillena, naimiedi omoína llofuede. ¹⁸ “Pablo caina jaciruilla jira, naimie cai dine biñeite” raillanomo

omoi comeciaina facajamona, omoimona damierie jai abina biridomoi. ¹⁹ Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie isoide uai naie abina biridinomo illana uiñoiticue. Naimaci ñaiacinodo iena uiñoñeiticue; iadedi naimaci finoca rafuemona iena uiñoiticue. ²⁰ Ero, jamai ñaiamona, Jusiñamui anamo naimie jitailla isoi iñedicai; iadedi naimie finoca rafuedo cai jaillamona, naimie jitailla isoi iticai. ²¹ Omoi dine ico cue ria, ¿niese omoi diga ñaiticue? Cuemo llono. Cue llwana omoi ñnoñenia, omoimo riire lloiticue. Cue llwana omoi ñnoia, omoina cue isiruillamona, omoimo fecuise lloiticue. Ie jira cuemo llono.

5

Pablo eo jearede rafuena finodimiena riire llote

¹ Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina ñnoñedino naie isoide rafuena rafueñedimaci; iadedi omoimona damie ie eicañona ote, ie aina. ² Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunaiñedomoi? Omoi rocabil-lacomo naimie bia, naimie fo billana rairui. ³ Omoi dine iticuedena, bie rafue daní omoi siadollena, omoi danomo ofillena lloticue. Omoi dine cue iñena jira, cue comecidi omoi dine ite. Bie rafuemo cue comeciina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uiñoticue. ⁴ Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite. ⁵ Tai femo jearede rafuena finodimiena sofe. Tai fe anamo naimie jai illa jira, duere sefuite; iadedi naiemona fueoite. Duere sefuillamona, Cristo ñibeimo dane iite. Cristo ico abido bia, naimiedi Cristo ñibeimo dane raise illa jira, Cristo naimiena duere finoñeite.

⁶ Jearede rafue omoi motomo illa jira, ¿buena abina iedotomoi? Janorede siritate ra juilliruaímo faiamona, nana naie juilliruai sircana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa. ⁷ Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciámo ite jeacinona fañonocai. Jeacino anamo omoi jai illa jira, iena fañonocai. Pascua rafue facaiseconi judíuai cominidi toica laudaiái fajamona, naimaci jeacino facaina Jusiñamui ibana oñede. Cai facaina Cristo jai fodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiñeno. ⁸ Cai facaina Cristo fodailla jira, cai jeacinona fañonocaillanona, Jusiñamui jitailla isoi mai cai i. Jeacinona finocana cai jaiñelli. Uanaicinodo mai cai jailli.

⁹ Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iñiaí diga itíñaiñuai diga nabairiñellena lloticue. ¹⁰ Nibai iena raise cacaiñedomoi. Ie jira iena dane lloiticue. Cristona ñnoñedinona ñaiñedicue. Naimaci aiñede riñoniai diga ia, naiñaiñuai iniñede iñiaí diga ia, naimaci rana nicidoia, rana naimaci fñia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo

Jusiñamuina uifnoñedino illa jira, ¿nino mo niadedi iticai? ¹¹ “Cristona inoticaí” raitinona ñaiticue. Naimaci aiñede riñoniai diga naimaci ia, naiñaiñuai iniñede iñiaí diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci ficabia, naimaci diga nabairiñeno. Naie isoidino omoi jofuemo feiñoñoeno. ¹²⁻¹³ Cristona inoñedinona ñaiñedicue. Naimaci rafue cuemo duiñede; iadedi maraiñedicinona naimaci finoia, Jusiñamui naimacina duere finoite; iadedi Cristona inotino maraiñedicinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

6

Cristona inoñede juezmo jiaie creyentena llogidoñoeno

¹ Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaí dine jaiñedomoi, naicinona siadollena? ¿Bue ñellena Cristona inoñede juez dine naimiena meiruiñeno llogidotomoi? ²⁻³ Jesucristo abido bille mei, Cristona inotinodicaídi Cristona inoñedinona duere sefuillena lloiticai. Taife comini duere sefuillicinona ico jiaí lloiticai. Iena uifnotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finidomoi? ⁴ Nicino omoimo ia, ¿bue ñellena Cristona inoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uifnoñedimaci. ⁵ Omoi meidallena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. ⁶ Iese finocabiñedomoi; iadedi nicino omoi creyentiaímo ia, Cristona inoñedimie mo jiaie creyentena llogidocabitomoi.

⁷ Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñoeno anamo ee. Naimiemona omoi duere sefua, dama ite. ⁸ Iese iñedomoi; iadedi dani conini jiaie creyentiaína duere finocabidomoi. Naimaci rana fidomoi. Omoi amana duere finodomoi.

⁹ Jusiñamui sedajanomo naimiena inoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede ima diga itino, jiraraina sedacabidino, daje isoide ima diga conima aifiedotino, daje isoide riño diga conioño aifiedotino, ¹⁰ rana baino ficabidino, rana nicidocabidino, jifaicabidino, jiaie cominina jeare ñaicabidino, cominimona rana bairidino. Nana naie isoidino Jusiñamui ie cominina sedajanomo duiñeitimaci. ¹¹ Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai featate. Ie Joreño uaido omoína ie cominina jai jaitate. Ie muidona naimiemona jai marebicaidomoi.

Jearede rafuemona abina rairui

¹² Cristo dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiaí iena finorede; iadedi dajerie Jusiñamui rairuiñega rafuena cai finoñelli, naiemona bue cai oña jira. Dajerie rafuena cai finocabiñelli, naie rafue anamo cai i

raillano. Dani Cristo rafue anamo cai illi. ¹³ Raitomoi: “Nie isoide guille cai guiacania, nie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede ima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. ¹⁴ Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

¹⁵ Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. ¹⁶ Ie aiñede riño diga bu ia, ie ai illa isoi, jai dajena jaidiaimaia. Ie jira Jusiñamui jai lote: “Riño diga ima illa jira, jai dajena jaidiaimaia” lote. ¹⁷ Cai Nama Cristomo bu duia, dajena jai jaidiaimaia. Jusiñamui Joreño iaimaiaimo illa jira, iaimaia comeci daje isoi jai lloide.

¹⁸ Ie jirari naie jearede rafuemonu abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie marañede rafue bu finoia, naimie abimo jearede rafue finoñede. ¹⁹ Naimiemo omoi duillanona, Jusiñamui Joreño omoiimo illana uiñotomoi. Ie illanodi omoi creyentia. Jusiñamuimo jai jainaiaidomoi. Ie muidona omoi jitaillacinodo jaiñeno. ²⁰ Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemonu Jusiñamuina eo iobita.

7

Pablodi ima ie aina ua rafuena ñaite

¹ Dajerie rafue cuemo jicanollena, carta cuemo navui oredomoi. Iena ja ñaiticue. Ima ie aina uana jicanotomoi. Faidaima jaca dama iacania, cuemona mare. Faidaiño jaca dañu iacania, cuemona jiai mare; ² iadedi jeacino omoi finoi raillano, nagamie ie aina otenu, jiai mare. Nagañaiño ie inina otenu, jiai mare. ³ Naga ini ie ai diga iniacania, naimiemonu naiñaiño ie abina caidiñenu. Naga ai ie ini diga iniacania, naiñaiñomonu naimie ie abina caidiñenu. ⁴ Naiñaiño abi dañuñede; iadedi dañu ie ini abimo jiai duide. Naimie abi damañede; iadedi dama ie ai abimo jiai duide. ⁵ Ie jira: “Danomu iniñeiticoco” lloñeno. Jusiñamui diga o raise ñaillenu, naimiemo o comecina raise o facallenu, iemo omico comeci daje isoi lloillamona, diga irui illamona danomu omico iniacaiñenu, jiai mare. Naie facaise fuilla meinomu riño diga o iacanamonu, dane danomu ini, Tafe omicomu ramo fai raillano.

⁶ Dane lloiticue. Jeacinonu omoi finoi raillano, nagamie ie aina otenu, mare. Nagañaiño ie inina otenu, jiai mare. Iese omoiimo lloticue; iadedi iese ocuiñedicue. ⁷ Ainidicue. Cue illa isoi omoi illanu jitaidicue; iadedi daje isoñedicai. Jusiñamui caina itataja diese iese iticai. Dajerie ainidimaci. Dajerie aredimaci. Dajerie ininidimaci. Dajerie iniredimaci.

⁸ Nia ainidinomu lloiticue. Nia ininidinomu lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare; ⁹ iadedi omoi ocuiñeniadedi, aina ono. Jiaie riño diga illemo o comecina

facañellena, daje riñona ono, o aina. Jiaie iimamo o comecina facañellena, daje imana ono, o inina.

¹⁰ Creyentiaimo nia lloiticue. Airedinomo lloiticue. Iniredinomo jiaie lloiticue. Cue uaido lloñedicue; iadedi cai Nama jaie llote: “Riño ie inina sofeño. ¹¹ Ima ie aina sofeño” llote. Iese llote; iadedi nie riño ie inina sofeia, jiaie iimana naiñaiño oñena. Imana naiñaiño oiacania, ie ini diga dane abido illasa.

¹² Nia lloiticue. Cai Nama biena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono. ¹³ Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiena dotaño” naiñaiñomo llono. ¹⁴ Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaimaiai uruiaina, jiaie creyente iaimaiai urui ai isoi, omoi roracomo feiño. ¹⁵ Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aina creyenteñede ini sofeiacania: “Naimiena dotaño” naiñaiñomo llono. “Naimie jaillena rairuiño” naiñaiñomo llono. Sofeia mei, jai dajemo duiñediaimaiai. Jusiñamui naga creyente uri illana jitaide; ¹⁶ iadedi ie ini diga ie ai fiebia, ie ini creyentenamona, naiñaiño nibai creyentena jaite. Ie ai diga ie ini fiebia, ie ai creyentenamona, naimie nibai creyentena jaite.

¹⁷ Iena lloticue; iadedi Jusiñamuimona ie feiñoega uaido nagamie jailla. Creyentiaina omoi jailla facaiseconi, omoi maijiuilla ramo nia raise omoi maiji. Naga creyentiaie illanomo biena llofuecabiticue. ¹⁸ Nia creyentiaina omoi jaiñenia, judíuai isoi omoi mona dajerie omoi abiaina detatatoi. Naie detatafuemo omoi comeciaina birui facañeno. Omoi mona dajerie omoi abiaina nia detatañedomoi. Iemo omoi comeciaina birui facañeno; ¹⁹ iadedi Jusiñamui uaina omoi inuamo omoi comeciaina birui faca. Jiaie rafue baifemo faite. ²⁰ Creyentiaina omoi jailla facaiseconi, omoi maijiuilla ramo nia raise omoi maiji. ²¹ Creyentiaina omoi jailla facaise omoi mona dajerie patrón anamo itinodomoi. Nia patrón anamo itino isoi omoi jai. Iemo omoi comeciaina jarire facañeno. Jaiñuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai. ²² Cristona omoi inua facaise, patrón anamo omoi mona damierie navui itomoi; iadedi Jusiñamui omoi na fetode. Naimiena omoi inuamona, omoi jeacino anamo jai iñedomoi. Patrón anamo omoi mona damierie navui iñedomoi; iadedi Jusiñamui omoi na fetode. Ie jira naimie anamo jai itomoi. ²³ Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai featate. Naimie cominina jai jaidomoi. Ie jira comini jitaillacino anamo iño; iadedi Jusiñamui jitaillacino anamo i. ²⁴ Cue amatiaie, creyentiaina omoi jailla facaiseconi omoi maijiuilla ramo nia raise omoi maiji. Jusiñamui omoi na canuanona, jearedé rana omoi jaiñenia, nie isoide rana omoi maijiia, Jusiñamuimona mare.

²⁵ Navui cuemo cartana oredomoi. Faidaiñuai illa rafuena uñoiacadomoi. Cai Nama naie rafuena jaie lloñena jira, iena birui

lloiticue. Naimie cuena duenailla jira, naimie uana inoticue. Ie muidona comini inogamiedicue. ²⁶ Birui duere omoi sefuilla facaise illa jira, omoi illa isoi omoi i. ²⁷ Omoimona bu airenia, naiñaiñona dotañena. Bu ainia, dama ainide. Riñona oñena; ²⁸ iadedi o aina illena ainide riñona o otiodena, jeacinona finoñedio. Omoimona o inina illena ainide imana o otiodena, jeacinona finoñedio; iadedi aina bu ua mei, inina bu ua mei, eo duere maijiite. Iese omoi duere sefuiñellena, omoimo iena lloticue.

²⁹ Cue amatiai, biemo omoi comeciaina faca. Jesucristo abido dane billirui iaerei ite. Naimie jitailla rafuena omoi raise finollena, omoi ainiamo ite rafuemo omoi comeciaina facaja; iadedi Cristo rafuemo omoi comeciai eo facaja. ³⁰ Omoimona damierie sunaia, damierie caimare ia, iemo omoi comeciaina eo facañeno. Damierie raruiaina ibaia, naieri eo iobiñeno. ³¹ Omoimona damierie bene ite rana ebruarimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

³² Omoi comeciai jarire inenana jitaidicue. Nia ainidimie abi juarede, dama Cristo rafuena maijillena. Naimiena iobitaiacade; ³³ iadedi airedimie bene ite rafuemo ie comecina facade. Ie aina iobitaiacade. Naiñaiñomo ite rafuemo naimie comecina facade. Cristo rafuemo ie comecina jiai facade; ³⁴ iadedi mena rafuemo ie comecina eo facallemo abi juanide. Inidifñaiño abi juarede, daño Cristo rafuena maijillena. Nana naiñaiño comecimona naimiena iobitaiacade; iadedi iniredifñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

³⁵ Aina uana rairuiñedicue. Inina uana jiai rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaidicue. Dani Cristo rafuemo omoi comeciaina facajana jitaidicue.

³⁶ Ero, omoimona naiñaiño oiacaga imamo ie moo, ie jisa caidifñeno fecaca. Naiñaiño jai moonailla jira, naiñaiño jitailla jira, naiñaiñona feca. Fecaia, ie moo jeacinona finoñede; ³⁷ iadedi inina naiñaiño oia-cañenia, naimie comeci llumona, ie comecina eo facajamona, ie jisa fecaacañenia, jiai mare. ³⁸ Ie jisana fecaia, mare. Cristo rafuena naiñaiño eo maijillena, ie jisa fecañenia, jiai mare.

³⁹ Jiaie rafuena lloticue. Riño ie ini nia fioidañenia, naiñaiño naimiemo jaca duide. Ie ini fioidaille mei, jiaie imana ie ini ifomo naiñaiño oiacania, mare; iadedi creyentedimiena naiñaiño ua. ⁴⁰ Naie fecifñodi imana ie inina oñenia, naiñaiño abi juarenite, Cristo rafuena eo maijillena. Ie muidona iniredifñaiño baifemo caimare iite.

8

Jusiñamuina eruaide jiraraimo llicisi fecaja rafue

¹ Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damierie naie isoide llicisi riana: “Marañede” raitimaci. Creyentiamona Jusiñamuina eruaide jirarai jamai rana illa jira, damierie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie ría, jiaie creyentiamo comecina facañede. Jiaie creyentiaina bu isirua, naimacimo ie comecina facade. Cristo rafuedo jiaie creyentiai raise jaillana jitaide.

² “Eo abina uiñoticue” ie comecina bu facaia, nia eo raise abina uiñoñede; ³ iadedi Jusiñamuina ua cai isiruillamona, jiaie creyentiaina cai isiruia, jai abina uiñoticai. Jusiñamui dinena caina jiai uiñotaacade.

⁴ ¿Niese Jusiñamuina eruaide jiraraimo fecaca llicisina ñaitica? “Jusiñamuina eruaide jirarai jaca cajeñenana uiñotica?” raitomoi. “Jusiñamui jaca dajede. Iena uiñotica?” raitomoi; ⁵ iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. ⁶ Iena sedacabidimaci; iadedi cai dani Jusiñamuina sedacabidica. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

⁷ Jusiñamuina eruaide jiraraidi jamai rana nana creyentiai uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: “Naie jirarai sedadica?” naimaci comeciaina facadimaci. Naie rafue naimaci raise uiñoñena jira: “Jecinona finodica?” raitimaci. ⁸ Ero, nie isoides llicisi cai riamona, llicisi cai riñenamona, Jusiñamui caina feiñoñede. Naimiena cai inuamona caina feiñote. Buena cai riñenia, buena cai riia, jecinona finoñedica. Naiemona marecinona jiai finoñedica. ⁹ Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi riia, naimiemona jecinona jai finodomo. “Jusiñamuina eruaide jiraraina omoi nia sedadomo?” raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaite. ¹⁰ Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”. ¹¹ Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite. ¹² Iese omoi finoia, omoi amana jecinona finotatomo. Naimie comecina ocuiñotañedomoi. Ie muidona Cristomo jecinona jiai finodomo. ¹³ Cristomo jecino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina llorainidi naimaci jitailla rana jamai feiñua

¹ Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuena jaie fetua facaise cai Nama Jesuna ciodicue. Creyentiaina omoi jailla jira, cai Nama facaina cue maijana uiñotomoi. ² Jiaie comini Jesucristo oretagamiedicuena nibai uiñoñedimaci; iadedi omoi iena uiñotomoi. Cristona omoi inua jira, Jesucristo cuena oretajana uiñotomoi.

³ Cue llofuiacinona bu uaitaia, iese cue llofuiacinona riidoticue. ⁴ Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa. ⁵ Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiaia

macaria, omoi dine Pedro macaria, naimaci jitailla rana naimacimo jamai fecaidomoi. Ie jira, ¿niese cue jitailla rana cuemo jamai fecañeitomoi? ⁶ Jiaie llorainimo naimaci jitailla rana jamai fecacabidomoi; iadedi cue onolli diga cue maijiana nibai nia jitaidomoi. Bernabé ie onolli diga naimie maijiana nibai nia jitaidomoi. ⁷ Ero, soldadodi ie guille ibañede. Iena jamai feiñote. Naga illimo maijiuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabiticue. ⁸ Jamai comini uaido naiena llofueñedicue; iadedi Moisés micori ciegafuiaimona iena fueoticue. ⁹ Naimie micori jaie cuela: “Jusiñamui llote: ‘Jurareta trigo oni juillena saisiia, iemona ie guillesa, ie fuena maiñeno. Maiñenia, ie maijia fuemona guite’ llote”. Ie isoide. Omoi motomo cue maijia fuemona cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade. ¹⁰ Cristo rafuena cue llofuecabilla jira, cue llua fuemona cue jitailla rana jamai cue feiñua. Iemo ocuiridicue. Ie isoide. Ie illimo bu maijia, naiemona riera ollena, nainomo maijide. Iemo ocuiride. ¹¹ Omoi motomo Cristo rafuedo omoi raise jaillena, navui llofueticue. Ie jira cue jitailla raruia omoimona jamai cue ua. ¹² Omoimona raruiaina jiaie lloraini feiñocabilla jira, cuemona Cristo rafuena nano omoi cacaja jira, cue jamai jiaie feiñua; iadedi omoimona raruiaina jicañedicue.

Cue jitailla raruia cue ollena, cue onolli diga duere maijidicue. Ie jira nana cue jitailla raruiaina oñedicue. Cristo rafuena omoi cacaiacaiñeni raillano, omoimona raruiaina jicañedicue. Raruiaina cue jicaia, omoi comeciaina nibai facaitomoi: “Raruiaie oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoimona raruiaina jicañedicue. ¹³ Ero, Jerusalémo juduia comini Jusiñamuina sedauilla jofe ite. Nainomo naie comini toiniaina atiuidimaci, Jusiñamuimo fecallena. Moisés micori jaie llua isoi, naimaci jeacino facaina toiniaina fajanona fecadimaci. Nainomo maijiuidino comini atica toiniaimona naimaci rillena, ibajanona ocabitimaci. Iena uñotomoi. ¹⁴ Ie isoide. Cristo rafuena llorainidi naimaci rafuena iñotinomona naimaci jitailla rana imaci ua. Cristo iena jai llote. ¹⁵ Omoimona raruiaina jaca jicañedicue. Raruiaie birui cue ollena, bie cartana jiaie cueñedicue. Dama cuemo ite ra diga iiticue. Omoimona iena feiñoticedena, meiruioicaida feiñoticue. Omoimona cue feiñoñena jira, omoi facaina Cristo rafue cue lluamona, abina iedoticue. Raruiaie cuemo jamai omoi fecaia, ¿niese abina iedoiticue?

¹⁶ Jiaie lloraini rana feiñua isoi cue feiñoia, Cristo rafuena cue lluamona abina iedoñeiticue. Jusiñamui cuena oretaja jira, naie rafuena lloticue. Iena cue lloñenia, Jusiñamui cuena duere finoite. ¹⁷ Dama cue comeci jitaillamona Cristo rafuena cue lloiacania, Jusiñamuimona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue. ¹⁸ Ie jira, ¿niese ibana feiñoiticue? Ibana nibai feiñoiticue; iadedi omoimo Cristo rafue cue lloia, cuemona mare. Omoimona cue jitailla rana cue oñenia, cuemona mare.

¹⁹ Omoimona raruiaina cue feiñoñena jira, omoi anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena cominina

Cristo dibeimo cue itatallena. Iese jaiñedicuedena, eo janore comini Cristo dibeimo nibai jai itataticue. ²⁰ Judíuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo dibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue. ²¹ Judíuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiai jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiai jaidicue. Cristo lloga uaido jiai jaidicue. Naimacina Cristo dibeimo itataiacadicue. ²² Naimaci diga cue nabairillena, Cristo rafuena nia raise iñoñedino diga cue ia: “Omoi baiñemo Cristo rafuena uñoticue” raiñedicue. Naimacina iciaicaiñedicue, naimacimo jeacinona cue finoi raillano. Naimacina cue isiruillamona, naimacina canoacadicue. Naimacina Cristo rafuena raise iñuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comequina facadicue: “Cue muidona damierie Cristona nibai iñoitimaci”. ²³ Cristo rafuena ailluena comini iñollena, iese jaidicue. Iena llocana jaidicue. Naimaci iñua jira, iobidicue.

²⁴ Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena iñocana mai cai jailli, ico Jusiñamui illanomo monamo ibana nana cai feiñollena. ²⁵ Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Ibana feiñollena, iese finode. Ibana bu oia, dallu iobide. Ero, jeacinona cai finoi raillano, cai abiana cai eenua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobitica. ²⁶ Riire aisiacadimie ebena aisiñede. Onolli diga mena iaimaiai jamai jifanoia, jafaicina jamai ducoiñediaimaiai; iadedi conimana ducoidiaimaiai. Ie isoide. Cristo rafuedo raise cue jaicania, jamai ebena jaiñedicue; iadedi nana cue comeqimona iedo jaidicue. ²⁷ Cue comequina raise sedadicue. Dama Cristo rafue anamo iacadicue. Dama iena iñoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comequina raise sedadicue. Iemona omoi fueua.

10

Jiraraina sedañena rafue

¹ Cue amatiai, bie rafuena feitañeno. Cai jaiagai micoriai finoca rafuemonu fueoitica. Egipto railla eniruemonu naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaicania, Jusiñamuidi naie monaillai oni ñajitate, safefodo nana naimaci ruica jaillena. ² Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci. ³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci. ⁴ Nainomo jinui jiai iñena jira, Jusiñamui llua jira, Moisés micori noficina butajamona, toide jinuína nana jirodimaci.

Naimaci ñine macaria, Cristona cioñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; ⁵ iadedi Jusiñamuina naimaci ñnoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fiodaitade.

⁶ Cai jaiagai finoca rafuemona cai fueua. Maraiñede jearede rafuena naimaci finua isoi ebiruiñeno. Abimo omoi oñeno. ⁷ Jusiñamuiñedimiena sedañeno. Cai jaiagaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oñeno. Jusiñamuiñedimiena omoi sedañeno. ⁸ Naimaci jearede rafuena finodimaci. Naimacimona damierie naimaci aiñede riñoniai diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oñeno. ⁹ Cai jaiagaimona damierie Jusiñamui Joreñaña ñaitimaci. Naimaci guisoiga radi Jusiñamuimona bite. Naiena ñiamona, Egiptomo ite guillemo comeciaina facadimaci. Ie muidona naimiena ricaitadimaci. Ie jira Jusiñamuidi jaioniaina naimacina ainitate. Iemona ailluena fiodaitimaci. Naimaci finoca rafue isoi abimo cai oñeno. Jusiñamuina ricaitañeno. Cristona cai ñia ñnoñena facai finoca rafuemo cai comeciaina facañeno. ¹⁰ Cai jaiagaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oñeno. Jusiñamui facaina lloraini joreñuaina cai ñaiñeno.

¹¹ Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoí railanona. ¹² Naie isoide rafue omoimo suiñellena, omoi abiaina rairui. Omoi comeciaina ñibai facadomoi: “Cristona cai eo raise ñnua jira, iena finoñeiticai” comeciaina facadomoi; iadedi omoi abiaina omoi rairuiñenia, jeacinona finoitomoi. ¹³ Taife ramo omoimo faicabilla isoi, nana jaie creyentiaimo ie isoi ramo faicabite. Iena feitañeno. Jusiñamuidi ñnogamie. Ie muidona omoi comeciai ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi ñnoñellena, Jusiñamuidi omoina canoite.

¹⁴ Cue amatiai, Jusiñamui omoina canuamona, Jusiñamuiñedimie facaina finoca rafuemona oni i. ¹⁵ Abina uiñotomoi. Ie jira omoimo cue llucina omoi cacaja mei, iemo omoi comeciaina omoi faca. ¹⁶ Ero, Cristona cai sedallena, roracom danomo oficabidicai. Naimie fiodailla rafuena cai comecillena, janore vino jiruana, janore llomenicono guiticai. Jusiñamuimo iobillacina nano fecadicai. Ie mei janore vino jirodicai. Iena cai jiruamona, Cristona cai nabaillana uiñoticai. Cruzmo Cristo fiodailla jira, naimiena nabaidicai. Naie facaise llomenicono cai tairuñuamona, naimiena cai nabaillana uiñoticai. Cristo fiodailla jira, iese iticai. ¹⁷ Diga creyentiaidicai; iadedi daje llomenicomona jaca guiticai. Daje llomenicomona cai guilla jira, dajena Cristomo cai duillana uiñoticai.

¹⁸ Ero, judíuai raila cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. ¹⁹ Omoi illanomo Jusiñamuina ñnoñedinodi Jusiñamuina

eruaide jiraraïmo guillena fecacabidïmaci. Cai creyentiaïdicai mona naie guilledï jamai guille. Naie jiraraïdi jamai ra. Cajeñede; ²⁰ iadedï Jusiñamuina ñnoñedinomona jamai rañede. Naimacimona nanoca ra. “Temo rille cai fecajia, cai moon sedadicaï” raitimaci; iadedï naie ramo naimaci comeciaina facañedïmaci; iadedï imaci moomo comecina facadïmaci. Ero, Jusiñamuiñedïmiemo comecina fecadïmaci. Taifemo naie guille fecacabidïmaci. Taifena iobitadïmaci. Jusiñamuimo fecañedïmaci. Naimaci diga omoi jaia, Taife diga jai nabairitomoi. Taife diga omoi nabairillana jitaiñedicue. Taifemo omoi duillana jitaiñedicue. ²¹ Rollena omoi ofia, Cristo fiodaillana omoi comecillena, nainomo omoi jirua-mona, nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, maraiñede. ²² Iese omoi finoia, Jusiñamuina jai iciritaitomoi. Naimiena omoi icia, ¿niese naimie riicaillafuemona jilloitomoi? Jaca jilloñeitomoi.

Jiaie creyentiaïna canocana cai jailla

²³ Ero, Jusiñamui ðibeïmo omoi illa jira, ¿niese danï omoi jitail-lacinodo jaiacadomoi? Diga Jusiñamui rairuiñega rafue ite. Creyentiaï iena finorede; iadedï dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo ðibeïmo itatañedicaï. Iena cai finoia, cai amana Cristo rafuena ñnotacana jaiñeiticaï. Naimiena ramo faicana uitataticaï. ²⁴ Omoi mona nagamie dama naimie ite rafuemo comecina facañena; iadedï naga jiaie creyentemo ite rafuemo ie comecina jiai facaja.

²⁵ Ero, ninena o llicisina omoi ibaia, Jusiñamuiñedïmiemo naie llicisina fecajana jicanoñeno; iadedï jicanoñeno iena jaricitaiñeno rino. ²⁶ Iena David micori jiaie cuela: “Jusiñamui bie eniruena finode. Nana rana finode. Cai guillena, cai guille rana nana comuitaga” cuela. Ie jira ¿niese fimaiticaï? Naimie mare finoca rana cai rïa, jeacinona finoñedicaï.

²⁷ Ero, naimie diga o guillena Cristona ñnoñedïmiedï ona uaidoia, naimie dine o jaiacania, naimie dine guisai. Nana omo eaja guillena guiño. Jamai uainino guiño. “¿Ninena ibadio bie llicisina?” jicanoñeno. O comeci jarire finoñeno; ²⁸ iadedï Cristona raise ñnoñedïmie nainomo jiai guitemo, omo lloia: “Bie llicisidï Jusiñamuiñedïmiemo jai fecaca llicisi”, iena o riñeno. Iena o rïa, Cristona raise ñnoñedïmie comecina facaite: “Jecinona finodio. Taifemo fecaca llicisina ritio. Creyentedïmie iena riñede” comecina facaite. O isoi naie llicisimo naimie comecina facañede. O raitio: “Naie llicisidï jamai llicisi” raitio; iadedï naimie raitte: “Naie llicisi Taife ie” raitte. Ie jira naie creyentena o canollena, naiena riñeno. ²⁹ Naimie comecina facajacinodo cai jaiñenamona, nana Jusiñamui comuitaga guillena guiredicaï; iadedï Cristona nia raise ñnoñedïmiemona nana guinidicaï; iadedï naimie comecina facajacinodo jaiñedicaï. ³⁰ Cai guia, Jusiñamuimona naie guille comuitaja jira, Jusiñamuimo iobillacinona fecadicaï; iadedï cai guillamona damierie cai joreña ñaiamona, iena guiñeiticaï. ³¹ Omoïmo iena nia lloiticue. Nie isoide rana omoi guia, nie isoide rana omoi rïa, nie isoide rana omoi jiroia, nie isoide rafuena omoi finoia, naieri Jusiñamuina iobita. ³² Jusiñamuina nia ñnoñedïno canocabi, naimie uaina naimaci cacaillena. Jusiñamuina jai ñnotinona jiai canocabi, naimaci abido danomo uaiñellena. ³³ Buena cue finoia, nana cominimo cue comecina facadicue. Ie jira nagaruï cue jitaillacinodo

jaiñedicue; iadedi Cristo rafuena naimaci ñnollena, nana cominina canocana jaidicue.

11

¹ Cristo lloga rafuedo jai jaidicue. Cue isoi omoi jai.

Roracomo riñoniai illa rafue

² Cuenia nia feitañedomoi. Cristo oretagano jaie llogacinona omoina llofueticue. Cue llofueuillacinodo nia jaidomoi. Ie jira omoi iobidicue; ³ iadedi jiaie rafuena nia lloiacadicue. Cristo ie Moo anamo ite. Naga ñima Cristo anamo jiaie ite. Nagamie ai ie ini anamo ite. Omoi afemo itino uaina omoi ñnoñenia, marañede. ⁴ Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo ñiroina bicuano jailla. Iese naiñaiño bicoñenia, ie ini anamo naiñaiño ññede isoi eruaide. Jusiñamui diga ñie ñima ñaia, Jusiñamui uaina ñie ñima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitañia, Cristo afemo itena eruaide. ⁵ Ñie riño Jusiñamui diga ñaia, Jusiñamui uaina ñie riño jino lloia, ie ifogimo ñiroina bicoñeno jaia, ñima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaitade. ⁶ Ñie riño ie ifogimo ñiroi bicoñeno jaiacania, ñima isoi eruaillena, ie ifogidi rijiruda gareca. Iemona naiñaiño meidaillamona, ie ini anamo illamona, ie ifogimo ñiroina bicuano naiñaiño jaite. ⁷ Jusiñamui diga naimie ñaia, Jusiñamui anamo naimie illa jira, ñima ie ifogi icona jitañena. Jusiñamui naga ñimana comuitate. ñimana naimie finuamona, naimiena cai iobitajamona, Jusiñamui cai afemo illana uifoticaie. Ie ñina iobitajamona, naiñaiño afemo ie ini illa jira, riño ie ifogimo ñiroina bicuano jailla. ⁸ Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide. ⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai ñnollena, naimiena canollena, naiñaiño comuide. ¹⁰ Ie ini anamo naiñaiño illa jira, riño ie ifogimo ñiroina bicuano jailla. Naiñaiño iese ia, naiñaiña naimaci cuanona, Jusiñamui jaienisaimona jiaie mare. ¹¹ Naga riño ie ini anamo ite; iadedi Cristona cai ñnua jira, riño baifemo ñimadi faiñede. ñima baifemo riño jiaie faiñede; iadedi daimaiaie conimana iaiaiaie canua. Cristo naga ñimana, naga riñona daje isoi feiñote. ¹² Naga comini Jusiñamui comuitaga. Nano facaiseconi Adán micorimona Eva micorina jaie comuitate; iadedi birui naga ñima riñomona comuide.

¹³ Biemo omoi comeciaina omoi faca: Omoi roracomo Jusiñamui diga ñie riño ñaia, omoi einamacie finocabilla isoi, ie ifogina bicoñeno jaia, ¿ñiese omoi comeciadi raite? Cue comeci: “Marañede” raite. Ie ini anamo naiñaiño ññedena eruaide. ¹⁴ Nana omoi biesedena raicabitomoi: “Ñie ñima ie ifotirai eo arenadedi, cai cominimona marañeno ciede; ¹⁵ iadedi ñie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena scotajamona, naiñaiño ifotie ie ifogina raise ibaide. ¹⁶ Iena jaca llofuecabiticue. Jiaie creyentiaie illanomo cue isoi comeciaina lloidimaci. Omoimona bu cue llogacinona uaitaiacania, damameie ite.

Cristo fodailla rafuena raise comeciñedimaci

¹⁷ Jiaie rafuena lloiticue. Omoi marañede finocabilla rafuena jai fididicue. Cristona sedallena omoi oficabia, Cristo rafuena ñnocana

jaiñedomoi; iadedi naiemona marañede rafue comuide. ¹⁸ Rollena omoi oficabia, omoi comeciaina daje isoi lloñenana jai fididicue. ¿Bue ñellena omoi comeciaina daje isoi lloiacañedomoi? Naie rafuena omoi diga ja ñaiacadicue. Omoi oficabia, nagamiiai guillena aticabidomoi. Mare; iadedi danomo guiñedomoi. Omoimona damierie ucuberena jira, dueredino diga guiacañedomoi. Omoi guille caididomoi. ¹⁹ Omoi iese illana jitaiñedicue; iadedi daje isoi omoi comeciaina lloñenamona, Jusiñamui ñibeimo raise itinodi uiñoga. Omoimona damierie danomo omoi guillamona, Jusiñamuina omoi isiruillana uiñotica. ²⁰ Cristona sedallena omoi oficabia, guitomoi; iadedi vino jiruanona, llomeniconona guillanona, cai Nama fiodailla rafuena raise comeciñedomoi. Marañede rafuena omoi finua jira, iena nia lloiticue. ²¹ Nagamiiai guillena aticabidomoi. Dani coniniri raise guiñedomoi. Danirie omoi atica guillena guitomoi. Jiañona guillena iñedomoi. Damierie omoimo ailluena guille ite. Damierie omoimo guille raise iñede. Jiañona guillena omoi iñena jira, damierie jaca aimetaimaci; iadedi jiaño monidimaci. Damierie guilla motomo jiañ jifaidimaci. Conini nabaiñedomoi. Ie jirari Cristo fiodailla rafuena raise comecinidomoi. ²² Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiañonomo guille feacaicañedomoi? Jiañe creyentiaina omoi isiruiñenamona, Jusiñamuina jiañ isiruiñedomoi. Janore guille itinona duere finodomoi, naimacina omoi eacaicañena jira. Iese omoi illa jira, omoiri iobiñedicue.

Cristo fiodailla rafuena llofuicino

²³ Navui omoina biena llofueticue; iadedi omoi raise ñnoñena jira, iena dane llofueiticue. Cai Nama iena cuemo jaie llote. Cai Nama Jesús ie gaitatajarui facaiseconi, ie llofueoicaigano diga ia, naimaci guia, llomeniconona llinote. ²⁴ Iena llinuanona, Jusiñamuimo iobillacinona fecade. Ie mei iena tairuanona raite: “Mai, biena guiño. Bie llomenicodi omoi guillamona, cue fiodaillana omoi comeci. Cue fiodaillemona omoi jeacinomona jilloitomoi. Biena omoi guillamona cuena comeci. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci. ²⁵ Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisemona cominina imaci jeacino facaina Jusiñamui duere finoñellena, toiniaina atuidimaci, naimiemo fecallena”. Iemo ie comecina facajano, raite: “Cue fiodaillemona, dama cue diaillemona, Jusiñamuidi omoimo jiañe rafuena birui llote. Omoi jeacinona oni dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci. ²⁶ Naga icaiño Cristo facaina llomeniconona omoi guia, Cristo facaina vinona omoi jiroia, omoi jeacino facaina cai Nama fiodaillana uiñotomoi. Naimie nia abido dane bille ñinori naiena comeci.

Cristo fiodailla rafuena raise comeciacadica

²⁷ Cristo fiodailla rafuena raise comeci. Naie llomeniconona Cristo rafuedo raise jaiacañedimie ebena guia, Cristo rafuedo raise jaiacañedimie naie vino ebena jiroia, iena jamaide. Naimie jeacinomona Cristo naimie jilluana naimie ñnoñena jira, Cristomo jeacinona finode. ²⁸ Jeacino omoi comeciaino illamo omoi comeciaina faca. Jeacino omoi comeciaino ia, iena guiño. Iena jiroñeno. Jeacino omoi comeciaino iñena, iena guiño. Iena jiro. Jeacino ia, Jusiñamuimo iena llono. Jiaimie

diga nicino ia, iena raise fino. Ie mei iena guiño. Iena jiro. ²⁹ Jeacino naimie comecimo nia illamona, iena guia, iena jiroia, maraiñede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite. ³⁰ Ie muidona omoimona ailluena irareside. Ie jira omoimona damierie fiodaite. ³¹ Cai comeciaina raise cai facajamona, jeacinona cai fainoocaia, Jusiñamui caina duere finoñeite. ³² Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena ñnoñedinona duere finoite. Naimaci diga cai duere sefuiñellena, birui caina duere finode.

³³ Cue amatiai, Cristo fiodailla rafuena omoi comecillena omoi ofia, daacaño omoi guillesa, jiaño riñedinona seda. ³⁴ Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacañenia, Jusiñamui omoina duere fino raillano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

12

Cristo facaina raise maijillena, Jusiñamui Joreño naga creyentena canode

¹ Cue amatiai, jiaie rafuena cuemo jai jicanotomoi. Iena ja ñaiticue. Jusiñamui mona diga uaina feiñoticaí. Naimiemona naimie facaina maijia uaina feiñoticaí. Naimie facaina cai maijillena, jiaie creyentiaina cai canollena, naimiemona cai oga uaina ñaiticue. Iena omoi raise uiñuana jitaídícue.

² Ero, Cristona nia omoi ñnoñenia, Jusiñamuiñedimiede jiraraina sedauidomoi. Iedo jaie tainodo jai-jaisoidomoi. Taife iedo omoina jifue. ³ Ie jira buena omoi raise uiñuana jitaídícue. Jusiñamui Joreño uaido ñie creyente ñaia, Jesús Joreñoña jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido ñie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiñeno.

⁴ Jusiñamui Joreño caimo jai illa jira, Jusiñamui Joreñomona cai maijia uaina oticaí. Naga creyente daje isoi oñedicaí. ⁵ Naga creyente Cristo facaina daje isoide uai diga maijiñedicaí; iadedi Cristo facaina nana maijidicaí. ⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena. ⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticaí. ⁸ Damierie creyentemo Cristo rafue jino llole uaina itatate. Damierie creyentemo Cristo rafue llofuelle uaina itatate. ⁹ Damierie creyentemo Jusiñamui siño rafue finuana ñnotaja uaina itatate. Damierie creyentemo duidinona jillotaja uaina itatate. ¹⁰ Damierie creyentemo siño rafuena finua uaina itatate. Damierie creyentemo jino llole uaina itatate. Naimacimo Jusiñamuidi ie rafuena llocabite, jiaínomo jino llole. Dajerie creyentemo uaina itatate, ñie isoide uaido Cristo rafuena railla lloraíma lluaña uiñollena. Jusiñamui Joreño uaido ñie lloraíma lloia, iena uiñote. Taife uaido ñie lloraíma lloia, iena jiaí uiñote. Damierie creyentemo naimaci uiñoñega uaido ñaia uaina itatate. Damierie creyentemo naie uiñoñega uai oni dobaiñolle uaina itatate, comini iena raise uiñollena. Iena naimaci nia dobaiñoñenia,

iena jiaí raise uifioñedimaci. ¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicai

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai. ¹³ Dama Jusiñamui Joreñodi dajena Cristomo nana creyentiaidicaidi duidicai. Dajerie judiuidicai; dajerie judiuiñedicai; dajerie patrón anamo iticai; dajerie patrón anamo iñedicai. Diga nairaiaidicai; iadedi dajena Jusiñamui Joreñona nana feiñoticai.

¹⁴ Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai. ¹⁵ Ero, cai abimona cai eilli nibai facaite: “Onolli isoiñedicue. Onolli cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baifemo faiñede. Dafocni ite. ¹⁶ Ero, cai jefo nibai facaite: “Uisi isoiñedicue. Uisi cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baifemo faiñede. Ie isoide. Dajena Cristomo omoi duilla jira: “Jiaimie baifemo iticue” raiñeno. Jiaie creyentena abina uradoiñeno. ¹⁷ Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticai? ¿Niese niadedi ra sorillana cacadimoi? Ie isoide. Dajena Cristomo omoi duilla jira, naga creyentena jitaidimoi, Cristomo dajena inocana omoi jaillena. Jiaie creyentena uaitaño. ¹⁸ Jusiñamui cai abimo diga rana comuitate. Naimie jitailla isoi, cai abimo naga rana comuitate. ¹⁹ Cai abimo diga ra iñedena, ¿buedo cajeniticai? ²⁰ Diga ra cai abimo ite; iadedi jaca dajede cai abi.

²¹ Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comeci ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena inocana jaillana jitaidicai. Jiaie creyentemona abina iedoñeno. ²² Naga cai abimo ite rana jitaidicai, raise cai illena. Naga cai abimo ite ra jiaie ra baifemo iñede. Nana daje isoi itena, mare; ²³ iadedi dajerie ra ebire eruaillena, cai abi jifollena, iniroina jitadicai. Meiruiñellena, cai abi bainillena, iniroina jiaí jitadicai. ²⁴ Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiaie ra baifemo iñede. ²⁵ Jusiñamuidi naga cai abimo ite ra dajena maijiana itatate. Dajena maijicana jaide. ²⁶ Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai. Jiaie creyente duere sefuia, naimiena cai canoia, Cristo dibeimo caimare marena iticai. Naimiena cai canoñenia, caimare marena iñedicai.

²⁷ Ero, caidi naimie cominina jira, Cristomo dajena nagasaiaí duidicai. ²⁸ Ie jira Jusiñamuidi naimiena inotinomona damieriena nano fetuanona, Cristo naimacina oretate, ie rafuena llollena. Ie mei jiaionona fetode, naimacimo ie rafuena llua mei, jiaionomo ie rafuena jino llollena. Jiaionona fetode, ie rafuena llofuellena, cominina ie rafuena raise uifioñatallena. Jiaino ie uaina itatate, naimie facaina naimaci maijillena, jiaie creyentiana naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina

itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena. ²⁹ Ero, Jusiñamui nana omoina fetofede, ie rafuena jino llolena. Damieriena fetode. Nana omoina fetofede, ie rafuena llofuellena. Damieriena fetode. Nana omoina fetofede, siño rafuena finollena. Damieriena fetode. ³⁰ Nana omoina fetofede, duidinona jilloitallena. Damieriena fetode. Nana omoina fetofede, omoi uiñoñega uaido ñaillena. Damieriena fetode. Nana omoina fetofede, naie uiñoñega uai jino dobaiñollena. Damieriena fetode. ³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoimo illena, Jusiñamuimo jica; iadedi jiaie rafuena omoi ollena, omoimo lloiticue. Nana jiaie rafue baifemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uiñoñega uaido ñaia uaina cai ñaia, Jusiñamui jaienisa; isoi cai ñaia, cominina cai isiruiñenia, jamai ñaiafuena ñaiticai. ² Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo ñnoia, cominina cai isiruiñenia, Jusiñamuimona jamai bue isoidicai. ³ Jiaie cominina cai canollena nana caimo ite rana cai fecaia, Cristo rafuena cai lollela cai niadi fiodaicania, cominina cai isiruiñenia, jaca buena oñedicai. Jusiñamuina jaca iobitañedicai.

⁴ Cominina cai isirua, naimaci diga raire iciriñedicai. Naimacina canocabicai. Naimaciri abina uradoñedicai. Abina birioicaiñedicai. ⁵ Cominina cai isirua, abina iedoñedicai. Naimacimo cai comeciaina facacabicai. Cai rana caidicabiñedicai. Naimaci diga iciricabiñedicai. Naimaci caina jeare finoa, ibana ocabiñedicai. ⁶ Cominina cai isirua, naimaci jeare finoca rari iobicabiñedicai. Naimaci uanai mare finoca rari iobicabicai. ⁷ Cominina cai isirua, naimaci caina duere finoa, ibana ocabiñedicai. Cai joreña bu ñaia, caina taino lloia, iena ñnocabiñedicai. Cai marena illamo ocuridicai. Cai comeciaina ocuiñocana jaidicai.

⁸ Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite. ⁹ Nana Jusiñamui caina uiñotagacinona nia raise cacaiñedicai. Nana Jusiñamui rafuena nia raise jino lloñedicai; ¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticai. Naimiemo ite rafuena jia; raise uiñoiticai.

¹¹ Jiaie rafuedo iena llofueticue. Jiaie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena faimonocaidicue. Eimie comecina facajacino birui jaidicue. Urue isoi Jusiñamui rafuena birui janore uiñoticai; iadedi monamo cai ia, eimie isoi iena raise uiñoiticai. ¹² Ero, jaciae acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicai. Iena raise cacaiñedicai; iadedi Cristona ico cioiticai. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiña

isoi, jiaí raise uifioíticue. ¹³ Ja muidomo lloíticue. Jesucristo billanona, Jusiñamui Joreñomona caímo ite uaidí saite; iadedí Jusiñamui llogacínodo jai abina ifnoticái. Naimie llogacino suillemo jai ocuridicái. Jusiñamuina cai isiruillamona, jiaíe cominina jiaí isiruiticái. Naie isiruillacino jiaícano baífemo faite. Ie jira coninina isiruicana omoi jai.

14

Omoi uifioñega uaido omoi ñaia rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido. ² Ero, omoi uifioñega uaido ñaia uaina omoi ñaicabia, jaca buna omoína cacaiñena jira, cominina canollena ñañedomoi; iadedí Jusiñamuina iobitallena ñaitomoi. Omoi uifioñega rafuena omoi comeciáimona ñaitomoi. ³ Jusiñamui rafuena jino omoi lloia, cominina canodomoi. Naimacina Jusiñamuina ifnotadomoi. Naimie díbeimo raise itatatomoi. Naimaci comeciáina ocurifnotadomoi. ⁴ Nana creyentiaína canodomoi; iadedí naie uifioñega uaido omoi ñaia, daní omoi comeciáina canodomoi.

⁵ Rollena omoi oficabia, naie uifioñega uaido omoi ñaia, cuemona mare; iadedí Jusiñamui rafuena jino omoi lloia, cuemona ua eo mare. Naie jino llua uaidí naie uifioñega uai baífemo faite. Naie uifioñega uaido omoi ñaia, nana creyentiaí iena raise cacareillena, iena omoi oni dobaiñoia, cuemona jiaí mare. Ie mei naie ñaiamona, Jusiñamui rafuena naimaci cacajamona, creyentiaína canodomoi. ⁶ Cue amatiaí omoi díne cue jaiacanana uifiotomoi. Omoi díne cue ria, cue uifioñega uaido cue ñaiticuedena, omoína canoñedicue; iadedí Jusiñamui cuemo jai lloga rafuena omoímo cue lloticuedena, omoína canodicue. Jusiñamui rafuena raise cue jai uifua jira, omoína cue llofueticuedena, omoína jiaí canodicue.

⁷ Ero, quena jamai tainuaido bu fia, ie figana uifioñedicái. Guitarra bu jamai tainuaido taia, ie taillana uifioñedicái. ⁸ Ejércitomo trompetana jamai tainuaido fia, soldaduai maijillena raise uifioñedimaci. ⁹ Ie isoide. Cai cacaiñena uaido omoi ñaia, omoi ñaiana uifioñedicái. Iese omoi ñaia, jamai tainona ñaite isoi cacadicái. ¹⁰ Eo ailluena nairaiaí ite. Naga nairaí ie uai ite daní naimaci ñaillena; ¹¹ iadedí nie nairaí ie uaina cue uifioñenia, naimacimona jiaíe nairaí imiena eruaidicue. Cuemona naimaci jiaíe nairaina eruaidimaci. Coniní díga ñaiana cacaiñedicái. ¹² Ie isoide. Jusiñamui Joreñomona bite ñaia uaina omoi eo jitaillanona, díga uaina Jusiñamuimo jica, daní coniní Cristo rafuena ifnocana omoi jaillena. Jusiñamui Joreñomona daní daje uaina nicidoño; iadedí nana nicido.

¹³ Ie jira ie uifioñega uaido bu ñaia, ie oni dobaiñua uaina naimiemo illena, jiaíe creyentiaí iena cacaillena, Jusiñamuimo jicaja. ¹⁴ Jusiñamui díga cue uifioñega uaido cue ñaia, Jusiñamui Joreño cuena ñaitatate; iadedí iena cacaiñedicue. Iena uifioñedicue. ¹⁵ Ie jira, ¿niese cue nibaille? Jusiñamui díga cue ñaia, cue uifioñega uaido ñaiticue; iadedí cominí cue ñaiana raise uifioñena, Jusiñamui díga jamai cue uaido jiaí ñaiticue. Jusiñamuimo cue roia, cue uifioñega uaido roíticue; iadedí cominí cue ruana raise uifioñena, Jusiñamuimo jamai cue uaido jiaí roíticue. ¹⁶ Iobillacinona Jusiñamuimo omoi fecajano, omoi uifioñega uaido omoi ñaianona, ¿niese omoína cacaiñedino: “Jee” raitimaci? ¹⁷ Iobillacinona

Jusiñamuimo raise fecadomoi; iadedi omoina cacaiñedinona Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñaiñeno. ¹⁸ Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; ¹⁹ iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona maraiñede.

²⁰ Cue amatiai, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca. ²¹ Jusiñamui facaina lloraima micori jaiie cuela: “Jusiñamui llote: ‘Cue comini dine jiaie nairaina cue oretajamona, cue cominina cuena ñnotallena, naie jiaie nairai uaido cue cominimo lloiticue; iadedi iena jitañeitimaci. Cuenajaca uiñoñeitimaci’ llote”. ²² Ie isoide. Uiñoñega uaido omoi ñaiamona, Cristona ñnoñedinona iena raise cacaiñeditimaci; iadedi Cristona ñnotino iena cacadimaci. Iemona fueotimaci. Jusiñamui rafuena omoi llofuamona, Cristona ñnoñedinona iena cacajamona, Cristona ñnoñeditimaci; iadedi Cristona ñnotinona canodomoi. ²³ Danomo nana omoi ofia, omoi uiñoñega uaido nana omoi ñaia, Cristona ñnoñedinona iena cacajanona, omoina; “Uairico” raitimaci; ²⁴ iadedi omoi ofia, Jusiñamui rafuena omoi jino lloia, iena Cristona ñnoñeditimie cacajamona, naimiedi jeacino naimie comecimo illana uiñoite. Naie rafue naimiemo riire baite. ²⁵ Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina ñnoite. Ie muidona raite: “Unai, Jusiñamui omoi motomo ite”.

Roracomo omoi ia, raise marena omoi i

²⁶ Cue amatiai, rollena omoi oficabia, ¿ñiese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo ñibeimo creyentiaina raise itatallena, nana omoi finua rafuena raise fino. ²⁷ Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite. ²⁸ Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. ²⁹ Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uiñuanona llua. ³⁰ Jusiñamui rafuena bu nia lloia, naimie ecimo jiaimienona rafuena Jusiñamui Joreño llotataia, nano llotimie raire llucilla. Iemei jiaimie lloite. ³¹ Iese damierie nana lloitoimoi, naie lluamona Jusiñamui rafuena raise omoi uiñollena, omoi comeciiai jiaie ocuiñollena. ³² Naga llotimiedi ie uiñua diese lluanona uiñote. Ie jira jiaimie nia lloia, iena cacarei. Iemei jiaimie llua. ³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

³⁴⁻³⁵ Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie ñnimo jicanoitimaci. Roracomo naiñaiñuai ia, Moisés micori jaiie llua isoi, naiñaiñuai ini anamo naiñaiñuai

illa jira, nainomo ite lloraima uaina naiñaiñuái uaitañena. Roracomo naiñaiñuái uaina uaitaia, maraiñede, nainomo ite jino lloraima uaina naiñaiñuái raise cacaiñena jira.

³⁶ ¿Niese cue llucacínodo jiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena llote. ³⁷ “Rafuena Jusiñamui cuemo llote” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoimo cueticue” naimiedi uiñote; ³⁸ iadedi naimie iese uiñoñenia, Jusiñamui Joreñomona naimie uai iñenana uiñoiticaí.

³⁹ Cue amatai, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiaí ñaia, iena rairuiñeno. ⁴⁰ Omoi ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amatai, iena omoi feitañellena, bie rafuena dane lloiticue. Cristo ie mare rafuena omoína navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena ñinocana jaidomoi.

² Naiena omoi ñinuamona, Jusiñamui omoi jeacinomona omoína jillotate. Naiedo nia omoi jaia, iena raise omoi ñinoia, jai jillobidomoi.

³ Nanoca rafuena omoína llofueticue. Jiaie creyentiaimona buena jai cacadicue. Jusiñamui facaina lloraini micoriai jaie ciegafuiai isoi cai jeacino facaina Cristodi fiodaite. ⁴ Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriai jaie llua isoi. ⁵ Ie mei Pedro naimiena cide. Ie mei ie once llofueoicaigano naimiena ciodimaci. ⁶ Ie mei quinientos naimiena ñnotino naimiena daruido ciodimaci. Naimacimona damierie jai fiodaitimaci; iadedi ailluena nia fiodaiñedimaci. Cristo jilluana uiñotimaci. ⁷ Ie mei Jacobo naimiena cide. Ie mei nana ie oretagano naimiena ciodimaci.

⁸ Ie mei naimiena jiai ciodicue. Ie jira fiodaillamona naimie jilluana uiñoticaí. Ie doce llofueoicaigano fetua mei, diga años illanona, naimiena nia cue uiñoñena facaise cuena fetode. Ie mei ie rafuena cue llollena, cuena oretate. ⁹ Ailluena creyentiaina jaie cue duere finua jira, nana jiaie Cristo oretagano cue baifemo faitimaci. Jamai bue isoidicue; iadedi Cristo cuena fetode. ¹⁰ Jusiñamui cuena duenaillamona, Cristo oretagamiena jaidicue. Jusiñamui cuena jamai tainomo duenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue. ¹¹ Jiaie oretagano Cristo rafuena llofueia, iena cue llofueia, daje isoide rafuena llocana jaidicaí. Naie rafuena omoi cacajamona, iena ñnotomoi.

Fiodaillamona nana creyentiaí ico jilloitimaci

¹² Fiodaillamona Jusiñamui Cristona jillotajana llofuecabiticaí; iadedi omoimona dajerie raitomoi: “Fiodaillamona, nana comini imaci abiaí diga ico jilloñeitimaci”. ¹³ Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede. ¹⁴ Cristo jilloñenia, Cristo rafuena jai tainona lloticaí. Naie rafuena jiai tainona

ñnotomoi. ¹⁵ Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiaina ico Jusiñamui jillotañena, Cristona jiai niade jillotañede. Jusiñamui rafuena tainona jai llofueticai. ¹⁶ Fiodaillamona nana creyentia ico jilloñenia, Cristo jiai jaije jilloñede. ¹⁷ Cristo nia jilloñenia, naimiena tainona ñnotomoi. Jusiñamui omoi jeacinona niadedi oni dotañede. ¹⁸ Cristona ñnuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca iitimaci. ¹⁹ Nana cai ille dinori dani Cristo caina jilloitallemo cai ocuiria; iadedi naimie jilloñenia, jai duere iticai. Jai tainomo ocuiridicai.

²⁰ Ero, tainomo ocuiriñedicai; iadedi fiodaillamona Jusiñamui Cristona jai jillotate. Naimie jillua mei, naimiena cidicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentia jiai jilloitimaci. ²¹ Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicai; iadedi fiodaillamona Cristo jai jillua jira, fiodaillamona ico jiai jilloiticai. ²² Adán micorimona cai comuilla jira, nana fiodaicana jaidicai; iadedi Cristomo cai duilla jira, jilloiticai, naimie diga jaca cai illena. ²³ Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticai. ²⁴⁻²⁵ Ie mei naimie dinena nana naimie dibeimo iñedinona anafeditaite. Nana naimie dibeimo iñede joreñuaina jiai anafeditaite. Illaimana Cristo illamona, nana naimie dibeimo iñedinona anafeditaite. “O uai cuemo o illamona, nana o jitailla rafuena jai fuidodicue” ie Moomo lloite. ²⁶ Nana naimie dibeimo iñedinon naimie anamo jai illa mei, Cristo muidona naimie comini jai jilluamona dane fiodaiñeitimaci. ²⁷ Jusiñamuidi nana cominina Cristo anamo itataite. Ie muidona creyentiaidicai dane fiodaiñeiticai; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede. ²⁸ Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiena jira, nana naimie finoca ra naimie anamo iite. Nana comini naimie anamo iitimaci. ²⁹ Cristo jilloñeden, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese ñnoñedomoi. Dajerie creyentia marena illamona, omoimona dajerie creyentiaina jaidomoi. Naimaci jai fiodaitimaci; iadedi fiodaillamona ico jilluana ñnotimaci. Iena omoi ñnuanona, bautizagaomoi. ³⁰ Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jaciredo ramona niadedi fiodaicabiticue? ³¹ Cue amatiai, cai Nama Jesucristomo omoi duilla jira, omoiri iobidicue; iadedi nagarui niadedi fiodaicabiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci. ³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue lluamona jaca buena oñeiticue. Ie muidona fiodaillamona cai jaca jilloñeiticaidena, Cristo rafuena fañnonocaida, ico raire jamai cai fiodailla jira, jamai ua jai jaicaillafuena cai jaiacaiticai. Ie ia iese iñede. Cristo jai jillode.

³³ Ie jira omoi abiaina jifueñeno. “Jilloñeiticai” railla comini diga omoi nabairia, naimaci llogacinodo jiai jaitomoi. Ie muidona naimaci diga nabairiñeno. ³⁴ Ie jira raise abina uiñuanona, mai jai. Jeacinona finocana jaiñeno. Omoimona dajerie Jusiñamuina raise uiñoñena jira: “Jusiñamuidi

cominina jillotañeite” raitimaci. Omoi meidaillena, omoimo iese lloticue. Jusiñamui rafuedo raise mai omoi jai.

¿Niese creyentiai jilloitimaci?

³⁵ Omoimona damie nibai jicanoite: “¿Niese fodaillamona creyentiaidicai jilloiticaí? Naimaci abiai nibai jai rifaidimaci. ¿Nie isoide abiai diga dane iiticaí?” ³⁶ Iese bu jicanoia, raise comecina facañede. O illimo buena o ria, janore sicua meinoconi, o riga radi jai abidi rifaide. ³⁷ Nie isoide iconona o ria, nie isoide ijina o ria, nie isoide idona o ria, naie ra sicua mei, jai jiaífo eruaide. O riga rana eruañede. ³⁸ Naga riana daje isoi eruañede. Jusiñamui jitailla isoi, jiaíforie eruaide. Ie isoide. Naga fodaítimie jillua mei, Jusiñamui jitailla isoi, ie abina jiaíforie itataite. ³⁹ Diga isoide cai abiana Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellená, silli abi ite. Jinuimo illena, lliciaí abi ite. Ua diga isoide abi ite. Jusiñamuidi cai jiaíforie eruaite abiana finorede. ⁴⁰ Jusiñamui dine ico cai ia, cai abiai iite, nainomo cai illena. Bene cai abiai jiaí ite, bene cai illena. Monamo cai ia, ebirenticaí. Bene cai ia, jiaí ebire iticaí; iadedi daje isoi ebire iñedicaí. ⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuaí isoi lligaiñoñede. Naga ucuaí daje isoi lligaiñoñede. Monamo cai ico illena, naimie jitailla diese cai abiai caimo iite. ⁴² Ie isoide. Fodaillamona cai jillua mei, cai abiai jiaífo eruaite. Cai fodaillamona cai abiai rifaide; iadedi cai jilluamona, cai abiai dane jai rifaiñeite. ⁴³ Cai fodaillamona cai abiai jai ebinide; iadedi cai jilluamona, cai abiai ebirente. Fodaicana cai jailla jira, cai abiai birui raise mairiñede; iadedi ico cai jilluamona, cai abiai mairite. Nana Jusiñamui jitailla rafuena finoreniticaí. ⁴⁴ Cai fodaia, come abiai isoi caimo birui ite; iadedi cai jilluamona monamo ico caimo cai abiai jiaí iite. Enirue iena cai abiai birui caimo ite. Ie jira monamo cai jiaífo eruaite abiai caimo iite.

⁴⁵ Adán micori comuilla rafuena Moisés micori jaie cuela: “Jusiñamuidi nano comuidimie dofomo jafaicina firaiñuamona, naimie micori comena jaide” cuela. Naimiemona cai comuilla jira, fodaíticaí. Fodaillamona Cristo jillua jira, ico cai jiaí jilloille jira, caina jiaífo eruaite abiana ico itataite. ⁴⁶ Eniruemo birui cai illa jira, caimo birui ite abiai diga iticaí. Fodaillamona ico cai jillua mei, monamo cai ia, jiaífo eruaite abiai diga iiticaí. ⁴⁷ Adán micoridi enirue ie. Imuicimona Jusiñamuidi naimiena finode. Cristodi eniruemo billanona, imana jaide; iadedi Jusiñamui dinena monamona naimie bite. ⁴⁸ Imuicimona Adán micori finua jira, naimie fodailla mei, dane imuicina jaide. Naimiemona cai comuilla jira, cai fodaia, jiaí imuicina jaiticaí; iadedi Cristomo jiaí duidicaí. Cai jillua mei, naimie isoi ico iiticaí. ⁴⁹ Adán micorimona cai comuilla jira, naimiena eruaidicaí. Eniruemo Cristo jaie ia, naimie abi ite. Fodaillamona naimie jillua mei, naimiemo jiaífo eruaite abi naimiemo ite. Cai jillua mei, Cristona eruaiticaí.

⁵⁰ Cue amatiaí, buena lloticue. Caimo jai ite abiai diga monamo Jusiñamui ie cominina sedajanomo iñeíticaí. Cai abiai rifaila jira, cai fodailla facaise naie isoide abiai diga nainomo jaca iñeíticaí. ⁵¹ Ero, Jusiñamui cuena uifnotaga rafuena omoimo ja lloticue. Iena navui jaca uifnoñedicaí. Nana creyentiaidicaí fodaíñeíticaí; iadedi Jusiñamui cai

abiaina jiaifo meidotaite. ⁵² Omoï uisi jarire cuirorilla isoi, iena ua raire meidotaite. Ie trompeta fillanona, jai fodaite creyentiaina Jusiñamuidi jillotajanona, naimaci abiaina meidotaite. Nia fodiañedinodicai cai abiaina jiai meidotaite. Dane fodiañeiticai. ⁵³ Cai abiai birui rifaicade. Ie jira birui fodaicana jaidicai. Jusiñamuidi cai abiaina ico meidoite. Ico monamo jiaifo abiai caimo ia, cai abiai rifañeite. Fodiañeiticai. ⁵⁴ Iese caimo sua, Jusiñamui facaina lloraima micori jaie cuega uai jiai suite. Cuega: “Nairuimona creyentiaï jaca fodiañeitimaci”. ⁵⁵ Cai jaca illa jira, fodaicana jaiñeiticai. Fodaillana jaciruiñeiticai, dane cai fodiañeiticaina jira. ⁵⁶ Jeacino illa jira, birui fodaicana jaidicai. Moisés micori jaie llogacino illa jira, iena cai raise finonina jira, jeacino caimo illana uiñotici; ⁵⁷ iadedi cai jeacino facaina cai Nama Jesucristo fodailla jira, jeacino anamo jai iñedicai. Cai fodailla mei, dane fodiañeiticai. Jusiñamui caina iemona jai jillotate. Ie muidona naimieri cai iobillasa.

⁵⁸ Cue amatiai, fodaillamona nana creyentiaï ico jillua jira, Cristo rafuena ñnocana jai. Naganomo iñeno; iadedi Cristo rafuena llocana omoï jai. Naimie jitailla rafuena finocana omoï jai. Naimie facaina omoï maijia, tainona maijiñedomoi. Naiemona diga mare rafue comuite. Iena jai uiñotomoi.

16

Jerusalémo itinomo ucubena oredimaci

¹ Jiaie rafuena cuemo jicanotomoi. Jerusalémo ite creyentiaïmo ucubena oretaiacadomoi. Galaciamo ite creyentiaïmo cue llua isoi, omoïmo lloiticue. ² Naga domingo omoï ucubemona daje diese eneno oni eno. Omoï maijia bailla diese ucubemona cue bille dinori iena eeno. Iese naga domingo omoï eenoñenia, ico cue bia, ¿ñiese dacaño ofrendamo ailluena ucubena joneitomoi? ³ Omoï dine cue rilla mei, omoï eenoga ucubena uillena, Jerusalémo ite creyentiaïmo omoï fetocanona oretaiticue. Cartana jiai oretaiticue, omoï fetocano mareuidinona Jerusalémo itino uiñollena. ⁴ Jerusalémo cue começi jiai jaiacania, cue diga jaitimaci.

Pablo jai macariacade

⁵ Macedonia railla enruemo nano jaiticue. Creyentiaïna cioillena, dajerie nairaimo jaiticue. Ie mei omoï dine jaiticue. ⁶ Diga irui omoï diga nibai iiticue. Nana rollime facaise omoï diga nibai iiticue. Nibai daje amani fivui iiticue. Ie mei cuena omoï canollemona oni jaiticue. Omoï ñnomona cue jaia, cue jaillinona nia uiñoñedicue. ⁷ Omoï dine birui nia jaiñeiticue. Omoï dine birui cue jaia, dallu omoï diga iiticue; iadedi jiairuido omoï dine cue jaia, cai Nama jitaia, omoï diga are iiticue. ⁸ Beno Efesomo nia iiticue. ⁹ Beno diga comini Cristo rafuena cacaacadimaci. Naimacimo iena llofueiacadicue. Diga comini cue lluana uaitatimaci. Cue lluana jitañedinomoi Ie jira bene nia lloiacadicue. Pentecostés railla rafue fülle mei, jaiticue.

¹⁰ Omoï dine Timoteo ria, naimiena raise marena nafue. Cue isoi cai Nama facaina naimie maijicabide. ¹¹ Ie muidona naimie lluacinona jamañeno. Omoïmona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentiaï diga naimie billemo ocuridicue.

¹² Apolona jicanotomoi. Jiaie creyentiaie diga omoi dine naimie jaillana naimiemo lloticue; iadedi naimie comeci nia jaiacaiñede. Jiairuido abi juarena, omoi dine jaite.

Fuiduacino

¹³ Jeacinomona abina rairui. Cristo rafuena inocana omoi jai. Eimie isoi omoi comeciaina ocuiño. ¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amatiaie, Acaya railla eniruemo Estéfanadi, ie comini diga, nano creyentiaidimaci. Iena uñotomoi. Naimaci jitaila jira, jiaie creyentiaina canocabidimaci. ¹⁶ Naie isoidino lloga uaina cacarei. Naga Cristo dibeimo maijidino uaina cacarei. Iedo omoi jai. ¹⁷ Omoimona cue dine Estéfanas bite. Fortunato diga, Acaico diga naimie billa jira, iobidicue. Cue dine iñedomoi; iadedi naimaci billa jira, omoi isoi cuena canodimaci. ¹⁸ Naimaci billamona cue comeci caimataide. Omoi comeciaie jiaie caimataide. Naie isoidinomo: “Marena maijidomoi” omoi railla.

¹⁹ Diga creyentiaie Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiaie orediaimaiaie. Iaimaiaie jofomo dajerie creyentiaie rocabitimaci. Cristomo naimaci duilla jira, omoina isiruillanona, nana naie creyentiaie imaci uaina jiaie oredimaci. ²⁰ Nana bene ite creyentiaie imaci uaina oredimaci. Nana creyentiaina eo caimare uaido.

²¹ Omoimo cue uaina jiaie oredicue. Cuena canollena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena ino. Pablodicue.

²² Omoimona Cristona bu isiruiñenia, Jusiñamui naimiena duere finollesa. Cai Nama abido dane billesa.

²³ Cai Nama Jesús omoina duenaillasa. ²⁴ Jesucristomo cai duilla jira, omoina cue isiruillana omoi uñuana jitaide. Mai. Macaibaite.

CORINTOMO ITE CRISTONA HNOTINOMO IE EMODOMO PABLO ORETAGA RABE

Corintomo ite creyentiaimo Pablo cartana orede

¹ ¿Nigacino? ¿Nie isoidomoi? Pablodícue. Corintomo ite creyentiaí, omoi dine bie carta oredícue. Nana Acaya railla eniruemo ite creyentiaímo bie carta jiaí oredícue. Jusiñamui jitailla jira, ie rafuena cue jino llollena, Jesucristo oretagamíedicue. Cue diga Timoteo illa jira, naimíe ie uaina omoi dine jiaí orede. ² Cai Moo Jusiñamui, cai Nama Jesucristo diga, omoína duenaite. Iena uiñocana mai omoi jai. Iaimaiaí omoína uri jai itatate. Iena omoi uiñocana mai omoi jai.

Pablo ie duere sefuilla rafuena cuete

³ Cai Moo Jusiñamuimo iobillacinona cai fecacabillasa, naimíedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade. ⁴ Nie isoide rafuemona cue duere sefuia, nie isoide ramo cue jiria, naimíe cue comecina jaca ocuiñotade. Ie jira jiaínona canoredícue. Nie isoide rafuemona naimací duere sefuia, nie isoide ramo naimací jiria, Jusiñamui caina ocuiñotaja isoi, naimací comeciaina ocuiñotaredícue. ⁵ Cristomo jai cue duilla jira, naimíe isoi cue duere sefuia, naimíe cue comecina ocuiñotade. Iemona jiaíno comecina ocuiñotajana raise uiñoticue. ⁶ Duere cue sefuillamona, omoína canoredícue. Jusiñamui jitaillacino omoi finocana jaillana jitaídícue. Cuená naimíe ocuiñotajamona, Cristona omoi fainonocaiñellena, cue isoi omoi duere sefuia, omoína ocuiñotaredícue. ⁷ Cue isoi omoi duere sefuia, cue isoi Cristo omoi comeciaina ocuiñotaite. Iena raise uiñoticue.

⁸ Cristomo cai duillamona, cue amatiaí isoi itomoi. Asia railla eniruemo jaié eo duere sefuídícue. Iena omoi raise uiñollena, ie rafuena dane omoímo lloiacadícue. Eo duere cue sefuilla jira, cue comeci niadedi ocuiñoñedicue. Niadedi fiodaitícue. ⁹ “Naie facaise fiodaitícue” raillanomo cue comecina facadícue. Cue finoca rafuemona dama jillonidícue; ía Jusiñamui uai siñona jira, naimíe cuena jillotate. Fiodaitinona naimíe jillotarede. Niadedi fiodaitinona jiaí jillotarede. Naimíedi naimíe cuena jillotajana cue inuana jitaide. ¹⁰ Naie facaise eo duere sefuillamona cuena jillotate. Ico cue duere sefuia, iemona dane cue jilloillena inoticue. ¹¹ Iena cue facaina omoi jicabi. Jusiñamui fairíua meinomo, ailluena comíni cue facaina Jusiñamuimo iobillacinona fecaitímaci. Cuená Jusiñamui canua jira, iobillacinona fecaitímaci.

Pablo Corintomo navui jaiñede

¹² Cuená gaiñedino cuena níbai jeare ñaitímaci; ía daje rafueri abína íedoticue. Cue comecimona iena uiñoticue. Cristona inoñedinona marena finodícue. Omoína marena finodícue. Jusiñamui jitaillacino finocana jaidícue. Jusiñamuimona jeacínona finoñecana jaidícue. Cue comecina facajacinomona íese jaiñedicue; ía Jusiñamui cuena canuamona, íese jaidícue. ¹³ “Íese cuetío; íadedi o comecimo jiaíe rafue íte diga caimo cuetío” raitomoi. Omoína jífueiacaiñedicue. Cue cuela cartaiaina jai facadomoi. Cue cuela rafue omoi raise cacajana jitaídícue. ¹⁴ Cuená nía eo raise uiñoñedomoi; ía cuena uiñocana omoi jaillanona, cueri omoi iobillana jitaídícue. Cai Nama Jesús abído bíá, omoíri

cue iobilla isoi, cueri omoi iobillana jitaidicue. ¹⁵ Omoimo iese cue comecina facajamona, omoi dine navui jaiacadicue. Macedoniamona cue jaiacaduemo, raise omoina cue iobitallena, omoi dine nano navui jaiacadicue. ¹⁶ Macedoniamona cue abido bia, omoi dine navui dane jaiacadicue. Judeamo cue diga jaillena, omoimona damieriena omoi oretajana jitaidicue. Iese cue jaillemono navui comecina facadicue. ¹⁷ Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci. ¹⁸ Iese iñedicue. Jusiñamui uanaicinona jaca llua isoi, cue comeci naganomo iñede. Omoimo cue lloga uai finodicue. ¹⁹ Jusiñamui Jito Jesucristo rafuena omoimo navui lloticue. Cristo ie llogacinona jaca meidoñede. Silvano iena jiai llofuate. Timoteo iena jiai llofuate. Nagarui daje isoide rafuena llofuetica. Jiairuido jiaie Cristo rafuena llofueñedica. ²⁰ Nana Jusiñamui jai lloga uai Cristo finoca rafuemonona suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadica. ²¹ Jusiñamui Cristo dibeimona caina jai itatate. Ie rafuena cai lollena, caina jai fetode. ²² Ie cominina caina itatate. Iena cai uiñollena, ie Joreño caimo jai itatate. ²³ Jusiñamuidi cue uanaicinona llua uiñote. Uanaicinona cue lloñenia, Jusiñamui cuena duere finuana jitaidicue. Omoi finoca rafue jai cue uiñuamona, omoimo cue riire lloi raillano, omoi dine navui dane jaiñedicue. ²⁴ Cristona jai omoi ñnuana uiñoticue. Cristona ñnocana omoi jailla jira, omoi finolle rafuena lloñedicue; ia omoi iocire illana jitaidicue.

2

¹ Omoi dine nia cue jaiñellemono comecina facadicue. Omoi dine navui cue ia, iocire coniniri iñedica. ² Omoina jai icidicue. Cueri omoi iobillana jitaidicue; ia omoina cue dane icila, coniniri iocire iñeitica. ³ Omoimo cartana navui oredicue. Omoi dine ite rafuena raise finollena, iena oredicue. Cuena iobitajana uiñotomoi. Omoi dine ite rafuena omoi raise finoia, coniniri iocire iitica. “Cuena iobitaitomoi” raillanomo cue comecina facadicue. ⁴ Cue comeci eo sunaillamona, cue comeci eo eiamona, carta navui oredicue. Omoina iciaicaiñedicue; ia omoina cue eo isiruillana omoi uiñuana jitaidicue. Ie jira omoi dine ite rafuena raise fino.

Maraiñede rafuena finodimie rafuena feita

⁵ Maraiñede rafue navui damie finua jira, sunaitica. Naimie muidona cue comecido duere jaide; ia daje isoi omoi comeciai jiai duere jaide. ⁶ Omoi nabei dine ite cominimona naimie jai duere sefuilla jira, dama iesede. Naimiena dane duere finoñeno; ⁷ ia naimie finoca rafuena mai feita. Iena dane lloñeno. Naimie comecina ocuiñota. Naimiena iese omoi canoñenia, omoimona duere sefuillamona, abido danomo jaite. ⁸ Ie jira: “Ona nia isiruitica” naimiemo llono. Iena eo jitaidicue. ⁹ Nana cue llua omoi ñnuana cue facacillena, carta omoi dine navui cueticue. ¹⁰ Naimie finoca rafuena omoi feitaia, iena cue jiai feitaicue. Cristo rafuena omoi ñnocana jaillana cue jitailla jira, naimie rafuena feitaicue. Cristo cuena uiñuamona, iena feitaicue. ¹¹ Taiife ramo cai faiana uiñotica. Cristo rafuedo cai raise jaiñellena, naimie jitaillana uiñotica. Cristo dibeimona caina Taiife itatañenia, omoi motomo itimie finoca rafuena feitaicai.

Troamo navui Pablo ia, uri iñede

¹² Troamo navui jaidicue. Cristo rafuena cue lollena jaidicue. Cai Nama comini comeciaina jetajamona, naimie dibeimo cue mañiamona, ie rafuena lloticue. ¹³ Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiaina facaduanona, Macedoniamo jaidicue.

Jusiñamuidi Cristo dibeimo iñedinona anafefitaite

¹⁴ Jusiñamui fue eo mare. Cristo dibeimo iñedinona naimie anafefitajana, Cristo cominina cai illamona, naimie rafuena uicana jaidicai. Ie rafuena cai lloia, iena comini iñoia, Jusiñamui naimacina jai caimare itatate. ¹⁵ Cristomo cai duillamona, ie rafuena cai lloia, Jusiñamuina iobitadicai. Cai lluamona, damierie jillodimaci. Iena jitaiñenamona, damierie faifidimaci. ¹⁶ Iena cacajamona, damierie faificana jaidimaci. Jusiñamui illanomo jaca iñeitimaci. Iena cacajamona, jiaño Jusiñamui illanomo jaca iitimaci. Jamai bue isoidicue; ia bie rafue llocana jaidicue. ¹⁷ Damierie Jusiñamui rafuena llamona, ucubena oiacadimaci. Omoimo comecina facañedimaci; ia iese llofueñedicue. Omoimo cue comecina facajanona, bie rafue cue llamona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicinona jaca lloticue.

3

Cristo caimo lloga rafuedo birui jaidicai

¹ Omoi ñine damierie llofueraini jaia, cartaiaina uicabitimaci. Naimaci cartaiaimo jiañodi: “Bie llofueraini mare” raillanona cuetimaci. Omoimona jiaño cueda cartaiaina: “Bie comini mare” raillana jitaiñedicue. Cueda jiaño cueda cartaiaina: “Pablo mare” raillana jiañi jitaiñedomoi. ² Omoi marenana jai uiñotocue. Cue marenenana jai uiñotomoi. Carta isidomoi. Jusiñamui dibeimo omoi comeciaini meiduamona, cue comecimona omoina raise uiñotocue. Omoi birui illamona, omoina fidiamona, nana comini omoina raise uiñotimaci. Ie jira jiañodi: “Bie comini mare” raillana omoimona jitaiñedicue. ³ Cristo rafuena omoimo lloticue; ia Cristo omoi comeciaina jai meidotaja jira: “Omoi mare” raillanona naimie jai cuedadena, nana comini uiñotimaci. Tinta diga naimie cuedede. Jusiñamui Moisés micorimo jaie lloga rafue jamai noficimo cueda. Cai cajede Jusiñamui birui iese cuedede; ia naimie Joreño uaido omoi comeciaina birui meidote. ⁴ Cristomo cue jai duilla jira, Jusiñamuina cue iñuamona, omoina iese lloticue. ⁵ Cue finoca rafuemona iese lloñedicue; ia Jusiñamui uai cuemo illamona, iese omoimo lloticue. ⁶ Jiaie rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue iñuamona, Jusiñamui illanomo jaca buna itañede. Jusiñamui Joreño llotataga rafuena birui llocabiticue. Iena cai iñuamona, Jusiñamui Joreño Jusiñamui illanomo caina jaca itatate.

⁷ Moisés micorimo lloga rafuedo jaillamona, Jusiñamui ñine buna jaca iñena. Noficimo Jusiñamui cueda. Moisés micorimo Jusiñamui llua mei, Jusiñamui uai ebirena jira, Moisés micorini uieco eo quenirecaide. Jusiñamuimona naimie abido bia, Israel comini Moisés micorini uiecomo eruainidimaci. Nagarui Jusiñamui diga naimie ñañenia, naimie micorini

uieco ja muidomo queninide. ⁸ Jusiñamui Moisés micorimo jaie lloga uai ebirede; ia Jusiñamui Joreño birui caimo lloga uai baifemo ebirede. ⁹ Moisés micorí rafuedo bu jaia, faifcana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baifemo ua eo faite. ¹⁰ Moisés micorí rafue jaie ebirede; ia jaie rafue birui illa jira, Moisés micorí rafue jai birui ebinide. ¹¹ Birui ite rafue jaca saiñena jira, ua eo ebirede.

¹² Iena cai uiñuamona, bie rafuena marefodo jaciruiñeno lloticue. ¹³ Iniroi diga, Moisés micorí isoi cue uiecona ibaiñedicue. Naimie micorí ie uieco ibaide, ja muidomo ie uieco quenirena feioicaillana comini cioiñellena; ia cue lloga rafuena marefodo llocabiticue. ¹⁴ Moisés micorí comini Jusiñamui rafuena jaca iñoñedimaci. Naimaci comeciai jitaiñena jira, iñoñedimaci. Moisés micorí rafuena birui judíuai comini facaia, iena nia raise cacaiñedimaci. Dani Cristona iñuamona, naimaci comeciai raise cacareitimaci. ¹⁵ Cristo rafuena birui naimaci iñoñena muidona, Moisés micorí rafuedo nia jaidimaci. ¹⁶ Cai Nama dibeimo bu jaia, naimie comeci raise cacade. Moisés micorí rafuedo naimiedi cai jaiñenana raise uiñote. ¹⁷ Cai Nama Joreña lloticue. Cristo dibeimo cai jaia, naimie Joreño caimo jai ite. Cristona cai nabaillamona, jeacino anamo jai iñedicaí. Moisés micorí rafue anamo jai iñedicaí. ¹⁸ Cristomo jai cai duilla jira, naimiena cai comeciaimona raise uiñua jira, ie ebirede uaina uiñoticaí. Acaranimo cai eruailamona, cai abina ciodicaí. Ie isoide. Cai illamona jaie comini Cristona uiñotimaci. Cai Nama Joreño caina canuamona, naimie ebirena isoi cai illena, icana jaidicaí.

4

¹ Jusiñamui cuena duenaillamona, cue comecina ocuiñocaida, Cristo rafuena llocana jaidicue. ² Meirede rafuena llofueñedicue. Iena bainino llofueñedicue. Jifuianona omoína llofueñedicue. Omoiri iobitallena, Jusiñamui rafuena meidoñedicue. Jusiñamui cuena ciuana cue uiñuamona, naimie rafuena uanaicinona llofuecabiticue. Cue llofuiana bu raise cacaia, uanaicino cue llofuecabilana uiñoite. ³ Faifcana jaidinodi cue mare lloga rafuena raise cacaiñedimaci. ⁴ Taife anamo naimaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uiñuana jitaiñede. ⁵ Cue finoca rafuena llofueñedicue; ia Jesucristodi cai Namanana llofuecabiticue. Naimie dibeimo cue maijiamona, omoína canollena, naimie rafuena llofuecabiticue. ⁶ Enirue finua facaise Jusiñamui llote: “Jitiredino nana eniruemo iñellena, useredino mai iite”. Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

Cai comeciai ocuiñocaida iñocana jaidicaí

⁷ Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uiñotomoi; ia ie uai siñonana illamona, Jusiñamui illana uiñotomoi. ⁸ Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacareñeno comecina ocuiñocana jaidicue. ⁹ Damierie cuena duere finodimaci; ia

Jusiñamui cuena fainonocaiñeno cuena canode. ¹⁰ Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uiñocana jaidicue. ¹¹ Jesús rafuena cue llua muidona, nagarui damierie cuena meineiacadé. Iemona cue jillocabilla jira, Jesús siño uaina uiñotomoi. ¹² Naimie rafue cue llua muidona, cuena meineiacadémaci; ia bie rafuena omoi ñnuamona, Jusiñamui illanomo jaca iitomoi. ¹³ Jusiñamui facaina lloraima jaie cuela: “Cue ñnua jira, iena llofueticue”. Naimie isoi cue ñnua jira, bie rafuena jiaí llofuecabiticue. ¹⁴ Jesús fiodaillamona Jusiñamui naimie jaie jillotate. Iena cue uiñuamona, cai fiodaille mei, caina jiaí jillotaite. Jesús cai duilla jira, naimie illanomo danomo caina ico itataite. ¹⁵ Omoi facaina nana cue rafue finodicue. Cristo rafuena comini uiñollena, duere sefuidicue. Iemona Jusiñamui naimacina duenailana uiñoitimaci. Jusiñamui dibeimo naimaci illamona, naimiemo iobillacinona fecabitimaci. Ieri naimiena iobitaitimaci. ¹⁶ Ie jira iena sefuiruñedicue. Cue maírici fuicana nagarui jaide; ia cue comeci nagarui ñnocana ocuricana jaidicue. ¹⁷ Birui duere sefuidicue; ia iemo cue comecina eo facañedicue. Cristo rafue muidona birui duere cue sefuia, Jusiñamui illanomo ico cue ia, nainomo ebire marena iiticue. Iemo cue comecina eo facadicue. ¹⁸ Cuemo birui suide rafuemo comecina eo facañedicue. Jusiñamui illanomo cue nia cioñena rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

5

¹ Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo cai abi jaca rifaiñeite. ² Birui cue duere sefuillamona, Jusiñamui cuemo ico itatalle abina eo oiacadicue. ³ Cue fiodailla mei, Jusiñamui cue joreñomo jiaie isoide abina itataite. ⁴ Cue jiaie isoide abi cuemo illena, cue jamai fiodaiacañedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaille abi ifomo jaca ille abina cuemo iite. ⁵ Jusiñamuidi ie Joreño caimo itatajamona, cai abiaina iese jiaí itatajana uiñoticaí. ⁶ Iena cue uiñuamona, nie isoide rafue ia, ñnocana jaca jaidicue. Nia cue fiodaiñenia, cai Nama illa ecimo nia iñedicue. ⁷ Naimiena birui cioñedicue; ia naimiena ñnocana jaidicue. ⁸ Iese jaidicue. Cue Nama diga cue illena, fiodaiacadé; ⁹ iadedi nia cue fiodaiñenia, naimiena jaca iobitaiacadé. Cue fiodaia, naimiena jiaí jaca iobitaiacadé. ¹⁰ Naimie llua jira, Cristo uicomo ico nana iiticaí. Cai bene finoca rafuena uiñotaite. Marañede rafuena cai bene finua diese, naimiemona ibana feiñoñeíticaí. Mare rafuena cai bene finua diese, naimiemona ibana feiñoñeíticaí. Ie muidona naimie jitaillacinona jaca finoacadé.

Jusiñamui diga cai uri illafue

¹¹ Cue Nama uicomo ico cue illemona, iena cue jaciruillamona, naimie dibeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitaídicue. ¹² “Cuedi maremiédicue” lloñedicue; ia cue abi facaina omoi riídollena, bie rafuena lloticue. Omoi motomo damierie llofueraíni naimaci llofuiacino diga abina iedotimaci; ia naimaci comeciaino iticino diga abina iedofñedicue. ¹³ “Naimiedi uairico” cuena raitimaci. Iese cue iticuedena, Jusiñamui facaina iese

itícue; ie iadedi uaricoñedicue. Omoína llofuellena, omoi facaina maijidicue. ¹⁴ Nie isoidicuena, Cristo cuena isiruillana cue uiñuamona, jaca llofueiacadicue. Nana comini facaina damie fiodaillana jai ñnoticue. Naimaci jeacino ifomo naimie jai fiodaite. ¹⁵ Nana cai facaina naimie fiodaite. Fiodaillamona Jusiñamui naimiëna jai jilloitate. Naimiëna nia cai ñnoñenia, dani cai comeciaino ite rafue diga iobidicai; ia naimiëna jai cai ñnua mei, dani cai comeciaino naimiëna cai iobitajana naimie jitaide. Ie jira cue illana jai uiñotomoi.

¹⁶ Damierie llofuerañidi jiañonomo eruaillamona, naimaci comeciaina facajamona: “Naimaci mare” raitimaci. Jiaicaiño: “Naimaci marañede” raitimaci; iadedi Cristona cue ñnua facaise mona iese cominimo eruañedicue. Naimiëna nia cue ñnoñenia, Cristona jaiie raise uiñoñedicue. “Naimiedi jamai ñima” raillamo comecina facadicue; ia iese naimiemo birui comecina facañedicue. ¹⁷ Cristona cai ñnua mei, naimiemo jai cai duillamona, cai comeciainuaina meidotica. Jai jiaie isoidicai. Jiaie rafuedo jai jaidicai. Jaiie caimo ite rafuedo jai jaiñedicai. ¹⁸ Jusiñamui cai comeciainuaina meidotade. Cristo fiodaillamona, Jusiñamui dibeimo caina itatate. Iemona naimiëna jai nabairedicai. Naimacimo ie rafuena lollena, cuena fetode, jiaie cominina ie dibeimo itatallena. ¹⁹ Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacañede. Bie rafuena lollena, cuena jai fetode. ²⁰ Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiëna bu nia ñnoñenia, Cristo facaina cue illa jira, Jusiñamuina omoi nabaillanona, naimie diga uri i. ²¹ Cristo jeacino jaca finoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicai.

6

¹ Bie rafuena nia lliacadicue. Jusiñamui facaina cai maijiamona, naimie dibeimo cominina itataticai. Naimie caina duenaillana uiñoticue. Iena omoi ñnocana jaillana jitaidicue. ² Jaiie Jusiñamui cuetatate:

Cue jitailla facaise omoi jitaillacinona jai cacadicue.

Omoi jilloillena, omoína jai canodicue.

Ero, Jusiñamui birui omoína cacaacade. Birui omoína canuanona, omoína jillotaiacade. Ie muidona naimiëna ñnocana jai. ³ Bie rafuena omoi ñnoñellena, cue llofuiacinona omoi jamañellena, bu diga rafuena comuitaiacañedicue. ⁴ Jusiñamui dibeimo cue maijiamona, nie isoide rafuemona ramo cue jiria, cue illamona naimiedi: “Mare” cuena raillana jitaidicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue. ⁵ Damierie cuena fatimaci. Cárcelmo cuena jonetimaci. Naimaci illanuaimona cuena riire dotadimaci. Eo cue maijia jira, diga icaiño eo raise iniñedicue. Aime guisoidicue. ⁶ Jearede rafuena ebiruiñedicue. Cristo rafuena uiñocana jaidicue. Iciríñedicue. Jiañona canocabidicue. Jusiñamui Joreño anamo itícue. Cominina raise isiruiticue. ⁷ Uanaicinona llocabiticue. Jusiñamui uai cuemo illamona, llofuecabiticue. Cue comecina riidollena, Taifena emodofillena, Jusiñamui jitailla isoi, marecinona finocana jaidicue. ⁸ Damierie cuena marena jai ñaitimaci. Jiaño cuena jeare nia ñaitimaci. Damierie cueri jai iobidimaci. Jiaño cue joreña

jai ñaitimaci. Damierie: “Caina jifuetio” cuena raitimaci; ia nia uanaicinona llocabiticue. ⁹ Damierie: “Jamai fue isoidio” cuena raitimaci; ia jiaio cuena raise uifnuamona, naimaci dinena jamai fue isoifidicue. Nagarui niadedi fiodaicabiticue; ia nia iticue. Duere sefuicana jaidicue; ia Jusiñamui cue comecina ocuiñotacana nia jaidicue. ¹⁰ Sunaiticue; ia iocire jaca iticue. Dueredicue; ia ailluena comini comeaiaina eo caimaretadicue. Buenidicue; ia Jusiñamuimona ailluena marecinona feiñoticue. Iese jaca jaidicue. Cue illamona: “Naimiedi mare” cuena omoi raillana jitaaidicue.

¹¹ Corintomo itino, cue nabaiñiai, cue comeimo ite rafuena marefodo jai lloticue. Cue comeimona omoi diga marena iacadicue. ¹² Cuemona omoina raise isiruiticue; ia omoi dinena nia cuena eo isiruifedomo. ¹³ Cue uruiiai omoi isoilla jira, omoi diga ñaiticue. Omoina cue isiruilla isoi, cuena omoi isirui.

Jusiñamui cai comeaiamo illanodicaí

¹⁴ Creyentedimie mo jearede ramo faitatai raillano, daje isoide rafuedo iaimaijai jaiñena jira, daje isoi rafuena iaimaijai comeci lloifñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimiena creyentediñaiño oñena. Marecinodo jaiacadimiedi marañedicinodo jaiacadimie daje isoi diga nabairinide. Jusiñamuina uanaicinona uifnotimiedi useredinomo jai ite isoide. Jeacino anamo nia itimie jitiredinomo nia ite isoide. Cristo rafuena naimie uifnoñede; ia Cristo rafuena omoi uifnuamona, useredinomo jai itomoi isidomoi. ¹⁵ Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comecina facañede. ¹⁶ Creyenteñedimiedi Jusiñamuina sedañede; ia jiraraina sedade. Creyente comeimo Jusiñamui illamona, Jusiñamuina sedade. Nana creyentiaí comeaiamo Jusiñamui ite. Iena jaie Jusiñamui llote:

Comini motomo iiticue.

Naimacina nabaiticue.

Naimaci Jusiñamuiniticue. Cue comininitimaci.

¹⁷ Ie muidona cuena iñoñedino diga daje rana namatañeno.

Naimaci jearede jetaca rafuena abimo oñeno.

Iemona omoina raise feiñoiticue.

¹⁸ Omoi Moona iiticue. Cue uruiaina jaitomoi.

Siño jitodicue.

7

¹ Cue isiruiganodomo. Bie llogacino Jusiñamui caimo jai llua jira, naga marañede rafuena fainonocaida, cai jailla. Naga cai comeaiaina jearete rafuena fainonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo ciegacino diese finodimaci

² Omoi comeaiamona cuena raise feiño. Buna jeare finoñedicue. Buna jifueñedicue. ³ Marañede rafuena jai omoi finuana lloñedicue. Omoimo cue comecina nagarui facadicue. Iena ailli lloticue. Nia cue ia, raire cue fiodaia, omoina jaca uibiñocabiticue. ⁴ Cue llucacinona omoi iñuana raise uifnoticue. Omoi iobidicue. Omoi diga jai uri iticue. Duere sefuidicue; ia iocire iticue.

⁵ Macedoniamu navui cue jaidicue, cue comeci uri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentiaina naimaci itatallemo cue comeci jarire ite. ⁶ Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade. ⁷ Cue dine naimie ria, iocire iticue. Omoimo ite rafue cue cacajamona, jiai iocire iticue. Cuenamoi cioacanana llothe. Cue comeci jarire illari sunaitomoi. Cuenamoi riidoiacadomoi. Iena cue cacajanona, iocire iticue. ⁸ Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunañedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue. ⁹ Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cuega carta muidona iciriñedomoi; ia Jusiñamui jitailla isoi sunaitomoi. ¹⁰ Jusiñamui jitailla isoi, ie jeacino facaina bu sunaillamona ie comeci iuai Jusiñamui dibeimo meidoia, sunañede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca iñeite. ¹¹ Jusiñamui jitailla isoi omoi sunaillamona, omoi comeciaina raise finodomoi. Marañede rafue dibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cuenamoi dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, marañede rafuena finodimiena duere finodomoi. Nana bie rafuena raise fuidodomoi. ¹² Carta navui omoi dine cue oretaia, marañede rafuena finodimienmo cue comecina eo facañedicue. Naimiemona duere sefuidimienmo cue comecina eo facañedicue. Cuemo omoi comeciaina facajana omoi uiñollena, navui cueticue. Jusiñamui iena uiñote. ¹³ Ie jira cue comecina ocuiñoticue. Tito jiai iocire illa jira, dane iobidicue. Naimie comecina caimare omoi itataja jira, iobidicue. ¹⁴ Omoi dine Tito nia jaiñenia, naimienmo omoina lloticue. “Naimaci ona feiñoitimaci. Naimaciri iobidicue” naimienmo navui lloticue. Iese naimiena omoi feiñua jira, ieri meidañedicue. Omoimo uanaicinona jaca lloticue. Naimienmo cue llua isoi jiai suide. ¹⁵ Naimie llofuicacino omoi ñnoiacana jira, naimie omoina birui raise isiruite. Meiruoicaida, comeciari jarire illamona, naimiena feiñotomoi. ¹⁶ Omoina raise uiñoticue. Cristo ñnocana omoi jaillana raise ñnoticue. Omoiri iocire iticue.

8

Creyentiai Jusiñamuimo ucubena fecaja rafue

¹ Cue amatiai, omoimo jiaie rafuena lloiacadicue. Jusiñamui naimacina canuamona Macedoniamu ite creyentiaina omoi uiñuana jitaidicue. ² Eo duere sefuidimaci. Jiai eo dueredimaci; ia iocire illamona, jiaie creyentiamu ucubena caidiñeno fecacabidimaci. ³ Naimacimo ite ucube diese fecadimaci. Iena uiñoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue. ⁴ Naimacimo iese lloñedicue; ia iena naimaci eo fecaacana jira, jiaie creyentiaina canollena, cuemo iena eo jicanotimaci. Ucube diga jiaino creyentiaina naimaci canuana cue llua eo jitaidimaci. ⁵ Cue comecina facaja isoi, fecañedicue. Ucubena fecadimaci; ia: “Cai Nama dibeimo maijiacadica” jiai llotimaci. Nie isoide rafuena naimaci finuana cue ocuillena, Jusiñamui jitailla isoi, jitaidimaci. ⁶ Omoi dine Tito dane jaillana jitaidicue. Omoi dine naimie navui ia, ucube omoi uana naimie

canode. Iemona janore tainedomoi. Jiaie creyentiaina omoi canuana raise fuiduana jitaidicue. ⁷ Cristona inocana jaidomoi. Iena jiaonomo llocabitomoi. Cristo rafuena raise uinotomoi. Cristo jitaillacinona eo finocana jaidomoi. Cuenajia isiruitomoi. Ie muidona omoi ucube diga, jiaie creyentiaina omoi raise canuana jia jitaidicue. ⁸ Omoina iese riire lloñedicue. Macedoniamoi ite creyentiaina eo canuana omoi uinuamona, jiaie creyentiaina omoi canoia, Cristona omoi isiruillana uinoitica. ⁹ Cai Nama Jesucristomona cai fueua. Naimie cana duenaillana uinotomoi. Ie Moo ecimo naimie nano illamona, naga ra naimiemo ite; ia eniruemo ie billamona, cana canollena, imana jaillanona, duere ite. Iemona Jusiñamui rafuena cai cacaja jira, duere inedicai. ¹⁰ Ie jira omoimo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jai jitaidicue. ¹¹ Omoi jitaillamona bie rafuena fuido. Omoimo ite ucube diese feca. ¹² Ailluena ucubena omoimo inenia, dama iesede. Omoi jitailla jira, omoimo ite ucube diese omoi fecaia, Jusiñamuimona mare; ¹³ ia omoi jitailla rana omoi ollena, omoi ucube ineni raillano, omoi jitailla baifemo omoi fecajana lloñedicue. ¹⁴ Jiaie creyentiaimo ra birui raise inena jira, naimacina omoi canuana jitaidicue. Omoi ra ico inenia, naimaci dinena omoina canuana jitaidicue, nana omoimo daje isoi omoi ra illena. ¹⁵ Moisés micori illa facaise ite cominimona cai fueua. Naimacina jiaie iese cuela: “Jusiñamui oretaga guiga ramona ailluena guillena, nagarui damierie irauuidimaci. Jiaino janore guillena, irauuidimaci; ia coniniri fecajamona, imaci jitailla diese nagarui nana guitimaci”. Ie muidona omoimo ite ucubemona naimaci jitailla ra illena, jiaie creyentiaimo omoi fecajana jitaidicue.

Pablo Titona ñaite

¹⁶ Omoi dine Tito dane oretaiacadicue. Cueloi isoi naimie omoimo comecina facade. Omoina canoacade. Naimie comecina Jusiñamui iese itataja jira, Jusiñamui iobidicue. ¹⁷ Omoi dine jaillena naimiemo lloticuemo, naimie dinena: “Jee” raite. Naimiemo nia iese cue lloñenia, omoina naimie eo canoiajana jira, naimie omoi dine jaillemao ie comecina facade. Omoi dine raire jaite. ¹⁸ Naimie diga jiaimie oretaiticue. Naga nairaimo ite creyentiaidi: “Cristo rafuena eo raise llofuecabite” naimiena raitimaci. ¹⁹ Cuelo diga jaillena, naimiena fetodimaci. Dueredinomo omoi ucubena cue uillena, cue diga naimie jaite. Iemona cai Namana iobitaitica. Iemona nana creyentiaidi naimacina cue canuana uinoitimaci. ²⁰ Omoi ucubena raise cue sedajana jitaidicue. Iemona: “Pablo cai ucube fiide” omoi lluaana jitañedicue. “Iena Pablo raise fecañede” omoi lluaana jitañedicue. ²¹ Iena raise marena sedaa cadicue. Jusiñamui iena uinote. Nana creyentiaie iena uinuana jiaie jitaidicue. ²² Iaimaiaie diga jiaimiena jiaie oretaiticue. Naimie Cristona eo inocana jaillana raise uinoticue. Omoi rafuena naimie fidiano, jiaie creyentiaina omoi canuana naimie inuanona, omoi dine naimie eo jaiacade. ²³ Omoimo Titona bu jicanoia, naimacimo naimiena raise llono. Danomo Cristo dibeimo maijadicoco. Cuelo diga omoina canode. Jiaie iaimaiaina bu jicanoia: “Jiaie creyentiaie iaimaiaina fetuamona bitiaimaiaie” llono. Cristona iobitaiacadiaimaiaie. ²⁴ Cuenajia isiruillamona: “Omoi mare” omoina cue lluaamona, naimacina raise nafue. Nana cue jitailla rafuena omoi finuana naimaci uinuana jitaidicue. Omoi ucubena eenuana raise fuiduana jitaidicue. Iena omoi finuamona, abido naimaci bia, naimacina oretaga creyentiaimo iena lloitimaci.

9

Jiaie creyentiaina canollena, omoi ucube olle rafue

¹ Bie rafuena omoi jai uñua jira, iena dane lloñeiticue. ² Ucubena omoi jai feaacana uñoticue. “Benomo Macedoniamite creyentiamite omoi i iobidicue” llocabiticue. “Navuidi añomona feaacadomite” llocabiticue. “Acaya railla provinciamite creyentiaie feaacadimacite” llocabiticue. Iese omoi illamona, bene ite creyentiaie jiaino creyentiaina jiaie canoacadimacite. ³ Iese uñoticue; ia omoina cue canollena Titona oretaiticue, cue jitaillacino omoi raise fuidollena. Ucubena dajena uana raise jitaidicue. ⁴ Omoi dine Macedoniamite creyentiaie diga cue rillanona, omoi ucube dajena nia iñenia, iese omoina cue lluaconi meidaiticue. Omoide jiaie meidaitomite. ⁵ Ie muidona Tito idai jaillana jitaidicue. Ucube dajena uana omoi llua isoi, omoina canoite. Omoi ucube dajena uana lloiacañedicue; ia omoi comeciainomona jiaino creyentiaina canuana omoi jitailla jira, iena jitaidicue. ⁶ Jiaie rafuedo iena lloiticue. Janore iduaina bu ria, janore llisillana oite. Ailluena iduaina bu ria, ailluena llisillana oite. Cue llua jira, omoi ucube dajena oia, eo caimare iñeitomite; ia omoi comeciainomona omoi ucubena dajena oia, eo caimataitomite. ⁷ Ucube dajena omoi oia, nagamie ie comecina facajamona fecaja. Naimie jitañenia feañena. Naimie jitailla jira, naimie fecaja. Jiaimie omoina ñaie raillano, “Caie ucubena fecaiticaie” rañeno; ia o jitaillamona iena feca. Comeciainomona iocire illamona omoi fecaia, Jusiñamuina iobitadomite. Iena Jusiñamui jitaide. ⁸ Jusiñamui omoi jitailla baifemo omoimo fecarede. Nana omoi jitailla ra omoimo naimie illamona, jiaimite omoi fecaia, naimacina canorenitomite. ⁹ Jusiñamui facaina lloiraime micorite iena jaie cuela: “Jusiñamuina ñnotimie dueredinona canocabide. Mare rafuena finocana jaide”. Ie omoi finollemo, Jusiñamui omoina canoite. ¹⁰⁻¹¹ Ero, illimo maijiraime Jusiñamui iduaina itatate. Iena sicuamona, monaillamona, nainomite maijiraime ñaie naimona guicabite. Ie isoide. Omoimo Jusiñamui nana omoi jitailla rana jaca itataite. Iemona jiaie creyentiaina raise canorenitomite. Omoi ucubena caie uia, iena jiaie creyentiaie feiñoia, Jusiñamuimite iobillacinona eo fecaitimacite. ¹² Ucubena omoi oretaia, duerede creyentiaina canodomite. Omoi muidona naimacite Jusiñamuimite iobillacinona jiaie fecadimacite. ¹³ Iemona Cristona omoi raise iñuana uñoitimacite. Ierite Jusiñamuimite iobillacinona fecaitimacite. Omoi iga ucube facaina iobillacinona Jusiñamuimite fecaitimacite. Naimacina canoitomite. Iemona nana jiaie creyentiaina canoitomite. ¹⁴ Omoi facaina Jusiñamuimite jiaimite. Omoina naimacite isiruillamona, Jusiñamui omoina eo canuana naimacite uñuamona, omoi facaina jiaimite. ¹⁵ Jusiñamui caina eo canua jira, iobillacinona naimie mo caie fecallena, caie uai raise iñede. Uainicaidicaie. Naimie eo mare. Naimie caie iobillasa.

10

Caie Nama Pablona fetua jira, ie uai Pablomite

¹ Jiaie rafuena lloiacadice. Omoimona damierite llotimacite: “Caie dine Pablo ia, naimie ñaie jaca jira. Riire caimite naimie rafuena lloñede; ia caie dine naimie iñenia, riire caimite naimie rafuena llote” llotimacite. Ero, Cristo iciricabiñena isoi iacadice. Naimie isoi omoimo lloiacadice. ² Riire omoimo lloiacañedicue. Omoimona damierite cuena raitimacite: “Pablodite Cristona ñnotimie isoi icabite”. Naimacite iese nia lloia, omoi

dine cue ria, naimacimo jaciruiñoeno riire lloiticue. ³ Comena iticue; ia comini diga cue rafue iñede. ⁴ Taife dibeimo itino diga cue rafue illa jira, jamai cue uai diga naimacina llicaitaiticue; ia Jusiñamui uai diga naimacina llicaitaiticue. ⁵ Cristo uai diga Jusiñamui dibeimo iñedino llucinoconi uainicaitaticue. Abina iedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue inotallena. ⁶ Cristo anamo omoi raise ia, cue lloga uaina omoi raise inocana jaia, omoimona raise inoñedinona duere finoiticue. ⁷ Cominimo jamai eruailamona: “Naimaci mare” raitomoi. Jiaicaiño: “Naimaci marañedimaci” raitomoi; ia naimaci comeciaina uiñoñedomoi. Omoimona damie nibai comecina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie faiñede”. ⁸ Abina iedofedicue; ia cue abi iedoi, ieri meidaiñedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacaiñedicue. ⁹ Omoimo riire llollena cue uai ite; ia cue carta diga omoina jacinaitaiacaiñedicue. Omoina canoia-cadicue. ¹⁰ Omoimona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai riinide. Cristo rafue raise lluaana raise uiñoñede”. ¹¹ Iese iñedicue. Omoi motomo cue ia, cartana cue cueia, daje isoi llofuecabiticue. ¹² Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comecina facañedicue. ¹³ Jusiñamui cue maijiana cuemo llote. Naimie llua baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidicue. ¹⁴ Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue. ¹⁵ Jiaie llofueraini llofuiamona buena oiacañedicue. Cristo rafuena omoi inocana jaillamona, omoi motomo cue illamona, Jusiñamui jitailla diese omoina canoacadicue. ¹⁶ Jiaie nairaiiai illanuaiimo Cristo rafuena nia lloiacadicue; ia nainomo jaie llofueraima llofuiamona buena oiacañedicue. ¹⁷ Bu abina iedoiacania, cai Nama finua rafueri naimie abina iedua. ¹⁸ Ie llofuiia diga bu abina iedoi, Jusiñamui naimie llofuiacinona: “Mare” raiñeite; ia Jusiñamui finoca rafueri bu abina iedoi, Jusiñamui naimiena: “Mare” raite.

11

Pabloci Cristo oretaganona abi caitadinona llote

¹ Abina cue raise uiñoñenia, cue diga iciriñoeno. Cue llua nia cacarei. ² Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Hima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina feaacadicue. Omoimo jeacino iñena isoilla jira, omoina Cristomo feaacadicue. ³ Jiaie rafuemo omoi comeciaina facacana omoi jaillamo jacinaiticue. Jaie jaiona eruailamona, Taife Eva micorina jifuate. Jiai llofueraini Cristo rafuedo omoi raise jaiñenana itatajamo jacinaiticue. ⁴ Diga llofueraini feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feiñotomoi. Ie jira Cristo dibeimona omoi jaillemo jacinaiticue. ⁵ “Cristo oretaganodicaí”

raitimaci; ia naimaci cue baifemo faiamo cue comecina facañedicue. ⁶ Naimaci isoi rafuena jino llwana eo uiñoñedicue; ia Cristo rafuena eo raise uiñoticue. Nana cue finoca rafuemona omoína iena diga icaíño uiñotadicue. Uanaicinona omoína jaca llofuecabiticue. ⁷ Omoímo Jusiñamui rafuena navui cue lloia, omoína ibatañedicue. Omoimona ucubena jicañedicue. Cue ucube ollena, dama jiaie rana maijídícue. Iese cue illa jira, damieriemona marañede rafuena finodicue; ia cuemona eo mare rafuena jai uiñotomoi. Iemona abina jai uiñotomoi. ⁸ Omoína cue canollena, jiaie creyentiamona ucubena feiñoticue. Omoí facaina naimacimona feiñoticue. ⁹ Rana cue jitailla facaise omoimona ucubena jicañedicue; ia Macedoniamona bite creyentiai cuena canodimaci. Omoimona navui ucubena cue oñena jira, birui cue oñena jira, cuemona ibana oñeitomoi. ¹⁰ Cristo cue illana uiñuamona, naimie uanaicinodo cue jaillamona, nana Acaya railla provinciamo iena jaca lloitícue. ¹¹ Omoína cue isiruilla jira, ucubena omoína jicañeíticue. Jusiñamui cue comecina raise uiñote. ¹² Abina ieduamona omoí motomo damierie: “Pablo isoi llofueticai” raitimaci. Ucubena omoimona feiñotimaci. Naimaci isoi iacaiñedicue. “Daje isoi maijídicaí” naimaci raiñellena, ucubena omoímo jaca jicañeíticue. ¹³ Cristo oretaganona abi caitadinodimaci. Cristo díbeímo raise maijíñedimaci. “Cristo caina oretate” raicabitimaci; ia Cristo naimacina oretañede. Jífuecana jaidimaci. Cristo oretajanona itimacina jaidimaci. ¹⁴ Ieri rajicaiñedicue. Comínina jifuellena, Taífedí Jusiñamui jaienicina abi caitadimiena jaicabide. ¹⁵ Taífe díbeímo itinodí Jusiñamui ie mare rafuena llofuerainina jaicabidimaci. “Cai lloga rafuedo omoí jaia, Jusiñamuimona marebicaitomoi” llofuecabitimaci. Naimaci finolle rafue díese Jusiñamuimona duere sefuitimaci.

Cristo oretagamiena naimie illa jira, Pablo duere sefuide

¹⁶ “Pablo abina uiñoñedimie” raillamo omoí comeciaina facañeno; ia iese cuena omoí comeciaina facaia, cue llwamo nia cacarei. Omoí motomo ite llofueraini abina iedua isoi, iacaiñedicue; ia janore cuemo iticino diga abina iedoticue. ¹⁷ Abina ieduamona cue lloia, cai Nama Cristo isoi lloñeíticue. Naimie cuemo llua jira, iena lloñeíticue; ia abina uiñoñedimie isoi lloitícue. ¹⁸ Omoí díne damierie llofueraini naimaci illa diga abina iedua isoi lloitícue. ¹⁹ Abina uiñoñedimaci; ia: “Abina eo raise uiñoticaí” omoí llwamona, naimaci llofuaiacinona cacacabidomoi. ²⁰ Naimaci anamo omoína itataiacadimaci. Omoímo ucubena jicacabidimaci. Omoína ocuicabidimaci. Icirillamona, omoí uiecuaina bofedimaci. Iese omoína finocabidimaci; iadedi buena naimacimo finoñedomoi. Ibana oñedomoi. ²¹ Iese omoímo finoñedicue, omoína cue jaciruilla jira.

Cue illana omoímo ja lloitícue. Nibai abina raise uiñoñedicue; ia naie llofueraini isoi cue illa diga abina iedoíticue. ²² Omoí motomo ite damierie llofuerainina ja lloitícue. Judíuai uaido ñaitimaci. Iena jiai ñaiticue. Judíuai nairai imaci. Daje isoidícue. Judíuai nairai imiedicue. Abraham micorí uruiaiídímaci. Jiai naimie micorí uruedicue. ²³ “Cristo díbeímo maijídicaí” raitimaci. Abina uiñoñedimie isoi llotícue; ia naimaci baifemo Cristo díbeímo maijídícue. Naimaci baifemo duere sefuidicue. Diga icaíño cárcelmo iticue. Diga icaíño fajamona duere sefuidicue. Diga icaíño niadedi fodaicabiticue. ²⁴ Judíuai comini cinco digacaiño cuena fatimaci. Naga icaíño treinta y nueve digacaiño rao diga cuena jicuidimaci. ²⁵ Dacaiño amani radosi diga cuena

fatimaci. Nofici diga cuena dacaiño fairinotimaci. Dacaiño amani bote diga namo anabaiticue. Darui nairo monaillaimo botedo jamai furi baiticue. ²⁶ Eo jacirede illedo jaicabidicue. Firiruidino eo illa jira, jaciruoicaida jaicabidicue. Cue judiuai cominimona duere sefuicabidicue. Judiuañedinomona duere sefuicabidicue. Naimaci illanuaimo cue ia, diga icaiño duere sefuidicue. Naisodo cue macaria, duere sefuicabidicue. Monailaido cue jaia, duere sefuicabidicue. Cristo rafuena llorainina abi caitadinomona jiai duere sefuicabidicue. ²⁷ Cue ucube ollena, duere maijicabidicue. Diga icaiño raise inañedicue. Diga icaiño aime guiticue. Rollimemona duere sefuicabidicue. Iniroiminamona jiai duere sefuidicue. ²⁸ Diga jiaie rafuemona duere sefuicabidicue. Duenailamona naga creyentia illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue. ²⁹ Nie creyente Cristo rafuedo nia raise inoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue. ³⁰ Cue abina iedoiacania, jamai bue isoidimiedicue lloiacadicue. ³¹ Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue lluana uñote. ³² Cue illana nia lloiacadicue. Damascomo jaie creyentena cue jailla facaise cuena gaitatallena, Aretas raila illaima anamo ite gobernordí nairai llaiga nasena sedatate; ³³ iadedi llaigafo ecimo ite jofo a ite ventanamona cirigai isoide diga ana jaillanona, naiemona jillodicue.

12

Pablo nicairilla isoide rafuena cide

¹ Abina iedoiacañedicue; ia cue illana janore nia lloiticue. Iemona bue oñeiticue; ia cue illa abina ridoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. ²⁻³ Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uñoñedicue. Nibai dama cue joreña uite. Dama Jusiñamui iena uñote. Naimie mare illanomo iticue. ⁴ Nainomo cue ñainina rafuena cacadicue. ⁵ Ie diga abina iedoñeiticue. Cue jamai bue isoidimie diga abina iedoiticue. ⁶ Uanaicinona cue lluamona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uñotomoi. Ie baifemo cuena omoi comeciaina facajana jitañedicue. ⁷ Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefuicabidicue. ⁸ Cuemona iena naimie oni oretallena, cai Namamo dacaiño amani jidicue; ⁹ ia cuemo llote: “Ona jillotañeiticue; ia cue ona duenailacinodo jaca ocuiñoitio. O abi eo mairiñenia, ona cue canuana raise uñoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uñoiticue. ¹⁰ Cristo muidona duere cue sefuia, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoia, cue comecina ocuiñoiticue. Cue duere sefuia, cue Nama cuena eo canode.

Pablo Corintomo ite creyentiaimo comecina eo facade

11 Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena riidoñedomoi; ia jiaino eo mare railla llofuerainina raise feiñotomoi. Jamai bue isoidicue; ia naimaci cue baifemo faiñedimaci. 12 Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiñeno omoi motomo iticue. 13 Cuemona duere sefuiñedomoi. Jiaie creyentiai omoi baifemo faiamo cue comecina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiai isoifñedomoi. Iena omoi gaiñenia, iena feita. Cue diga iciriñeno.

14 Menacaiño navui omoi dine jaidicue. Omoi dine dane jaia-cadicue. Omoimo ucubena jicañeiticue. Omoi rana jitaiñedicue; ia Cristo dibeimo omoi illana, naimiena omoi raise inuana jitaidicue. Cue uruiái isoidomoi. Rana eenoñedomoi, omoi mootiai iena; ia omoi mootiai rana eenotimaci, omoiena. Ie isoide. Cue uruiái isoi omoi illamona, omoimona rana jitaiñedicue; ia omoimo rafuena iacadicue. 15 Nana cuemo ite ra omoimo fecaacadicue. Nana cue comecimo iticinona omoimo jiai iacadicue. Omoina eo isiruiticue; ia cuena janore isiruitomoi. 16 “Caimona ucubena jicañedio; ia jifuecana caimona otio” raicabitomoi. 17 Ero, omoi dine menamiēna cue oretajamona, omoimona ¿nie isoide rana otiaimaiaia? ¿Niese omoina jifuetiaimaiaia? 18 Omoi dine Titona oretaticue. Jiaisie creyente imiēna Tito diga oretaticue. ¿Niese Tito omoina jifue? Omoimo coco comecina daje isoi facadicoco. Daje rafuedo jaca jaidicoco. Omoina jaca jifueñedicoco. ¿Niese omoi comeciaina raitomoi? 19 “Caimona ie abina riidote” cuemo nibai comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo dibeimo omoi raise illena, naimiena raise omoi inollena, bie rafuena llocabiticue. 20 Omoi dine cue ria, cue jitailla isoi omoi iñenamo jacinaiticue. Iese omoi ia, omoi diga cue illana jiai nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi. Nibai nia omoi rana cadicabidomoi. Nibai nia jiaiona jeare ñaicabitomoi. Nibai nia jiaino joreña ñaicabitomoi. Nibai nia abina uradoidomoi. Nibai daje isoi comeciaina nia lloifñedomoi. Omoi iese illari cue comecidi jarire ite. 21 Omoi dine dane cue ria, omoi muidona Jusiñamui cuena meidaitajamo jacinaiticue. Cristo dibeimo omoi raise iñenia, sunaiticue. Jearede rafuena omoi nia fainonocaiñenia, omoi aiñede riño diga illana omoi fainonocaiñenia, omoi iniñede iima diga illana omoi fainonocaiñenia, sunaiticue.

13

Iraicaiño Pablo naimacina llofue

1 Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jiaie llote: “Mena iaimaiaia daje isoi lloillamona, daje amani daje isoi lloillamona, maraiñedicinona finodimiena duere finua”. 2 Maraiñede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciai iuai nia meidoñenia, naimacina duere finoiticue. 3 Iemona Cristo uai cuemo illana uiñoitomoi. Naimiēna omoi inuamona, naimie uai siñonana uiñotomoi. Jamai uaido naimie omoina jillotañede; ia ie siño uaido omoina jai jillotate. 4 Jamai bue isoidimie isoi cruzmo naimie fiodaite; ia fiodaillamona Jusiñamui uaido jillode. Cristomo

cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue. ⁵ Cristona ñnocana omoï raise jaillemo omoï comeciaina faca. Cristo jitaillacino omoï finollemo comeciaina faca. Cristomo omoï duillamona, Cristo omoï diga illana uiñotomoi. Cristomo omoï duiñenia, naimie omoï diga nia iñede. ⁶ Cristo omoï diga illana omoï uiñuamona, Cristo uai cuemo illana jiai uiñoitomoi. ⁷ Maraiñedicino omoï finocana jaillana jitañedicue. Jusiñamuimo iena jiiiticue. Omoï comeciai iuai omoï meidoñenia, Cristo uai diga omoïna duere finoacaiñedicue. Omoï comeciai iuai meiduana jitaïdicue; ia Cristo uai diga omoïna cue duere finoñenia, Cristo uai cuemo illana nibai uiñoñeitomoi. ⁸ Cristomona cue uai illana omoï uiñollena, maraiñedicino omoï finuana jitañedicue. Mare rafuena omoï finocana jaillana jitaïdicue. Iena finocana jiai jaiacaducue. ⁹ Cristo rafuena ñnocana omoï raise jaia, iobidicue. Omoïmo cue riire lloñenia, iobidicue. Cristo jitaillacino eo raise finocana omoï jaillena jicabidicue. ¹⁰ Birui bie rafuena cueticue. Omoï dine iñedicue; ia bie cartana omoï feiñua mei, omoï comeciaina raise finuana jitaïdicue. Cai Namamona cue uaina feiñoticue. Iedo omoïmo riire lloiacaiñedicue; iadedi iedo naimie dibeimo omoï raise itataiacadicue. ¹¹ Cue amatiai, bie carta cuiana jai fuidoacaducue. Marena omoï i. Omoï comeciaina raise fino. Cue lloga rafuemo raise cacarei. Nana omoï creyentiai comeciai daje isoi lloicana jai. Coniniri uri omoï i. Iemona Jusiñamui omoïna isiruillana uiñoitomoi. Jusiñamui omoïna uri itatajana uiñoitomoi. ¹² Nana creyentiaina eo camare uaido. ¹³ Nana cue diga ite creyentiai imaci uaina oredimaci. ¹⁴ Cai Nama Jesucristo omoïna jaca duenaite. Jusiñamui omoïna jaca isiruillamona, coninina omoï isirui. Naimie Joreño omoïmo illamona, coninina omoï nabai. Iese jitaïdicue. Mai. Macaibaite. Pablodicue.

GALACIAMO ITE CRISTONA HNOTHINOMO PABLO ORETAGA RABE

Uaiduacino

¹⁻² Galaciamo ite creyentiai, omoi dine bie carta oredicue. Pablodicue. ¿Nigacino? ¿Nie isoidomoi? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamiedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue lollena, cuena orediaimaiai. Comini cuena oreñedimaci. Cue lloga uaina cominimona jiai oñedicue. ³ Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatatiiaimaiai. Iena omoi uiñocana mai omoi jai. ⁴ Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite. ⁵ Cai Moona jaca cai iobillasa. Iena jitaidicue.

Pablo lloga rafuedi jaca dajede

⁶ Jusiñamuina raire omoi faionocaillari rajicaidicue. Cristo dibeimo omoi illena, omoina Cristo duenaillamona, Jusiñamui omoina jai uaidote; iadedi omoi jeacinomona omoi jilloillena, jiaie rafuedo jai jaidomoi. ⁷ Jiaie mare rafue jaca iñede; iadedi Cristo rafuena jiaiforiedo llofuia-mona dajerie omoi comeciaina uri itañedimaci. ⁸ Jesucristo rafuena omoimo jaie lloticai. Jiaie rafuena lloticaidena, Jusiñamui riicaillafue anamo nia cai illasa. Jusiñamui jaienici jiaie rafuena llotena, Jusiñamui riicaillafue anamo jai naimie illasa. ⁹ Omoimo jaie iese lloticue. Dane ja lloticue. Cai llua isoi Cristo rafuena omoimo bu lloñenia, Jusiñamui riicaillafue anamo naimie illasa. ¹⁰ Comini cueri iobillana jitañedicue; iadedi Jusiñamui cueri iobillana jitaidicue. Cominina iobitaiacadicuena, Cristo dibeimo nia maijiñedicue.

Ie oretagamiena jaillena, Cristo Pablona fetua rafue

¹¹ Cue amatiai, cue lloga rafuena omoi raise uiñuana jitaidicue. Omoi jeacinomona omoi jilluana jaie lloticue. Bie rafuena comini comeciai facajacinomona oñedicue. ¹² Cominimona oñedicue. Bu jaca cuena iena llofueñede; iadedi Jesucristo cuena uiñotade. ¹³ Jesucristona nia cue iñoñenia, cue judúuai einamací lloga rafuedo cue jaillana jai fididomoi. Cristona hnotinona jaie eo duere finodicue. Naimacina fuidoacadicue. ¹⁴ Cue einamací jaie llua isoi, Jusiñamuina raise hnoticue. Naimaci llogacinuaido eo duere cue jailla jira, daje facai cue diga itino baifemo hnoticue; ¹⁵ iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote. ¹⁶ Omoi judúuaiñedomoimo naie Jito rafuena cue lollena, cuemo ie Jitona jaie bairetate. Naie facaise cuemo jai suide rafuena bu diga ñañedicue; ¹⁷ ia Arabia railla eniruemo jaidicue. Nainomo comini iñena jira, cuemo jai suide rafuemo comecina facadicue. Jerusalémo Jesucristo nano oretagano dine jaiñedicue. Cuena Jesucristo nia oretañenia, naimacina orede, ie uai lollena. Arabia railla eniruemo cue illa mei, Damasco railla nairaimo abido jaidicue. ¹⁸ Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo

quince digarui iticue. ¹⁹ Naie facaiseconi nana Jesucristo oretaganona cioiñedicue. Pedrona ciodicue. Jacobona jiai ciodicue. Naimiedi cai Nama ie ama Jiaionna cioiñedicue. ²⁰ Omoimo nana cue ciegacínodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue. ²¹ Jerusalémo cue illa mei, Siria railla eniruemo jaidicue. Cilicia railla eniruemo jiai jaidicue. ²² Judeamo ite Cristona inotinodi cuena nia cioiñedimaci. ²³ Cuena iese fididimaci: “Navui caina duere finocabidimiedi Jesucristo rafuena jai llote. Jesucristona cai inuana navui jitaiñede. Caina fuidoacade”. Jiaie cue finoca rafuena fidiñedimaci. ²⁴ Ie fidiamona, cueri Jusiñamui iobillacinona jai fecadimaci.

2

Jerusalémo Pablo jailla rafue

¹ Catorce años illanona, Jerusalémo dane jaidicue. Bernabé cue diga jaide. Titona uiticue. ² Jusiñamui cuemo luua jira, nainomo ite creyentiaimo jaidicue. Judíuaiñedino Cristo rafuena jai inuana cue lollena, jaidicue. Cue llofuiana naimaci raise uiñollena, creyentiai illaicominimo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaia mei, cue llofuiana: “Mare” raitimaci. ³ Tito cue diga ite. Naimiedi judío nairai imieñede; iadedi naimaci abina detacabilla isoi, creyentiai illaicomini dinena naimie abi detatajana lloñedimaci. ⁴ Creyentiaina abi caitadino billa jira, Tito abina detatajana siadotica. Naimacina cai uaidoñeno bitimaci. Moisés micori llogacinuai anamo cai inenana naimaci uiñollena, bitimaci. Cristo Jesús cai inua jira, Moisés micori llogacinuaido jai jaiñedica. Moisés micori llogacinuai anamo caina dane itatallena, iena uiñoiacadimaci. ⁵ Cai mare rafuena jiaiena jaca meidoñellena, naimaci ñaiana dallu cacareñedica. Uanaicinsona omoi uiñuana jitaidica. ⁶ Naie creyentiai illaicomini omoimo lollena, cuemo jiaie rafuena lloñedimaci. Illaicominina raillanodimaci; iadedi cuemona jamai bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede. ⁷⁻⁹ Cue llofuiana rairuiñedimaci; iadedi creyentiai illaicomini cuena Bernabé diga marena feiñotimaci. “Daje isoi comeciaina facadica” raillamona, cue llofuiana: “Jai mare” raitimaci. Creyentiai illaicominidi Jacobo, Pedro, Juan digamie. Judíuai dine Pedrona Jusiñamui oretaja isoi, cue llua mona judíuaiñedino dine Jusiñamui cuena oretajana uiñotimaci. Pedro llua mona Jusiñamuidi ailluena judíuaiñedina creyentiaina itatate. Cue llua mona, Jusiñamuidi ailluena judíuaiñedina creyentiaina jiai itatate. Iemona Jusiñamui uai cuemo illana jai uiñotimaci. Judíuaiñedinomo Jesucristo rafuena llocana nia coco jaillana jitaidimaci; iadedi judíuaimo Jesucristo rafue llocana nia jaidimaci. ¹⁰ Daje rafue cocomo llotimaci. “Duerede creyentiaina canocabi” llotimaci. Iena iocire finoacadicue.

Antioquámo suide rafue

¹¹ Antioquámo cue jailla mei, Pedro nainomo jiai jaide. Nainomo Pedro bia, marañedifue naimie finua jira, naimie uiecomo naimiemo riire lloticue. ¹² Nainomo Pedro nano rilla mei, nana creyentiai diga nainomo naimie guisoide. Judíuai creyentiai diga, judíuaiñede creyentiai diga, danamo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede;

iadedi naimaci billa mei, naimacina naimie jaciruilla jira, judíuaiñede creyentiaí diga Pedro jai guiñede. Ie ñnoga rafuedo naimie jai jaiñede. ¹³ Naimie iese illamona, judíuai creyentiaídi judíuaiñede creyentiaí diga jai jai guiñedimaci. Pedro illa isoi, Bernabé iedo jai jaide. ¹⁴ Naimaci iese illa jira, Jesucristo rafuedo raise jaiñedimaci. Uanaicinodo jaiñedimaci. Iena cue uñua jira, nana comini uicomo Pedromo lloticue: “Judío nairai imiedio; iadedi o jeacinomona o jilloillena, cai einamací llucacínodo birui jaiñedio. Ie jira, ¿bue ñellena judíuaiñedino cai einamací llucacínodo jaillana jai jitaideo?”

Judíuai di creyentiaína jailla mei, Moisés micorí llogacínuaído jai jaiñedimaci

¹⁵ Nia lloticue: Judíuaiñedinodi Moisés micorí lloga uaina jaie uññoñedimaci. Caidi judíuaina jeicigacai. Ie muidona Moisés micorí llogacínuaí anamo jaie jeicigacai. ¹⁶ Iese iticai; iadedi Moisés micorí llogacínuaído jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona ñnuamona marebicaidicai. Iena uññoticai. Ie jira Cristo Jesúsna ñnoticai, cai marebicaillena. Cai marebicaillena, Moisés micorí llogacínuaína ññoñedícaí. Moisés micorí llogacínuaína ñnuamona, jaca buna marebificainide. ¹⁷ Jusiñamuimona cai marebicaiacallena, Cristona cai ñnuamona jeacino finorainiñedícaí. “Cuena ñnuamona, marebicaitomoi” Cristo iese llofueuide. Naimie llua isoi cai marebicaiñenia, cai jeacinomona nia cai jilloñenia, Cristo muidona; iadedi iese iñedícaí. ¹⁸ Moisés micorí llogacínuaí jai jamaññocaidicue. Ie jira naicínuaí dane abido cue oia, iena birui cue ññoñena jira, jai jeacino finoraimiedicue. ¹⁹ Iemona cue marebicaiñena jira, Moisés micorí llogacínuaí cuemo jai duiñede. Ie anamo jai iñedícaí. Ie muidona Jusiñamui llogacínuaído jai jaidicue. Cristo anamo jai iticue. ²⁰ Naimie díbeimo jai iticue. Cristo cuemo ite. Cristo cuena namatade. Jusiñamui Jitona cue ñnocana jai jaidicue. Cuena isiruillamona, naimie jitaillamona, cueri fodaite. ²¹ Jusiñamui caina duenaillana jamaiñedícaí. Jusiñamui jitailla isoi, Moisés micorí llogacínuaína cai ñnuamona marebicaidícaína, Cristo tainomo niade fodaite.

3

Jesucristona ñnuamona judíuai di Jusiñamui Joreñona feiñotimaci

¹ Gálatas imaci, abina jai uññoñedomoi. Jiaíno omoína birui jifueite. Omoímo Jesucristo cruzmo fodailla rafuena jaie marefodo lloticue. Iena raise cacadomoi. ² Ie jira omoímo buena jicanoiacadícaí: ¿Ñiese Jusiñamui Joreñona jaie feiñotomoi? Moisés micorí llogacínuaído jaillamona iena feiññoñedomoi. Jesucristo rafuena omoi cacajamona, ñnotomoi. Ie mei Jusiñamui Joreñona feiñotomoi. ¿Ñiese birui abina uññoñedomoi? ³ Omoi marebicaillena, Jusiñamui Joreño omoímo jai ite; iadedi Moisés micorí rafuena dane omoi jaiacanamona, omoi jaiie finolle rafuemona jai marebicaiacadomoi. ⁴ Jusiñamui Joreñomona diga marecínuaína feiñotomoi; iadedi iena jai jitaíñedomoi. Iese omoi illana ññoñedícaí. ⁵ Dane jicanoitícaí: ¿Ñiese Jusiñamuidi ie Joreño omoímo fecade? ¿Ñiese siño rafuena omoiri finode? Moisés micorí llogacínuaído omoi jaillamona ie Joreño omoímo fecañede. Moisés micorí llogacínodo omoi jaillamona, siño rafuena omoiri finoñede; iadedi Jesucristo rafue omoi

cacajamona, iena omoi ñnua jira, ie Joreñona fecade. Iemona siño rafuena omoiñi jiaí finode.

Abraham micorí Jusiñamuina ñnua muidona marebicaide

⁶ Abraham micorí ie rafuena lloiticue. Naimie micorimona fueoiticai. Moisés micorí naimiena cuete: “Abraham micorí Jusiñamuina ñnua jira, Jusiñamuimona naimiedi marebicaide”. ⁷ Iena cai cacajamona, Abraham micorí isoi cai ñnuamona, naimie ua cominina cai illana uiñoticaí. ⁸ Jusiñamuidi judíuainfedino ico marebicallena jaie uiñote. Naimiena ico naimaci ñnollena jaie jiaí uiñote. Iena uiñuamona, Jusiñamuidi ico suille rafuena Abraham micorimo jaie llote. Mare rafue naimiemo llote: “Nana cuena o isoi ñnotinona marebicaitaticue” llote. ⁹ Abraham micorí ñnote. Jusiñamui naimiena marebicaitate. Ie isoide. Nana Jusiñamuina ñnotinona marebicaitate; ¹⁰ iadedi nana Moisés micorí llogacinuaido jaidino jai faidobidimaci. Moisés micorí iena jaie cuela: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicai. ¹¹ Biena uiñoticaí. Moisés micorí llogacinuaido jaillamona, Jusiñamuimona jaca buna marebicaiñede. Jusiñamui facaina lloraima iena jaie cuete: “Jusiñamuina ñnuamona marebicaidimaci. Ie mei jaca iitimaci”. ¹² Moisés micorí llogacinuai daje isoíñede. Nana Moisés micorí llogacinuaina finuamona comini marebicaide. Moisés micorí iena jaie cuela: “Cue lloga uai finuamona, marebicaidimaci. Iemei jaca iitimaci”. Jusiñamuina ñnuana lloñede: ia ie lloga uai finollena cominimo llote. Nana ie lloga rafuena finuamona, cominidi marebicaidimaci.

¹³ Moisés micorí llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micorí iena jaie cuela: “Cruzmo cuinacaimie Jusiñamuimona jai faidobide”. ¹⁴ Jusiñamuina naimie ñnua jira, Abraham micorí jaie marebicaide. Jesucristo fiodailla muidona, naimiena judíuainfedino ñnuamona, Abraham micorí isoi marebicaidimaci. Jusiñamuidi ie Joreñona caimo fecallena jaie llote. Ie muidona Jesucristona ñnuamona, Jusiñamui Joreñona birui feiñoticaí.

Jusiñamui lloga rafue

¹⁵ Cue amatiai, bie rafuemo comeciaina faca. Nie isoide rafuena menamie finoacania, naie rafuena feitañellena, rabemo cuetiiaimaiai. Iaimaiai mamecina nainomo cuia mei, jiañruído damie naie rafuena jiaífo dama meidonide. ¹⁶ Ie isoide. Jusiñamuidi Abraham micorimo ico suille rafuena jaie llote. Iena naimie llua jira, iena meidonide. Ie uruiaiimo ico suille rafuena lloñede; ia daje uruemo ico suille rafuena llote. Cristona ññate. ¹⁷ Biena lloiacadicue. Naimie jilloillena, Jusiñamuina naimie ñnuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jiaie rafuena llote; iadedi Abraham micorimo jaie lloga rafuena meidoñede. ¹⁸ Jusiñamui llua jira, Abraham micorí jillode; iadedi Moisés micorí llogacinuaido cai jaillamona, cai jilloiadedi, Abraham micorí isoi jilloñedicai. ¹⁹ Iese itena, ¿bue ñellena Jusiñamui Moisés micorimo jiaie rafuena llote? Naiemona jeacinona cai uiñollena, iena llote. Naie rafue ite, Cristo eniruemo nia biñena. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena

oñedicaí. Jusiñamuidi ie jaienisaimo naie rafuena llote, Moisés micorimo iena lollena. Ie mei Moisés naie rafuena cominimo llote; ²⁰ iadedi Jusiñamuidi Abraham micorimo ie rafuena atona llote. Jiaimie mo iese lloñede, Abraham micorimo iena lollena.

²¹ Moisés micorimo Jusiñamui rafuena llote; ia naiemona Abraham micorimo llogacino nia saiñede. Cai jilloillena, cai jaca illena, Moisés micorimo Jusiñamuidi rafue finuana llotena, naie rafuena cai finuamona marebicaidicaí; ²² iadedi Moisés micori cuegafuiaídi nana comini jeacino anamo illana llote. Moisés micori llogacinuaido jaillamona, jeacino anamona jilloñedicaí. Jesucristona cai ñnuamona Jusiñamui llua isoi, jeacino anamona jillodicaí. ²³ Jesucristona ñnuana nia cai uiñoñenia, Moisés micori llogacinuai anamo iticaí. Jesucristo billamona, naimiena ñnuana uiñoticaí. ²⁴ Moisés micori llogacinuaidi cai lletarafue. Cristo ñibeimo cai illena caina lletade. Cristona cai uiñuamona, naimiena cai ñnuamona, marebicaidicaí. ²⁵ Naimiena ñnuana jai cai uiñuamona, naie lletarafuena jai oñedicaí.

Abraham micori ua uruiai

²⁶ Cristo Jesúsna ñnuamona, nana omoi Jusiñamui cominidomoi. ²⁷ Cristo ñibeimo omoi illamona, bautizagaomoi. Iemona naimie Moodi jiai omoi Moo. ²⁸ Jusiñamuimona dajena itomoi. Naimiedi nana cominina feiñote. Judíuaina omoi illamona, omoína feiñote. Judíuainñedinona omoi illamona, omoína feiñote. Mullaíaina omoi illamona, omoína feiñote. Mullaíainñedinodomoidena, omoína feiñote. Iñíuaina omoi illamona, omoína feiñote. Riñoniaína omoi illamona, omoína feiñote. Jesucristona omoi ñnuua jira, jaca damacidomoi. ²⁹ Cristomo omoi jai duiadedi, Abraham micori cominidomoi. Ie jira Jusiñamui Abraham micorimo lloga rafuemo jiai jainaiadomoi.

4

Jusiñamui uruiaiaina jaidicaí

¹ Moisés micori llogacinona dane lloiticue. Jiaie rafuedo iena lloiticue. Riaí uruiai moo fiodailla mei, ie moo raruiaidi nano doforamie mo fiebide. Naie nano doforamie uruenia, naimie mamecido naimie mo jide. Naimie mo nia raise jiiñede. Naimiedi nia jamai ite isoide. Naimie ie jofomo mullaíai isoi ite. ² Naimie moo llua ñnori jaino anamo naimie ite. Ie moo raruiai jaino anamo jiai ite. Naimie jai eimiena illemona naimie moo raruiaidi naimie mo raise jai duite. ³ Jiaie daje isoidicaí. Uruiai isoidicaí. Cai jaiagai llogacinuai anamo iticaí; ⁴⁻⁵ iadedi ie jitaillruimo Jusiñamuidi ie Jitona orede, naicinomona caina jilloitallena. Jusiñamui uruiaiaina cai jaillena, ie Jitodi naicino anamo riñomona jeiciga. ⁶ Naimie uruiaidicaina jira, Jusiñamuidi ie Jito Joreño cai comeciaino orede. Naimiena cai feiñuanona, naimiedi caina Jusiñamuina: “Cai Moo” raitatate. ⁷ Ie jirari jaino anamo jai iñedomoi; iadedi Jusiñamui uruiaidomoi. Jusiñamui uruiaidomoina jira, nana naimie lloga rafue omoimo jai duide.

Moisés micori llogacinuai anamo omoi jaiia, danomo abido jaidomoi

⁸ Jiaie Jusiñamuina nia omoi uiñoñenia, ua jusiñamuillañede ra anamo itomoi. Naie isoide rana sedavidomoi. ⁹ Jusiñamuina jai uiñotomoi. Naimie omoína jai uiñote. ¿Bue ñellena omoína marebicaitañede rafuedo dane jaiacadomoi? Omoína jilloitañede rafue anamo dane iacadomoi.

¹⁰ Judíuái comini rafuena finocabillarumo jiaí finocabidomoi. Iemona: “Marebicaiticaí” raillanona iese finocabidomoi. ¹¹ Cue lloga uai omoi finoñena jira, omoimo tainona jai lloticue. Nibai jai tainomo maijidicue.

Pablo naimaci diga illana uibiñote

¹² Cue amatiai, omoi dine nano cue jaia, Moisés micori llogacino anamo iñedomoi. Naie llogacino anamo jaie iticue; ia birui ie anamo iñedicue. Birui cue illa isoi omoi illana jiaí jitaidicue. Omoi dine cue nano ia, cuena raise feiñotomoi. ¹³ Cristo rafuena omoimo nano cue llua facaiseconi duidicue. Iena uñotomoi. ¹⁴ Cue duico omoimona jacire eruaide; iadedi cuena jearuiñedomoi. Jusiñamui jaienici omoi dine billa isoi, cuena feiñotomoi. Jesucristo omoi dine billa isoi, cuena jiaí feiñotomoi. ¹⁵ Jaie caimare iticai. ¿Niese birui cue diga caimare iñedomoi? Cuena omoi canoitena, cuemo fecallena, omoi uisi jaie jino juiconoiacadomoi. ¹⁶ Omoimo jicanoiacadicue: ¿Uanaicinuai omoimo cue llua jira, omoi enoillamiena jai jaidicue? ¹⁷ Moisés micori llogacinuai do jaidino omoina eo nabairitimaci; iadedi mare rafuena finoacaiñedimaci. Naimaci diga omoi nabairillena, cue diga omoi nabairillana jai jitaíñedimaci. ¹⁸ Mare comeciáimona cuena omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiaí mare. ¹⁹ Cue uruiai, Cristo omoi comeciáina raise namataja dinori, omoi rie cue comeci eo duere dane llicidaite. ²⁰ Omoi diga ja iacadicue, omoi diga atona raise ñaillena. Omoimona are cue illa jira, dane raise cai nabairillena, omoimo cue lluaana raise uñofñedicue.

Jesucristo rafue Moisés micori llogacinuai baifemo faite

²¹ Moisés micori llogacinuai anamo iacadino, omoimo daje rafuena jicanoiacadicue: ¿Moisés micori ciegafuiaina raise cacadomoi? ²² Moisés micori jaie cueda: “Abraham micorimo mena jito ite. Daje jito ie mullaíñomona comuide. Jiaie jito ie mullaiaíñediñaiñomona comuide. Naiñaiñodi ie nanoca ai. ²³ Abraham micori jitailla jira, ie mullaíño jitona comuitate; iadedi ie mullaiaíñediñaiñi jito comuide, Jusiñamui llua jira”. ²⁴⁻²⁵ Naie rafuemono cai fueolle. Ie iaíñuaidi mena jai lloga rafue isoidiaíñuái. Abraham micori mullaíño mameci Agar micori. Naiñaiñodi Sinaí railla anedumona lloga rafue isoide. Arabia railla eniruemo Sinaímona Jusiñamuidi Moisés micorimo rafuena llote. Naiñaiño mullaíñona jira, ie urue mullaímana jeiciga. Ie nama anamo jaca ite. Ie isoide. Moisés micorimo llogacinuai do jaidinodi naie rafue anamo itimaci. Jerusaléno itino Moisés micori llogacinuai anamo jai nia illa jira, Agar micori Jerusalén railla nairai isoide. ²⁶ Jiaíñaiñodi jiaie lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullaíñoñena jira. Nainomo jainaiaidicai, Moisés micori llogacinuai anamo jai cai iñena jira. ²⁷ Isaías micori iena jaie cuete: Oíniño, mai iobi.

Urue nia jocoñediñaiño, ado iobi.

Inirediñaiño baifemo eo uruiairenitio.

Iemona Moisés micori llogacino anamo iñedinomona Cristona inotinona ailluena jaillana uñoticaí.

²⁸ Cue amatiai, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruina jaidicai. ²⁹ Ero, mullaíño jitodi mullaiaíñediñaiño jitona

jaie duere finouide. Daje isoi Moisés micorí llogacínuaí anamo itínodi Jusiñamui Joreño anamo itínona birui duere finocabidímaci. ³⁰ ¿Níese cai nibaille? Moisés micorí Sara micorí lluana jaie cuete: “ ‘Mullaiño, nainaiño jito diga, oni dota. Ie moo fiodailla mei, mullaiño jito ie moo raruaiña feiñoite. Dama mullaiñaiñoñede jito ie moo raruaiña feiñoite’ llote”. ³¹ Ie jira mullaiño urue isoiñedícaí Moisés micorí llogacínuaí anamo jai cai iñena jira, mullaiñediñaiño urue isoidícaí.

5

¿Nie isoide rafuedo jaitomoi?

¹ Moisés micorí llogacínuaí anamona Cristodí caina jai jillotate. Ie jira omoi comeciaina ocuiño. Jaie omoi illa isoi, dane jaiñeno. Omoi marebicaiñede rafue anamo jaie itomoi. Ie jira Moisés micorí llogacínuaí anamo iñeno. Iemona marebicaiñeitomoi. ² Jeacínomona omoi jillobillena, Moisés micorí llogacínodo omoi jaiacanamona, omoi abiaína omoi detataia, Cristo rafuena jai jitaiñedomoi. ³ Dane lloiticue: Jeacínomona omoi jillobillena, naga abina detatagame nana Moisés micorí llogacínuaína inua. Nana iena inoñenia, naimie jilloñeite. ⁴ Moisés micorí llogacínuaína inuamona omoi marebicaiacania, Cristo rafuena jai duiñedomoi. Jusiñamui caina duenailamona, Cristona jaie cai dne orede. Moisés micorí llogacínodo omoi jaiacania, Cristo rafuena jai jitaiñedomoi. ⁵ Moisés llogacínuaína inuamona marebicaiñedícaí; iadedí Jesucristona cai inuamona, Jusiñamui Joreño caina canuamona, cai marebicaillemo iocire ocuiridícaí. ⁶ Abina detatajamona, cai jeacínomona jilloñedícaí. Abina cai detatañenamona, jiai jilloñedícaí. Dama Cristona cai inuamona jillobidícaí. Naimiena cai inua jira, nana cominina isiruicana jaidícaí. ⁷ Cristo rafuedo navui marena jaidomoi; ia damerie uanaicínona omoi inuana jai jitaiñedímaci. ⁸ Jusiñamuimona naimaci uaina oñedímaci. Jusiñamui omoína navui uaidote, naimie dibeimo omoi illena.

⁹ Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damie jiaie rafuedo jaiia, diga cominina jifuerede, naimie jailla dibeido jaillena. ¹⁰ Jiaie rafuedo omoi jaiñellemo cue comecina jai facadícue. Cai Nama cue inua jira, cue lloga uaido omoi jaillimo cue comecina jai facadícue. Omoi comeciaina naganomo itatimiena uiñoñedícue; iadedí Jusiñamui naimiena duere finoite.

¹¹ Cue amatiai: “Abina detataja” omoimo cue lloiadedí, cuena jai duere finoñedomoi, omoi jilloillena Jesucristo fiodailla rafuena jai cue lloñena jira. ¹² Omoi comeciái naganomo itatínodi raitímaci: “Janore jisa abina detatajamona, cai jeacínomona jillobidícaí”. Iese itena, Jusiñamuina uiñoñedino finua isoi, namiena naimaci abiaí diana jiai jitaídícue.

¹³ Moisés llogacínuaí anamona Jusiñamui omoína jai jillobitade; iadedí maraiñede rafuena omoi finollena jillobiñedomoi. Omoi jillobilla jira, naimacína omoi isiruilla jira, jiaie cominina cano. ¹⁴ Moisés micorí iena jaie llote: “O abi o isiruilla isoi, o ecimo itínona isirui”. Iena omoi finoia, nana Moisés micorí llogacínuaína jai finodomoi. ¹⁵ Iese omoi finoñenia, conima diga omoi riire iciria, jaca danomo iñeitomoi.

Jiaie cominina omoi isiruilla rafue

¹⁶ Omoimo nia lloiticue. Jusiñamui Joreño omoi comeciaino namatajano omoi i. Omoi comeciaino ite maraiñedícinodo omoi jaiñeno.

17 Cai comeciáimo ite maraiñedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; 18 iadedi Jusiñamui Joreño anamo omoï raise ia, naimie llwana omoï raise iñoia, Moisés micori llogacinona jai jitañedomoi. 19 Ero, maraiñede comeciáimo iticinodo omoï jaia, bie isoidicinona finocabidomoi: aiñede riño diga illacina, iniñede iima diga illacino, jeare ñaiacino, diga eo jearede rafuena finuacino, 20 jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino, 21 dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoïmo jaie lloticue. Dane lloticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite. 22 Jusiñamui Joreño omoï comeciáimo namataia, bie isoidicinona finocabidomoi: nana comini isiruillacino, comeci caimare illacino, uri illacino, raire iciriraininacino, duenaillacino, jiaie cominina canuacino, ie lloga uaina finuacino, 23 uai oñenacino, abina enuacino. Moisés micori llogacinuai bie isoidicinona ñaiñede. 24 Cristo Jesúmo jainaiñidinodi naimaci maraiñede comeciá jitaillacino anamo iñedimaci. 25 Jusiñamui Joreño caïmo illa jira, naimie cai comeciáina namatajacinodo cai jaillesa. 26 Iemona abina cai birinllesa. Abina jiaï cai iedoñellesa.

6

Jiaie llofuiacino

1 Cue amatiai, omoïmona damie ebena jamai jeacinona finoia, dane Jusiñamui dibeïmo naimie raise illena, naimiemo fecuise iciñeno llono. Omoï cominimona Jusiñamui Joreño comeciáimo raise namatadinodi iese naimiemo llofuellesa. Jeacino finoi raillano, nagamiiai abi rairuillesa. 2 Bu duere sefuiia, bu Taife ramo faia, coninina cano. Iese omoï canoia, Cristo llogacinuaina jai iñotomoi. 3 “Cuemo iese suiñeite. Dama abina sedadicue. Jamai bue isoïñedicue” comecina facadimie dama abina jifueite. Naimie jamai bue isoide. 4 Maraiñeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jiaimie mo ite maijia rafuedi naimiemo duiñede. 5 Naimie finoca rafuemonaga naimie jeacinona finoia, dama naimie muidona. 6 Naga Jesucristo rafuena fueotimiedi ie llofuegamiemo mare ra fecalle. 7 Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamuimona iba feiñoite. 8 Ie comeci mo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faiñeite. 9 Jusiñamui Joreño jitaillacinona finuana sefuiruiñeno. Cai comeciá cai ocuiñoia, Jusiñamui jitailla facaiseconi ibana feiñoiticai. 10 Ie jira nana cominina canocabi. Nana creyentiaina ua eo canocabi.

Facaduacino

11 Ero, jerie cuiano omoïmo bie facaimo cueticue. 12 Jiaie cominimona iobillacinona omoï abiaina detatajana jitaïdino feiñoiacana jira, omoï abiaina detatajana jitaïdimaci. Cristo rafue lloticainadedi: “Cristo rafuena uiñoñedinodi niade duere cana finodimaci” raillanomo comeciaina facajamona, iese jitaïdimaci. 13 Omoï abiaina detatajana

jitaidinodi Moisés micori llogacinodo raise jaiñedimaci. Nana iena iinoñedimaci. Omoiri abina iedoiacana jira, omoi abiaina detatajana jitaidimaci; ¹⁴ iadedi Jusiñamuidi jiaie rafueri abina cue ieduanana jitañede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaiañedicue. Naie rafue anamo jai iñedicue. ¹⁵ Abina diamona cai jeacinomona jilloñedicaí. Abina deñenanomona jaca jilloñedicaí; iadedi Jusiñamui Joreño caina comonori comuitajamona jillobidicaí. ¹⁶ Jusiñamuidi nana bie llucacino jaidino uri itatatesa. Naimie naimacina duenaillasa. Jusiñamui cominidi ua jaca iese illasa.

¹⁷ Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellaña jai oticue.

¹⁸ Cue amatiaí, cai Nama Jesucristo omoína duenaillasa. Mai. Pablocicue.

EFESOMO ITE CRISTONA HINOTINOMO PABLO ORETAGA RABE

Efesomo ite creyentiaimo Pablo cartana orede

¹ Efeso railla nairaimo ite creyentiai, Pablodice. Bie carta omoi dine oredice. Ie rafue llollena, Jusiñamui jitailla jira, Jesucristo ore-tagamedice. Naimiemo omoi jai jainaiaila jira, Jesucristona hinocana jai jaidomoi. ² Cai Moo Jusiñamui, cai Nama Jesucristo diga, omoina duenaicabillana uinocana mai omoi jai. Iaimai omoi comecina uri itatajacabillana uinocana mai omoi jai.

Cristomo jai cai jainaiaila jira, Jusiñamui marena itatajacinona feiñotica

³ Cristomo cai jainaiaila jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiaila jira, cai comecai marena itatajacinona Jusiñamuimona jai feiñotica. ⁴ Iena ja lloiticue. Enirue nia iñenia, Jusiñamui nana naimiena hinotinona jaie fetode. Cai facaina Cristo ico fiodaillena naimie uinuumona, caina jaie fetode. Naimiemono cai marebicaillena, jeacinona cai finoñellena, caina fetode. ⁵ Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fiodaillamona Jusiñamui uruiaina jaidica. ⁶ Naimie caina fetuamona, naimie caina duenaillana jai uinotica. Iemono naimiedi eo mareuidimiena jai jai uinotica. Ie isiruiga Jitomo cai jainaiailamona iena uinotica. Naimiemo buena cai finoñenia, caina duenaite. Naimiena cai iobitallena, caina fetode. ⁷⁻⁸ Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jai ofeite. ⁹ Naimiena cai raise hinollena, caina abina jai uinotade. Jusiñamui caina naimie nana caina birui jilloitaicanana jai uinotade. Cai cominidi iena jaie uinoñedimaci; iadedi Jusiñamui jitailla diese Cristo finoca rafuedo caina iena jai uinotade. ¹⁰ Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. "Cristo cai Nama" raitimaci.

¹¹ Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comecei jitailla jira, nana iena finode. Nano facaiseconi naimie cominina cai jaillana naimie uinuanona, caina jaie fetode. Ie muidona naimie cominina jai jaidica. ¹² Naimie caina fetuanona Cristona jaie hinotica. Naimie diga ico jaca cai illemo birui ocuridica. Naimiena cai iobitallena caina fetode. "Naimie fue eo mare" cai raillena caina fetode. ¹³ Cristona jai birui hinotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uinotomoi. ¹⁴ Jusiñamui Joreño caimo jaca illa jira, Jusiñamui diga ico cai jaca illena uinotica. Jusiñamuidi caina ie cominina jai jaitate, naimiena cai iobitallena. "Naimie fue eo mare" cai raillamona, naimiena iobitaitica. Naimiemo cai jainaiaila jira, naimiemono nana cai comecai marena itatajacinona feiñotica.

Naimaci facaina Pablo jide

15 Cai Nama Jesúna omoi ñnuana jai fididicue. Nana jiaie creyentiaina omoi isiruillana jiai fididicue. 16 Ie jirari Jusiñamuimo cue jiaia, omoina feitañedicue. Omoi facaina naimiemo iobillacinona jaca fecadicue. 17 Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jianona, omoi facaina jicanoticue. Naimie Joreño uaido naimie rafue raise uiñocana omoi jaillena jicanoticue. Naimiena raise uiñocana omoi jaillena jicanoticue. Iese omoi facaina jicanocabiticue. 18 Naimie dibeimo omoina naimie jai uaidua jira, naimie diga ico jaca omoi illemona, iena omoi raise uiñuana jitaidicue. Naimie cominina omoi jai jailla jira, naimie illanomo ico eo marena iocire iitomoi. Iena omoi raise uiñuana jitaidicue. 19 Naimie uai ua eo siñonana omoi uiñuana jitaidicue. Naimiena cai ñnua muidona, ie uaido naimie caina canorede. Iena omoi raise uiñuana jitaidicue. 20 Fiodaillamona Cristona ie uaido Jusiñamui jai jillotaja jira, naimie uai siñonana uiñotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate. 21 Ie jira Cristo nana Jusiñamui jaienisai afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaiaiaia isoide joreñuai afemo naimie ite. Birui iese ite. Ico iese nia iite. 22 Jusiñamuidi naga ra Cristo anamo ua jai itatate. Cristona nana creyentia imaci illaimana jiai ua jai itatate. 23 Cristomo daajena nana cai creyentiaidicaidi duidicai. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

2

Jusiñamui caina isiruilla jira, cai jeacinomona jai jillobidicai

1 Jusiñamuina jaiie omoi nia ñnoñenia, naimiemo omoi duiñena jira, naimiemonona fiodaitino isoidomoi. Jeacino anamo omoi illa jira, naimiemonona fiodaitino isoidomoi. Jeacino finocana jaidomoi. Marañedicinona finocana jaidomoi. 2 Jeacina eburitomoi Jusiñamui dibeimo iñedino rafuedo jaidomoi. Taife dibeido jai jaisoidomoi. Jusiñamuina oiacañedino Taife jitailla rafuedo jaisoidimaci. 3 Naimaci isoi jaiie nana iticai. Cai comeciaino ite jearede jitaillacinona finodicai. Iedo jai jaisoidicai. Ie jira Jusiñamui riicaillafue anamo jaiie iticai. Iese jaiie nana iticai. 4-5 Jeacina jaiie cai finua jira, jeacino anamo iticai. Jusiñamuina ñnoñedicai; iadedi Jusiñamui caina eo duenaillanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iitici. 6 Cristona jillotaja mei, Jusiñamui ie ecimo naimiena dane itatate. Cristomo cai jai jainaiaila jira, Jusiñamui nainomo caina jiai jainaiaitate. 7 Cristo finoca rafuemona caina iese jai itatate. Caina iese jai itatajamona, nana cominidi Jusiñamui caina eo duenaillana uiñoitimaci. 8 Naimie caina duenaillanona, caina jai jillotate. Jaca buena cai finuamona jillobiñedicai; iadedi naimie jitailla jira, naimie caina jai jillotate. 9 Cai jilloillena jaca buena cai finoñena jira, abina iedoñedicai. 10 Jesucristomo cai jainaiailamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaiie facajano, mare rafuena finocana cai jaillena, naimiedi cai comeciaina marena itatate.

Cristomo jai cai duilla jira, jiaie nairaia dig a birui uri iticai

¹¹ Omo jai e isoillana uifnotomoi. Iena comecitomoi. Jusiñamuina jai e uifnoñedomoi. Judíuaiñedinona omo jai e jeicifñena jira, cai judíuai comini isoi abiaina detatañedomoi. Ie jira cai cominimona maraiñedomoi. ¹² Omo jai e jecinomona Cristo omoina jilloitaiacanana naie facaiseconi uifnoñedomoi. Cai judíuai nairaimo jainaiañedomoi. Ie muidona Jusiñamui cai judíuai cominimo jai e lloga rafuena uifnoñedomoi. Jusiñamuina nabailana uifnoñedomoi. Jusiñamui dig a omo i co jaca illena uifnoñedomoi. Jusiñamuina omo uifnoñena jira, naimiena sedañedomoi. ¹³ Naimie dibeimo jai e jaiñedomoi; iadedi Jesucristomo birui duidomoi. Jusiñamui jai e ifnoñedomoi; iadedi Cristo jai fiodailla jira, naimiena birui ifnotomoi. Naimiena omo jai ifnuamona, cai dig a naimie dibeimo jai itomoi. ¹⁴ Naimie omo comeciai jai uri itatate. Cai comeciai jai jai uri itatate. Cai judíuaiimona omoina jai e jearuiticai. Iese jai e iticai; iadedi Cristo muidona dani cominina nana birui nabaidicai. ¹⁵ Cristo fiodaillamona Moises micori jai e llogacino anamo jai ifñedicai. Naie llogacino dani cai judíuaiimo duilla jira, Jusiñamui dibeimo jai e ifñedomoi; iadedi Cristo finoca rafue muidona, birui daajena jaidicai. Omoina jai e cai gaiñena jira, omoina jai e nabaiñedicai; iadedi Cristomo daajena cai duilla jira, birui nabairedicai. ¹⁶ Cruzmo Cristo fiodailla jira, Jusiñamui dibeimo cai illamona, mena nairaimona caina daje nairaia jai itatate. Ie jira daje nairaia uri iticai. ¹⁷ Cristo jai e billanona, mare rafuena llote. Omo judíuaiñedinomo, cai judíuaimo, comeciai uri illana llote. Nana caina jilloitaiacanana llote. ¹⁸ Naimie muidona Jusiñamuina jai nabairedicai. Jusiñamui Joreño caina canuamona, naimie dig a birui nabairedicai. ¹⁹ Jusiñamui cominina omo jai illa jira, nana naimiena ifnotino dig a Jusiñamuimo daajena duidomoi. Caimona birui jiaie cominiñedomoi. ²⁰⁻²² Jofo isoidicai. Jofona cai finoacania, naie ibiri nano finodicai. Ie mei dig a rana cai atiamona, iena niticai. Ie isoide. Dig a jai e isoide cominaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena ifnoticai. Iena cai ifnuamona, naimie jitailla isoi, mare rafuena finocana jaidicai. Cai dig a Cristomo omo jai duillamona, Jusiñamui Joreño nana cai comeciaimo jai ite.

3

Judíuaiñedinomo Pablo Cristo rafuena llofue

¹ Jesucristo rafuena omo judíuaiñedinomo cue llofueuilla jira, cárcelmo iticue. ² Omoina naimie duenailanona, omoina llofuellena, Jusiñamui cuena oretate. Iena jai uifnotomoi. ³ Jusiñamui cuemo jai e uifnoñega rafuena jai llote. Naie rafuena janore como jai cueticue. ⁴ Bie carta omo facaia, Cristona jai e uifnoñega rafuena cue jai uifnuana uifnoitomoi. ⁵ Jusiñamuidi cominimo iena jai e raise uifnotañede; iadedi ie Joreñodo Cristo facaina llorainina iena birui jai uifnotade. ⁶ Iena lloiticue. Judíuaiñedomoi; iadedi Jusiñamui cuemo jai e llote: “Judíuaiñedino Cristona ifnuanona, omo judíuai isoi jilloitimaci” llote. Omo facaina Cristodi fiodaite. Naimiena omo ifnoia, omoina ie uruiaia cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omo ifnuamona, naimie jai illa isoi, Jusiñamui dig a i co jaca ifnotomoi. Jusiñamui cuena iena jai e uifnotade.

7 Jusiñamui jitailla jira, cuena naimie duenaillanona, naimie uai cuemo illamona, naie mare rafuena llofuecabiticue. 8 Creyentena nia cue jaiña facaiseconi, creyentiaina jaie cue duere finouilla jira, jamaí bue isoidicue. Nana jaie creyentiái cue baifemo faitimaci; iadedi Jusiñamui cuena duenaillanona, ie rafuena cue llollena, cuena oretate. Cristo caina eo raise marena canocabillana llofuecabiticue. 9 Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitailla jira, naie jaie uiñoñega rafuena jaca buna jaie raise uiñotañede. Nana comini iena birui raise uiñollena, cuena oretate. 10 Judíuáiñedino judíuái diga creyentiaina jaillamona, Jusiñamui jaenisaí naimie uai siñonana uiñoitimaci. “Naimie fue eo mare” raitimaci. 11 Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitailla rafuedi suide. 12 Cristona cai inua jira, Jusiñamui diga jaciruiñoeno birui jai ñaíredicai. Naimie caina cacajana jiaí uiñoticaí. 13 Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoi comeciái sefuiruisiñoeno; iadedi Cristo rafue omoimo cue lluanona cue duere sefua, iobicana omoi jai.

Cristo caina eo isiruite

14 Cai Moo Jusiñamui caina eo canocabillanomo cue comecina fa-caia, naimiemo juidicue. 15 Naimiedi nana creyentiái imaci Moona jira, naimiemo juidicue. 16 Naimiemo cue jñanona, omoi facaina juidicue. Naimiemo eo ebirede siño iticino illamona, ie Joreño naimie omoi comeciaina raise ocuiñotallena jicanoticue. 17 Cristona omoi inuamona, naimie omoi comeciaina raise namatallena jicanoticue. Jusiñamuina omoi isiruicana jaillana juidicue. Jiaie cominina omoi isiruicana jaillana jiaí juidicue. 18-19 Cristo caina jaca eo isiruillana, nana jaie creyentiái diga jaca eo isiruillana, omoi eo raise uiñuana juidicue. Naimie caina eo isiruillacino cai comeciái facajacino baifemo uailla jira, naimie caina eo isiruisoillacinona jaca raise uiñoñedicai; iadedi iena janore cai uiñuamona, Jusiñamui omoi comeciaina namatallena juidicue. Iese omoi facaina jicabidicue.

20 Ie jira Jusiñamuimo iobillacino cai fecajasa. Ie uaido cai comeciái marena icana jaitate. Naimiemo cai jicajacino baifemo naimie fecarede. Cai comeciái facajacino baifemo naimie jiaí finorede. 21 Ie muidona naimiemo iobillacinona nana cai creyentiáidicaidi fecacabillasa. Jesucristo finoca rafue muidona iobillacinona jiaí cai fecacabillasa. Mai.

4

Jusiñamui Joreño jai caimo illa jira, cai comeci daje isoi lloide

1 Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaina omoi jai jailla jira, Cristo jitailla isoi omoi i. Jusiñamui omoína jai fetode naimie jitailla rafuena omoi finollena. 2 Ie muidona abina jaca iedoñoeno. Raíre iciríñoeno. Jiaimie ona duere finoiá, ibana oñoeno; iadedi uai oñoeno naimiENA jaca isirui. 3 Jusiñamui Joreño omoimo illamona, omoi comeciái daje isoi lloicana jai. Daje isoi omoi comeciái lloillamona, omoi jitaillamona daní uri omoi i. 4 Iena nia lloiticue. Cristona cai inuamona, daajena naimiemo jainaiáidicai. Jusiñamui Joreño nana caimo illamona, daní

omoi comeciai lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuridicai. ⁵Jaca dajede Nama sedacabidicai. Caina jilloitallena, da naimiena inotica. Dama naimie facaina bautizaganodicai. ⁶Cai Moo Jusiñamui jaca dajede. Jaca dajede Jusiñamuina nana cai creyentiaidicai sedadica. Naimie anamo nana iticai. Naimie jitaillacinona cai finollena, caina canocabide. Caina canollena, naimie Joreño caimo jaca ite.

⁷Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaina naimiemo inotacana jaillena, ie uai caimo fecade. ⁸Iena cai raise uifollena, David micori jaiie cuega-fuemona fueoitica. Naimie cuega: “Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade”. Cristona ñaite. Iemona Cristo cai maijiacino caimo illana uifotica. ⁹Biemo omoi comeciaina faca. Monamo abido naimie jailla jira, monamona enruemo Cristo nano billana uifotica. ¹⁰Enruemo bite; iadedi monamo abido jaide. Nana cominina birui sedade. Naimie baifemo jaca buna ifede. ¹¹Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina ore-tate. Damieriemo ie facaina ie rafuena jino llollena, ie uaina fecade. Ie rafuena nia inoñedinomo llollena, damieriemo ie uaina fecade. Creyentiaina ie rafuena llofuellena, damieriemo ie uaina fecade. ¹²Iese ie uaina fecade, naimie facaina raise cai maijillena, nana jiaie creyentiaina cai canollena, Ie mei Cristo rafuena daajena inocana jaitica. ¹³Iena cai inuamona, Jusiñamui Jitona raise uifocana jaitica. Cai comecidi daje isoi lloicana jaitica. Naimie jitaillacinodo raise jaitica. Naimie marena icana illa isoi jaitica. ¹⁴Cai uruia facaise cai comeciai naganomo ite. Naie facaise nie isoide rafuena cai cacajia, iena raire inotica. Cristo inocana cai jaillamona, uruia isoi cai iacaiñena. Damierie naga llofueraima uaido jaidimaci. Damierie llofueraimidi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena; ¹⁵iadedi jiaie cominina cai isiruillamona, uanaicinodo cai jailla. Cristo isoi icana cai jaillamona, abina uifotica. Cristodi cai illaimana jira, caina ocuide. ¹⁶Naga creyente naimiemo jainaiaide. Aillosiedicai; iadedi daajena naimiemo jainaiaidicai. Daajena naimiemo cai jainaiailamona, naimie jitaillacino cai finoia, naimiena inocana jaitica. Iemona dani cominina isiruicana jaitica. Daajena naimiemo cai jainaiaila jira, cai comeciai daje isoi lloicana cai jailla.

Cristomo jai cai duilla jira, naimie rafuedo birui jaidicai

¹⁷Omoi mo nia lloiticue. Cai Namamo cue duilla jira, biena lloiticue. Jusiñamuina inoñedino isoi dane omoi ifeno. Jaiie naimaci isoi itomoi. Naimaci comeciadi tainomo jai jaide isoide. Cacarefiacaiñedimaci. ¹⁸Jusiñamui rafuena uifoneñedimaci. Iena cacaiñedimaci. Abina naimaci uifoneña jira, Jusiñamui dibeimo illana jaca uifoneñedimaci. Uanaicinona uifoiacaiñedimaci. ¹⁹Jearede rafuena naimaci finoia, meiruiñedimaci. Naimaci comeciai oiacana rafuedo jai jaidimaci. Naga jearede isoide rafuena eo finocana jaidimaci; ²⁰iadedi Cristo rafuena omoi cacajamona, naimiena omoi raise uifuumona, naimaci isoi omoi illena fueotomoi. Cristo rafuena omoi cacajamona, jaiena illena jai fueotomoi. ²¹Naimiena cacajanona iena inotomoi. Naimiena cue llofuiamona, naimiena Cristo facaina lloraini llofuiamona, danomo omoi

roracom omoi ofia, Cristo uanaicinona cacadomoi. ²² Biena omoina llofuecabiticue. Cristona jaie nia omoi ñinoñena isoi, omoi jaiñeno. Omoi comeciaino jaie iticinodo jaiñeno. Naga jearede rafue omoi comeciaino oiacanamona faifcana jaie jaidomoi. Iedo birui jaiñeno; ²³ iadedi Cristo ðibeimo omoi jai illanona, naimiemo omoi comeciaino facajano, Jusiñamui omoina canuamona, omoi comeciaino iuaillaina meidocana jai. ²⁴ Cristo rafuena birui ñnotomoi. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide. ²⁵ Ie jira tainona lloñeno. Cristomo daajena jai jainaiaila jira, coninimo uanaicinona jaca omoi lloño. Jainona omoi jifueñeno. ²⁶ Maraiñedicinona bu finoia, naimiemo riire lloño; iadedi iese o lloia, naimiena jeare ñaiñeno. Jiaimie ona icia, naimiena jeare ñaiñeno. Naimie diga o rafue ia, naie rafue nairuido marena fino, ²⁷ Taiife ramo o fai raillano. Bu diga o nicino ia, iena raire marena o finoñena, ibana oiacanitia. Naie raire o feitañena jira, Taiife ona jeacinona finotaite. Iese suiñellena, naicino raire marena fino. Iena feita. Iena dane abido lloñoño. ²⁸ Naimiemo ra illena, fiamona omoimona navui bu ia, creyentena naimie jai jailla jira, naimie dane fiiñena; iadedi ra naimie jitaia, naimie maijiite. Ie maijiamona ie ra ollena, ucubena feiñoite. Ie mei dueredinona naimie jiai canoite. ²⁹ Jeare ñaiñeno; iadedi nie isoide rafue ia, marecinona ñaino. Ie mei naiemona jiaie cominina canoitomoi, Jusiñamui ðibeimo naimaci raise illena. ³⁰ Jusiñamuimo omoi jai jainaiaila jira, jeacinona finoñeno. Jeacino omoi finoia, Jusiñamui Joreñodi sunaite. Naimiena sunaitaño. Naimie caimo illamona, caina jillotajana uiñotica. Cristo dane abido billemona, naimie ðine cai jaca illena, caina jai jillotate. ³¹ Jiaie cominina icineno. Icirineno. Uaina uaitaño. Jiaie cominina jeare ñaiñeno. Naimacina duere jeare finoño; ³² iadedi coninina canua. Jiaie cominina duena. Jiaimie diga omoi nicino ia, naimie finoca rafuena faitajanona, naimie diga marena ñaino. Naie rafuena dane abido lloñoño. Cristo finoca rafue muidona, Jusiñamui omoi jeacinona jai feitaja isoi, jiaimie diga omoi rafue ia, naifuena omoi feita.

5

Jusiñamui cominina jai cai illamona, naimie jitaillacinona finoitica

¹ Jusiñamui isiruiga uruiadomoi. Naimie marecinona finua isoi, omoi fino. ² Cristo caina isiruilla isoi, coninina isiruicana omoi jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade. ³ Jusiñamui cominidomoi. Omoi aiñede riño diga iño. Omoi iniñede ñima diga iño. Rana nicidoño. Jearede rafue finuamo omoi comeciaina facañeno. ⁴ Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobillacinona fecacana omoi jai. ⁵ Ie aiñede riño diga icabitimiedi Jusiñamui illanomo ðuiñede. Cristo ie cominina sedajanomo ðuiñede. Ie iniñede ñima diga icabitiñaiñodi Cristo ie cominina sedajanomo jiai ðuiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo ðuiñede. Cue lloga rafuena jai raise cacadomoi. ⁶ “Creyente naie isoide rafuena finorede” bu lloia, naimie omoina jifueiacade. Naimie iese lluaña

ñnoñeno. Jusiñamui naie jeacinona finocana jaidinona duere finoite. ⁷ Ie jira naimaci jearede finoca rafuedo jaiñeno. Naimacina nabaiñeno. ⁸ Jusiñamuina jaie omoi uiñoña jira, jitiredinomo itomoi isoidomoi; iadedi cai Namamo omoi duillamona, uanaicinona ñnocana omoi jai. ⁹ Jusiñamuina omoi jai uiñoia, jeacinona omoi fainocai, Jusiñamui jitaillacinona finocana jaitomoi. Uanaicinona llocana jaitomoi. ¹⁰ Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai. ¹¹ Jitiredinomo nia itino finoca rafuedo omoi jaiñeno. Naimaci finoca rafuemona marecinodi jaca comuiñede. Naimacimo: “Maraiñede” llono. ¹² Iena cue meidailla jira, naimaci jearede bainino finoca rafuena ñaiacaiñedicue. ¹³ Marecinona omoi jaca finuamona, jiaie comini naimaci finoca rafue eo maraiñenana raise uiñotimaci. ¹⁴ Cai ofia, naiena rocabitcai:

Mai casi. Inñeno.

Jai fioidaitino isoidomoi;

iadedi omoi comeciaina Cristo jai lligaiñoite.

¹⁵ Ie jirari omoi marena illena, abina rairuicana omoi jai. Jusiñamuina ñnoñedino ebena jaicabidimaci. Naimaci isoi jaiñeno. ¹⁶ Diga maraiñede rafue birui comuicabilla jira, cominina Cristo dibeimo raise omoi itatajallena, nagarui Cristo jitaillacinona finocana omoi jai. ¹⁷ Ie jira ebe isoi jaiñeno; iadedi Cristo jitaillacinona uiñocana omoi jai. ¹⁸ Iocire omoi iacania, naiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jiai iit-omoi. ¹⁹ Danomo omoi ofia, nana omoi comeciainona diga isoide ruana iocire ro-rona. Omoi ruamona jiaie creyentiai comeciaina ocuiñota. Cai Namamo omoi ruamona, omoi fillamona, omoi taillamona, naiemona iobitaitomoi. ²⁰ Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca feca.

Cristomo jai cai duilla jira, cai comini diga marena iacadica

²¹ Cristo anamo omoi illa jira, jiaie creyente baifemo omoi faiacinomo omoi comeciaina facañeno; iadedi coninina nagamiiaina cano.

²²⁻²³ Inirediñaiñuai, omoimo rafuena lloiacadicue. Cai Nama Cristomo omoi jainaiñaiilla jira, naimie jitailla jira, omoi iniñiai anamo raise omoi i. Naimaci uaina raise ñno. Cristo nana creyentiai afemo illamona, naimacina naimie sedaja isoi, naga ini ie ai afemo illamona naiñaiñona sedaja. Cristodi nana creyentiai imaci jeacinomona jillotajamona, naimie anamo itimaci. ²⁴ Cristo anamo nana creyentiai illa isoi, naiñaiñuai iniñiai uaina jaca ñnuua. ²⁵ Airedino, omoimo jiai lloiticue. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaina omoi isirui. ²⁶ Nana creyentiai marena illena naimie fiodaite. Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai ñnuamona, cai jeacinomona jai jillobidicai. ²⁷ Fiodaite, nana cai creyentiai comeciain marena illena. Cai comeciain jeaninana jitaide. Cristo abido bille facaisemo, Jusiñamui jitailla isoi cai marenana jitaide. ²⁸ Naimie abi naimie isiruilla isoi, naga ini ie aina isiruilla. Iamaiai daajena jira, ie aina isiruitimedi ie abina jiai isiruite. ²⁹ Jaca bu ie abina enoiñede; iadedi ie abina sedade. ³⁰ Naimiemo nana

cai creyentiai duilla jira, Cristo caina isiruillamona, caina sedena. Ie isoi nagamie ie aina isiruilla. ³¹ Bie jaie lloga uaimona iena uifnoticai. Moisés micorí Jusiñamui llwana jaie cueda: “Ie aina ollena, ima ie moon, ie ei diga fañonocai. Iemei dajena iitiamai”. ³² Naie llofuiacinomona jia rafuena fueotica. Cristona ñaiticue. Creyentiaina ñaiticue. Naimiemo cai duillamona, daajena iticai. ³³ Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitañeno ñnua.

6

¹ Uruiai, omoimo rafuena lloiacadicue. Cai Nama jitailla jira, omoi eiñiai uaina ñno. Omoi mootiai uaina jiai ñno. Jusiñamuimona marena jira, iaimaiiai uaina ñno. ²⁻³ Moisés micorí Jusiñamui lloga uaina jaie cueda: “O moo uai ñno. O ei uai ñno. Marena o illena, raire o fodañellena, iaimaiaina o isiruillamona, iaimaiiai uaina ñno” cueda. Jusiñamui diga lletarafuena llote; iadedi bie nanoca rafuena llote. ⁴ Mootiai, omoimo lloiticue. Omoi uruiaina jamai icifño; iadedi naimacina cai Namana naimaci uifollena llofue. Naimaci ñnoiacañenia, abina naimaci uifollena, naimacina isiruillamona, naimacina duere fino.

⁵ Patrón anamo itino, omoimo lloiticue. Omoi patrones ocuica uaina ñno. Omoi maijana naimaci ocuica, naimacina iobitallena, jaciruoicaida raise maiji. Omoi comeciainomona naimaci jitailla rana maiji. Cristo iedena, naimaci ocuica uaina ñno. ⁶ Omoimo naimaci eruaiia, naimacina iobitallena, marena maiji; iadedi omoimo naimaci eruaiñenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusiñamui jitailla jira, omoi comeciai maiji raillamona, marena omoi maiji. ⁷ Patrón facaina maijiacinomo dani comecina facañeno; iadedi iocire maiji, cai Nama facaina omoi maijedomoidena. ⁸ Biena uifnoticai: Marena bu maijia, cai Nama Cristomona ibana ico feñote. Patrón anamo itino iena feñoitimaci. Patrón anamo ifedino iena jiai feñoitimaci. ⁹ Patrones, omoimo lloiticue. Omoi Nama Cristo monamona omoimo eruaiilla jira, Cristo monamona naimacimo jiai eruaiilla jira, omoi anamo itinona marena fino. Naimacina riire ocuifño. Naimacina jeare finoñeno. Cristo nana naimie cominimo daje isoi comecina lloide. Ie jira omoi anamo itinona marena fino.

Cristomo jai cai duilla jira, naimie cai comeciaina ocuifnotaitaie

¹⁰ Ie muidona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuifnotacana omoi jai. ¹¹⁻¹² Ero, Taife caina ramo jifueoicaida faite. Caina anafetitaiacade. Naimie isoidino caina jiai anafetitaiacadimaci. Naimacidi aillosie. Naimaci anamo nana Jusiñamuina ñnoñedino jai itimaci. Jitiredinomo naimaci illanona, Jusiñamui dibeimo ifedimaci. Beno eniruemo itimaci. Jusiñamui illanomo duiñedimaci. Cominina ñañedicue. Taifena, Janabana, Dofina, jananiaina, Dusisifona ñaiticue. Naimaci isoide joreñuaina ñaiticue. Cai dibeimo ifedimaci. Naimacimona abina omoi rairui. ¹³ Jobaime illa facaiseconi, soldaduai imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Ifogi icona jitadimaci. Lloebina llinotimaci. Ie isoide. ¹⁴ Cristomo omoi comeciai facajanona, uanaicinona jaca llono. Jusiñamui jitailla isoi,

marecinona finocana omoï jai. ¹⁵ Cristo rafuemona omoï comeciai uri itatajama, iena meiruiñeno llocana uiño. ¹⁶ Taifemona nana jearede rafuedi comuide. Naimiedi ramo faiacana jai jaide. Cristona omoï ñnuamona, Taife ramo faiacinona jamai. ¹⁷ Jusiñamui caina jai jilloitajana jai uiñotomoi. Iena omoï uiñuamona, Taife ramo faiacinona ñnoñeno. Taifena anafenollena, Jusiñamui Joreño Jusiñamui uaimona fueo. ¹⁸ Jusiñamui Joreño omoïna canuamona, Jusiñamui diga ñaicabi. Taife ramo omoïmo faia, iena omoï ñnoñellena, Jusiñamui omoïna canoite. Iese abina omoï rairuia, Taifena anafetitatomoi. Taife ramo faiacino naimaci ñnoñellena, nana jiaie creyentiai facaina jiai jicabi. ¹⁹ Cue facaina jiai omoï jii. Marefodo nana Cristo ie rafuena cue lluaana omoï jii. Cristo nana cominina jilloitaiacanana nia lloiacadicue. ²⁰ Naie rafue cue llollena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluaana mai omoï jii.

²¹⁻²² Tíquico omoï dine oretaiticue. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoïmo cue illana lloite. Cue finoca rafuena lloite. Naimiemona cue rafuena fidiitomoi. Iena cacajama omoï comeciai ocuiñoitomoi. ²³ Cai Moo Jusiñamui, cai Nama Jesucristo diga, omoïna uri itatajama, Cristona jai omoï ñnuamona, coniniri uri icana jaillana jitaidicue. Iaimaiaia omoïna isiruillama, iaimaiaia omoï ñnuamona, nana jiaie creyentiaia isiruicana omoï jai. ²⁴ Cai Nama Jesucristona omoï eo isiruilla jira, Jusiñamuidi omoïna duenailasa. Mai. Pablodicue.

FILIPOMO ITE CRISTONA HNOTINOMO PABLO ORETAGA RABE

Uaiduacino

¹⁻² Filipomo ite creyentiai, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeimo maijicabidicoco. Omoimo coco uaina oredicoco. Omoi creyentiai illaicominimo coco uaina ua oredicoco. ¿Nigacino? ¿Nie isoidomoi? Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaiaí omoína uri jai itatate. Iena omoi uiñocana mai omoi jai.

Jusiñamuimo iobillacino fecade

³ Naga icaiño omoína cue comecia, Cristo rafuedo omoi jailla jira, Jusiñamuimo iobillacinona fecadicue. ⁴ Naga icaiño Jusiñamui diga cue ñaia, omoi facaina caimare jidicue, ⁵ Jesucristo rafuena cue lluaña cuena omoi canua jira. Nano bie rafuena omoi cacajamona, cuena canodomoí. Cuena nia canodomoí. ⁶ Jusiñamuidi omoi comeciaina jaiie marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiruiimo Jusiñamui bie rafuena fuidoite. Iese fuidollemo ocuiridicue. ⁷ Omoimo iese cue comecina cue facajia, omoína cue isiruilla jira, cuemona mare. Cárcelmo cue illamona, Jesucristo rafuena cue riduano, Jesucristo rafuedi uanaicino cue lluaño, Jusiñamui cuena canocabide. Iemona naimie cana duenaillana jai uiñoticaí. ⁸ Cuena omoína Cristo Jesús isiruitajamona, nana omoína isiruiticue. Jusiñamuidi uanaicinona cue lluaña uiñote. ⁹ Jiaie cominina eo isi-isiruicana omoi jaillena, Jusiñamuina raise omoi uiñollena, nie isoide rafue omoimo ia, abina raise omoi uiñollena, Jusiñamuimo jicabidicue. ¹⁰ Iese omoína jitaídicue. Mare rafuedo omoi jaiacanana jitaídicue. Jaiiruido Cristo abido biite. Ie jira omoi comeciaí jeanillena jitaídicue, Jusiñamui jitailla isoi omoi comeciaí marena illena. ¹¹ Jusiñamui jitailla isoi omoi illamona, mare rafuena jaca omoi finuana jitaídicue. Jesucristona omoi inuamona, naimie omoína iena finotarede. Iese omoi finocana omoi jaia, Jusiñamuina eo iobitaitomoi.

Cárcelmo Pablo illamona, diga comini Jesucristo rafuena cacadimaci

¹² Cue amatiai, bie rafuena omoi uiñuana jitaídicue. Cárcelmo cue illamona, diga comini Jesucristo rafuena cacadimaci. ¹³ Cai illaíma jofomo itino cacadimaci. Nana bene itino jiaí cacadimaci. Jesucristo rafuena cue llua jira, cárcelmo iticue. Iena jai uiñotimaci. ¹⁴ Cárcelmo iticue; ia jaciruiñeno Cristo rafuena nia lloticue. Iemona diga creyentiai naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

¹⁵ Cuena uradoillamona, cue afemo iacanamona, damierie Cristo rafuena llofuetimaci. Jiaie llofueraini marecinona finuacanamona llofuetimaci. ¹⁶ Cuena naimaci isiruilla jira, llofuetimaci. Cristo rafuena cue riduamona, cárcelmo cue illana uiñotimaci. ¹⁷ Cue afemo iacadino mare comeciaino llofueñedimaci. Iemona cuena duere finoacadimaci. ¹⁸ Iese itimaci; iadedi uradoillamona naimaci llofuia, marecinona finuacanamona naimaci llofuia, cuemona damamei iesede.

Cristo rafuena llocana jaidimaci. Iena jai iobidicue. Nia iobiticue. ¹⁹ Cueri Jusiñamui omoi jiano, Jesucristo Joreño cuena canuano, nana cuemo ite rafuemo jilloiticue. Iena cue uiñuamona, nia iobiticue. Jesucristo Joreño ie Moo diga daje. ²⁰ Cue finolle rafuemo cue meiruiñellena eo jitaidicue. Jai cue finocabilla isoi, Cristona marefodo birui iobitaiacadice. Cue nia fioidañenia, naimi ena iobitaiacadice. Cue fioidallemona naimi ena jai iobitaiacadice. Iemona jai creyentiaidi Jusiñamui iobillacinona fecaitimaci. ²¹ Nia cue fioidañenia, Cristo rafuena nia lloiticue. Mare; iadedi cue fioidaia, naimie dine cue illena jai eo mare. ²² Nia cue fioidañenia, diga cominimo Cristo rafuena nia lloiticue. Ie jira nie isoide cue illana cue comeci niese rainide. ²³ Nia raise uiñoñedicue. Jiaicaiño fioidaicaiñedicue. Jiaicaiño fioidiacadicue. Cue comeci Cristo dine jaiacade. Nainomo cue illena cuemona eo mare; ²⁴ iadedi omoina cue canollena, nia fioidaicaiñedicue. Cue nia fioidañenia, omoina nia canoacadice. ²⁵ Cue comecina jai facajano, raite: “Nia fioidañenicue. Omoi diga nia cue illana uiñoticue”. Cristona omoi innotacana omoi jaillana jitaidicue. Omoi innuamona, caimare omoi illana jai jitaidicue. ²⁶ Iemei omoi dine dane cue illa jira, cueri Cristomo iobillacinona eo fecaitomoi.

²⁷ Cue fioidaia, cue fioidañenia, Cristo ie mare rafuedo omoi jai. Omoina cue cioia, omoina cue cioñenia, mare rafuena omoi finuana fidiacadice. Cristo rafuena innotacana omoi jaillana, omoi comeciaia daje isoi lloillana, Cristo rafuena omoi riiduana fidiacadice. ²⁸ Omoi dibeimo iñedinona omoi jaciruiñenana fidiacadice. Iese omoi ia, Jusiñamuidi omoi dibeimo iñedino faifillana uiñotaite; iadedi naimiedi omoina omoi jilluana uiñotaite. Naimie diga omoi jaca illena, omoina jai jillotate. ²⁹ Jusiñamui Cristona omoi inollena omoina fetode; iadedi Cristori omoi duere sefuillena omoina jai fetode. ³⁰ Omoi nairaimo cue nano illa facaise Cristona innotacana duere sefuidicue. Iena ciidomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jai duere sefuidomoi.

2

Jiaie creyentiaia diga raise omoi illacino

¹ Jiaie creyentiaia diga omoi marena illena, dajerie rafuena lloiacadicue. Cristomo omoi duilla jira, coninina omoi comeciaia ocuiñotajamona, Cristo omoina isiruillana omoi uiñuamona, Jusiñamui Joreño nana omoina nabaitajamona, coninina omoi comeciaia eo duenaillacino illamona, ² cue comecina caimare itata. Omoi comeciaia daje isoi lloillamona, coninina omoi isiruillamona, daje uaido omoi comeciaia lloillamona, cue comecina caimare itata. ³ Jaca buena fiñoño, jaimie afemo jamai omoi illena. Abina ieduamona buena fiñoño. Abina iedoño jaimacimo comeciaina faca: “Naimaci cue baifemo faite”. ⁴ Omoi abimo ite rafuemo omoi comeciaina faca; iadedi jaimaci abimo ite rafuemo comeciaina jai faca. ⁵ Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. ⁶ Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede; ⁷ iadedi iena faionocaida, ie Moo ocuica rafuena finollena, imana naimie jaide. ⁸ Jamai bue isoidimienja jaide; iadedi ie Moo uaina

ñnote. Ie Moo jitailla jira, fiodaite. Maraiñede rafue finodimie isoi, cruzmo fiodaite. ⁹ Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitade. ¹⁰ Jesúna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisaí naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiaí fecaitimaci. ¹¹ Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

Maraiñedino comeciaina lligaiñotomoi

¹² Cue isiruiga amatiaidomoi. Ie Moona Jesucristo ñnua jira, cue llua nia ñnocana omoi jai. Jiaie omoi diga cue ia, Cristo rafuena raise ñnotomoi. Birui omoi diga iñedicue; iadedi Jusiñamuina omoi ñnua jira, naimie jitailla rafuena jaciruoicaida, finocana omoi jai. ¹³ Ie jitailla rafuena omoi finollena, Jusiñamui omoi comeciaina birui marena itatate. Naimie omoína iena finotaiacade. Naimie mare jitaillacinomona, omoína iena finotaite. ¹⁴ Nana omoi finolle rafuemo abi jafueoicaíño fino. Uai uaitaíño fino, ¹⁵ jiaie comini omoiñi ñai raillanona, Jusiñamui uruiaína omoi illa jira, omoi comeciái jeanide-mona marena omoi i. Maraiñede comini motomo itomoi. Naimaci comeciái jearede. Naimaci comeciaina lligaiñotomoi, naimacimo ite jacinona uíñotallena. ¹⁶ Jesucristo rafuena llocana uitomoi. Iena naimaci ñnuamona, bie rafue Jusiñamui dine cominina jaca itatate. Cristo dane billirui omoiñi cue iobiacana jira, omoi dine: “Tainona jiaie lloticue” cue raillano, Jesucristo rafuena llocana nia omoi jai. ¹⁷ Jusiñamuina omoi ñnua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiaí jitaia, iobiticue. Omoi diga jiaí caimataiticue. ¹⁸ Ie muidona caimare itomoi. Cue diga caimataitomoi.

Pablo Timoteona orede

¹⁹ Cai Nama Jesús jitaia, omoi dine Timoteona raire oretaiacadie. Cue dine abido naimie bia, omoi rafuena cue fidiano jiaí iobiticue. ²⁰ Cue dine jiaíno naimie isoi iñede. Dama naimie omoi ite rafuemo comeciaina facade. ²¹ Jiaíno daní naimacimo ite rafuemo comeciaina facadimaci. Jesucristo rafuemo comeciaina facañedimaci. ²² Timoteodi mareuidimiena uíñotomoi. Cue jito isoide diga, Cristo rafuena lloticoco. ²³ Cárcelmo cue illa rafuedi nia fuiñede. Iena cue uíñollemona, naimie omoi dine raire oretaiacadie. ²⁴ Cárcelmona cue jino jaillena cai Nama jitaia, omoi dine jiaí raire jaiacadie.

Pablo Epafroditona abido orede

²⁵ Epafroditodi cue ama isoide. Danomo Cristo rafuena lloticoco. Danomo Cristo rafuena riidoticoco. Naimiena oredomoi, cuena canollena. Naimiena omoi dine abido oretaiacadie, ²⁶ omoi dine naimie illemo naimie comeciaina facaja jira. Naimie navui duillana omoi fidia jira, naimie uri iñede. ²⁷ Navui niadedi fiodaicanamona jillode, Jusiñamui naimiena duenaila jira. Naimie fiodaillamona, eo cue duere sefuiñellena, Jusiñamui cuena jiaí duenaite. ²⁸ Ie jira Epafroditona eo raire oretaiacadie, naimiena omoi cüanona omoi iobillena. Iemei jiaí uri iticue. ²⁹ Cai Nama mamecido naimiena eo caimare feiño. Jiaie naimie isoidinona omoi dine ia, naimacina iobita. ³⁰ Cristo facaina navui naimie llofuamona, omoi facaina cuena canollena, niadedi fiodaite. Omoi

facaina naimie cuena canuano, cue dine omoi iñena jira, cue muidona niadedi naimie abina faifitate.

3

Moisés micori llogacinuaido jaidinomona abina rairui

¹ Cue amatiai, omoi mo nia lloticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite. ² Jearede rafue finode cominimona abina rairui. Jiconiai isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeciai nia raise finoñedimaci. ³ Cai abiaina detatajamona, cai comeciai raise finobiñede. Cai comeciai raise finuamona, Jusiñamui Joreñodi caina Jusiñamuina raise sedatate. Cristo Jesúri iobidicai. Cai jillobillena, cai abiaina detatañedica. ⁴ Buena cai finuamona cai illamona jillobidicaidena, cue jilluana raise uiñoticue. Cue cominimona jamai bue isoñedicue. ⁵ Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judúai imacina jira, cue uruenamona judúai uaido ñaiticue. Fariseo cue imiena jira, Moisés micori llogacinuaido fainonocaiñeno iedo eo jaidicue. ⁶ Iena eo cue jitailla jira, Cristona ñnotinona duere finodicue. Nana Moisés micori llogacinuaido eo raise jaidicue. Iena raise finodicue. ⁷ Iese jaie iticue. Cue comeci iena: “Mare” raite; iadedi Cristona jai cue ñnua jira, birui nana bie rafuedi cuemona ieñedicinuai. Naie isoide rafue cuemo illamona, cue jeacinomona jilloñedicue. ⁸ Dane lloticue: Cue Nama Cristo Jesúna cue uiñoiacana jira, jaie rafue cuemona ieñedicino. Naimiena cue uiñuacinodi nana jaie rafue baifemo faite. Jeacuai isoi jai marañena jira, naimie muidona cue jaie illacinona jai sofecaidicue. Iena sofeticue, Cristo díbeimo raise cue illena, ⁹ naimiemo raise cue duillena. Moisés micori llogacinuaido cue jillamona marebicaiñedicue; iadedi Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate. ¹⁰ Cristona raise uiñoiacadicue. Naimie fiodaite; ia iemona jillode. Naiemona cue comeci marena illena, naimiena jillotate uaina uiñoiacadicue. Naimie rafuena cue lluaamona, naimie isoi duere sefuiticue. Iemona nibai fiodaiticue. ¹¹ Cue fiodaille mei, fiodaillamona naimie isoi cue jilloillemo ocuridicue. Ie jira naimiena uiñocana jaiacadicue.

Pablo jitaillacino

¹² Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote. ¹³ Cue amatiai, iena nia iñedicue; iadedi jaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue. ¹⁴ Cue risaillinomo iocire jaidicue, ibana cue feiñollena. Ieri Cristo Jesúdo Jusiñamui cuena uaidote, monamo cue illena. ¹⁵ Caimona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite; ¹⁶ iadedi caimo jai ite uiñuacinodo mai cai jailli.

Pablo illa isoi cai illa

17 Cue amatiái, Cristona cue inua isoi, naimie rafuedo cue jailla isoi, nana omoi jiaí jai. Cai illa isoidinomo omoi eruai, naimaci isoi omoi illena. 18 Jaie omoimo llouidicue. Cue sunaillamona dane lloiticue. Ailluena comini Cristo fiodailla rafuena birui jitaiñedimaci. 19 Ja muidomo faifitimaci. Naimaci Jusiñamuidi imaci guille, dani guille ramo naimaci comeciái facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai inena. 20 Monamo ite Jusiñamuimo cai jainaiaila jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima. 21 Naimie bia, cai fiodailla abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

4

1 Ie jira Cristo rafuena inocana nia omoi jai. Cue amatiái, omoína isiruiticue. Omoína cioacadicue. Omoiri iobidicue. Cue llamona Cristona jaie inotomoi. Ie rafuedo omoi jailla jira, iobidicue. 2 Evodia raillañaiñomo rafuena lloiacadicue. Sintique raillañaiñomo jiaí lloiacadicue. Cai Namamo iaiñuai duilla jira, iaiñuai comeci daje isoi lloilana jitaidicue. Coniño diga icirillana jitaiñedicue. 3 Cue mare nabai, omo jicanoticue, iaiñuaina canollena, coniño diga iaiñuai dane marena ñaillena. Cristo rafuena cue diga llotiaíaiñuai. Clemente diga llotiaíaiñuai. Cue diga llofueuidino diga llotiaíaiñuai. Monamo ite rabenicomo nana naimaci mameciái jai cueda. Jusiñamui diga monamo jaca iite comini mameciái diese cueda.

Iobillacino, uri illacino diga

4 Cai Namamo omoi duilla jira, jaca iobi. Dane lloiticue: Iobi. 5 Omoi riininana nana comini uñuana jitaidicue. Cai Nama dane abido billirui iairei ite. 6 Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaia, naimiemo iobillacinona jiaí feca. 7 Iemei Jusiñamui omoi comeciaina uri itataite. Omoi comeciái facajacino baifemo omoína uri itataite. Cristo Jesúsna omoi inuano, omoi comeciaina eenoite. 8 Cue amatiái, ie muidomo daje rafuena nia lloiticue. Uanaicinomo comeciaina faca. Inogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca. 9 Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi ciua rafuedo omoi jai. Iemei omoi comeciaina uri itatajanona, Jusiñamui omoi diga iite.

Filipomo ite comini Pablona eo canodimaci

10 Cai Namari iobidicue, diga irui illamona dane cuena omoi comeciái jira. 11 Cuemo comeciaina facadomoi; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uñoticue. 12 Duere cue illana uñoticue. Duenino cue illana jiaí uñoticue. Nie isoi cue ia, uri cue illana jai uñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue. 13 Nie isoide rafue cuemo ia, Cristo cue comecina ocuiñotaja jira, naga rafuena

finocana jaiticue. ¹⁴ Cue duere sefuillamo cuena omo; duenaillamona, cuena omo; canua jira, cuemona mare. ¹⁵ Omo;mo Cristo rafuena nano cue lluamona, cuena canodomo;. Macedoniamona cue jailla mei, jiaie creyentia; cuena canoñedimaci. Dani omo; cuena canodomo;. Iena uifnotomo;. ¹⁶ Tesalónicamo nia cue ia, diga icaño ucube cuemo oredomo; ¹⁷ iadedi omo; ucubena nicidoñedicue; iadedi cuena omo; canuamona, Jusiñamuimona ibana omo; feiñuana jita;dicue. ¹⁸ Nana cue jita;lle rana jai feiñoticue. Ailluena cuemo ite. Epafroditomona cuemo omo; oretaga rana feiñoticue. Jusiñamuimo fecadomo; isoide. Jusiñamui dibeimo cue maijia jira, mare rana finodomo;. Ie jira Jusiñamui iena gaide, caimare soride rana cai gaia iso;. Naimie iena jia; feiñote. ¹⁹ Naimiemo ailluena ite ramona cue Jusiñamui nana omo; jita;lle rana fecaite, Cristo Jesúmo cai duilla jira. ²⁰ Cai Moo Jusiñamuimo iobillacino jaca cai fecacabillasa. Iena jita;dicue.

Fuiduacino

²¹ Cristo Jesús mamecido cue facaina nana creyentia;mo cue uaina llono. Cue diga amatia; imaci uaina jia; oredimaci. ²² Nana benomo ite creyentia; imaci uaina oredimaci. Cai illa;ma César jofomo maijidino imaci uaina ua oredimaci. ²³ Cai Nama Jesucristo omo; comeciaina jaca caimare itatajana jita;dicue. Mai. Pablodicue.

COLOSAMO ITE CRISTONA HINOTINOMO PABLO ORETAGA RABE

Colosamo ite creyentiaimo Pablo carta orede

¹⁻² Colosas railla nairaimo ite creyentiai, Pablodicue. ¿Nie isidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue llolena, Jesucristo oretagamiedicue. Naimiemo jai duidomoi. Naimiena raise inocana jaidomoi.

Naimaci facaina Pablo jide

³ Cai Nama Jesucristo Moodi Jusiñamui. Omoi facaina Jusiñamuimo coco jia, naimiemo iobillacinona jaca fecadicoco. ⁴ Jesucristona nia omoi inuana coco fida jira, nana creyentiana nia omoi isiruillana coco fida jira, iobillacinona jaca fecadicoco. ⁵ Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino. ⁶ Diga illanomo, diga comini iena jiai jai cacadimaci. Iena inuamona Cristo dibeimo naimaci comeciai jai meidoga. Iena inuamona marecinodo jai jaidimaci. Ie isidomoi. Jusiñamui omoina duenaillana jai uifotomoi. Uanaicinona omoi raise uifuumona, iedo jaidomoi. Ie marecinona finocana jaidomoi. ⁷ Epafras luamona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana maijide. Omoi motomo cai ifena jira, Cristo dibeimo cai facaina naimie raise maijuide. ⁸ Naimiemono omoimo ite rafuena fididicoco. Jusiñamui Joreño omoina canuamona, jiaie creyentiana omoi isiruillana fididicoco.

⁹ Ie jirari omoi facaina jaca jidicoco. Omoi rafuena coco fidiamona, Jusiñamuimo omoi finolle rafuena omoi eo raise uifollena jidicoco. Nana naimiemo ite abi uifuumonona omoi eo raise uifuumona jitaidicoco. ¹⁰ Cai Nama: “Mare” omoina raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uifocana jaillana jitaidicoco. ¹¹ Nie isoide ramo omoi jiria, nana naimie siño ebirede uaido naimiedi omoi comeciaina ocuifotajana jitaidicoco. Iocire omoi illana jitaidicoco. ¹² Caina ie cominina naimie jai itataja jira, nana ie comini diga naimie illanomo ico jaca iiticai. Ie muidona naimiemo iobillacinona omoi fecacabillasa. ¹³ Jeacino anamo navui cai illa jira, jitiredinomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate. ¹⁴ Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai feitate. Naiena ico abido linoñeite.

Cristo muidona Jusiñamui riicailifue anamo ifedicai

¹⁵ Jusiñamuina cionidicai; iadedi Cristomona naimiena uifoticai. Jaca bue nia ifenia, Crsito nano jaca ite. ¹⁶ Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioifena rana finode. Cominina finode. Ie jaienisaia finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode. ¹⁷ Nano dofoconi Cristo jaca ite. Naimie uaido naga ra marena icana jaide.

18 Naimiedi nana creyentiai imaci illaima. Fiodaitinomona naimie nano jillodimiena jira, cai fiodaia, ico jiai jilloitica. Naimiedi naga ra baifemo faite. Naimiedi nana comini baifemo jiai faite. 19 Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite. 20 Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo iñedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai inoia, Jusiñamui riicallifue anamo jai iñedica. 21 Jusiñamui dibeimo navui iñedomoi. Naimiena nabaillana jitañedomoi. Omoi comeciama naimiena enidomoi. Maraiñediciona finuidomoi; 22 iadedi cruzmo naimie abi illanona, nainomo Cristo fiodailla jira, naimiedi naimie dibeimo omoina itatate. Jusiñamuimona mareuidinona omoi illena, omoimo nicino iñellena, Jusiñamui dine ico omoi ia, naimie dibeimo omoina jai itatate. 23 Naimiena raise inocana omoi jai, danomo abido omoi jaiñenia, iese iitomoi. Cristo rafuena navui cacadomoi. Ie jira Cristo dine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

Pablo Cristo rafuena llofuecabite

24 Omoimo Cristo rafue cue llua muidona, duere sefuidicue; iadedi iocire nia iticue. Omoi creyentiai facaina Cristo isoi duere sefuidicue. 25 Jusiñamui cuena oretaja jira, naimie rafuena ailluena cominimo eo raise cue lollena, omoi creyentiai facaina llofueticue. 26 Cai jaiagai bie rafuena uiñodimaci; iadedi Jusiñamuina inotinodi iena birui uiñotimaci. 27 Jusiñamui naimacina iena uiñotade. Naie rafuedi eo ebirede. Judiañedinodomoi; iadedi bie rafue omoimo jai duide. Omoi comeciama Cristo illana jai uiñotica. Ie jira naimie ebirede illanomo ico omoi jaca illemo ocuridomoi. 28 Cristo rafuena llofuetica. Nana cominimo Cristo dibeimo naimaci iacanana llotica. Cristona naimaci eo raise inollena, Cristo isoi naimaci marebicallena, naimaci abi uiñuana llotica. 29 Ie jira bie rafuena llofuecabiticue. Nana Cristo cuemo iga uaido eo llofuecabiticue.

2

1 Omoimo eo comecina facadicue. Iena omoi uiñuana jitaicue. Laodicea railla nairaimo jiai eo comecina facadicue. Diga comini cuena nia cioñedimaci. Naimacimo jiai eo comecina facadicue. 2 Omoi comeciaina ocuiñotallena, iese omoimo comecina facadicue. Dani omoi isiruillamona, ni Jusiñamui rafuena omoi eo raise marena uiñollena, omoimo comecina facadicue. Naie rafuedi Cristona llote. 3 Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide. 4 Naimaci ñaiama omoina bu jifuei raillanona, biena omoimo lloticue. 5 Omoi dine iñedicue; iadedi cue comecidi omoi dine ite. Omoimo cue comecina facadicue. Danomo omoi marena illa jira, Cristona omoi raise inocana omoi jailla jira, iobidicue. 6 Cai Nama Jesucristona omoi inuamona, naimie lloga rafue finocana omoi jai. 7 Naimie dibeimo raise icana omoi jai. Naimiena inocana omoi jai. Omoi lloraini omoina llofua isoi, naimiena inocana omoi jai. Jusiñamuimo iobillacino eo fecacana omoi jai.

Cristona cai inuano, cai illa rafue

⁸ Jaie comini naimaci jamai comeciai facajacinomona omoi jifuei raillanona, abina omoi rairui. Uanaifedicinomo comeciaina jamai facadimaci. Naimaci einamacimona iena otimaci. Naie rafuedo omoi jaillana jitaifimaci. Cristo rafuedo omoi jaillana jitaifedimaci.

⁹ Ero, Cristomo nana Jusiñamui uai ite. Eniruemo billanona, Cristo imana jaide. Naimiemona Jusiñamuina uiñoticaí. ¹⁰ Cristomo omoi jainaiaila jira, naimiemona nana omoi jitaillacinona oitomoi. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite. ¹¹ Cristomo omoi duilla jira, omoi comeciaino ite jeacino anamona omoina naimie jillotate. Omoi abiaina detatajamona naimie iena finoñede; iadedi omoi comeciaino ite jearede uai meiduamona jillobidomoi. Naimie iena finode. ¹² Naimie dibeimo cai illamona, jai bautizagacai. Naimie dibeimo cai illamona, cai jeacino anamo jai ifedicaí. Cristo fiodaite; iadedi fiodaillamona Jusiñamui naimiena jillotate. Jusiñamuina omoi inua jira, jeacino anamo jai ifedomoi. Naie anamona Jusiñamui omoina jai jillotate. ¹³ Jeacino anamo jaie omoi illamona, naimiemona fiodaitino isoidomoi. Omoi marañede jitaillacino anamo jaie itomoi. Cristomo omoi jai duillamona, omoi jeacinona oni dotajamona, naie anamona Jusiñamui omoina jai jillotate. Cristo dibeimo omoina itatate. ¹⁴ Moisés micori jaie llogacinona jaie cai inoñena jira, Jusiñamui ricailifue anamo iticaí; iadedi cruzmo Cristo fiodailla jira, naie llogacino anamo jai ifedicaí. Ie muidona Jusiñamui caino ibana oñeite. ¹⁵ Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uaillana uiñoticaí.

Cristomo ite rafuedo omoi jai

¹⁶ Cristo rafuedo omoi jailla jira, omoi guiga rana bu fimaia, naimaci ñaiamo cacarefiñeno. Judíuai einamací rafue dine omoi jaiñenia: “Omoi mareifedomoi” bu raia, naimaci ñaiamo cacarefiñeno. ¹⁷ Naie isoide rafuedo jaie jaidicaí; iadedi iedo birui jaiñedicaí. Cristo rafuedo birui jaidicaí. ¹⁸ Dajerie llofueraini jaie rafuedo jaidimaci. “Abina iedoñeno” raitimaci. “Jusiñamui jaienisaina seda” raitimaci. Nicairillacinodo jaidimaci. Naimaci isoi omoi jaiñenia: “Marañedomoi” omoina naimaci raia, naimaci ñaiamo cacarefiñeno. Naimaci illa isoi ifeno. Naimaci llucino anamo ifeno. Naimaci llucinodo omoi jaia, omoi jitaillanomo Cristo dine riñeitomoi. Naimaci comeciai jearena jira, jamai buena uiñoñenano abina iedotimaci. ¹⁹ Cristo rafuedo jaiñedimaci. Cristomo cai duilla jira, naimie caina oucicabide. Naimiemona cai illena Jusiñamui jitailla isoi, fueoticaí. Jusiñamui jitailla isoi, naimie dibeimo cai raise illena, naimiena cai raise inollena, naimiemona fueoticaí. Cristomo cai duilla jira, daní conina nabaidicaí. ²⁰ Cristo fiodaillamona, jaie rafue anamo jai ifedicaí. Naimiena inoñedino rafue anamo jai ifedicaí; iadedi naie rafuedo nia jaidomoi. Damierie llofuerainidi diga rana fimaidimaci. ²¹ “Biena jetañeno. Biena guiñeno” raitimaci. ²² Ero, naie fimaica guille ra ite, cai guillena. Iena cai guilla mei, jai buena ifede. Naimaci fimaiduacino cominimona otimaci. Jusiñamuimona oñedimaci. ²³ Naie fimaiduacinodi eo abi uiñuacino isoide. Naiedo bu jaia: “Jusiñamuina eo raise sedadicaí” raitimaci. “Abi iedoñedicaí. Cai abina isiruiñedicaí” raitimaci; iadedi naie isoide llucinodo bu jaia, naimie comecimo ite jeacinomona jilloñede. Naimiedi jeacino finocana nia jaide.

3

¹ Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite. ² Cristomo ite rafuemo omoi comeciaina facacana jai. Bene ite maraiñede rafuemo omoi comeciaina facañeno. ³ Bene ite maraiñede rafue anamo jai iñedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoina naimie canoite. ⁴ Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

Omoi comeciaino ite jeacinona faionocai

⁵ Cristomo omoi jai duilla jira, omoi comeciaino ite jeacinona faionocai. Omoi aiñede riño diga iñeno. Omoi iniñede iima diga iñeno. Jeare finoca rafuemo omoi comeciaina facañeno. Omoi maraiñede jitaillacinodo omoi jaiñeno. Rana nicidoñeno. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi. ⁶ Naie isoidicinona comini finua jira, naimiena naimaci iñoñena jira, Jusiñamuidi naimacina duere finoite. ⁷ Naie isoide rafuedo jaie jaidomoi. ⁸ Nana bie isoide rafuedo jaiñeno. Icirineno. Omoi ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno. ⁹ Tainona lloñeno. Omoi comeciaino ite jeacino anamo jaie itomoi. Naicino anamo omoi jai iñena jira, naicinodo jaiñeno; ¹⁰ iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate. ¹¹ Cristo rafuedo birui omoi jailla jira, Jusiñamuimona nana creyentiaidomoidi daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatinodomoi. Dajerie abina detatañedinodomoi. Dajerie abina uiñotinodomoi. Dajerie abina uiñoñedinodomoi. Dajerie patrón anamo itinodomoi. Dajerie patrón anamo iñedinodomoi. Cominimona iese itomoi; iadedi Jusiñamuimona daje isoidomoi. Cristo díbeimo omoi illa jira, jai amatiaina eruaidomoi. Cristomo omoi duillacino jiaie rafue baifemo faite. ¹² Jusiñamui omoina fetode. Omoi comeciaina maretate. Omoina isiruite. Ie jira jiaie cominina duenai. Jiaie cominina cano. Abi iedoñeno. Abi biriñeno. Icirineno. ¹³ Dani omoi ibana oñeno; iadedi bu diga omoi icirillafue ia, naina raise fino. Iena raise finuanona, abido ietañeno. Iena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoaia, iena feita. ¹⁴ Coninina omoi isiruicana jai. Isiruillacino nana jiaie lluacino baifemo faite. Coninina omoi isiruia, danomo marena iitomoi. ¹⁵ Jusiñamui omoina fetua jira, Cristomo daajena jai duidomoi. Cristo omoi comeciaina uri itatajamona, nana comini diga uri i. Omoi comeciaino uri illamona, Jusiñamuimo iobillacinona feca. ¹⁶ Cristo rafuena omoi eo iñuana jitaidicue. Naie rafuena coninimo omoi llofue. Iena raise uiñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciainona iocire rono. David micori cueba salmos omoi roia, Jusiñamui Joreño omoina birui cuetataga ruana omoi roia, omoi comeciainona iocire rono. ¹⁷ Buena omoi lloia, buena omoi maijia, cai Namamo omoi

comeciaina facajano, iena fino. Cai Nama muidona, cai Moo Jusiñamuimo iobillacinona jiai feca.

Coniniri creyentiai illa rafue

¹⁸ Inirediñaiñuai, omoimo rafuena lloiacadicue. Cai Namamo omoi jainaiaila jira, naimie jitailla jira, omoi iniñiai anamo raise omoi i. Naimaci uaina raise ñno.

¹⁹ Airedino, omoimo jiai lloiacadicue. Omoi ainiaina isirui. Naiñaiñuai diga iciricabiñeno. Naiñaiñuaimo riire lloñeno.

²⁰ Uruiai, omoimo rafuena lloiacadicue. Nana omoi mootiai uaina ñno. Nana omoi eiñiai uaina ñno. Iena omoi ñnoia, cai Nama eo iobite.

²¹ Mootiai, omoi uruiaina jamai iciñeno. Naimacina omoi jamai icia, comecina facaitimaci: “¿Ñiese cai mootiai uaina raise ñnoiticaí? Iena eo sefuiruiticaí”. Ie muidona omoi uaina raise ñnoñeitimaci.

²² Patrones anamo itino, nana omoi patrones ocuica uaina ñno. Omoimo naimaci eruaiñenia, omoi patrones facaina raise maiji. Cai Namana omoi ñnua jira, cai Namana raise omoi iobitaiaicana jira, omoi patrones facaina raise maiji. ²³ Buena omoi maijia, omoi comeciamona maiji. Dani comini facaina maijiñedomoi; iadedi cai Nama facaina maijidomoi. Ie jira raise maiji. ²⁴ Naimie jai llua isoi, cai Namamona ibana ico feiñoitomoi. Cai Nama Cristo facaina omoi maijidomoi; ²⁵ iadedi Jusiñamui raise maijiñedinona duere finoite. Jusiñamuimona naga maijidimie ie maijia diese feiñoite.

4

¹ Patrones, omoimo lloiticue. Naimaci omoi anamo illa jira, omoi diga maijedinona raise iba. Naimacina jifueñeno. Omoi Nama monamo illamona, omoimo eruaide. Naimie anamo omoi illa jira, omoi anamo itinona marena raise fino.

² Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca. ³ Cristo rafuena llocana cue jailla jira, cárcelmo birui iticue; iadedi naie rafue nia lloiacadicue. Jusiñamui nana comini Cristo dibeimo jai jitaillana lloiacadicue. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadicue. ⁴ Naimaci iena raise cacaillena, naie rafuena raise lloiacadicue. ⁵ Creyentiañedino motomo omoi ia, marena omoi i. Naimacimo Cristo rafuena llono. ⁶ Bu diga omoi ñaia, caimare ñaino. Nie isoide Cristo rafuena omoimo bu jicanoia, raise marena fairio.

Damierie ie uaina orede

⁷ Tiqicodi nana cuemo ie rafuena omoimo lloite. Naimiena isiruiticaí. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide. ⁸ Cai illana omoi uñollena, omoi dine naimiena oredicue. Omoi comeciaina ocuiñotaite. ⁹ Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruiticaí. Naimiedi omoi comini imie. Nana bene jai suide rafuena omoimo lloitiaimaiai. ¹⁰ Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloticue. Omoi dine naimie ria, naimiena feiño. ¹¹ Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fainonocaillamona, Jusiñamui ie dibeimo cominina jai jitaide” naimaci

lluamona, cue comecina ocuiñotadimaci. ¹² Epafras ie uaina jiai orede. Naimie omoi comini imie. Jesucristo dibeimo naimie maijide. Jusiñamui diga naimie ñaia, omoi facaina jaca duere jicabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jicabide. ¹³ Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. ¹⁴ Cai médico Lucas ie uaina jiai orede. Naimiena isiruiticai. Demas ie uaina jiai orede. ¹⁵ Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono. ¹⁶ Bie cartana omoi facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoi jiai faca. ¹⁷ Arquipomo llono: “Cai Nama fetocamedio. Naimie rafuena llocana raise o jai” llono. ¹⁸ Cue uaina omoimo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoi jii. Jusiñamui omoina duenaioillasa. Mai. Cue cuela rafue jai fuite. Pablodicue.

TESALÓNICAMO ITE CRISTONA HNOTINOMO PABLO NANO ORETAGA RABE

Uaiduacino

¹ Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaia uaina orediaimaia. Cai Moo Jusiñamuimo, cai Nama Jesucristomo jai jainaidomoi. Ie jira iaimaia omoi duenaillana uiñocana omoi jaillana jitaídicaí. Iaimaia omoi uri itatajana omoi uiñocana jaillana jiai jitaídicaí.

Tesalónicamo ite creyentiai Jusiñamui uaina raise #notimaci

² Jusiñamuimo cai jüia, naimiemo omoi facaina iobillana jaca fecacabidicaí. Omoi facaina jücabidicaí. ³ Cai Moo Jusiñamuimo cai jüia, omoína comeciticaí. Jusiñamuina #notomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoína comeciticaí. ⁴ Omoína naimie isiruillamona, Jusiñamui omoína fetuana uiñoticaí. ⁵ Jamai cai uaido Cristo rafuena omoína llofueñedicaí; ia siño uaido iena llofueticaí. Jusiñamui Joreño uaido iena llofueticaí. Naie rafuena #nuanona llofueticaí. Omoi diga cai jaie ia, nie isoi cai illana raise uiñotomoi. ⁶ Cai illa isoi ifcaidomoi. Cai Nama illa isoi ifcaidomoi. Iemona duere sefuidomoi; ia Jusiñamui Joreño omoína iocire itatajamona, Jusiñamui uaina iocire feiñotomoi. ⁷ Ie jira nana Macedoniamomo ite creyentiai omoimona fueotimaci. Nana Acayamo ite creyentiai omoimona jiai fueotimaci. ⁸ Omoimona Macedoniamomo ite comini cai Nama uaina fididimaci. Acayamo ite comini jiai fididimaci. Ailluena nairaiaí Jusiñamuina omoi #nuana jai fididimaci. Ie jira naimacimo Cristo rafuena omoi #nuana jai lloñedicaí. ⁹⁻¹⁰ Omoi dine nano cai ria, caimare caina feiñotomoi. Cristo rafuena omoi caca-jamona, jiraraina sedajana fañonocaida, cajede nanoca Jusiñamuina jai sedadomoi. Jusiñamui Jito abido billemo birui jiai ocuridomoi. Iese jiaie creyentiai omoína birui ñaicabitimaci. Cristo fiodaillamona Jusiñamui naimiena jaie jillotate. Naimiena cai #nuamona, Cristo Jusiñamui riicaillifuemona caina jai jillobitade.

2

Pablo Tesalónicamo llofua rafue

¹ Cue nabaiñiai, omoi diga jaie cai ia, tañonomo jaiñedicaí. ² Omoi dine cai nia riñenia, Filipomomo iticaí. Nainomomo itinodi caina jeare finodimaci. Iena jai uiñotomoi. Caina jeare finodimaci; ia cai comecina Jusiñamui ocuriñotajamona, Jusiñamui rafuena omoína llofueticaí. Ailluena comini iena jitaíñedimaci; ia iena llofueticaí. ³ Uanaíñedicinona jaca llofueñedicaí. Jearedicinona jaca llofueñedicaí. Jifuerillacinona jaca llofueñedicaí; ⁴ iadedi Jusiñamui uiñoganodicaí. Ie jira caina naimie oretajamona, ie rafuena llofueticaí. Cominina iobitallena llofueñedicaí; iadedi Jusiñamuina iobitallena llofueticaí, Jusiñamui cai comecina raise uiñua jira. ⁵ Cai llofuiacino diga omoína bifueñedicaí. Omoimona ucube ollena, iese llofueñedicaí. ⁶ Cominimona iobillacinona jitaíñedicaí. Omoimona jitaíñedicaí. Jiañomona jiai jitaíñedicaí; iadedi Cristo oretaganona cai

illa jira, cai jitaia, omoimona iobillacinona jicaredicai. ⁷ Uruiaina raise sedaraiño isoi, fecuise omoina llofueticai. ⁸ Jusiñamui rafuena omoi raise uifollena, omoina cai eo isiruillamona, niadedi omoi facaina fiodaia-cadicai. ⁹ Omoi motomo cai ucube ollena, jiaie rana maijiuidicai. Omoina cai duere finoñellena, nagarui iese maijiuidicai. Iena raise uifotomoi. Iese Jusiñamui rafuena omoina llofueticai.

¹⁰ Omoi motomo cai illana raise uifotomoi. Jusiñamui jitailla isoi, nainomo iticai. Maraiñede rafuena finoñedicai. Mare rafuedo jaca jaidicai. Iena uifotomoi. Jusiñamui iena jiai uifote. ¹¹ Omoi uruiaia omoi llofuia isoi, omoina llofueticai. Omoimo diga icaiño Jusiñamui rafuena llofueticai. ¹² Jusiñamui jitaillacinona omoi finollena, iena llofueuidicai. Monamo ie cominina sedajanomo omoi jaca illena, naimie omoina jai fetode. Nainomo ie siño uai anamo jaca iitomoi.

¹³ Jusiñamuimo cai jiaia, omoi facaina iobillacinona fecacabidicai. Jusiñamui rafuena caimona omoi jiaie cacajamona, iena raise feifotomoi. Cominimona cai oga rafue isoi feifonedomoi; ia Jusiñamuimona cai oga rafuena feifotomoi. Cai lloga rafue omoi comeciaia iuai meidocana jaide. Ie jira Jusiñamuimo iobillacinona fecacabidicai. ¹⁴ Judeamo ite creyentiaia isoi duere sefuidomoi. Omoi cominimona duere sefuidomoi. Naimaci judiuai cominimona duere sefuidimaci. ¹⁵ Judiuai comini cai Nama Jesúna jiaie meinetimaci. Jusiñamui facaina lloraini micoriaina jiai jiaie meinetimaci. Caina jiai birui duere finodimaci. Jusiñamuina iobitañedimaci. Jusiñamui rafue dibeimo jiai inedimaci. ¹⁶ Judiuaiñedinomo Cristo rafuena cai lluana jitaiñedimaci. Jusiñamui judiuaiñedinona jillotajana jitaiñedimaci. Iese jecino finocana nia jaidimaci; ia ja muidomo Jusiñamui riicailifue anamo jai itimaci.

Tesalónica comini dine Pablo abido jaiacade

¹⁷ Omoimona cai billa mei, nigarui illanona, omoina dane cioacadicaia. Omoina cioifnedicai; iadedi omoimo comecina facadicai. Omoi dine eo jaiacadicai. ¹⁸ Ua eo jaiacadicue. Diga icaiño jaiacadicai; ia Taife cai jaillana jitaiñede. ¹⁹⁻²⁰ Caina omoi jaca iobitaja jira, omoina cioacadicaia. Jesús abido bia, naie facaise omoiri eo iobiticai. Iemo ocuridicai. Caina iocire itataitomoi. Omoi muidona iobiticai.

3

¹ Cai comeci jarire illamona, Atenas railla nairaimo fiebidicoco; ² iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise inotallena, omoi comeciaina ocuifnotallena, naimiena oretaticoco. ³ Duere sefuillamona bu bie uai sefuiruillana jitaiñedicai. Creyentena cai illamona, jaca duere cai sefuillana uifotomoi. ⁴ Omoi motomo jiaie cai ia, iena llofueticai. Omoi birui duere sefuillamona cai lluana raise uifotomoi. ⁵ Cue comeci jarire illamona, Cristona omoi inuana raise uifoiacadicue. Omoina Taife ramo faicabillamona, tainomo cai maijiana jacinaicai. Ie jira Timoteona oredicoco. ⁶ Omoimona Timoteo jai abido billamona, omoie mare rafuena cocomo llote. Cristona inocana jaidomoi naimie llote. Coninina isiruitomoi. Cocona caimare comecitomoi. Omoina coco cioacana isoi, cocona dane cioacadomoi naimie llote. ⁷ Birui duere sefuidicai; iadedi omoie rafuena cai cacajano, cai comeci marena ite. ⁸ Cristo rafuena inocana omoi jaillana jai cai

uiñuamona, cai comeci marena ite. ⁹ Omoiri eo caimare jai iticai. Ie jira Jusiñamui iobillacinona eo feaacadicai. ¹⁰ Omoina dane cai cioillena, naimiemo nagarui jidicai. Naimiena nia omoi raise inoñenia, omoina naimiena raise inotaadicai. Ie jira omoina cioadicai. ¹¹ Iese omoi facaina, cai Moo Jusiñamui, cai Nama Jesúmo jicabidicai. Omoi dine caina naimie oretajana jidicai. ¹² Cai Nama coninina isiruitacana omoi jaillana jitaidicai. Caina omoi isiruilla isoi, nana jianona omoi isiruillana jidicai. ¹³ Omoi comeciai ocuiñollena, omoi comeciai Jusiñamui jitailla isoi, marena illena jidicai. Nana ie comini diga cai Nama Jesús abido bia, Jusiñamui dine omoi ia, omoi comeciai marena illena jitaidicai. Iese omoi facaina jicabidicai.

4

Naimaci marena illena llofuite

¹ Jiaie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitaidicai. Iese birui itomoi; ia nagarui iese omoi illana jitaidicai. Ie jira cai llua isoi, omoi jai. ² Cai Nama Jesús jitailla jira, navui iena llofueticai. ³ Jusiñamui jitailla isoi omoi marena illena, omoi aifede riño diga iño. ⁴ Nagamiai riñona ie aina otena, mare; ia marañede rafuena finoño. Nagamiai dajena daje riño uana Jusiñamui jitaide. Dañaiño diga iaiaiaia jionaillena jiai jitaide. ⁵ Naimiena inoñedino isoi, omoi ai uana jitaifede. Naiñaiñuui abina jamai cioillena riñona otimaci. ⁶ Jiaie creyentemo jeacinona finoño. Naimie aina jamai aifiedoño. Naie isoide rafuena bu finoi, cai Nama naimiena duere finote. Iena navui omoiimo lloticue.

⁷ Jearede rafuena cai finollena, Jusiñamuidi caina fetofede; iadedi mare rafuena cai finollena caina fetode. ⁸ Bie llofuiacino nie creyente inoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jiai jamaide. ⁹ Jiaie creyentiaina omoi isiruillana omoiimo eo lloñeticue. Jusiñamui omoina coninina isiruillana jai uiñotade. ¹⁰ Nana Macedoniamoi ite creyentiaina jai isiruitomoi; iade nia isirucana omoi jai. ¹¹ Uri omoi i. Dani omoiimo ite rafuena omoi uiuicai. Jianomona ucubena jicaño; ia omoi ucube ollena, omoi onolli diga rairuioicaiño omoi maiji. ¹² Ie mei omoi jitailla ra iite. Iemona Cristona inoñedino omoina jiai mameriñeitimaci.

Jesucristo dane abido billena lloite

¹³ Omoi raise uiñollena, daje rafuena lloiticue. Omoi creyentiamona dajerie jai fioiditimaci. Jesúsna inoñedinomona bu fioidaia, fioidaillamona jilluamo naimaci ocuirina jira, sunaitimaci; iadedi naimaci sunailla isoi, omoi illana jitaifedeticue. Fioidaillamona jilluamo jai ocuiridomoi. ¹⁴ Jesús fioidaillamona naimie jilluana inotica. Ie jira Jesús abido billa faise, jai fioidaite creyentiaina Jusiñamui jilloitajana jiai jai inotica. ¹⁵ Cai Nama llofua isoi, bie rafuena lloiticue. Jesús abido bia, jai fioidaite creyentia, nia fioidañede creyentia diga, daacaiño naimie dine a jaiticai. ¹⁶ Cai Nama Jesús abido bia, Jusiñamui dinena naimie billanona, caina jidaite. Ie jaienici caina uaidoite. Jusiñamui ie trompeta daacaiño jiai fiite. Jai fioiditino nano jilloitimaci. ¹⁷ Iemei nia fioidañedinodi como jillodino diga uille motomo naimiemo dafaiñillena,

Jesús caina uite. Iemei naimie diga jaca iticai. ¹⁸ Bie llofuiacino diga conini comeciaina omoi ocuiño.

5

¹ Bie rafue suilliruina uifnoñedicai. Bie rafuena omoi jai uifnua jira, iena dane eo cueñeiticue. ² Cai Nama abido billana jai uifnotomoi. Fii redimie naiona ebena billa isoi, naimie abido biite. ³ “Uri iticai. Marena iticai” Cristona inoñedino raia, naie facaise naimacimo duere sefuillifue suite. Urue riño jigicomu casilla isoi, ebena suite. Naiemona jilloñeitimaci. ⁴ Naie facaise suia, Cristo billena omoi jai uifnuamona, fii redimie naiona ebena billa isoi, jacinaiñeitomoi. Cristona inoñedino isoi, inedomoi. ⁵ Uanaicinona omoi jai uifnuamona, Cristo ie cominina jai jaidomoi. Jeacino anamo omoi jai inena jira, Cristona inoñedino dibeimo jai duifnedomoi. ⁶ Ie jira abina sedacana omoi jai. Abina rairuioicaida omoi jai. Jifaidino isoi ebena omoi jai ineno. ⁷ Cristona inoñedino abina sedacana jaiñedimaci. Rairuioicaida ebena jaidimaci. ⁸ Cristo ie cominina jai cai illa jira, ebena cai jai inena. Imaci abina riidollena, soldaduai jogobe icodi ite. Imaci ifogi icodi jai ite. Ie isoide. Cai comeciaina eenollena, Cristona inocana mai cai jailli. Jiaino isiruicana mai cai jailli. Jusiñamui dine ico cai illemo ocuiricana mai cai jailli. ⁹ Caina duere finollena, Jusiñamui caina fetofede; iadedi cai Nama Jesucristo finoca rafue muidona, duere finollemona cai jilloillena, caina fetode. ¹⁰ Cristo cai facaina jai fiodaite. Ie jira birui cai fiodaia, naimie bille facaise nia fioidañedinona cai ie, naimie diga jaca iticai. ¹¹ Ie jira coninina ocuiñotacana omoi jai. Cristo dibeimo coninina itatacana omoi jai. Iese birui jaidomoi; ia nia iese omoi jai.

Omoi creyentiaina llofueraini uaina ino

¹² Cue amatiai, jiaie rafuena lloiticue. Omoi creyentiaina llofueraini uaina ino. Cristo jitailla jira, omoi afemo itimaci. Cristo dibeimo omoina raise itatallena, omoi facaina llofuetimaci. ¹³ Omoina naimaci canua jira, naimacina isiruillanona, naimaci uaina raise omoi ino. Coniniri uri omoi i. ¹⁴ Omoi motomona maijiacaiñedinona imaci maijillesa ocui. Duere sefuillamona jai comecina ocuiñonidinona comecina ocuiñota. Raise inollena, Cristona nia raise inoñedinona jai cano. Fecuisse naimacina ui-uillanona, naimacina cano. ¹⁵ Omoina jiaimie duere finoi, ibana ofeno; iadedi naimiemo mare rafuena fino. Nana cominimo mare rafuena fino. ¹⁶ Nie isoide rafue omoimo ia, caimare omoi i. ¹⁷ Jusiñamuimo nagarui jii-jii. ¹⁸ Nie isoide rafue omoimo ia, Jsuiñemui jitailla jira, naimiemo iobillacinona feca. Jesucristomona Jusiñamui jitaillacinona jai uifnoticai. ¹⁹ Jusiñamui Joreñoa jamaiñeno. ²⁰ Jusiñamui Joreño uaido lloraini llofuiana jamaiñeno; ²¹ iadedi Jusiñamui Joreño uaido naimaci llofuiana facaci. Mare rafuedo jaca omoi jai. ²² Nana marañede rafuemona eneno oni omoi i. Naie isoide rafuena omoi abimo omoi ofeno. ²³ Ie jira Jusiñamuimo omoi facaina jiiiticue. Naimie omoina jai uri itatate. Naimie omoina nagarui marena itatacana jaillana jitaidicue. Iese omoi jai, cai Nama Jesucristo dane abido bille facaise, naimie jitailla isoi, omoi comeciaini marena iite. ²⁴ Jusiñamuidi inogamiena jira, iese omoina finoite.

²⁵ Cue amatiai, Jusiñamuimo cai facaina omoi jiiicabi. ²⁶ Cue facaido nana creyentiaina caimare uaido. ²⁷ Cai Namamo cai duilla jira, naimie

jitaila jira, bie cartana nana creyentia; uicomo faca. ²⁸ Cai Nama
Jesucristo omoina duenaillasa. Mai. Pablodicue.

TESALÓNICAMO ITE CRISTONA HNOTINOMO PABLO IE EDOMOMO ORETAGA RABE

Uaiduacino

¹⁻² Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiadomoi. Ie jira iaimaiai omoi duenaillana uiñocana omoi jaillana jitaidicai. Iaimaiai omoi uri itatajana omoi uiñocana jaillana jiai jitaidicai.

Cristo dane abido bia, naimiena ñnoñedinona duere finoite

³ Jusiñamuimo cai jiaa, omoi facaina naimiemo iobillacinona fecacabidicai. Cristona ñnocana raise jaidomoi. Coniniri isiruicana raise jaidomoi. ⁴ Ie jira marena omoi illana jiaie creyentiai illanomo llocana uiticai. Duere sefuidomoi; iadedi danomo abido jaiñedomoi. Cristona ñnocana jaidomoi. Iena llocana uiticai. ⁵ Jiainomona birui duere sefuidomoi; ia ñnocana jaidomoi. Iemona Jusiñamui omoi facaina illana uiñotica. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

⁶ Jusiñamui omoina duere finodinona ico duere finoite. Omoi facaina ibana oite. Iese naimie finoa, naimiemo mare. ⁷ Cai Nama Jesús abido bia, duere sefuillamona jilloitica. Monamona ie siño jaienisai diga biite. Irai boua isoi ana biitimaci. ⁸ Jusiñamuina ñnoñedinona diese duere finoitimaci. Cai Nama Jesús rafuena naimaci ñnoñena jira, naimacina duere finoitimaci. ⁹ ñnoñena jira, jaca faifitimaci. Jaca legi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. ¹⁰ Cristo bille facaise naimiemo iobillacinona fecaiticai. Naimieri nana naimiena ñnotino rajicaitimaci. Omoimo cai lloga rafuena omoi jai ñnua jira, iese iitomoi.

¹¹ Ie jira omoi facaina jicabidicai. Naimie jitailla isoi, omoina naimie marena itatajana jidicai. Omoina naimie fetuamona, ie uaido mare rafuena finocana omoi jaillana jidicai. Ie uaido naimiena ñnocana omoi jaillana jidicai. ¹² Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusiñamui, cai Nama Jesucristo diga, caina duenaillamona iese iitica.

2

Jesucristo abido bille rafue

¹ Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue. ² “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusiñamui Joreño iena cuemo jai llote” damie raia, iena ñnoñeno. Nie lloraima iena lloia, iena ñnoñeno. “Pablomona cue feiñoga carta iena llote” damie raia, iena ñnoñeno. ³ Naie isoide rafue diga omoina jiaino jifueiacania, iena ñnoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; ⁴ iadedi nano jiaie rafuena finoite. Taife dinena naimie billanona, jirarai baifemo iacanite. Jerusalémo Jusiñamui jofomo illanona,

“Jusiñamuidicue” raite. ⁵ Omoï ñine navui cue ia, bie rafuena omoïmo lloticue. ⁶ Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite. ⁷ Taife maraiñede rafuena birui bainoi finotate. Jusiñamui Joreño naimiëna maraiñede rafuena birui marefodo finuana rairuide. Jusiñamui Joreño naimie rairuiñena mei, ⁸ Taife dinena maraiñedimie biite; ia cai Nama Jesús abido ebire bia, firaiñuamona naimiëna meineite. ⁹ Cai Nama Jesús nia abido biñenia, comini jifuellena, Taife uaido bie maraiñedimiedi ñiga siño rafuena finoite. ¹⁰ Cominina eo maraiñedinodo jifueite. Naie comini ico faifitimaci. Jusiñamui ie uanaicinona naimaci ñinoñena jira, jilloiacaiñeitimaci. ¹¹ Ie jira Jusiñamui naimacina tainocinona ñnotaite. ¹² Jusiñamui ie uanaicinona naimaci ñinoñena jira, maraiñede rafuena naimaci ebiruilla jira, Jusiñamui naimacina duere finoite.

Jusiñamui omoïna jai fetode

¹³ Jusiñamuina ñinoñedino isoi Jusiñamui omoïna duere finoñeite. Naimie omoïna jai fetua jira, naimiemo iobillacinona jaca fecacabidicai. Omoï jilloillena, nano dofoconi omoïna fetode. Ie Joreño uaido naimie jitaillacinona omoï finollena, naimie uanaicinona omoï ñnuamona, omoïna fetode. ¹⁴ Ie rafuena cai llumona, Jusiñamui omoïna jai jillotate. Iemona cai Nama Jesucristo ebirede illanomo jaca iitomoi. ¹⁵ Ie jira, Cristona ñnocana omoï jai. Cai llogacinodo omoï jai. Iena caïmona jai cacadomoi. Cai cartamona iena jiai cacadomoi. ¹⁶ Omoï facaina cai Nama Jesucristomo, cai Moo Jusiñamuimo, jicabidicai. Naimie caina isiruite. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicai. ¹⁷ Naimie omoï comeciaina nia ocuiñotallena jidicai. Nie isoi ñ rafuena omoï finoia, naie rafue omoï marena finollena jidicai. Buena omoï ñaia, omoï marena ñaillena jiai jidicai.

3

Cai facaina omoï jiana jitaidicai

¹ Daje rafue nia lloiacadicue. Cai facaina omoï jiana jitaidicai. Cai Nama rafue llocana jaillana jitaidicai. Omoï ñnua isoi, jiaïno ñnuana jiai jitaidicai. ² Maraiñedinomona cai jillobillena, omoï jiana jitaidicai. Ailluena comini Cristona ñinoñedimaci; ³ ia cai Nama jaca ñnogamie. Omoï comeciaina ocuiñotaita. Maraiñedinomona omoïna eenoite. ⁴ Cristomo cai duilla jira, cai llogacinona omoï jai ñnuana jai uiñoticaï. Iena nia ñnoitomoi. ⁵ Cai Nama Jesús omoïna Jusiñamui omoïna isiruillana uiñotajana jitaidicue. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuimo omoï facaina jaiticue.

Maijuillasa

⁶ Cai Nama Jesucristo jitailla jira, jiaie rafuena nia lloticue. Jiaie creyente maijiacaiñenia, naimie ñiga eo nabairiñeno. Iena navui omoïmo lloticue; ia damierie iese ia, naimaci ñiga eo nabairiñeno. ⁷ Caïmona fueo. Navui omoï motomo iticai; ia cai ucube ollena, jaca maijidicai. ⁸ Guillena ibaño guiñedicai; ia nagarui eo maijidicai, omoïna duere cai finoñellena. ⁹ Cristo facaina cai maijia jira, omoïmona ra jamai cai jicallena, caïmo uai ite; iadedi caïmona omoï fueollena iese jicañedicai. Omoï ra ollena, omoï maijiana jitaidicai. ¹⁰ Navui omoï motomo cai illa facaise lloticai: “Bu maijiacaiñenia, guiñena”. ¹¹ Omoï motomo damierie jai

maijiñenana jai fididicai. Maijiñeno jai itimaci. ¹² Cai Nama Jesucristomo cai duilla jira, naie isoidinomo maijillena lloticai. Uainino maijiamona ucube naimaci uana jitaidicai. ¹³ Cue amatiai, nie isoide mare rafuena finollena sefuiruiñeno. ¹⁴ Cue jai cuega cartamo ite rafuena bu inoñenia, nana creyentiaina naimiena uiñota. Naimie meidaillena, naimie diga nabairiñeno. ¹⁵ Naimiena enoiñeno; ia creyentena naimie nia illamona, naimiena fecuise llofue.

Fuiduacino

¹⁶ Cai Nama omoi jaca uri itatajana jitaidicai. Naimie omoi diga jaca iite. ¹⁷ Cuenanollena, naimiemo cue llua isoi, jiamie bie carta cuega; iadedi cue mameci buene dama cueticue. Nana cartamo iese cue mamecina cueticue. Pablodicue. ¹⁸ Cai Nama Jesucristo nana omoina duenailasa. Mai. Macaibaite.

TIMOTEO MO PABLO NANO ORETAGA RABE

Pablo Timoteona uaiduacino

1-2 Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús oretagamiedicue. Ie rafue llollena, naimie cuena orede Naimiena cue cioillena, naimie isoi cue illena, naimie abido billemo ocuridicue. Jusiñamui cuena jiai orede. Naimiedi cai Jilloitaraíma. Cue llofuiaicinomona Cristona o raise ñnua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatataímaiaí. Iena uiñocana mai o jai.

Cristo rafuena tainona llofueraíni llofuiaicínodo jaiñeno

3-4 Macedoniam o jai e jaidicue mo, Efesomo o fiebicailena omo lloticue. Nainomo dajerie Cristo rafuena raise llofueñedimaci; iadedi jiaiforie llofuetimaci. Diga ñgáiaina faca-facadimaci. Imaci usumatiai mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai ñnuamona, marena iticai. Iena llofueñedimaci. Ie jira naimaci uaina llícaita. ⁵ Jusiñamuina comini isiruillena, jiaie cominina jiai naimaci isiruillena, Jusiñamui uaina llofueticai. Naimaci comeciái jeaninana jitaídicaí. Jusiñamuina raise naimaci ñnuana jiai jitaídicaí. Ie jira Jusiñamui rafuena llofuecabiticaí. ⁶ Dajerie llofueraíni iese llofueñedimaci; iadedi jamai ñaitimaci. ⁷ Moisés micori jai e llogacínuaído llofueiacadimaci; iadedi iena llofuiana uiñoñedimaci. Naie llogacínuaína ua uiñoñedimaci.

⁸ Iena raise llofuegana, Jusiñamuina uiñoñedinona naimiena uiñotallena, mare. Iena uiñoticaí. ⁹⁻¹⁰ Moisés micori llogacínuaídi mareuidinomo jainaiñede. Jiaínom o jainaiide: Jusiñamui uaina ñnoñedinomo lloga uaina ñnorainidinomo, Jusiñamuina jitaíñedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, añede riño diga itinomo, iniñede ñma diga itañaiñuaimo, daje isoide ñma diga conini aífuedotinomo, comena fiidinomo, taino llorainimo, taino llwana jífueridinomo, uanaí rafue facaisena iñedinomo. Nana Cristo rafue facaina iñedinomo Moisés micori llogacínuaí ua jainaiide; ¹¹ ia naie rafue cuemo jai jainaiñede. Ie mare rafuena cue llollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

Jusiñamui caina duenailla jira, Pablodi iobide

¹² Cuena fetua jira, cai Nama Cristo Jesús iobidicue. Naimiena cue ñnollena, naimie cuena uiñuamona, cuena fetode, naimie rafue cue llollena. Iena llollena, cue comecina jiai ocuiñotade. ¹³ Jai e naimiena jeare ñaiticue. Naimiena ñnotinona jiai duere finodicue. Abina cue uiñoñena jira, naie facaiseconi naimiena nia cue ñnoñena jira cuena duenaillamona, naimie cuena fetode. ¹⁴ Cuena eo duenaite. Iemona naimiena ñnoticue. Naimiena jiai isiruiticue.

¹⁵ Bie lluaídi mare cue uiñuamona, nana comini buena ñnuana jitaídicue. Marañedinona naimaci jeacinomona jilloitallena, eniruemo

Jesucristo bite. Ero, nanoca jeacinona finora imadicue; ¹⁶ iadedi Jesucristo cuena duenaite. Naimiena cue inuamo jai e fecue ocuiride. Nana jeacinona finora inimo fecue ocuiride, naimiena inollena. Naimiena cai inuamona, Jusiñamui diga jaca iiticaí. Cuena duenailla jira, biruimona naimiena inoitinodi naimie naimacina duenaillana uifnotimaci. ¹⁷ Jusiñamuidi nanocamie. Jaca fioidaifeite. Naimiena cionidicaí. Naimie damiede. Jaiena ifede. Naimiena jaca iobicabillasa. Iena jitaídicue.

¹⁸ Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuera inidi ona jai e llotimaci: “Naimie raise marena llofueite” llotimaci. Iena comecianona, o comeci ocuifnocana o jai, Cristo rafuena riidocana o jaillena. ¹⁹ Cristona inocana o jai. O comecina marena finocana o jai. Dajerie naimaci comeciai iuaimo comeciaina facañedimaci. Ie jira Cristona jai inoñedimaci. ²⁰ Iese ite Himeneo. Alejandro jiai jai daje isoide. Jai inoñediaimaiaí. Ie mei iaímaiaína Taife anamo jai itabicaítaticue, duere sefuillena. Iaímaiaí fueollena, Jusiñamuina jeare ñaifñellena, iese itabicaítaticue.

2

Nana comini facaina juiticaí

¹ Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca. ² Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii. ³ Iese cai jiiia, Jusiñamuimona mare. Naimiedi cai jilloitaraima. ⁴ Naimiedi nana comini naimaci jeacinomona jilluana jitaide. Uanaicinona naimaci uifnuana jiai jitaide. ⁵ Nana nairaiái imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie imanana, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. ⁶ Cai jeacinomona cai eneno illena, Jesucristo nana cai facaina jai fioidaite. Naimie jitailla facaiseconi Jusiñamuidi cominina bie rafuena jai uifnotade. ⁷ Bie rafue cue lollena, Jusiñamui cuena fetode. Judiaifñedinomo cue lollena, bie rafue naimaci inollena, uanaicinona naimaci uifñollena, cuena orede. Tainona lloñedicue.

⁸ Ie jira naga roracomo ite iifñiaí, cai comini onolliaí a ñuitacabilla isoi, comeciaino jeacino ifñenanomona, Jusiñamuimo jii ana jitaídicue. Naimaci comeciaino icirillacino ifñedemo, Jusiñamuimo jii. Naimaci comeciaino uaitajacino ifñedemo, Jusiñamuimo jii. ⁹⁻¹⁰ Riñoniaimo jiai lloiticue. Roracomo omoi jaia, abi ieduoamo comeciaina facañenamona, omoi ifotiena fino. Jamai ebinai raillano, abi ieduoamona abina finora jitañeno. Jamai ebinai raillano, abi ieduoamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina inoticaí” omoi raillanona, naimie jitailla isoi, marena omoi finolle. ¹¹ Rollena comini ofia, ñaifñenanomona, uaitañenamona omoi fueo. ¹² Omoi ofia, omoi iifñiaína llofuiana jitaifñedicue. Nainomo omoi ñaifñena. Iifñiaí omoi anamo illana jitaifñedicue. Iese omoi riñoniaimo lloiacadicue. ¹³ Jusiñamui Adán micorina nano finua jira, iese lloticue. Adán micorini finua mei, Eva micorina jiai finode. ¹⁴ Taifedi Adán micorina jifueñede; iadedi Eva

mícorina jífuate. Ie mei naie riño jeacínona fínode. ¹⁵ Iemona jilloite; iadedi uruiai jococana jaite. Riñoniaidi Jusiñamuina ñnoia, jiaie comínina isirua, Jusiñamui jitailla rafuena finoia, ie abina eenoia, jilloitimaci.

3

Creyentiaina sedaraini illa rafue

¹ Bicínodi uanaicino. Creyentiaina llofueraimana bu jaiacania, naimie comecimo mare jitaillacino ite. ² Bie isoide llofueraimana jaiacadimiena jitaidicue. Naga comíni naimie mare raillamie. Dañaiñona airedimie. Abi eenotimie. Ebena iñedimie. ñnogamie. Jiaie comíni naimie jofomo riadedi, raise nafuecabitimie. Jusiñamui uaina raise llofuecabitimie. ³ Jifairuiñedimie. Fuirirainidimie. Raire icirirainidimie. Ucubena nicidoñedimie. ⁴ Naimie comínina raise sedadimie. Naimie anamo naimaci illanona, naimie uruiai ie uaina raise ñnotadimie. Ie isoidimie llofueraimana jaillana jitaidicue. ⁵ Iese naimie iñenia, ie anamo itinona naimie raise sedañenia, ¿niese jiaie creyentiaina raise sedaite? ⁶ Como creyentena jaidimiena creyentiaina llofueraimana fetoñoeno, naie diga naimie abi iedoi raillano. Abi ieduamona, Taife isoi jeacino finoite. ⁷ Llofueraimana jaiacadimiena creyenteñedino: “Mare” raiñenia, naimiena fetoñoeno. Iese naimiena raiñenia, naimie joreñoena jeare ñaitimaci. Iemei Taife ramo jiai faite, naimie abido danomo uailena. Ie muidona naimie uaina jaca cacarefiñeitimaci.

Diáconuai illa rafue

⁸ Diáconuai creyentiai llofueraini isoi marena illa. ñnouiganona illa. Jifairaiñena. Ucubena nicidoñena. ⁹ Naimacidi Cristona cai ñnua rafuena jeanide comeciainomona ñnua. ¹⁰ Bu omoi fetoacania, naimacina nano facaci. Roracomo jiaie rana nano maijita. Iena raise finoia, diáconuaina jaite. ¹¹ Diáconuai ainiai jiai ñnogañaiñuaina illa. Jiaie comíni joreñoena ñaiñena. Jirorainina. Naga rafuena marena raise finua. ¹² Nana diáconuai aidi dañaiñoriède. Diáconuai uruiai naimaci uaina raise ñnua. Diáconuai imaci anamo itinona raise sedajana uñua. ¹³ Diáconuai marena maijia, comíni naimacimo iobillacinona fecaitimaci. Cristo Jesúna ñnuano, naimiena marefodo jiai lloitimaci.

Jusiñamuina ñnotino

¹⁴ Timoteo, raire o ñine jaiacadicue; iadedi uicodo bie rafuena omo cueticue. ¹⁵ Are cue riñenia, dani omoi creyentiai diese ofia, Jusiñamui ie comínina marena omoi illana omoi uiñollena, omo cueticue. Cajede Jusiñamuina jai sedadicaí. Uanaicínona riidoticaí. ¹⁶ Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaí:
Eniruemo Cristodi ñimana jai bairede.
Jusiñamui Joreñodi caina naimie uai siñonana uiñotade.
Jusiñamui jaienisai naimiena jiai cioidimaci.
Jiaie nairaiaimo naimiena lloticaí.
Iena cacajamona, ailluena comínidi diga nairaimona naimiena birui ñnotimaci.
Monamo naimie abido jai jaide.

4

Jainodi jiaiforie rafuena lloitimaci

¹ Jusiñamui Joreño caimo raise llote: “Jesucristo nia abido biñena fa-caiseconi damierie creyentiaí Cristona fañonocaitimaci. Taife díbeimo ite lloraini lluaana cacarefillamona, Janabamona ite llucínodo jaitimaci. Taifemona ite llucínodo jaitimaci”. ² Naie llorainidi: “Uanaicínona lloticaí” raitimaci; iadedi taino llocabiitimaci. Naimaci comeciaí jai tainomo iite. ³ Hima riño ie aina ollena rairuitimaci. Riño hima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiaí uanaicínona uñuanona, iobillanona guillena, naimiedi naga rana finode. ⁴ Nana Jusiñamui comuitaga guille radi mare. Iobillano iena cai feñuanona, guiticaí. ⁵ Jusiñamui llua jira, Jusiñamuimo cai jñia, nana guille radi jai mare. Iemona marañede rafue jaca caimo comuiñeite.

Jesucristo rafuedo raise ñnocana jai

⁶ Timoteo, cue lluaana creyentiaímo o lloia, Jesucristo díbeimo raise maijidió. Cristo uaina ñnocana o jailla jira, mare llogacínodo o jailla jira, raise maijidió. ⁷ Jamai rafuemo, jamai ñgaaímo o comecina facañeno; iadedi Jusiñamui jitailla rafuena finocana o jai. ⁸ Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui dine jairuido o jaillena, o comecina marena jiaí raise finotaite. ⁹ Bie llucínodi uanaicínó. Ie jira iena cai ñnuu. ¹⁰ Cai jillobillena, cajede Jusiñamuimo ocuiridicaí. Ie jira duere sefuillano maijidicaí. Jeacínomona Jusiñamuidi nana comínina jillobitacade. Naimiena ñnotínona jai jillotate.

¹¹ Nana creyentiaímo cue lluaana raise llofue. ¹² Naimacina o llofueia, coniruenta nia o illamona: “O afemo iticaí” naimaci raíadedi, damai íese raitimaci. Mare illacínodo o jai. Ie mei íese raíñeitimaci. Marena o ññaiamona, marena o illamona, jiaíe comínina o isiruillamona, Jusiñamuina o ñnuamona, o jeanide rafuena o finoñenamona, naimacidi fueoitimaci. ¹³ O dine nia cue riñenia, creyentiaí ofia, Jusiñamuina cuegafuinaína ado faca. Iena llono. Iena llofue. ¹⁴ Creyentiaína llofueraini navui ofidemo, Jusiñamuimona o baitajacínona o feñollena, naimaci onolliaí o ífogímo jonetímaci onolliaí o ífogímo jonetímaci. Naie fa-caiseconi Jusiñamui naimacina naicínona ona llotatate. Naicínona birui fañonocañeno. ¹⁵ Iena eo uuiucaí, nana comíni Cristona ñnocana o jaillana uñollena. ¹⁶ O comecina raise eeno. Marena raise llofue. Cristo uaina ñnocana o jai. Íese o jaia, jeacino finuamona jilloitio. Íese ona cacadino jiaí jilloitímaci.

5

Timoteo afemo itino diga ie illa rafue

¹⁻² Eimíaiaina illamona, o afemo itínona riire llofueñeno; iadedi o moomo o llua isoi, naimacina fecuise llofue. O anafemo itínona o amataímo o llua isoi, llofue. O afemo itíñaiñuaina o eimo o llua isoi, llofue. O anafemo itíñaiñuaina o miriñotiaímo o llua isoi, llofue. Naiñaiñuaimo jeare comecina facañeno. ³ Naiñaiñuaina canollena, feciñuaí comíni íñenia, naiñaiñuaina cano. ⁴ Feciñomo uruiaí ia, naimaci naiñaiñona canua, naiñaiño naimacimo duilla jira. Einamacina illamona, iemona naiñaiñodi íbana oite. Íese itena, Jusiñamuimona mare. ⁵ Feciñomo

urui*ai* iñenia, da Jusiñamuimo naiñaiño ocuride, naimie naiñaiño*na* canolena. Jusiñamuimo nagarui jicabite. Bie isoide feciñuain*a* cano; ⁶ iadedi Jusiñamuimo duiñede rana ebiruiga feciño*na* canoñeno. Jusiñamui anamo naiñaiño jai raise iñenamona, Jusiñamuimona naiñaiñodi jai fiodaitiñaiño isoide. Fiodaite comin*ina* jaca canoñedicai. ⁷ Ie jira creyentiaimo biena lloño, feciñuain*a* jeare bu ñai raillanona.

⁸ Ie comin*ina* canoñedimie Cristo uain*a* jai fainonocaide. Naimiedi Cristona inoñedimie baifemo eo jearedimie. ⁹ Creyentiaina sedarain*ina* canolle feciñu*ai* mameciain*a* o joneia, iese jone: Jai jionaidiñaiñu*ai* diese mameci jone. Dajede inirediñaiñu*ai* mameci*na* jone. ¹⁰ Mare rafue naiñaiñu*ai* finocabilla jira, jiaie comin*idi* naiñaiñu*ai*di mareñaiñu*ai* raillañaiñu*ai*. Ie urui*ai* raise sedadiñaiñu*ai*. Comin*ina* nafuecabitñaiñu*ai*. Jai creyentiaina abin*a* iedoñeno canocabidiñaiñu*ai*. Duidinona canocabidiñaiñu*ai*. Diese mare rafuena finocabidiñaiñu*ai* mameci jone. ¹¹ Feciñu*ai* diese mameci o joneia, nia jionaiñede feciñu*ai* mameciain*a* joneñeno. Naiñaiñu*ai* nano llotimaci: “Inina dane oñeiticai. Da Cristona sedaiticai” llotimaci. Ie mei uri iñenanomona, imana niciduamona, inina jitaitimaci. Ie jira naiñaiñu*ai* mameci joneñeno. ¹² Naiñaiñu*ai* navui llucanona jai fainonocail*a* jira, jiaie comin*i* naiñaiñu*ai* joreñuain*a* ñaitimaci. ¹³ Naiñaiñu*ai* diga jofomo macariruillamona, rairaiedimaci. Eo ñaillaredimaci. Naiñaiñu*ai* ñaiñenacinuaido ñaitimaci. ¹⁴ Nia jionaiñede itañaiñu*ai* iese iñellena, naiñaiñu*ai* inina dane uana jitaidicue. Ie mei urui*ai*renitimaci. Naiñaiñu*ai* jofona sedaitimaci. Ie mei budi naiñaiñuain*a* jeare ñaiñeite. ¹⁵ Cristona dajerie fainonocaida, Taife dibeimo jai jaidimaci. ¹⁶ Creyente cominimona feciño iade, da naimie naiñaiño*na* canua. Jiaie creyentiaimo naiñaiño*na* canolle rana jicañena. Ie muidona cominide feciñuain*a* canorenitimaci.

¹⁷ Creyentiaina llofuerain*i* marena maijia, raise ibauiga. Naimaci lloia, naimaci jiaie llofueia, eo raise ibauiga. ¹⁸ Moisés micori jiaie cuegafu*ai* iena llote: “Trigo oni juillena jurareta saisia, ie fuena maiñeno, ie guillena”. Guillamona ibana jai ote. Cristo jiaie llote: “Maijidimiedi ibauiga”. ¹⁹ Creyentiaie llofueraimana damie llogidoia, iena cacareñeno. Mena comin*i*, nibai daje amani comin*i* iese naimien*a* llogidoia, iemo cacarei. ²⁰ Creyentiaie llofuerainimona bu jeacinona finocabia, nana creyentiaie uicomo naimiemo riire lloño, jiaie creyentiaie daje isoi iñellena. ²¹ Dacinodo naga jeacino finoraimamo lloño. Nagamiemo riidoñeno lloño. Fecuisse damiemo lloñeno, naimiedi o nabain*a* jira. Jusiñamui cain*a* ciode. Jesucristo cain*a* ciode. Jusiñamui fetoca jaienisaie cain*a* jiaie ciodiaci. Ie jira dacinodo lloño. ²² Jeacino naimiemo ia, naimie jeacino facaisena o iñellena, creyentiaie llofueraimana jaillena, buna raire fetoñeno. Jeacinomona oni eneno o i. ²³ Eo o duia, da jinuina jiroñeno. O duicabilla jira, janore vino jiro, o jebe manollena. ²⁴ Jeacino dajerie finoia, iena uiñoticai, juez isoi Jusiñamui iena nia lloñenia. Jeacino jiaino finoia, iena uiñoñedicai; iadedi jiairuido Jusiñamui lloia, iena uiñoticai. ²⁵ Ie isoide. Mare rafue bu finoia, iena uiñoticai; iadedi birui iena cai uiñoñenia, jicarena finoñena jira, jiairuido iena uiñoticai.

6

¹ Jusiñamuina inote maijirainidi naimaci patrones eo inua. Ie mei Jusiñamuina inoñedino Jusiñamuina jeare ñaiñeitimaci. Cai llofuiaicinona jamaiñeitimaci. ² Jesucristona naimaci patrones inoia, maijiraini

naimaci uaina jiai #nua. Naimaci comeciai facañena: “Patrón creyentena illa jira, dani conima cai isiruilla jira, raise maijiñeiticai”; ia: “Raise maijiñeiticai” comeciaina facaja.

Uanañedicinona llucino

³⁻⁴ Cai llogacinodi uanaicino. Cai Nama Jesucristona lloticai. Bie llogacinomona naimie jitaile isoi cai illanona, raise uiñoticai. Jiaicnodo bu llofueia, abi iedote. Abi uiñofede. Uai eo uaitaiacade. Ie meinoconi comini abina uradoidimaci. Daajena comeciaina lloñfedimaci. Jiaie comini joreñona ñaitimaci. Cai ñiena bitimaci. ⁵ Uai uaitatimaci, naimaci comeciai marañeno illa jira. Uanaicinona jai uiñofedimaci. “Cristo uai llumona, ailluena ucubena oitica;” raillanomo comeciaina facadimaci. “Temona caimare iticai;” raillanomo comeciaina facadimaci. ⁶ Ie iadedi iese iñede. Cristona eo raise cai #nuamona, caimo diese ite ra diga caimare iticai.

⁷ Cai jeicia, jaca buenidicai. Cai fiodailla mei, cai rana uiñeiticai. Cai radi benomo fiebicaite. ⁸ Ie jirari, cai guille ia, cai iniroi ia, caimare bene cai illa. ⁹ Eo ucuberedinona jaiacadinona Taife eo ramo faite. Taife uaina #nuanona ucube ollena, ucuberedinona jaiacadinodi diga marañede rafuena finodimaci. Ja muidomo imaci abi faifitimaci. ¹⁰ Ucubena ebiruillanona, ucuberedinona jaiacadinona naga jeacinona finocabidimaci. Ucube ollena, dajerie Cristona jai fañonocaidimaci. Ie muidona eo duere sefuidimaci.

Jusiñamui uaina #nocana jai

¹¹ Ero, Timoteo, odi Jusiñamui fetocamiedio. Nana cue como lloga rafuemonona oni eneno o i. Mare rafuedo o jai. Jusiñamui jitailla rafuena finocana o jai. Jesucristona #nocana o jai. Jiaie cominina isirui. Mare rafue dibeimo o comecina jone. Riicnodo cominina llofueño. ¹² Jeacino dibeimo o iñellena, Jesucristona #nuanona, llocana o jai. Jaca itatajacinona marena raise #no. Jusiñamui ona fetode, o jaca illena. Navui diga cominimo Jesucristona o #nuana marefodo llotio. ¹³ Ie isoide Jesucristo. Poncio Pilato dine jaiie naimie itemo, marefodo: “Imiedicue” llote. Jusiñamuidi nana rana cajetade. Naimie caina jaca ciode. Jesucristo caina jiai jaca ciode. Ie jira uanaicinona omo lloticue. ¹⁴ Cai Nama Jesucristo nia abido ñienia, nana omo cue llogacinuai #no. Jearede rafuena finofeno, jiaie comini naie llogacinuaina uaitañellena. ¹⁵ Naimie jitaillirui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai moto illaima. Cai nanoca Nama. ¹⁶ Da jaca naimie fiodañeite. Eo isire lligañote ra dinomo naimie ite. Nainomo jaca bu iairei rinide. Bu naimena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaidicue.

¹⁷ Eo ucuberedinomo llono: “Abina iedoñeno. Ucubedi fuirede. Ie jira ucubena uamo ocuiriñeno; iadedi Jusiñamuimo ocuiri”. Cai comeciai jaisillena, naimiedi caimo rana eo raise fecacabide. ¹⁸ Ucuberedinomo jiai llono: “Omoi ucube diga mare rafuena fino. Jiaie cominimo ucubena caidiñeno fecajana cano”. ¹⁹ Ie muidona iese naimaci finoia, monamo naimaci isiruiga rana iite, jaiiruido iena. Iese naimaci jaja, jaca itatajacinona marena raise ua uiñoitimaci.

Fuiduacino

²⁰ Timoteo, cue omo llogacinona fañeno raise uiuicai. Jamai rafuemo cacarefiñeno. “Uanaicinona eo uiñoticai” dajerie raitimaci; iadedi

uiñoñedimaci. Naimaci ñaiana cacarefiño. ²¹ Dajerie iena cacajano, Cristona nia uiñoñedimaci. Jusiñamui ona duenaillasa. Jaca ñinori omo rafuena lloticue. Mai. Pablodicue.

TIMOTEOMO PABLO IE EMODOMO ORETAGA RABE

Uaiduacino

¹⁻² Timoteo, carta omo dane cueticue. ¿Nigacino? ¿Nie isoidio? Pablodícue. Jusiñamui cuena jitailla jira, Cristo Jesús oretagamiedícue. Cominimo jaca itatajacinona llollena, cuena oretate. Cristo Jesús cai ñnuamona, naimie diga jaca iticai. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uñocana mai o jai. Ona jai uri itatatiamaia. Iena uñocana mai o jai.

Jusiñamuimo iobillacinona fecade

³ Mare cue comecimona cue usumatia micoriai isoi, Jusiñamuina sedadícue. Timoteo, nagarui Jusiñamuimo cue jia, o facaisena iobillacinona fecadícue. ⁴ Cue comeci camareficaillena, ona eo cioacadícue. Navui cue o facadoia, o eiana comecitícue. ⁵ Cristo Jesús o ñnuana dane jia comecitícue. O usuño Loidadi ñnote. O ei Eunicedi jia ñnote. Ie mei ñnotio. Naimiena o ñnuana jai uñotícue.

⁶ Ie jira o comecina dane ocuiño, Jusiñamui uai o llofuellena. Cue onolli o ifogimo navui joneticue, ona fetollena, naimie uaina o llollena. Jusiñamuimona o baitajacinona naie facaiseconi feiñotio. ⁷ Jusiñamuidi comina o jaciruillana jitañede. Cai comeciaina ocuiñotajanona, caina jiaie comina isiruitallena, cai comeciaina eenotallena, ie Joreño caimo fecade. ⁸ Ie jira cai Nama rafuena o llwana meiruñeno. Cárcelmo cue illa jira, cuena jia meiruñeno. Cristo Jesús rafue muidona duere sefuidícue. Naie rafue muidona duere o jia sefua, rairuioicaiñeno i. Jusiñamui o comecina ocuiñotaite. ⁹ Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotañede; iadedi naimie jitailla jira, caina jillotate. Enirue nia finoñena facaiseconi caina jaie duenaite. Cristo Jesús caina iena jai uñotade. ¹⁰ Cai Jilloitaramadi Cristo Jesús. Caimo Jesús jai bairia jira, Jusiñamui caina duenaillana jai uñotícai. Fiodaillamona naimie jai jillode. Iemona jia jilloitícai. Naimie mare rafuemona naimie caina Jusiñamui ñbeimo jaca illacinona jai uñotade. ¹¹ Bie rafuena llollena, cuena fetode. Cuena oretaja jira, biena llofuetícue. ¹² Ie jira duere sefuidícue; iadedi cue illana meiruñedícue. Cue ñnogamiena cue uñua jira, naimie bille ñnori naimiedi nana cuemo naimie jai iga rafuena cue llofuellena, cuena raise eenoite. ¹³ Cue llua isoi o i. Uanaicinona llotícue. Cristo Jesús ñnocana o jai. Jiaie comina isiruicana o jai, Cristo Jesús o jainaiaila jira. ¹⁴ Jusiñamui Joreño caimo illa jira, omo naimie lloga uanaicinona fañonocaiñeno uuiicai. Uanaicinona o fañonocaiñellena, naimie ona canoite.

¹⁵ Diga Asiamo ite cominidi cuena fañonocaidimaci. Naimacimona Figelo cuena fañonocaide. Hermógenes cuena jia fañonocaide. ¹⁶ Onesiforo daje isoñede. Diga icaiño naimie cue comecina ocuiñotade. Cuena meiruñede. Cai Namadi Onesiforo jofomo itino duenaillasa. ¹⁷ Romamo Onesiforo navui ria, cuena isire jenuano, cuena baite. ¹⁸ Efesomo jaie cue ia, naimie cuena jia canode. Iena raise uñotio. Cai Nama ñco abido bia, cai Namamona naimie iba feiñuana jitaídícue.

2

O majia rafuena raise fuido

¹ Cuená fainonocaidino isoi iñeno; iadedi cue jito, Cristo Jesús ona canuano, Cristo dibeimo o comecina ocuiñocana jai. ² Diga cominimo cue llua navui cacadio. O uaina inotonomo cue llua llono, iena jiaie cominina naimaci llofuellena. ³ Cristo Jesús rafue muidona duere o sefua, rairuioicaiñeno i. Cai Nama rafuena o riidamona, naimie soldado isoidio. ⁴ Ie illaima uai naimie inoiacania, soldadodi soldadoñede rafuena maijiacaiñena. Ie illaima iobitallena, ie illaima ocuica rafuena finoacanite. Ie isoide. Da Cristo Jesús rafuena o fino, naimiena iobitallena. ⁵ Reglamientos llua isoi naimie raise jifanoñenia, jifanoraímadi bue isoide rana cioñede. Ie isoide. Hana o feiñollena monamo o jiaia, Cristo Jesús lludo raise o jai. ⁶ Illimo duere maijiraímadi majia jira, naiemona naie guiledi oga. Ie isoide. Duere o maji, ibana feiñollena. ⁷ Cue llamo o comecina facacabi. Cai Nama ona canoite, iena uiñollena.

⁸ Jesucristo fiodaillamona jillode. Iena comeci. Naimie usumadi David micori. Jesucristona cue llua jira, ⁹ marañedimie isoi cárcolmo duere jai sefuidicue; iadedi Jesucristo rafue nia llocana jaide. ¹⁰ Ie jira Jusiñamui fetocano facaina duere sefuidicue, Cristo Jesúsna naimaci inuamona naimaci jilloillena, monamo naimaci jaca illena. ¹¹ Bie llucinodi uanaicino:

Naimie dibeimo cai jaillamona, naimie diga jaca iiticaí.

¹² Naimie muidona cai duere sefua, naimie diga iiticaí, ie cominina naimie sedalle facaiseconi.

Naimiena cai janoia, naimie caina jiaí janoite.

¹³ Naimie raise cai inoñenia, naimie uai meidoñena muidona, naimiedi nia inogamie.

Timoteo illa rafue

¹⁴ O cominimo biena dane llono, iena comecillena. Jusiñamui facaina naimacimo llono: Uaina jamai uaitañeno, mare rafuena naicinomona comuiñena jira, naicinona cacadino comeciaina maretañena jira. ¹⁵ Marena maji, Jusiñamui ori iobillena. O meiruiñellena, naimie o majia jibuia, marena maji. Uanaicino o uiñuamona, naimie uaina marena raise llofue. ¹⁶ Jamai ñaiana cacarefiñeno. Comini jamai ñainoicaia, Jusiñamui jitailla rafuena finocana jaiñedimaci. ¹⁷ Diga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiaí jaide. ¹⁸ Uanaicinona fainonocaidiaimaiaí. Coco inua isoi, llofueñediaimaiaí. “Cai fiodaia, cai abi ico jilloñeite” llofuetiaimaiaí. “Cristona cai inua facaise jai jillodicaí. Cai fiodaia, cai joreño jaca iite” llofuetiaimaiaí; iadedi cai abi ico jillollena inoñediaimaiaí. ¹⁹ Ie ia Jusiñamui comini jaca inocana jaidimaci. Ie cominimo Moisés micori jaie llua mona, iaimaiaí finoca rafuena jiaí ñaite: “Jusiñamuidi ie cominina uiñote. ‘Jusiñamuina inoticue’ raitimiedi marañede rafuemona eneno illasa” llote. Ie jira iaimaiaí mona eneno o i.

²⁰ Ero, ucuberedimie jofomo diga guillirue joneuilla ra jai ite. Eo jitairedo rana jai ite. Janore jitairedo rana jiaí jai ite. ²¹ Ie isoide. Jusiñamui dibeimo itinomona naga isoide comini ite; iadedi jeacinomona eneno bu ia, Jusiñamui naimiena fetoite, ie eo jitailla rafuena finollena. Jusiñamui dibeimo raise majiite. ²² Ie jira conirueni comeciaí jitailla

maraiñede rafuemon a eneno o i. Marena i, Jusiñamui jitailla isoi. Jesucristona ñnocana jai. Nana cominina isirui. Uri i. Mare comeciãmona nana cai Namana sedadino diga iese i. ²³ Jamai ebena rafuemo ñeno. Naiemona icirillacinodi comuide. Iena uifotio. ²⁴ Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Ricaiñena. ²⁵ Naimie uaina jitañedinona fecuise llofuega. Ie mei Jusiñamui naimaci comeciai iuaina nibai meidotaite, uanaicino dibeina uifollena. ²⁶ Ie mei abi uifuanona, Taife anamona jilloitimaci. Taifedi naimacina ie anamo jai itatate.

3

Jusiñamui dibeimo iñedinomona abina rairui

¹ Bie llucinomo comecina raise faca. Jesucristo abido bille fa-
cise iairei ia, creyentena illena eo sefuirenite. ² Naie facaiseconi
comini dani imaci abina isiruitimaci. Ucubena ollena eo nicidoitimaci.
Abina iedoitimaci. Abina biruitimaci. Jusiñamuina eo jeare ñaitimaci.
Naimaci moo uaina, naimaci ei uaina ñnoñeitimaci. Jiaie cominimo
iobillacinona jaca fecañeitimaci. Jusiñamuina jaca jitañeitimaci. ³ Jiaie
cominina duenañeitimaci. Comeciaina jaiarenitimaci. Jiaie comini
joreñaona eo jeare ñaitimaci. Naimaci comeciaina eenoñeitimaci. Ebe
isoi naga rana duere finoitimaci. Mare rafuena jitañeitimaci. ⁴ Naimaci
nabaiñaina janoñeitimaci. Jiaie cominimo comeciaina facañeitimaci. Eo
abina iedoitimaci. Naimaci comeciai jitailla rafuena finoacanitimaci.
Jusiñamui rafuena isiruiñeitimaci. ⁵ “Jusiñamuina sedadicaí” raitimaci;
iadedi Jusiñamui uaina jamaitimaci. Bie isoide comini diga nabairiñeno.
⁶ Naimacimona dajerie jiaie jofuemo macaritimaci, naie jofuemo ite
riñoniaina jifuiãnona llofuellenã. Diga jearede rafuena finuano, naie
riñoniai ebena itimaci. Naimaci comeciai uaillaí raire meidocana
uitimaci. ⁷ Naga lloraima lluaamo naiñaiñuai cacareidimaci; iadedi
uanaicinsona jaca uifioñedimaci. ⁸ Naimaci comeciai eo maraiñede.
Jusiñamui uaina uifioñedimaci. Jannes, Mambres diga, Moisés micori
lloga uai jaie uaitatiaimaiaí. Ie isoi bie comini uanaicinsona birui jiaí
jitañedimaci. ⁹ Nana comini naimaci rafue jamai ebe isoi finoca rafue
uifuaõmona, Jannes iaímaiaí Mambres rafue jaie fuilla isoi, naimaci rafue
raire fuite.

Timoteo uanaicinsona ñnuãnona jailla

¹⁰ Timoteo, cuena uifotio. Cue llofuiana uifotio. Cue illana uifotio.
Cue jitailla rafuena uifotio. Cristona cue ñnuãna uifotio. Icirriñeno
fecuise lloticue. Cominina isiruiticue. Duere cue sefuia, cue comecina
ocuiñoticue. Iena uifotio. ¹¹ Antioquãmo, Iconiõmo, Listramo cuena
duere finodimaci. Duere sefuidicue; iadedi nana naiemona cue Nama
cuenã jillobitade. ¹² Jusiñamui jitailla rafuena finuano, Cristo Jesús uaido
jaidinodi duere sefuitimaci. ¹³ Ie facaiseconi maraiñedinodi maraiñede
rafuena finocana jaitimaci. Jifueraini daje isoi jifuericana jaitimaci.
Naimacidi abido naimacina jiaí jifueitimaci. Iese jaitimaci; ¹⁴ iadedi cue
llofuia uaido ñnocana odi jai. Cuemona jai fueotio. O usuõmona jai
fueotio. O eimona jai fueotio. Ie jira uanaicinsona jaie ñnotio. ¹⁵ O
uruenamona Jusiñamuina mare cuegafuiana cacadio. Naie cuegafuiaí
cai jilluana caimo lloste. Cristo Jesúsna cai ñnuãmona, jillobidicaí. Iena
caimo jai lloste. ¹⁶ Comini nana naie cuegafuiana cuetimaci; iadedi

Jusiñamui jitailla isoi, naga cuetimie cuete. Ie jira nana naie cuegafuiaí Jusiñamuimona ite. Cominimona iñede. Ie jira naie cuegafuiaímona uanaicinona uñotícaí. Cai marañedicinona caimo llote. Cai comeciaí marena illena, Jusiñamui jitailla isoi, caimo llote. ¹⁷ Iese llote, naimiemo cai duillamona, nana Jusiñamui rafuena cai raise uñollena. Raise uñuamona, Jusiñamui rafuena raise llofuerenitícaí. Naga Jusiñamui jitailla rafuena jiaí raise finorenitícaí.

4

¹ Jiaíruido Cristo Jesúsí illaímana eniruemo abido biite. Illaíma isoi ie cominina sedajite. Naimiema ñnoñenamona nia cajedinona duere finoite. Jai fiodaitinona jillotajanona, naimiema ñnoñenamona, naimacina duere finoite. Jusiñamuidi birui caina jaca ciode. Cristo Jesús birui caina jaca ciode. Iena cue uñuamona, bie uai omo lloiticue. ² Naimiema ñnoñedinona Cristo duere finoñellena, naimie rafuena naimacimo jaca llono. Comini o dafaífa, comini ofia, comini o dine ria, naimacimo iena lloitiosa. Naimaci jitaia, llono. Jitaiñenia, jiaí llono. Jeacinona bu finoia, naimacimo llono. Marena naimaci illena, naimacimo llono. Fecuisse jaca llofue. ³ Jiaíruido dajerie uanaicinona jitaiñeitimaci. Jiaífuena jitaitimaci. Naimacimo dani naimaci cacaacana rafuena llollena, diga llofuerainina jenoitimaci. ⁴ Uanaicinona fañonocaida, ñgaiaí icinuaido facajitimaci. ⁵ Timoteo, o comecina eeno. Duere o sefuaí, rairuioicaíñeno i. Jesucristo rafuena llocana o jai. O llofuiaicinona marena fuido.

⁶ Jai iaírei ite cue meinellirui. ⁷ Cai Nama rafuena llocana cue jaillano, iena marena jai riidotícue. Cue illa dinori jai fuiacade. Cai Namana fañonocaiñedicue. ⁸ Cai Namamona marena cue illa jira, monamo ibana feiñoitícue. Iemo jai ocuiridícue. Iena cai Nama cuejena eenote. Naimie abido billiruiemo iena feiñoitícue. Caina raise uñuamona, dama cuemo fecañeite; iadedi nana naimie abido billena jitaidinomo ibana jiaí fecaite.

Pablo damieriena ñaia rafue

⁹ Timoteo, raise cue dine bi. ¹⁰ Biniemo ite rafuena Demasdi eo ebiruilla jira, Tesalónicamo naimie jaillano, cuena fañonocaiide. Galaciamo Crescentedi jai jaide. Dalmaciamo Tito jai jaide. ¹¹ Dama Lucas cue diga ite. Marcos o diga ati. Cuena canollena, naimiema jitaidícue. ¹² Efesomo Tíquicono oredícue. ¹³ O bia, cue fiebide ñiroina ati. Troasmo Carpio jofomo fiebide. Cue libros ati, cue rabiaí diga. ¹⁴ Alejandro raillamie navui cuena jeare finode. Naimiedi lloeomona rana finoraíma. Cai Nama naimiemo iba oite. ¹⁵ Naimiemona o abi rairui. Naimie cue lluana eo jitaiñede. Iena uaitate. ¹⁶ Illaicomini dine cue rafue nano cue riidoia, jaca buna cue facaina riidoñede. Nana cuena fañonocaidimaci. Jusiñamuidi naimacimo iba uana jitaiñedicue. ¹⁷ Cai Nama cue facaina ite. Cue comecina ocuiñotade, nana judíuainéidinomo naimie uai raise cue llollena. Naimie muidona cue fiodaisaillanomona jillobidícue. ¹⁸ Cai Nama naga marañede rafuemona cuena eenoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidícue.

Fuiduacino

¹⁹ Diga cominimo cue uai oredícue: Priscamo, Aquilamo, Onesíforo jofomo itinomo. ²⁰ Corintomo Erasto fiebide. Miletomo Trófito duide fañonocaidícue. ²¹ Rollime nia iñenia, cue dine bi. Diga comini omo

naimaci uai oredimaci: Eubulo, Pudente, Lino, Claudia, ua nana creyentiaj.

²² Cai Nama o começi ocuiñotajasa. Naimie nana omoina duenaillasa. Mai. Pablodice.

TITOMO PABLO ORETAGA RABE

Uaiduacino

¹ Tito, omo cartana oretaiacadicue. ¿Nigacino? ¿Nie isoidio? Pablocicue. Naimie cominina cue illamona, naimie jitailla rafuena cue finuamona, Jusiñamui anamo llofuecabiticue. Ie rafuena llofuel-lena, Jesucristo ie oretagamiedicue. Jusiñamui fetocanona ñnotallena, naimacina uanaicinona uifnotallena, Jusiñamuina naimaci raise sedallena, cuena oretate. ² Naimie diga jaca cai illemo cai ocuirilla jira, Jusiñamuina sedadica. Enirue nia ifena facaiseconi, Jusiñamuidi cai jaca illena jaie llote. Naimie taino jaca lloñede. ³ Iemei naimie jitaillarui caina ie rafuena jai uifnotade. Naie rafuena cue llollena, naimie cuena oretate. Naimiedi cai Jilloitaraima. ⁴ Tito, bie carta omo cueticue. Cue isoi o ñnua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaia ona jai duenaitiaimaiaia. Iena uifnocana mai o jai. Ona uri jai itatatiaimaiaia. Iena uifnocana mai o jai.

Creventiaina sedaraini illacinuai

⁵ Nainomo ite rafue o fuidollena, Creta railla uiasimo ona fainonocadicue. Creventiaina sedallena, naga nairai illanomo llofuerainina o fetuana navui omo lloticue. ⁶ Creventiaina llofuerainina o fetoiia, nagamie bie isoidimiena fetoi: Nana comini naimie mare raillamie. Dañaiñona airedimie. Nana naimie uruiaia creventiaina itimie. Nana comini naimie uruiaia mare raillamie. Naimie uruiaia ie uaina ñnotimie. ⁷ Jusiñamui facaina naimie maijia jira, creventiaia sedaraimadi maremiena illa. Abina iedoñena. Raire icirifñena. Jifairuifñena. Fuiriruiñena. Ucubena nicidoñena. ⁸ Ie jofomo cominina raise feifñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua. ⁹ Naie uai raise llofuiamona comini comeciaina ocuifnotallena, naimie uaina uaitatinona llucaitallena, cai llofuiia isoi uanaicinona ñnocana naimie jailla.

¹⁰ Ie isoidinona fetoi, ailluena comini Cristo rafuena raise ñnoñena jira. Tainocinuaina ñaicabitimaci. Cominina jifuecabitimaci. Judiuai creventiaimona diga comini iese itimaci. ¹¹ Ie jira naimacina llucaita. Naimacidi diga cominina uri itafañedimaci. Uanaifñedimaci llofuetimaci, ucube bifuiano ollena. ¹² Naimacimona comini rafuena lloraia navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillardimaci. Rairaidimaci” raite. ¹³ Naimiedi uanaicinona llote. Ie jira creventiaimo riire llono, naimaci Jusiñamui uaina raise ñnollesa. ¹⁴ Judiuai ñgaaia naimaci ñnoñellena, comini lletarafuena naimaci ñnoñellena, naimacimo riire llono. Damerie uanaicinona jitaifñedimaci. ¹⁵ Ero, mareuidinomona naga ra mare. Jusiñamuina ñnoñedinomona naga ra jearede. Naimaci comeciadi jai jearena jira, jeagerie comeciaina facacabidimaci. ¹⁶ “Jusiñamuina uifnoticaia” raitimaci; iadedi Jusiñamuina uifnoñedimaci. Naimaci finoca rafuemona iena uifnoticaia. Jusiñamui naimacina eo gañede. Buena ñnoñedimaci. Ie jira mare rafuena finuana uifnoñedimaci.

2

Creyentiaí marena illena, uanaicinona llofue

¹ Tito, Jusiñamuina ñnoñedino isoi iñeno. Odi uanaicino llofue, naimaci marena raise illana uiñollena. ² Uaicimaiaina llofue. Canamacina jiaí llofue: Jifaiñeno. ñnogamiena jai. Uairico isoi iñeno. Jusiñamui uaina raise ñno. Omoi ecimo itinona isirui. Duere omoi sefuia, omoi comeciaina ocuiño. ³ Uaicíñuaina llofue. Cañaiñuaina iese jiaí llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeiñaiñuai mare rafuedo jaitimaci. ⁴ Naiñaiñuai ñina isiruillena, naiñaiñuai uruiaina jiaí isiruillena, ⁵ uairico isoi iñellena, jearede rafuena finoñellena, jofomo raise maijillena, cominina duenaillena, naiñaiñuai iniñiaí uaina ñnollena, jiaie comini Jusiñamui uaina jamaiñellena, naie cañaiñuaimona fueoitimaci. ⁶ Einamacimo llono. Coniruenimo jiaí llono: Ieñede ramo omoi comeciaina facañeno. Uairico isoi iñeno. ⁷ Tito, naga rafue o finua diese, mare rafuedo o jai. O llofua, uanaicinona llono. Jamai ebe isoi llofueño. ⁸ Marena llofue. Marena o llofua, ¿niese comini o uai uaitaitimaci? Uaitañeitimaci. Iemei o díbeimo iñedino meidaitimaci, caimo jearede rafue iñenia. Ie jira cairi ñaiñeitimaci. ⁹ Patrón anamo itinomo iese llono: Omoi patrón uaina ñno. Naimie jitailla rafuena raise fino. Naimie uaina oñeno. ¹⁰ Rana fiñeno. Naimie raruiaí raise seda. Iese naimaci ia, naimaci raise maijia, naimaci patrón: “Jusiñamui uai mare” raite. Jusiñamuidi cai Jilloitaraíma.

¹¹ Jusiñamui caina duenaillena jai cai uiñua jira, naicinona llofue. Naimiedi nana cominina jillotaicade. ¹² Naimie uai caimo llote: “Cue díbeimo iñede rafuena eneno fañonocai. Maraiñede rafuena jitaíño. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina ñnocana jai”. Iese cai illana Jusiñamui birui jitaide. ¹³ Jiaí caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiaí cai Jilloitaraíma”. ¹⁴ Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. ¹⁵ Naie rafuena llofue. Maraiñede rafue comini finoia, naimacimo llono. Illaíma uai isoi llono. Cominidi o uaina jamaiñellena, raise llofue.

3

Creyentiaí illacinuai

¹ “Omoi illaicomini uai anamo i” creyentiaímo dane llono. Omoi illaicomini lluacinona ñno. Mare maijille ia, iena raise fino. ² Jiaie cominina jeare ñaiñeno. Fuiríño. Fecuisse uiuicai. Nana comini diga marena ñaino. ³ Jiaie cai jiaí ebe isoidicai. Jusiñamuina ñnoñedicai. Taife caina jifuate. Dani cai comeciái jitaillacino railla isoi finouidicai. Diga ie jearede rafuena finouidicai. Jiaie cominina jeare finouidicai. Marairainidicai. Abina uradoisoidicai. Cominidi caina enoisoidimaci. Coninina jiaí enoisoidicai. ⁴ Ie ia Jusiñamuidi mareñienana jai fididicai. Naimie caina isiruillana jiaí fididicai. ⁵ Ie mei Jusiñamui caina jillotate. Mare rafuena cai finoñedicaí; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie díbeimo cai comeciaina dobaiñoticai. Jusiñamui Joreño cai comeciaina marena

finode. ⁶ Ie Joreño caimo raise fecade, Jesucristo finua muidona. Jesucristo cai Jilloitaraíma. ⁷ Ie jira naimiemona marebicaidícaí. Caina duenailamona, marebicaidícaí. Caina ie cominina itatate. Iemona naimie diga jaca illemo ocuiridícaí.

⁸ Tito, cue lluacínodi uanaicino. Jusiñamuina ñnotino marena maijillena, cue lluacínona llo-llocai. Cue lluacino mare. Ie jira nana comínidi iena cacacabillasa. ⁹ Ebena ñaiñeno. Omoi usumatiaí mameciaína jamai sia-siadoñeno. Moisés micori llogacínuaína uaitañeno. Naicino diga buena oñedícaí, Jusiñamui jitaillacínona cai finollena. ¹⁰ Roracomo comíni comeci jiaifocaitatímie ia, naimiemo llono: “Iena finoñeno”. Dacaiño o llumona naimie ñnoñenia, dane llono. Ie mei ñnoñenia, naimie diga omoi ñaiñeno. Naimie diga omoi nabairiñeno. ¹¹ Uanaicínodo naimie jai jaiacaiñede. Jeacínona jai finode. Naimie iena jai uíñote.

Fuiduacino

¹² Artemas o dine cue oretaia, Tíquico o dine cue oretaia, Nicópolis railla nairaimo are sedañeno raire bi. Nainomo rollime facaiseconí cue comeci illana jitaide. ¹³ Zenas railla abogado Apolos iaímaiaí diga cano, iaímaiaí oni jaiacana jira. Iaímaiaí jitaile rana feca. ¹⁴ Dueredino ia, naimacina canollena, creyentiaímo: “Marena maiji” jiaí llono. Naimaci jamai iñellena, iese llono.

¹⁵ Cue diga itino naimaci uaina omo oredimaci. Jesucristona cai ñnua jira, caina isiruitinomo cue uaina llono. Jusiñamui nana omoína duenailana uíñocana omoi jaillana jitaídícue. Mai. Pablodícue.

FILEMÓMO PABLO ORETAGA RABE

Filemómo Pablodi carta orede

¹ Filemón, bie carta o dine oredicue. ¿Nie isoidio? Pablodicue. Jesucristo rafue cue lluamona, cárcelmo iticue. O dine cue uai oredicue. Timoteo cue diga ite. Ie uai jiai orede. Cai Moo Jusiñamuimo jai cai jainaiaila jira, naimiedi coco ama. Coco diga Cristo facaina o maijia jira, ona isiruiticoco. ² Coco uaina Apiamo jiai oredicoco. Cristo dibeimo naiñaiño illamona, naiñaiñodi coco miriño. Coco uaina Arquipomo jiai oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiai oredicoco. ³ Cai Moo Jusiñamui, cai Nama Jesucristo diga, omoina jai duenaite. Iena mai uiñocana omoi jai. Iaimaia omoina uri jai itatate. Iena omoi uiñocana mai omoi jai.

Filemón Cristona ñnocana jaide

⁴ Jusiñamui diga cue ñaia, o facaina cue jiaia, naimiemo iobillacinona fecadicue. Mare rafuena o finuana cue fidiia jira, naimiemo iobillacinona fecadicue. ⁵ Cai Nama Jesúsna ñnocana o jaillana fididicue. Nana creyentiaina o isiruillana jiai fididicue. ⁶ Cristo dibeimo cai illa muidona, naimiemaona diga marecinona feiñoticaí. Cristona o ñnuamona, jiaie creyentiaina o nabaia, omona naie marecinona uiñoitimaci. Naga mare ra uiñocana naimaci jaillana jitaicidicue. ⁷ Cue ama, creyentiaina o isiruilla jira, iobidicue. O muidona creyentiaie comeciaie caimare uri illa jira, cue comeci iocire ite.

Onésimo facaina Pablo ñaite

⁸ Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue; ⁹ iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue. ¹⁰ Onésimo facaina ñaiacadicue. Cárcelmo cue illa facaiseconi, cue muidona Cristona naimie ñnua jira, naimie cue jitiona jaide. ¹¹ Omo naimiedi marañede rafue navui finode. O mullaíma naimie illanona, raise maijiñede. Bene aisiamona, Cristona naimie ñnote. Cuen a birui eo canode; iadedi birui o diga raise iacade. ¹² O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comecina jiai oretaiticue. ¹³ O facaina naimie cuena birui canode. Cue diga naimie fiebillana jitaicidicue; ¹⁴ iadedi: “Jee” o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitañedidicue; iadedi dama o comeci jitailla jira, mare rafuena o finuana jitaicidicue. ¹⁵⁻¹⁶ O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaíma; ia naimiedi jiai birui o ama. Naimiena isiruillanona feiño. ¹⁷ O nabaina iticuen a cuena o feiñua isoi, naimiena feiño. ¹⁸ Naimie marañede rafuena omo navui finode. Omo naimie nia debia, cue facaina jone. ¹⁹ Iena ibaiticue. Bie carta dama cue cuiamona, naimie debiana cue ibajana uiñotio. Omo eo lloñeiticue; iadedi cue muidona Cristona o ñnua jira, ailluena cuemo debedio. ²⁰ Cue ama, coco Nama Cristomo coco jainaiaila jira, cue jitailla rafuena fino. Ie mei cue comeci uri iite. ²¹ Cue jitailla rafue o finollena uiñotitue. Cue

jitaila rafue baiŕfemo o finollena uiñoticue. ²² Jiaie rafuena lloiacadicue. O jofomo daje cuarto cuejena fino. Cue facaina o jüia, Jusiñamui jitaia, o dine jaiticue.

Damierie imaci uaina jiaie orede

²³ Omo Epafraŕs ie uaina orede. Jesucristo rafue llua muidona, cárcelmo cue diga naimie ite. ²⁴ Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide. ²⁵ Cai Nama Jesucristo nana omoi creyentiaie comeciaina ocuiñotajamona omoina duenaillasa. Mai. Macaibaite. Pablodicue.

HEBREOS COMINIMO ORETAGA RABE

Jesucristo rafuena jai cai cacajamona, Jusiñamuiña jai uiñoticaí

¹ Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena lllollena, jaiacaiño ie jaienisaina orede. Jaiacaiño nicai anado Jusiñamui ie rafuena llote. Iena lllollena, jaiacaiño ie facaina lloraini micoriaina orede; ² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote. ³ Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jiacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisai baifemo faite

⁴ Jusiñamui Jitona naimie illamona, naimie illano Jusiñamui jaienisai illano baifemo faite. Ie illanomona naimie Jusiñamui jaienisai baifemo faiana uiñoticaí. ⁵ Jusiñamuidi: “Cue Jitodio” Cristomo llote; iadedi ie jaienisaimo iese lloñede. Jaiacaiño llote: “Naimie Moodicue. Naimie cue Jito” llote. Ie jaienisai ie Jito baifemo faiñena jira, ie jaienisaimo iena jaca lloñede. ⁶ Ie dajede Jito eniruemo oretaja facaiseconi Jusiñamui llote:

Nana cue jaienisai naimiemo iobillacinona fecaja;

⁷ iadedi jiaie rafuedo ie jaienisaina ñaite:

Cue ocuilla rafuena naimaci finollena, cue ocuilla diese naimacina oretacabiticue.

⁸ Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

⁹ Mare rafue finuana jitaideo.

Maraiñedicinona finuana jitaíñedio.

Ie jira ona caimare jai itataticue.

Monamo o abido billanona, cue jaienisai baifemo ona caimare itataticue raite. ¹⁰ Jaiacaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie finodio.

Mona jiai finodio.

¹¹ Bie eniruedi mona diga ico fuite.

ñiroi fuilla isoi, iñeite;

iadedi odi jaca iitio.

¹² Eniruena mona diga meidotaitio;

iadedi odi jaca daje isoitio.

Jaca iitio

raite. ¹³ Ie Jitomo buena llote; ia ie jaienisaimona damiemo iese lloñede.

Ie Jitomo llote:

Illaimana o illamona, cue nabei dine ana rai.

Nana o ðibeimo iñedinona o anamo itataitue.

¹⁴ Ie jaienisaïmo iena lloñede; iadedi naimacina oretacabite, ie Jitona iñotinona canollena. Ie jira nana naiemona, ie Jito ie jaienisaï baifemo faiana uiñoticaï.

2

Jusiñamui caina jillotaja rafuena cai jamaïñena

¹ Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai iñnuasa. ²⁻³ Ero, Jusiñamui ie jaienisaïna jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise iñnoñenia, Jusiñamui naimiena eo duere finode. Jusiñamui jaienisaï lloga rafue mare; iadedi Cristo birui lloga rafue jaienisaï jaie lloga rafue baifemo faia jira, Cristo rafuena cai iñnoñenia, Jusiñamui caina duere finollemona ua jilloñeiticaï. Ero, naimie cai jeacinomona caina jillotaïacade. Naie rafuena cai jamaïa, iena cai iñnoñenia, naimie caina duere finollemona ua jilloñeiticaï. Cai Nama Cristo naie rafuena jaie llote. Naimiena cacadinodi caimo iena jai llotimaci. Cristo rafuedi uanaicinona llotimaci. ⁴ Jusiñamui uai diga jaiïforiede siño rafuena naimaci finuamona, Cristo rafuedi uanaicinona uiñoticaï. Naimie jitailla ðiese naga creyentemo Jusiñamuidi ie uaina itatate. Naga creyente naimie ðibeimo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñoticaï. Ie jira naie rafuena cai iñnuasa.

Cai isoi illena, Jesucristo iñmana jaide

⁵ Jusiñamuidi ie jaienisaïna oretauide, ie jitailla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote. ⁶ Jusiñamui David micori iena jaie llote: Cai jamaï bue isoidicaï; iadedi caimo comecina facadiio.

Jamaï cominidicaï; iadedi caina canodio.

⁷ Caina cominina o finua jira, o jaienisaï isoi iñedicai.

Fodiañedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadiio.

⁸ Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira. ⁹ Jesúna dane lloiticue. Naimiena uiñoticaï. Eniruemo naimie jaie billamona, Jusiñamui ecimona naimie billa jira, Jusiñamui jaienisaï illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiena Jusiñamui abido itatajamona, Jusiñamui naimiena iobitade. ¹⁰ Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicaï. Naimie illanomo ico iiticaï. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiena iñotinodicaina jai raise canorede. ¹¹ Naimie fiodaillamona marebicaidicaï. Naimie ðibeimo jai cai illa jira, daajena mooredicaï. Ie jira naimiedi: “Cue cominidomoi?” caina meiruiñeno llote. ¹² Jusiñamui facaina lloraini

mícoríai llogacínomona naie rafue uanaicínona uifñotícaí. Jesús ie íco finolle rafuena jaie llotímaci:

Ie comínimo ie Moo rafuena lloite.

Ie comíní díga naimíe ofía, daajena Jusíñamuimo roitímaci

jaie llotímaci. ¹³ Jesúsna dane ñaitímaci:

Ie comíní díga naimíedi Jusíñamuina ñnocana jaite.

Jusíñamui comínina damíerie jailla jira, naimacídí jiaí naimíe comíní ñaitímaci. Naimací ñaía isoi, Jusíñamui comínina biruí jaidícaí.

¹⁴ Jusíñamuina ñnotínodi comínina jira, caí isoi naimíe illena, Jesúsdi comena jaide. Caí fiodailla isoi, naimíe jiaí fiodaite. Taife uaina caí ñnoía, jeacino finodícaí. Iemona fiodaicana jaidícaí. Jeacino anamona caina Jesús jai jillotaja jira, Jusíñamuimona Taife uai jai saide. Jusíñamui díbeimo íñenanomona jai jillodícaí. ¹⁵ Jesús nia fiodaíñenia, nana caí illa díñori fiodaillana jacíruicana jaidícaí. Jesús jai fiodailla jira, caina jacíruillacino anamona jillobitade. ¹⁶ Jeacino anamo naimací íñena jira, Jusíñamui jaiénisaimo ie comécina facañede; iadedí Abraham mícorí isoi ñnotínomo naimíe comécina facade. Naimacina naimíe jilloitallena, naimíedi comena jaide. ¹⁷ Comena naimíe illena, Jusíñamui naimíena orede. Caí isoi naimíe duere sefuillena, naimíena orede. Caí isoi ramo naimíe Taife faíamona, naimíe fueollena, naimíena orede. Caí illana raise uifñote. Iemona caina dueruíte. Jusíñamui jitaillacino finuana raise uifñote. Ie jira Jusíñamui díga caí facaina nanoca ñairaimana naimíe raise jaide. Ie jira caí jeacínona oni dotajana Jusíñamuimo jicanote. ¹⁸ Naimíe duere sefuilla jira, naimíe ramo Taife faía jira, caí ramo Taife faía isoi, naimíe caina canorede. Taife uai naimíe ñnoñena jira, caina canorede. Taife uaina caí finoñellena, caí comeciaina ocuíñotade.

3

Jesús Moisés mícorí baífemo faíte

¹ Cue amatíai, jeacino anamo omoi jai íñena jira, ie díbeimo omoína Jesús jai fetua jira, naimíe síño jítóna jira, naimíemo omoi comeciaina faca. Naimíena ja ñaitícue. Ie rafuena lollena, Jusíñamui naimíena orede. Naimíe lloga rafuena jai caí ñnuamona, naimíedi Jusíñamui díga caí facaina nanoca ñairaima. ² Ie Moo comínina naimíe raise sedajanona, naimíedi ie Moo uaina ñnuanona, iena finode. Nana Israel comínina naimíe sedajanona, Moisés mícorí Jusíñamui uaina ñnuanona, iena finode. ³ Jusíñamuimona Jesúsdi Moisés mícorí baífemo faíte. Moisés mícorí mare; iadedí naimíe caina jillotañede. Jesús caina jillotaja jira, Moisés mícorí baífemo Jesúsdi Jusíñamui íobide. Caí jillua jira, Jusíñamui comínina jaidícaí. ⁴ Buena caí finuamona, naimíe comínina jaiñedícaí; iadedí naimíe caina ie comínina dama ítatarede. ⁵ Naimíe facaina maíjiano, Jusíñamui llua isoi, Moisés mícorídi nana hebreos comínina raise sedade. Ie comínimo Moisés mícorí Jusíñamui naimíemo lloga uaina raise llote. Naimíemona Jusíñamui íco lllolle uaidí uanaicínona uifñotícaí. ⁶ Jusíñamui facaina maíjianaona, Moisés mícorí ie comínina sedade; iadedí Crístodi Jusíñamui Jítóna jira, naimíe ie comínina sedade. Naimíena caí ñnocana jaía, naimíemo caímare caí ocuíria, Jusíñamui ua comínidícaí.

Jusíñamuimona abído caí jaiñellena, bíe rafuemona caí fueua

⁷ Jusíñamui joreño caímo biruí lloía, iena cacareí. Ero, Jusíñamui jaie llua cuetatate:

⁸ Omoi jaiagai isoi iñeno.

Jofue iñenanomo omoi jaiagai ia, cue uaina iñoñedimaci.

⁹ “Naimie uaina raise uiñoticaí” raillanona, cuena facacabitimaci.

Cuarenta años cue siño finoca rana ciódimaci; iadedi jaca iñoñedimaci.

¹⁰ Naimacimo lloticue: “Omoi diga iciriticue.

Cue díbeimo omoi illamo omoi comeciaina facañedomoi.

Cue lloga uaido jaiacaiñedomoi”.

¹¹ Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

¹² Cue amatai, cai jaiagai rafuena cai uiñuamona, cai fueua. Uanai Jusiñamui mona abido omoi jaiñellena, naimie jai lloga rafuena omoi iñocana jai. Omoimona bu raise iñoiacaiñenia, naimiemo llono. ¹³ Jusiñamui rafuena omoi raise iñollena, nagarui conini omoi comeciaina ocuiñota. Omoimona jeacinona ebiruiñellemona, jeacino anamo omoi iñellesa, birui Jusiñamui rafuena raise iño. Jeacino anamo omoi dane jaia, Jusiñamui rafuena iñoñeitomoi. Iemona naimie riicaillafue anamo dane iitomoi. ¹⁴ Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille dinori naimiema cai nano iñnua isoi, cai iñocana jaia, marena caimare iiticaí. ¹⁵ Ie jira naimiema iño. Bie jaie cueda:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina iñoñedimaci

cueda. Naimaci isoi iñeno.

¹⁶ Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise iñoñedimaci. ¹⁷⁻¹⁸ Cuarenta años jofue iñenanomo itimaci; iadedi naimiema naimaci iñoñena jira, Jusiñamui naimaci diga icirite. Naimiema iñoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fióditimaci. ¹⁹ Jusiñamui uaina naimaci iñoñena jira, naie Canaán railla eniruemo jaca jaiñedimaci. Naimaci comeciái jaca uri illana uiñoñedimaci.

4

¹ Jusiñamui díbeimo raise cai illamona, Jusiñamui cai comeciái birui uri illana jitaide. Naimie lloga uai nia saiñede. Caimona damerie iese iñellesa, cai jaiagai isoi cai iñellena, abina rairuicana mai cai jailla.

² Jusiñamuidi comini comeciái uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci iñoñena jira, iemona buena oñedimaci. ³ Jusiñamuidi cai comeciái uri illana birui caimo jai llote. Cristo ie mare rafuena jai cacadicaí. Naimie uaina cai iñnua jira, cai comeciái jai uri ite. Cai jaiagai comeciái uri iñede. Moisés micori cuiamona iena uiñoticaí. Cueda:

Naimaci diga Jusiñamui icirilla jira, naimacimo lloga eniruemo jaiñedimaci

Comeciái uri illana jaca uiñoñedimaci

cueda. Jusiñamuidi nana comini comeciái uri illana jitaide. Eniruena naimie finocamo, comini comeciái uri illana jitaide. ⁴⁻⁹ Iena Moisés micori jaie cueda:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

cuega. Jusiñamuidi nana comini comeciai uri illana nia jitaide. Moisés micori facaise cai jaiagai comeciai uri illana jitaide; iadedi naimiena naimaci inoñena jira, naimaci comeciai jaca uri inede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci inoñena jira, naimaci comeciai jaca uri inede. Josué micori illa facaisemona diga años illanona, David micori comeciai uri illana jiai llote:

Naimie uaina birui omoi cacaia, iena ino llote. Naiemona Jusiñamui cai comeciai uri illana jitaillana uiñotica. Naimiena inotindicaimo naie rafue jai duide. ¹⁰ Jusiñamuina cai inuamona, cai comeciai jai uri ite. Cai comeciai uri illana, jiaie rafuedo jaiñedica. Naimiena cai inuamona, naimie illanomo ico iitica. Nana naimie finoca rafuena naimie fuidua mei, nainomo uri iitica.

¹¹ Cai jaiagai inoñedimaci. Cai faifiñellena, naimaci isoi cai jaiñena; iadedi Jusiñamui uaina inocana mai cai jailli. Jusiñamuina cai inuamona, naimiedi cai comeciai uri itatate. ¹² Naimiena cai inoñenia, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaimo riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaimo iticinona riire bairetate. Nana cai comeciaina facajacinuaina riire bairetate. ¹³ Jusiñamui buna reirinide. Jusiñamui nana caina ciode. Nana cai finoca rafuena uiñote. Nana cai comeciaimo iticinona uiñote. Ie jira naimie uaina inocana mai cai jailli

Jesúdi cai facaina Jusiñamui diga nanoca ñairaima

¹⁴ Jesúdi naie uaina cai inuamo canoite, naimiedi cai facaina Jusiñamui diga nanoca ñairaimana jira. Ie jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena inocana jaitica. ¹⁵ Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie inoñede. Iemona Taife ramo faiacinona inoñenana naimie uiñua jira, jeacinona oñede. Caina canorede. “Naimacina cano” ie Moomo llocabite. ¹⁶ Cai facaina ie Moo abimo naimie illa jira, cai comeciaina naimie ocuiñotaiacana jira, Jusiñamuina jaciruiñeno naimiemo cai jia. Naimie caina duenailamona, cai jeacinona feitaite. Cai comeciaina jiai ocuiñotaite.

5

¹ Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaitica. Moisés micorimo Jusiñamui jaiie llua isoi, Aarón micorina Jusiñamui fetuanona, jeacino facaina comini Jusiñamui faga toinaia fecauidimaci. Cominina Jusiñamui feiñollena, imaci ñairaima Jusiñamui diga ñaite. ² Nana comini isoi naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui dibeimo raise jaiñedinona fecuise canorede. ³ Comini facaina toinaia fecaude; iadedi naimiemo jeacino illa jira, naimie facaina toinaia jiai fecaude.

⁴ Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñotica. ⁵ Cristo jitailla jira, cai facaina Jusiñamui diga

ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie cuegafuiaimona iena uiñoticaí. David micori Jusiñamui lluaana jaie cuega:

Cue Jitodio. Jai o Moodicue

cuega. ⁶Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

⁷Eniruemo Cristo ia, imana naimie jailla jira, duere sefuide. Naimie fiodiacana iaírei ia, Jusiñamuimo eo jüide. Naimie fiodiañena Jusiñamui jillotarede; iadedi Jusiñamuimo ado llote: “Cuenta legi cacaitañeno; iadedi cue comeci jitailla isoi finoñeno. O comeci jitailla isoi fino” llote. Jusiñamui uaina naimie raise inua jira, Jusiñamui naimie jiana cacajano fairiote. ⁸Naimiedi Jusiñamui Jito; iadedi Jusiñamui naimiena legi cacatate. Iemona Jusiñamuina inocana jaca jaillana naimie uiñote. ⁹Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena inotinona jillotaite. ¹⁰Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saiñena jira, naimie ifomo illena, jiamiena jaca fetoñede. Ie isoi Jesús uai jaca saiñede.

Cristo dibeimona abido danomo jaiñeno

¹¹Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeci iena raise jitañena jira, omoimo iena raise llonidicue. ¹²Cristo rafuena are omoi cacaja jira, iedo omoi raise jaidomoidena, llofueraimona jaidomoi; iadedi iedo nia raise omoi jaiñena jira, jaimie omoina llofuiana nia jitaidomoi. Cristo dibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena inocana nia raise jaiñedomoi. Eo janorede janosa monoi ijina jitaicabide. Einamací isoi guillena nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uiñoñede. Monoi ijina jitaide isoide. Janosa monoi iji jirua mei, jiaie guille guillamona moonaitaite. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi. ¹³Janosa monoi ijina nia jitailla jira, naimie nia moonaiñenana uiñoticaí. Naimie nia abina uiñoñede. Jusiñamui jitailla isoi marecinona finuana nia uiñoñede. ¹⁴Guilledí moonaitimie ie. Ie isoide. Cristo rafuedo raise jaidimiedi Cristo rafuena uiñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiaí uiñote.

6

¹Diga icaiño bie rafuena jai cacadomoi. Cristona nano cai cacaja rafuena raise cai inuamona, jiaie Cristo rafuena raise uiñocana mai cai jailla. Cai nano cacaja rafuena cai fueoiacana siadocabiñelli. Cristo dibeimo cana itatañede rafuedo navui jaidicai; iadedi cai comeci iuai birui jai meidoticaí. Cristo dibeimo itatate rafuedo birui jaidicai. Jusiñamuina inuamona, naimie dibeimo jaidicai. ²Cristo dibeimo bautizajana jai uiñoticaí. Llofueraimona jaillena fetuana jai uiñoticaí. Creyentaina naimaci sedallena, naimacimo cai onolli jonianona, Jusiñamuimo

caí jianona, naimaci fetuana jai uifnoticai. Nana creyentiaí fiodaillamona jilluana jai ifnoticai. Jusiñamuidi naimiena ifnoñedinona íco jaca duere finollena jai ifnoticai. ³ Naie isoide rafue mare; iadedi iena caí raise ifnuamona, Jusiñamui jitailla jira, naimie caina canuamona, jiaie Cristo rafuena fueocana maí caí jailli. ⁴ Uanaicinona omoí comeciaí uifnuamona, Cristona omoí ifnuamona, Jusiñamui Joreño omoímo illamona, ⁵ Jusiñamui uaina mare omoí uifnuamona, Cristo uai siñonana omoí uifnuamona, abido danomo omoí jaiñellena, abina rairuicana omoí jai. ⁶ Cristo díbeimona omoímona bu sofetena, jiaimie naimiena jil-lotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitañena jira, Cristo fiodaillana jai jitañede. Cristona jeare jai finode. Cristo finoca rafuena jamaide. Cristona naimie jitañenia, ¿niese naimie jillobite? Jillobiñeite. Ie jira abido danomo omoí jaiñellena, abí rairuicana omoí jai. ⁷ Ero, iena jiaie rafuedo lloiticue. Jusiñamui noci deitacabilla jira, enirue naimie riatacabilla jira, iemo riará sicuanona, iena ie nama raitiia, naiemona ie llisillana naimie uamona, Jusiñamui iobide; ⁸ iadedi naie eniruemona riará sicoñenia, marañede. Monaigi cuiraió diga naiemona dama sicoia, marañede. Jusiñamui nainomo noci deitate; iadedi naiemona llisillana onide. Naie enirue caímanide. Marañede. Ie nama iobiñena jira, iena faínonocaide. Naie enirue isidomoí. Jusiñamuimona mare rafuena cacadomoí. Iena ifnocana omoí jaia, naimie omoína iobitaite. Iena omoí jitañenia, naimiemona duere sefuitomoí.

Jusiñamui llua jira, caí comeciaí ocuiñocana jaidicai

⁹ Cue isiruigaomoí, abí rairuillicinona omoímo lloticai; iadedi caí llofuiacino omoímo duiñenamo caí comeciaina facañedicai. Cristona ifnocana omoí jaillamo caí comecina facadicai. ¹⁰ Jusiñamui omoína raise uifnote. Naimiena omoí isiruillamona, jiaie creyentiaína omoí isiruillamona, naimacina navui canodomoí. Naimacina nia canodomoí. Ie jira naimiemona duere sefuiñeitomoí. ¹¹ Omoí comeciáimona jiaie creyentiaína omoí canua isoi, Cristo rafuedo nana omoí ille dínorí ifnocana omoí iocíre jaillana jitaídicaí. Naimie diga íco jaca omoí ille jira, íese omoí jaillana jitaídicaí. ¹² Cristo rafuedo omoí jaillamona omoí sefuiruifnenana jitaíñedicai. Jusiñamui lloga uaina ifnocana jaidino isoi, omoí jaillana jitaídicaí. Naimiena naimaci ifnuamona, naimie lloga uai fecuise naimaci ocurillanona, naimie lloga uaina oitímaci. Naimaci isoi omoí jaia, naimie lloga uaina jiaí oitomoí.

¹³ Ero, Jusiñamuidi Abraham micorímo lloga uaina uifnotomoí. Naimiedi Jusiñamuina jira, uanaicinona llote. Tainona lloñede. ¹⁴ Abraham micorímo llote: “Ona jaca canoiticue. O diga jaca íitícue. Cue llua jira, o jito comuite. O uruíaina eo jebuitaitícue” llote. ¹⁵ Abraham micorí naimie lloga uaina ifnote. Iena suillemo fecuise ocuride. Ie jito Isaac micorí, Jusiñamui llua isoi, comuide. ¹⁶ Uanaicino caí llocabillana jiaie comíni uifollena, Jusiñamui mamecina llifnoticai. “Jusiñamui caina cide” lloticai. “Uanaicinona caí lloñenia, Jusiñamui caina duere finoite” lloticai. Ie jira caí lloga uaina buna uaitañede. ¹⁷ Ie isoide. Jusiñamuidi ie finolle rafuena caímo jai llote. Naimie lloga uai meidonillana caí uifnuana naimie jitaide. ¹⁸ Naimiedi Jusiñamuina jira, ie uai naimie jai llua jira, naimie tainona llonillana uifnoticai. Ie jira naimie lloga uai naimie finuana uifnoticai. Naimiena caí ifnuamona, naimie anamo caí illa jira, caina

naimie eenua jira, cai comeciai ocuiñocana jaidicai. Naimie illanomo ico cai jaca illemo ocuiridicai. ¹⁹ Naie rafuena Jusiñamui llua jira, cai comeciai ocuiñocana jaidicai. Ie lloga uaina naimie finollemo ñnoticai. Monamo Jusiñamui illanomo ico cai illena eo raise uiñoticai. Nainomo fiebillena, barco ie lloelluna illemo dotaja isoi, cai comeciai naganomo iñellena, Jesús caina eenote. ²⁰ Jesús nainomo jai illa jira, naimie muidona nainomo jiai iiticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saiñena isoi, Jesús cai facaina ñaia uai jaca saiñeite.

7

Melquisedec micori illa isoi, Jusiñamui diga ñairaimana Jesús jaide

¹ Iena omoi raise uibiñollena, Melquisedec micori rafuena omoimo lloiticue. Naimie micoridi Salem railla nairai ie illaíma. Naimiedi comini facaina cai Moo Jusiñamui diga ñairaima. Cinco illaimana Abraham micori anafetitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñoticue” llote. ² Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaimana anafetitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micoridi Salem railla nairai illaíma. Melquisedec mameci oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. ³ Naimie moona, naimie eina, naimie cominina uiñoñedicai. Naimie jeiciaruina uiñoñedicai. Naimie fiodaillaruína uiñoñedicai; iadedi Jusiñamui Jito isoi Jusiñamui mona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jaiimie iñena jira, naimie ñairaimana nia ite isoide.

⁴ Ero, cai cominimona Abraham micori cai jaiagai baifemo faite; iadedi Melquisedec micori Abraham micori baifemo faite. Ie jira naimiemo ie décima facaina rana fecade. ⁵ Moisés micorimona Abraham micori uruiái Jusiñamui lloga uaina cacadimaci. Naimacimo Jusiñamui ie sedaja jofo finuana llote. Nainomo maijidinomo nainomo maijiana llote. Abraham micori uruiamona Leví railla nairaina fetode. Nainomo maijidino comini facaina Jusiñamui diga ñauidimaci. Jusiñamui ocuica rafue naimaci maijia jira, naimaci comini ramona décima facaina rana feiñoudimaci. ⁶ Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Leví railla nairai imieñede. Naisomo Abraham micori dine Melquisedec micori billanona, Abraham micorimo marecinona llote: “Jusiñamui ona jaca canoite. O diga jaca iite” llote. ⁷ Melquisedec micori Abraham micori baifemo faia jira, naie marecinona naimiemo llote. ⁸ Ero, Melquisedec micorimo Abraham micori rana fecade; iadedi Melquisedec micori fiodaillaruína uiñoñedicai. Naimie uai saiñena jira, jaiimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judíuai cominidi fecaudimaci; ia naie ñairaini fiodaicana jaillana uiñoticai. Naimaci uai sailla jira, jaiino naimaci ifomo meidoudimaci. ⁹⁻¹⁰ Leví micoridi Abraham jira.

Leví micorimona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feiñoudimaci. Leví micori nia comuiñenia, Melquisedec micorimo Abraham micori décima facaina rana fecajamona, Abraham micori Leví ie usumana jira, Melquisedec micoridi Leví nairai baifemo faiana uiñoticaí. Melquisedec micoridi Jusiñamui diga ñairaini baifemo faiana uiñoticaí. Melquisedec isoi Cristo illa jira, Cristodi Leví baifemo faiana uiñoticaí. Cristodi nana naie ñairaini baifemo faiana jiai uiñoticaí.

¹¹ Jusiñamui diga ñairaini finouilla rafuedo Jusiñamui jitailla isoi marebicaiñedicaí. Naimaci finouilla rafuedo cai jillobidicaídena, jiaie rafuena jitaíñedicaí. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiena orede. Caina jillobitallena, naimiena orede, jiaie rafuedo cai jillobiñena jira. Jusiñamui Moisés micorimo jaie llua isoi, comini facaina nano ñairaimadi Aarón micori. Naimiedi Leví railla nairai imie. Naimie jitoniamona comini facaina ñairainina itimaci. Iena uiñotomoi. Aarón jitoniamona Cristo iñede. Aarón maijia rafuemo Cristo duiñede; iadedi Melquisedec rafuemo duide. ¹² Comini facaina ñairainina jaillana jai meidua jira, Jusiñamuidi naimaci rafuena jiai meidote. ¹³ Iena lloiticue. Aaróni Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede. ¹⁴ Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micori jaie jaca lloñede.

¹⁵ Cristo billa jira, Moisés micori lloga rafue meidua uiñoticaí. Melquisedec micori illa isoi, comini facaina ñairaimana Cristo jaca iite. ¹⁶ Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide. ¹⁷ Jusiñamui lloga uaimona iena uiñoticaí. David micori naimiena jaie cuega:

Melquisedec micori illa isoi, odi comini facaina ñairaimana jaca iitio cuega. ¹⁸ Comini facaina ñairaimana jaillena Moisés micori jaie cuega. Naiemona jilluana comini oñena jira, naie uai jai saide. Naiedo jaillamona, naimaci jecinomona jilloñedimaci. Naiedo jaillamona, naimaci Jusiñamuina nabaiñedimaci. ¹⁹ Naiedo jaillamona, Jusiñamui jitailla isoi marebicaiñedicaí. Iedo birui jaiñedicaí. Jiaie rafuemo birui ocuridicaí. Cristo finoca rafue muidona, Jusiñamuina cai nabaillamona, Jusiñamui diga birui ñairedicaí.

²⁰ Jusiñamui llua jira, Cristo cai facaina ñairaimana jaide. ²¹ Leví micori jitonaiidi imaci jeciamaona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetoñede; iadedi ie lloga uaina jira, Cristo cai facaina ñairaimana jaide. David micori Jusiñamui llua jaie cuega:

Cue jai llua jira, cue llua finaioiticue.

Cristomo lloticue: “Comini facaina ñairaimana jaca iitio”

cuega. ²² Jesús ñairaimana jaca illa jira, naimie jailla rafue Moisés micori lloga rafue baifemo uaide. ²³ Moisés micori lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaitino ifomo meidollena. ²⁴ Naimie jaca illa jira, Cristo ñairaimana jaca iite. Naimie ifomo jaca buna meidoñeite. ²⁵ Naimie jaca illa

jira, comini facaina Jusiñamui diga jaca ñaicabite. Ie jira Cristodi nana Jusiñamui dibeimo iacadinona, naimaci jeacinomona, ua jaca jillotarede. ²⁶ Caina canollena, naimie isoide nanoca ñairaimana jitaídicaí. Ie Moo isoi naimiedi mareuidimie. Naimiemo jeacino jaca iñede. Jeacino finouidino dibeimo naimie iñede. Jusiñamuídi ie ecimo naimiena itatate. Ie jira naimie caina canorede. ²⁷ Jusiñamuimo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiai finodimaci. Cristo naimaci isoiñede. Naimie jitailla jira, comini jeacino facaina naimie fiodailla jira, comini facaina dacaiño fiodaite. Naimaci jeacino facaina naimie dane fiodaiñeite. ²⁸ Moisés micori facai ñairainidi jeacinona finocana jaidimaci. Fiodaicana jiai jaidimaci; iadedi jiaie rafue birui illa jira, ie uaido Jusiñamuídi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

8

Cristo muidona jiaie rafue birui ite

¹ Cristomo ite rafuena lloiticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. ² Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite. ³ Moisés micori naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiodaite. ⁴ Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. ⁵ Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñoticaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaie niacania, Jusiñamui naimiena llofujete: “Monamo iticue; ia cue jofo eniruemo jiai finoitomoi. Sinaí railla anedu navui o ia, ona llofueticue. Ona cue llofuia isoi, cue jofona fino” llofujete. ⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite. ⁷ Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

⁸ Moisés micori lloga uaina cai jaiagai ñinoñena jira, Jusiñamui jai llote: Naie cominimo jiaie rafuena ico jiairuido lloiticue.

⁹ Naimaci jaiagaimo cue lloga rafuena jaie lloiticue.

Naie facaiseconi Egiptomona naimacina canuanona, naimacina atidicue;

iadedi Moisés micorimo cue lloga rafuedo jaiñedimaci.

Ie jira naimacina fañonocaidicue.

¹⁰ Naimacimo jiaie rafuena ico jiairuido lloiticue.

Iena naimaci uiñuamona, cuena raise ñinoitimaci.

Naimaci Jusiñamuidicuenta jira, naimaci cuenta sedaitimaci.

Cue anamo raise naimaci illa jira, cue comininitimaci.

¹¹ Nana naimaci cuenta uñoitimaci.

Ie jira naimacimo: “Cai Namana omoi ñno” buna ñiese lloñeite.

Jamai bue isoidinomona cuenta ñnoitimaci.

Jamai bue isoiñedinomona cuenta jiai ñnoitimaci.

¹² Naimacina cue duenaillamona, naimaci jeacinona jaca feítaiticue llote. ¹³ Jiaie rafuena Jusiñamui jai lluamona, Moisés micorimo lloga rafue jai saillana uñoticaí. Moisés micori lloga rafue caimo jai duiñede. Cristomona jiaie rafuena birui jai cacadicaí.

9

Hebreos comini Jusiñamui jofona eniruego jaiie nitimaci. Monamo Cristo birui illanona, Jusiñamui ecimo naimie ite

¹ Jusiñamuidi Moisés micorimo diga rafuena jaiie llote. Naie rafuemonaca fueollena, iena lloiticue. Naimiena sedajana llote. Naimie sedalle jofo finuana jiai llote. ² Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofo jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce llomenoico joide. ³ Mena cuartos illena iniroina sebiñoga. Naie baifemo iticuartodi Jusiñamui illano. ⁴ Naie iniroi façai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micori jiguída nainomo jiai ite. Jusiñamui uaido naie jiguída dacaiño llisilla jira, nainomo ite. Jusiñamui cuega nofici ibici jiai ite. ⁵ Cajón emodo ibaillabicidi ite. Ie emodomo nagafebei ñine oromona finoca mena Jusiñamui jaienicí joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uñua jira, iena omoimo are lloñeiticue.

⁶ Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci. ⁷ Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, ñiruena naie cajón ibaillabicimo llerede. Dama naimie jeacino facaina ñiruena nano llerede. Chivo fajanona, dane fo jaide, ie comini jeacino facaina ñiruena llerellena. Iena finuamona, cominina duenaillamona, Jusiñamui naimaci jeacino facaina ibana oñede. ⁸ Jusiñamui joreño caina llofuiamona, biena birui uñoticaí. Naie jofo ñia ia, jamai comini fo jainina jira, Jusiñamui diga, cominidi atona nabairinidimaci. ⁹ Bie rafuena birui ñia finodimaci. Moisés micori lloga uaido bu jaiia, ie jeacino facaina faga toñiaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci. ¹⁰ Jusiñamuina naimaci raise sedallena, Moisés micoridi diga guille fimaide. Jiruana jiai fimaide. Naimaci abiaina finollena jiai llote. Nie isoide guille, ñie isoide jirole, ñiese naimaci abiaí finollena, nana naie isoide rafuedo jaidimaci. Cristo ñia biñena facaiseconi ñiese jaidimaci,

naimaci comeciaina raise finobitallena; iadedi Cristo billamona, jiaie rafue birui ite.

¹¹ Moisés micori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicai. Cai comeciari raise jai finobide. ¹² Naimie fiodailla mei, dane jilluanona, Jusiñamui dine monamo naimie abide jaide. Toñiaia diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate. ¹³ Marañede rafuena finoia, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jaie llua isoi, toñiaia diailla mei, jobaide toñiaia ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede. ¹⁴ Toñiaina fañeno Jusiñamuina birui sedadica. Cristo fiodaicana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade. ¹⁵ Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina inotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toñiaina Jusiñamuimo jaie fecauidimaci; iadedi Cristo jai fiodailla jira, naimiena bu inoia, naimie jeacino facaina Jusiñamui birui ibana oñeite. Nana Jusiñamuina inotinodi naimie jai llua isoi, naimie diga jaca iitimaci.

¹⁶⁻¹⁸ Jusiñamui jofo jaie finua mei, Moisés micorimo Jusiñamui llote: “Cue lloga rafuena raise finodomo. Bie jofomo cuena sedallena, faga toñiaia dirue diga bie jofona llerca. Nana naiemo ite rana jia llerca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicai. ¹⁹ Ie cominimo nana naimiemo Jusiñamui lloga rafuena Moisés micori llua mei, faga jurareta dirue diga, faga chivo dirue diga, nana naie lloga rafue cuegabiaina llerede. Cominina jia llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede. ²⁰⁻²¹ Jusiñamui jofona dirue diga llerede. Nana nainomo ite rana jia llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”. ²² Moisés micorimo Jusiñamui llua isoi, raise finobillena, nana rana dirue diga llerede. Toñiaia fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

Cristo fiodailla jira, Jusiñamui cai jeacinona oni dotade

²³ Jusiñamuidi Moisés micorimo toñiaina fajana jaie llote. Naie llua ana finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toñiaia baifemo faia jira, monamo cai jaca illena, jeacinona oni dotallena, Cristo fiodaite. ²⁴ Naimie fiodaillamona, cai facaina ñairaimana Cristo jaide.

Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. ²⁵ Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoifede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite. ²⁶ Cristo iesse itena, nano facaisemona diga icaiño comini jeacino facaina naimie fodaite. Iesse iñena jira, eniruemo birui dacaiño naimie billanona, naimie jitailla jira, naimie dacaiño fodaite. Jeacino anamo cai iñellena fodaite. ²⁷ Nana dacaiño fodaitecai. Iena uiñoticaí. Fodailla mei, Jusiñamui uicomo iiticaí. Naimiena cai iinoia, caina feiñoite. Naimiena iñoñedinona duere finoite. ²⁸ Dacaiño Cristo jai fodaillana uiñoticaí. Comini jeacino facaina dacaiño jai fodaite. Naimie dane bia, fodaillena biñeite; iadedi dane bia, naimiedi ie billemo iocire ocuiritina monamo Jusiñamui illanomo uite.

10

¹ Moisés micori facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micori lloga uaimona jeacino cai finuana uiñoticaí. Jusiñamui cai jeacino oni dotajana uiñoticaí. Jusiñamui jaca mareuidimiena uiñoticaí. Jusiñamuina nabaillena janore uiñoticaí. Cristo jiaie rafue caimo jai iga. Naimie fodailla jira, cai jeacino jai feide. Jusiñamuina raise nabairedicaí. ² Naie faga toiniái Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci. ³ Naiena fecauillamona, jeacinona finocana naimaci nia jaillana uiñotimaci. ⁴ Toiniaí dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona feitate. ⁵ Eniruemo jaiie billanona, Jusiñamuimo iena Cristo llote:

Jeacino facaina toiniái fajana jai jitañedio.

Ie jira eniruemo comena jaillena, comini jeacino facaina cue fodaillena, cuena oredio.

⁶ Jeacino facaina ailluena faga toiniaina jai jitañedio.

⁷ Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriai iena jaiie cuetimaci

llote. ⁸ Cristo lluana dane ñaiticue. Cristodi Jusiñamui Moisés micorimo llogacinona ñaite. Jusiñamui jaiie llua isoi, naimiemo cominidi jeacino facaina faga toiniaina jaiie fecauidimaci. Iena Jusiñamui birui jai jitañede.

⁹ Cristodi: “Jusiñamui jitailla rafuena finuaibiticue” lluamona, Moisés micorimo llogacino jai saillana uiñoticaí. Jiaie rafue birui illana jai uiñoticaí. ¹⁰ Jusiñamui jitailla jira, Jesucristona orede. Cai facaina naimie fodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicaí. Jai marebicaidicaí.

¹¹ Nana Moisés micori llogacinodo jaide ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede; ¹² iadedi dacaiño Cristo fodaillamona, Jusiñamuidi nana cai jeacino feitate. Bene naimie finoacaga rafue fuilla jira, illaimana jira, Jesús Jusiñamui

ecimo abido jaide. ¹³ Nana naimie dibeimo iñedinona naimie emod-ofillemo naimie birui ocuride. ¹⁴ Dacaiño Cristo fodaillamona, naimiena cai ñnuamona, Jusiñamuimona jaca marebicaidicai. ¹⁵ Jusiñamui facaina lloraima micori ciegafuemona Jusiñamui Joreño caina iena uiñotade. Naimie facaina lloraima micori Jusiñamui lluaana jaie iese cueda: ¹⁶ Hebreos cominimo jiaie rafue ico jairuido lloiticue.

Cue rafuena naimaci uiñuamona, cuena raise ñnoitimaci.

¹⁷ Jiai cueda:

Naimaci jeacino jaca feitaiticue.

¹⁸ Cristo jai fodailla jira, jeacinona Jusiñamui jai feitaja jira, faga toiniana naimiemo fecajana dane jai jitaiñede.

Jusiñamuina cai nabaiilli

¹⁹ Cue amatiai, Jesús fodailla jira, Jusiñamuina jaciruiñeno birui nabairedicai. Naimie cai Moo jai illanona, naimie diga meiruiñeno jaciruiñeno birui jiai ñairedicai. ²⁰ Moisés micori facaise nanoca ñairaima fo iticuartomo jaillena, sebiñoga ñiroi oni dibeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fodailla jira, Jusiñamuina atona birui nana nabairedicai. Naimie diga birui atona nana ñairedicai. ²¹ Cristona jai cai ñnua jira, cai facaina nanoca ñairaimana naimie illa jira, ²² cai mare comeciama Jusiñamui diga birui cai ñaiilli. Naimiena eo cai ñnuamona, cai comeciai jeanillamona, naimie dibeimo cai bautizamona, naimiena mai cai nabaiilli. ²³ Cristo caina jilluana ñnoticai Monamo naimie diga cai illemo ocuridicai. Jusiñamui ñnogamiena jira, naie rafuena ñnocana mai cai jailli. ²⁴ Jiaie creyentiamo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli. ²⁵ Rollena omoimona damierie oficabiñedimaci. Naimaci isoi omoi iñeno; iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iaiei illa jira, naimiena raise ñnollena, conini omoi comeciai ocuiñocana mai omoi jai.

²⁶ Cristo finoca rafuena bu uiñua mei, iena naimie ñnoñenia, jeacinona naimie finocana jailla jira, Jusiñamui naimie jeacinona feitañeite. Cristo fodaillana bu jamaia, Jusiñamui ie jeacinona feitañeite; ²⁷ iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo iñedinona duere finoite. ²⁸ Moisés micori jaie cueda: “Jusiñamui llote: ‘Menamie naimiena daje isoi lloillamona, Moisés micori llogacinona jamaidimiena dueruiñeno meinega’ ”. ²⁹ Iese duere sefuillana jaie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fodaillana bu jamaia, Jusiñamui Joreña jeare bu ñaia, Jusiñamuimona naimie eo duere sefuite. Cristo fodaillamona, Jusiñamui naimiena ñnotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite. ³⁰ Ero, Jusiñamui jaie llote: “Maraiñedicinona bu finoia, ibana oiticue. Cuena ñnoñedinona duere finoiticue” llote. ³¹ Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi iñellena, Jusiñamui lloga rafuena jamaiñeno.

³² Creyentiaina nano omoi jaillamo dane comeciaina faca. Creyentiaifnedinomona eo duere sefuidomoi; iadedi Cristona inocana jaidomoi. ³³ Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci. ³⁴ Cárcelmo jonetinona duenaillamona, naimacina canocabidomoi. Cristomo omoi duilla jira, creyentiaifnedino omoi rana bairodimaci; iadedi omoi comeciai nia iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi. ³⁵ Jusiñamuimona iba ico omoi feiñua jira, Cristona nia inocana omoi jai. ³⁶ Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia inocana omoi jai. ³⁷ Jusiñamui biena llua jira, iese suite: Cristo abido billirui iairei illa jira, naimiena inocana omoi jai.

³⁸ Naimie nia abido biñenia, omoina cue jai marebicaitaja jira, cuena inocana mai omoi jailli; iadedi cuena jitaifnedinori iobiñedicue.

³⁹ Naie isoidino jillobiñetimaci. Nimaci isoi iñedicaí. Jusiñamuina inocana cai jaillamona, jaca jillobidicaí. Ie jira naimiena inocana mai cai jailli.

11

Jusiñamuina inocana jaidicaí

¹ Jusiñamuina cioiñedicaí; iadedi naimie illana inoticaí. Naimie lloga uaina inocana jaidicaí. Naimie lloga uai suillena inoticaí. Ie lloga uai suillemo ocuiridicaí. ² Cai jaiagai mona damierie iese inocana jailla jira, Jusiñamuimona marebicaidimaci. ³ Jusiñamui finoca rana birui ciodicaí; iadedi jaié nano dofoconi jaca buena iñede. Naie facaiseconi dama ie uaido Jusiñamuidi eniruenta finode. Mona finode. Nana rana finode. Nana rana comuitate. Iena inoticaí.

⁴ Cai jaiagai rafuena ja lloiticue, naiemona cai fueollena. Abel micori Jusiñamuina jaié inuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise inoñena jira, naimie fecaca rari iobiñede. Iena feiñoñede. Abel micori Jusiñamuina inua jira, Jusiñamuimona naimie marebicaide. Abel micori jaié fiodaite; iadedi Jusiñamuina cai raise inollena, naimiemona nia fueoiticaí.

⁵ Enoc Jusiñamuina jaié inote. Naimiedi Jusiñamuina eo iobitate. Moisés micori ciegafuiaimona iena uiñoticaí. Jusiñamuina inuamona, Jusiñamuina eo iobitaja jira, naimie fiodaiñede; iadedi fiodaiñeno monamo Jusiñamui naimiena naimiena uite. ⁶ Jusiñamuina cai inoñenia, naimiena iobitañedicaí. Jusiñamuina cai nabaiaçania, naimiena cai raise sedaçania, naimie illana inoticaí. Naimiena cai nabaiaçania, cai jitaí raillano, caina canollena inoiticaí.

⁷ Noé micori Jusiñamuina jaié jiaí inote. Jusiñamui ico sülle rafuena naimiemo llote. Enirue buillena llote. Iena inuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui lluana Noé micori inua jira, jillode. Noé micori Jusiñamui lluana inote; iadedi naimie facaise ite comini inoñena jira, Jusiñamui riicaillafue anamo

itĩmaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micorĩ marebicaide.

⁸ Abraham micorĩ Jusiñamuina jaie jiaĩ ñnote. Ie moo enĩruemona naimie jaiannilla Jusiñamui naimiemo llote. Are ite enĩruemo naimie jaiannilla llote. “Jiaie enĩrue omo iitĩcue” Jusiñamui llote. Abraham micorĩ ñnote; iadedi ie jaillinona uĩñoñede. ⁹ Jusiñamui lloga enĩruemo Jusiñamuina ñnocana jaide. Naie enĩruemo ride; iadedi naie enĩrue naimiemo nia raise duiñede. Chivo itiraimona niga ñnĩroimona sebiñoga jofomo naimie jaca ite. Ie jito, Isaac micorĩ, naie isoide jofomo jiaĩ ite. Isaac micorĩ jito, Jacob micorĩ, naie isoide jofomo jiaĩ ite. Jusiñamuidi nana naimacimo daje isoide rafuena llote: “Bie enĩrue omoimo iitĩcue” llote. ¹⁰ Abraham micorĩ mare jofona finoñede, naie enĩruemo naimie jaca iacaiñena jira; iadedi Jusiñamui diga monamo jaca illemo naimie ocuiride. Monamo Jusiñamui mare finolle illanomo ocuiride.

¹¹ Abraham micorĩ aidi Sara micorĩ. Jusiñamuina Sara micorĩ ñnua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiño Jusiñamui llua isoi, naiñaiño uruesillana ñnote. ¹² Abraham micorĩ jiaĩ eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidĩmaci. Facadonide conillie isoi jebuidĩmaci. Ailluena ucuai illa jira, naimaci facadonidĩcai. Ailluena conillie illa jira, iena facadonidĩcai. Ie isoide. Eo ailluena Abraham micorĩ uruiaĩ illa jira, naimacina facadonidĩcai.

¹³ Abraham micorĩ, Isaac micorĩ, Jacob micorĩ Jusiñamuina ñnocana jaidĩmaci. Nana naimacimo Jusiñamui lloga uaina suiñedemo fi-daitĩmaci. Nia fi-daiñenia, Jusiñamui llogacĩnona cacadĩmaci. Iena ñnotĩmaci. Ie jira bie enĩruemo naimaci jaca illemo comecina fa-cañedĩmaci; ¹⁴ iadedi monamo jaca illemo comeciaina facadĩmaci. ¹⁵ Naimaci jaie billa enĩruemo comeciaina naimaci facadena, nain-omo abido jaidĩmaci; ¹⁶ iadedi jiaie illanomo comeciaina facadĩmaci. Jusiñamuina nabaillemo, monamo Jusiñamui diga jaca illemo comeciaina facadĩmaci. Naimiena naimaci ñnua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

¹⁷⁻¹⁸ Jusiñamuina Abraham micorĩ ñnua jira, ie jitona comuitate. Jusiñamui Abraham micorĩmo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micorĩ naimiena ñnuana raise uĩñollena, facacite. “O jitona fano” Abraham micorĩmo llote. Abraham micorĩ Jusiñamuina ñnuanona, ie jito faiacade. ¹⁹ Ie jito fi-daillemona, Abraham micorĩdi Jusiñamui naimiena jilloital-lena ñnote. Isaac micorĩ fi-daiñede; iadedi fajamona jillode.

²⁰ Isaac micorĩ Jusiñamuina jiaĩ ñnote. Naimie fi-daiacania, Jusiñamui ie llogacino finollena ñnuamona, mena ie urue iaĩmaiamo ie uaina fecade. Llote: “Jusiñamui llua isoi, jebuicana jaitomico”. ²¹ Jacob micorĩ Jusiñamuina jiaĩ ñnote. Naimie fi-daiacania, Jusiñamuimo jiañona, ie jiguĩdamo juita naidaidemo, José micorĩ ie mena urue iaĩmaiamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomico. Naimie omicono canoite” llote. ²² José micorĩ fi-daiacania, ie comĩnimo llote: “Jusiñamui omoina canuano, Egiptomona ico jiaĩruído omoi jaillena ñnotĩcue. Omoi jaia, cue

illaiciaina omoi diga uiño. Canaán railla eniruemo omoi ria, nainomo cue illaiciaina raino”.

²³ Moisés micori moo, ie ei diga Jusiñamuina jiai inotiaimaiai. Hebreos comini jebuiñellena, naie facaiseconi Egipto illaima nana hebreos isaiaina meiniana llote. Iaimaiai jito jeicia mei, iaiaiai uruena daje amani fivui reidiaimaiai. Jusiñamuina inuanona, naimie maresana eruaila jira, jaciruiñeno naimiena jofomo fo reide. Illaima lluamona Jusiñamui naimiena jillotajana inotiaimaiai. Ie jira Faraón jisa anamo comuide. Faraón di Egipto nairai illaima. ²⁴ Moisés micori Jusiñamuina inote. Naimie eimienamona, naimiedi Faraón jisa ie jitona mamecireaiañede; ²⁵ iadedi naimiedi Jusiñamui naimiena ie cominina Egiptomona jillotajana inote. Jusiñamui naimie fetua jira, ie comini dibeimo naimie iacade. Ie comini diga duere sefuiacade. Jusiñamuina inoñedino diga ie comeci jamai iobitaiacaiñede. ²⁶ Faraón jisa anamo naimie comuilla jira, naimiemo eo aillue rana ite; iadedi Egiptomo ite ebirede ramo ie comecina eo facañede. Jusiñamuimona iba naimie ico feiñoiacana jira, Jusiñamui Jito billemo ie comecina facajano, duere sefuide. ²⁷ Ie jira Egiptomona Moisés micori Faraóna jaciruiñeno oni jaide. Jusiñamui naimiena eenuana inote. Jusiñamuina cioiñede; iadedi Jusiñamui illana naimie inua jira, inocana jaide.

²⁸ Jusiñamui ie cominina jillotajana Moisés micori inua jira, Jusiñamui llua isoi, pascua railla rafuena finode. Ie cominimo toica llauda fallena llote. Ie dirue nase fuemo jidellena llote. Naie nairo Jusiñamui jaienici nana nano doforanina meinesiñellena, Jusiñamui lluana finodimaci. ²⁹ Egiptomona naimaci billa mei, jiairede railla monailai ruica dine jaillena, Jusiñamuina inotimaci. Jusiñamui Moisés micorimo lluana naimaci inuamona, jinui motodo saferedifodo ruica jaidimaci; iadedi Egipto soldaduai daje isoi ruica jaiacadimacimo, nana corobaitimaci.

³⁰ Canaán railla eniruemo hebreos comini rilla mei, Jericó railla nairai dine ridimaci. Jusiñamuina inuanona, Jusiñamui llua isoi finodimaci. Siete digarui Jericó ecimo naimaci macarilla mei, Jusiñamui llua isoi, naie laigafo ana bijide. Naie nairaina emodofidimaci. ³¹ Naie facaiseconi Jericómo Rahab micori fioidañede. Naiñaiñodi callirediñaiño. Nana Jericó comini Jusiñamuina inoñena jira, fioidaitimaci; iadedi jofue iñenanomo, nia Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina inote. Mena hebreos comini iaiaiaiana naiñaiño feiñua jira, Jericó nairaina emodofilla facaise naiñaiño meineñedimaci.

³² Diga jiaie comini Jusiñamuina inocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefe micori, David micori, Samuel micori Jusiñamui facaina jaie llorainina jiai eo cueñeiticue. ³³ Jusiñamui naimacina canuamona, inotimaci. Ie jira damierie naimaci bacauaina emodofidimaci. Illaima isoi jiaino naimaci cominina raise marena sedadimaci. Jusiñamui llogacino suillana cidimaci. Leones naimacina riacanamona damierie jillode. ³⁴ Iraimo usillamona damierie jillodimaci. Lloebi diga meiniana mona damierie jillodimaci. Jiaino jamai bue isoidino; iadedi jamai bue isoiñedinona jaidimaci. Jobaime raise finuamona, jiaino imaci bacauai soldaduaina judaisitade. ³⁵ Dañaiñorie riñoniaimona uruai fioidailla mei,

fiodaillamona Jusiñamui damieriena jillotate. Illaicomínimona jiaíno duere fiodaitimaci. Jusiñamuina faínonocaiacaiñena jira, naimacina meinetimaci. Naimaci fiodaiacania, monamo Jusiñamui diga ico jaca il-lena naimaci inua jira, Jusiñamuina faínonocaiñeno fiodaitimaci. ³⁶ Jiaíno duere sefuidimaci. Naimaciri jaístitimaci. Naimacina jeare ñaitimaci. Rao diga naimacina duere fatimaci. Damieriena maianona, cárcelmo jonetimaci. ³⁷ Damierie nofici diga fairinuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaíno buenidimaci. Naimaci iniroi ja-mai igoi ie. Dueredimaci. Naimaci iniroi raise iñede. Aime guisoidimaci. Jiaíe comínimona duere sefuisoidimaci. ³⁸ Jiaíe comínimona jamai bue isoidimaci; iadedi Jusiñamuimona jamai bue isoíñedimaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai biita inuidimaci. ³⁹ Jusiñamuina inocana jaidimaci. Naimaci finoca rafuemona Jusiñamui comíni naimaci illana uiñotícaí. Jusiñamuina inotimaci; iadedi nana naimacimo Jusiñamui lloga rafue naimaci illa facaise suiñede. ⁴⁰ Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodail-lena Cristona jai orede. Ie comínina birui cai jiaí jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

12

Jesús finoca rafuemo cai comeciaina cai facalli

¹ Cai jaiagai Jusiñamuina inocana jaillana uiñotícaí. Ie jira caidi naimaci isoí, Jusiñamuina inocana birui mai cai jailli. Marena riire cai aisiacania, ailluena rana abiñedícaí. Ie isoide. Jeacínona cai finoñellena, naimiena raise cai inollena, jeacino finuacínona mai cai faínonocaili. Nie isoide rafue caímo ia, Jusiñamui jitaillacínona finocana mai duere cai jailli. ² Jesús finoca rafuemo cai comeciaina cai facalli. Cai jeacino fa-caina naimie fiodailla jira, cai comeciaina naimie ocuiñotajanona, Jesúsna inotícaí. Cruzmo maraiñedímie isoí fiodaite. Fiodaillamona jilluana naimie uiñuamona, naimie fiodaite. Ie Moo ecimo dane illena naimie uiñuamona, iocire fiodaite. Illaímana naimie illamona, ie Moo ecimo birui ite. Jesúsno cai comeciaina facajamona, caímare mai cai jailli. ³ Jusiñamui díbeimo iñedinomona Jesús eo duere sefuide. Ie isoí cai duere sefuia, Jesúsno cai comeciaina facajamona, cai comeciaina ocuiñotacana mai cai jailli. ⁴ Jusiñamui díbeimo iñedinomona duere sefuillamona, Jesús isoí duere ñia sefuíñedomoí. Omoína ñia meineñedimaci. ⁵ Duere omoí sefuia, bie jaie cuegafuíaína feitañeno. Naimie comínina omoí illamona, Jusiñamui llote:

Cue uruíaí, omoína cue duere finoía, cuena ñia ino.

Duere sefuillamona, cuena faínonocaiñeno.

⁶ Omoína cue isiruillamona, omoína duere finodicue.

Cue díbeimo omoína raise itatallena, omoína duere finodicue.

Nana cue comínina cue llofuecabillamona, naimacina duere finodicue llote. ⁷ Naimie jitaillacínona cai finollena, caina duere finode. Ie uruíaína cai illamona, caina duere finode. Ero, nana ie uruíaína isiruillamona, naimaci ie jitaillacínona finollena, naga eniruemo ite moo ie uruíaína duere finocabide. Ie isoide Jusiñamui. Ie jitaillacínona cai finollena, caina duere finocabide. ⁸ Caina inotallena, Jusiñamui caina duere finoñenia,

naimie cominiñedicaí. Naimiedi nana ie cominina duere finocabide. ⁹ Cai eniruemo ite cai mootiai caina duere finoia, naimaci uaina inoticaí. Ie isoide. Cai Moo Jusiñamui caina isiruillamona, caina duere finoia, naimie uaina cai inua. Naimiena cai inuamona, monamo naimie diga ico jaca iiticaí. ¹⁰ Naimaci comeciaí llua isoi, cai eniruemo ite mootiai dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue dibeimo caina itataiacade. ¹¹ Jusiñamuimona duere cai sefua, iena gaiñedicaí. Iena jitaíñedicaí; iadedi naiemona cai fueoia, jeacinona dane cai finoñellena, naimie jitailla isoi marecinona finocana jaiticaí.

Jusiñamui rafuena cai cacaia, iena cai aruiruiñena

¹² Nie isoide ramo caimo jiria: “Jusiñamui caina nibai canoñede” raiticaí. Iemona naimiena fainonocaiacadaí; ia iemo cai comeciaina cai facañena. Jusiñamui rafuena cai sefuiruia, duere cai sefua, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise inuamona, cai comeciaí ocuiñocana mai cai jailli. ¹³ Jiaie rafuedo cai jaiñena; iadedi Cristo rafuedo raise inocana mai cai jailli. Iese cai jaia, Cristo rafuedo naimaci jiaí raise jaillena, jiaie creyentiaina canoíticaí. ¹⁴ Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite. ¹⁵ Jusiñamui caina duenaillamona, nana cominina jillotaiacade. Omoimona buna Jusiñamui duenaillacinona fainonocaillana jitaíñedicue. Omoimo iese sua, iemona conini gaiñenacino comuirede. Iena jitaíñedicue. Omoi comeciaí daje isoi lloillana jitaídicue. ¹⁶ Jearede rafuena jaca finoño. Esaú micori jaie finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiodaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiodaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade. ¹⁷ Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaíñeno.

¹⁸ Moisés micori facaise cai hebreos cominimo Jusiñamui ie rafuena jaie llote. Sináí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiaí jitaíbaide. Nainomo aifi eo ite. Eo boriuide. Eo gurude. ¹⁹⁻²⁰ Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toiniaí nainomo macaria, nofici diga fairinuamona, naimiena omoi meine” llote. Jusiñamui llua cacajamona, eo jaciruitimaci. Moisés micorimo: “Jusiñamui caimo nia llua jai jitaíñedicaí” llotimaci. ²¹ Eo jacirede ra illa jira, nana comini diga Moisés jiaí jaciruite. ²² Sináí anedumona lloga rafuedo birui jaiñedicaí; iadedi jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicaí. Monamo Jusiñamui ite; iadedi birui

naimiena atona nabairedicai. Cai fiodaia, naimie dine jaiticai, naimie diga jaca cai illena. Nainomo ie jaienisaí naimiemo iobillacinona fecacabidimaci. ²³ Ailluena comini diga, Cristona birui inotícaí. Nana caina Jusiñamui fetuanona, cai mameciaí monamo ite rabenicomo jai cueda. Jusiñamui nana comini comeciaina uifnote. Naimiena inotinomona ailluena jai fiodaitimaci; ia naimie ecimo naimaci joreñuái jiai jai itimaci. ²⁴ Jesús fiodailla jira, Jusiñamuina nabairedicai. Naimie fiodailla jira, caimo jiaie rafue birui ite. Naie rafuena cai inuamona, cai comeciái jai marena iticai. Jiai cai jeacinona oni dotade. Iena jiai jai feitate. Abel micori jaié fiodaia, naiemona Jusiñamui buna ie jeacinona feitañede; iadedi Jusiñamui Abel micori meinetimie mo ibana ote.

²⁵ Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaíno iena jitaiñedimaci. Iena inoñedimaci. Ie jira Jusiñamui naimacina duere finode. Cristomona jiaie rafue birui cacadicaí. Bie rafuedi Moisés lloga rafue baifemo faite. Jusiñamui duere fnollicinomona buna jillobinide. Cai duere sefuiñellena, Cristo rafuena cai inua. ²⁶ Moisés micorimo ie rafue llua facaise, Jusiñamui naie eniruena niraídotade. Jusiñamui jiaíruído jiai llote: “Eniruena dane niraídotaiticue. Ucuaina, fivuina, jitoma diga, jiai niraídotaiticue” llote. ²⁷ Naimie lloga uaimona enirue fuillena uifnoticai. Monamo ite ra fuillena jiai uifnoticai. Nana naie rana naimie fuidoite; iadedi naimiena cai inua jira, naimie caina fuidoñeite. Ico cai illinona jai finode. Iena naimie fuidoñeite. ²⁸ Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai inuamona, naimiena cai raise sedajamona, naimiena cai iobitaja. ²⁹ Naimiena inoñedinona Jusiñamui eo duere finolle jira, naimiena jaciruillanona naimiena cai inua.

13

Jusiñamuina cai iobitaja

¹ Dani conini jiaie creyentiaína isiruicana omoi jai. ² Abraham micori Jusiñamui jaienisaína uifnoñeno jaié nafuete. Jiaie illanomona jiaie creyentiaí bia, naimaci inillino ifena jira, naimacina nafue. Jusiñamuimona ibana feiñoitomoi. ³ Cristo rafue muidona damerie creyentiaí cárcelmo itimaci. Nainomo omoi jiai itomoidena, naimacina feitañeno. Naimacina isiruillamona cano. Damerie creyentiaí duere sefua, naimacina jiai cano. Jiaíruído naimaci isoi níbaí duere sefuitomoi. ⁴ Airedimie jiaie riño diga illemo ie comecina facañena. Inirediñaiño jiaie ima diga illemo ie comecina facañena. Ie aiñede riño diga bu ia, ie iniñede ima diga bu ia, marañede. Iena finoñeno. Iena bu finoa, ie jeacino Jusiñamuimo lloñenia, Jusiñamui naimiena duere finoite. Naiñaiñona jiai duere finoite. ⁵ Ailluena ucube ollena, iemo naciñeno. Omoimo ite ra diga caimare i. Iena Jusiñamui facaina lloraíma jaié cueda: “Jusiñamui llote: ‘Omoína jaca canoiticue. Omoína jaca fainonocaiñeiticue’ llote”. ⁶ Naiena cai uifnuamona, cai comeciaina ocuiñoiticaí. Jaié cuedafue isoi lloiticaí:

Cai Nama caina canoite.

Ie jira cai comeciái jarire finoñeiticai.

Buena jaciruifneiticai.

Jiaimie buena caina jaciruitanide.

7 Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoj. Cristo dibeimo naimaci illamo omoi comeciaina facajanona, naimaci isoi Jesucristona inocana mai omoi jai. 8 Naimie jaca inogamiena uifotica. Naimie ie lloga uaina jai jaca finode. Iena birui finode. Ico iena jaca finoite. Ie jira naimiema cai inua. 9 Cristo ieñede rafuedo jaiñeno. Diga jiaie llofuicacino ite; iadedi iedo jaiñeno. Jusiñamui caina canuamona, cai comeciaina birui ocuifocana jaitica. Moisés micorimo lloga rafuedo navui jaidica. Diga ra fimaide; iadedi naiedo cai jaillamona, cai comeciaina raise illena, buena ofedica. 10 Cruzmo Cristo fiodaillamona, cai jeacino facaina fodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. 11 Moisés rafue llua isoi, nanoca ñairaima toiniaina faja mei, naie dirue daciaño naga año fo iticuartomo uite; iadedi naie toi abi naimaci comini illanomona jino uite. Iena jai jitañena jira, nainomo iena jobaide. 12 Ie isoide. Cristona comini jitañena jira, ie comini nairaimona jino uillanona, naimiema meinetimaci. Nainomo jeacino facaina fodaite, comini comeciaina raise finollena. 13 Ie jira Moisés micori lloga rafuena cai fañonocaida, dani Jesucristo rafuedo cai jailli. Naimiema jeare finodimaci. Caina jeare finoia, naimiema jaca inocana cai jailli. 14 Beno jaca cai illemo ocuirifedica; iadedi monamo Jusiñamui diga cai jaca illemo ocuiridica. 15 Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uifnuamona, naimiemo iobillacinona jaca cai fecaja. 16 Marecinona finocana mai cai jailli. Jiaie creyente jitai raillano, omoi raruiaimona naimiema omoi cano. Iena omoi finoia, Jusiñamui omoiri iobite.

17 Omoi llofueraini uaina ino. Naimaci anamo raise omoi i. Cristo dibeimo omoina raise itataicadimaci. Iese naimaci finoacaiñenia, Jusiñamui naimacina duere finoite. Naimaci uaina omoi inoia, Cristo dibeimo caimare majititimaci. Naimaci uaina omoi inoñenia, sunaitimaci. Sunailla jira, naimaci llofuicacinomona buena ofeitomoi.

18 Jusiñamui diga omoi ñaia, cai facaina omoi jii. Jusiñamuimona cai comeciaina marena illana uifotica. Naimie jitailla isoi, mare rafuena finocana jaiacadica. 19 Omoi dine cue raire illena cue facaina Jusiñamuimo eo omoi jii.

Naimaci marena jaca illana jitaide

20 Jusiñamui conini omoi comeciaina uri itatajana jitaidecue. Cai Nama Jesús fodailla mei, Jusiñamui naimiema jai jillotate. Jusiñamui llua isoi, Jesús fodaite. Naimie fodailla jira, Jusiñamui cai jeacimona feitate. Naimie fodailla jira, naimie anamo cai illamona, caina raise sedarede. 21 Jusiñamui ie jitaillacino omoi finuana canoite. Cristona omoi inuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaidecue.

22 Cue amataia, bie cartana caimare feiño. Eo are rafuena cueñedice. Janore cuetice. 23 Cai ama Timoteo cárcelmona jai jino bite. Cue dine naimie raire bia, omoi dine naimiema atitice. 24 Nana omoi llofueraimimo cue uaina oredice. Ua nana creyentiammo cue uaina oredice. Italamona bitino imaci uaina jiaie oredimaci. 25 Jusiñamui omoina jaca duenaillana omoi uifnuana jitaidecue. Mai. Macaibaite.

SANTIAGO ORETAGA RABE

Uaiduacino

¹ Caimaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiamo omoi duillamona, omoi jai judaisilla jira, omoimo cue uaina oredicue.

Ramo omoi jiriadedi, omoi comeciaina mairita

² Amatiai, diga ie ramo omoi jiriadedi, eo iobilla. ³ Ramo omoi jiriadedi, Jusiñamui uaina raise omoi inuana uifnoitomoi. Iemona omoi comeciain mairillemona, inocana omoi jaitomoi. Biena omoi uifua jira, iobilla. ⁴ Mairicana omoi comeciain jiaia, omoi comeciain marebicaite. Marebicaillamona, omoi comeciain buena fiebicaiñeite. Nana Jusiñamui llogacinuaina ja muidomo inoitomoi; ⁵ iadedi omoimo rafue ia, niese nibaiana omoi uifnoñenia, Jusiñamuimo jica. Ie mei omoimo naimiedi abi uifnoracinona iite. Jusiñamuidi nana naimiemo llotinomo iena caidiñeno icabilla jira, omoimo iena jia iite; ⁶ iadedi omoi jicaia, uai inuanona jica. Omoi comeciain inoñenia, jicañeno. Comecina inoñedi aifi betaja jorai isoide. Naimie comeci naganomo ite. ⁷ Naimiedi Jusiñamuimona ra feñollemono tainona sedate. ⁸ Naie isoidimiedi nana naimie illa dinori ie comeci naganomo iite.

⁹ Naimie ramo jiriadedi, Jusiñamuimona naimie jamai bue isoifena jira, duerede creyente iobilla; ¹⁰ iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite. ¹¹ Jitoma a ia, eo ecasillamona, safia safenaite. Lliride. Ie mei jai ebinide. Jai ifede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feifnotica

¹² Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuenta isiruitinona cue illanomo jaca itataitcue”. ¹³ O ramo bu faia, lloñeno: “Jusiñamuidi cuenta ramo faite”. Marañede rafue dibeimo naimie ifena jira, naimiedi buna ramo jaca faifede. ¹⁴ Cai comecimo naie jitaillacino illa jira, ramo faia uai inotica. Naie facaiseconi caimona ebirena jirari, iena finoacadicai. ¹⁵ Cai jitailla jira, jeacinona finodicai. Jeacinona finocabillanona jaillano, faifitica. ¹⁶ Ero, cue isiruga amatiai, Jusiñamui omoina ramo faitatafena jira, naimiemono da mare rafue billa jira, dani omoi abina jifueñeno. ¹⁷ Nana mare rafue cai Moomona feifnotica. Naimiedi monamo ite lligaiñoraniaina jai finode. Naie radi nagarui daje isoi lligaiñoñede; iadedi naimie daje isoifede. Naimie comeci jacanano danoconi nagarui ite. ¹⁸ Naimie jitailla jira, ie uai lluno, naimie caina ie uruiaina itatate. Ie uruiaimona nano doforanidica.

¿Nie isoide rafuena finoacadicai?

¹⁹ Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiai raire iciriñeno. ²⁰ Icirillamona, Jusiñamuidi cai marena jitailla isoi, buna jaca marebicaiñede. ²¹ Ie jira nana marañedicinona oni fañonocai. Jusiñamui uai omoi comecimo fe-cuise abi iedoñeno nagarui feiñocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede. ²² Cacajamona iena ñnocana jai. Cacajanona iena omoi ñnoñenia, dani abina jifuetomoi. ²³ Bu naie uaina cacajamona ñnoñenia, naimiedi acaranimio eruaidimie isoide. ²⁴ Ie uiecona eruaide. Naimie jailla meinocani, ie eruailla ie uiecona jai raire faitate. ²⁵ Jusiñamui llogacinona bu eo facajia, iena feitañede. Iena ñnote. Naie uaidi jearedicino ie finuamona naimiena marena itatate. Jusiñamui uaina naimie feitañaena jira, iena ñnua jira, naimie comeci cainmare ite.

²⁶ “Jusiñamuina sedadicue” raillanona ie comecina facadimiedi jeare ñaia, marañeno ñaia, dama naimie abina jifuate. Jusiñamuina taino sedade. ²⁷ Cai Moo Jusiñamuina bu marena raise sedaacania, diga rafuena finoit: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñeite. Jusiñamui dibeimo iñedino isoi iacaiñeite. Jusiñamui naimie iese sedajia, Jusiñamuimona eo mare.

2

Nana cominimo comeciaina lloitaicadica

¹ Amatiai, cai Nama Jesucristo uai eo ebirede. Naimiena omoi ñnua jira, naimacimo daje isoi comeciai lloillamona, nana cominina daje isoi nafue. ² Ero, omoi roracomo mena ñma bia, ¿nie ñmana nafueit-omoi? Damie ucuberedimie. Naimiemo oro ie anillos ite. Eo mare iniroina jitate. ³ Ucuberedimio llotomoi: “Bai bene bancomo rai”. Dueredimio llotomoi: “Bai bene naidai. Raiacania, eniruemo rai”. ⁴ Iese omoi lloia, damiena jai raise nafuetomoi; ia damiena jai raise nafueñedomoi. Iaimai iniroimo omoi eruailamona, nafuetomoi. Mare rafuemo comeciaina facañedomoi.

⁵ Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiena naimaci eo ñnua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”. ⁶ Ero, Jusiñamui dueredinona nafuete; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomo. Ucuberedinomona duere sefuicabidomoi; ia ucuberedimiena raise nafuetomoi. Maijitalena, juez dine ucuberedino omoina uitatatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci. ⁷ Cristomo omoi jainaiailamona, ucuberedino naimiena jeare jiai ñaitimaci.

⁸ “Cristo llogacino finodica” raillanomo comeciaina facajamona ucuberedimiena omoi nafueia, cuemona mare. Cristo naiena iese caino llote: “O jofocimo itinona isirui, dama o abina o isiruilla isoi”. Iese omoi ia, cuemona mare; ⁹ iadedi nana cominina daje isoi omoi nafueñenia, jeacinona jai finodomo. Jai Jusiñamui llogacinona ñnoñedomoi. Jusiñamui llogacinomona jai marañeno itomoi. ¹⁰ Nana Jusiñamui llogacinuaimona daje llogacinona omoi ñnoñenia, Jusiñamuimona nana naie llogacinuaina jai ñnoñedomoi. ¹¹ Jusiñamui caino jai llote: “O aiñede riño diga iñeno.

O iniñede iima diga iñeno". Jiai llote: "Jiaimiena meineñeno". O aiñede riño diga iñedio; iadedi jiaimiena o meineia, nana Jusiñamui llogacinuai jai iñoñedio. ¹² Jiairuido Jusiñamuidi juez isoi omoimo lloite. Omoi comeciaino iticino diese omoimo lloite. Ie jira marena ñaino. Marena i. ¹³ Ero, omoimo naimie lloia, jiaie cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiaie cominina birui omoi duenaia, Jusiñamui naie facaise omoina jiai duenaiite. Duere sefuillena omoimo lloñeite.

Jusiñamuina cai iñnuamona, diga rafuena cai finua

¹⁴ Amatiai, "Jusiñamuina iñoticue" raitimiedi mare rafuena jaca finoñenia, ¿niese naie iñoracinodi naimiena jillotaite? Jillotañeite. ¹⁵ Jiaie rafuedo iena lloiticue. Omoimona daje creyente iniroinia, guille iñenia, ¹⁶ naie creyente omoi dine bia, naimiemo omoi lloia: "Mai jai. Rosiruiñeno. Marena ailluena guiño"; ia naimiemo jaca buena omoi fecañenia, ¿bue ñellena iese naimiemo raitomoi? ¹⁷ Ero, Jusiñamui omoi iñnuamona mare rafuena omoi finoñenia, omoi iñoracino ieñede. ¹⁸ Omoimona damie cuemo nibai lloite: "Jusiñamuina raise iñoticue". Jiaimie cuemo nibai lloite: "Mare rafuena finocabidicue". Iaimaiaino lloiticue: "Jusiñamuina cai raise iñoia, mare rafuena finocabiticai. Mare rafuena cai finuamona, Jusiñamuina cai raise iñnuana uiñoiticai". ¹⁹ Dajede Jusiñamuidi illana iñotio. Iena o iñnuano, mare; iadedi jananiai iena jiai iñotimaci. Ie jira Jusiñamuina jaciruitimaci. ²⁰ "Jusiñamuina raise iñoticue" nibai nia raitio. Abina raise nia uiñoñedio. Mare rafue o jiai finoñenia, dama abi o iñoracinodi ieñede. ²¹ ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. ²² Abraham micori iñnote. Mare rafuena jiai finode. Mare rafue naimie finuamona, naimie jai raise iñnote. ²³ Iemona Jusiñamui ie llogacino suide. Iena Moisés micori cuete: "Abraham micori Jusiñamuina iñnote. Ie jira Jusiñamuimona naimie marebicaide". Jiai cuete: "Naimiedi Jusiñamui nabai". ²⁴ Abraham micori rafuemona daje rafuena uiñoticai. Dama ie iñoracino diga jaca bu marebicañede; iadedi Jusiñamuina iñnuano, mare rafuena finuano, marebicaide. ²⁵ Jiaie rafuedo iena lloiticue. Jiaie Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraimaiaina feiñote. Naiñaiño nairaidi iaimaiaina meinellena jenodimaci. Meineñellena, naiñaiño iaimaiaina reide. Ie mei iaimaiaina bainino oretate. Mare rafuena naiñaiño finuamona, Jusiñamuimona naiñaiño marebicaide. ²⁶ Ero, bummo ie joreño jai iñenia, cajeñede. Ie isoide. Mare rafue bu finoñenia, ie iñoracinodi ieñede.

3

Cai fuaimona jeacinodi comuide

¹ Amatiai, omoimona diga comini creyentiaina llofuerainina jaiñeno. Jusiñamuidi juez isoi ico lloite. Llofueraini jiaie comini baifemo uiñuamona, Jusiñamui rafuena naimaci eo raise iñoñenia, Jusiñamui naimacina jiaino baifemo duere finoite. Iese riire naimacimo llwana jaciruillano, llofuerainina ailluena jaiñeno. ² Nana caidi diga marañede rafuena finocabidicai. Marañedicinona bu ñaiñenia, jai marebicaide.

Naimie nana ie comeci namarede. ³ Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadica. ⁴ Riire aifi aillue botena nine uiacade; iadedi eo janorede quilla diga, ie jailla dine piloto botena dataoicaide. ⁵ Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate. ⁶ Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaiacade.

⁷ Nana rana toiredicai: ocainaiai, silliñiai, ofomaiai, eniruemo biicaidino, lliciai. Nana toiredicai; ⁸ iadedi jaca bu ie fuena namatanide. Cai fuiai jaca eo marañede. Iemona eo marañede rafue icabite. ⁹ Cai fuiai diga cai Namamo, ua cai Moomo, marecinona llotica. Caina naimie finuamona Jusiñamuina eruaidicai; iadedi cai fuiai diga naimiena jeare jiai ñaiticai. ¹⁰ Cai fuedi dajede; iade marecinona ñaiticai. Marañedicinona jiai ñaiticai. Amatai, iese cai ñañena. ¹¹ Ero, daje pozomona mare jinui, erirede jinui diga, oñedicai. ¹² Amatai, higuera railla riarazona aceitunadi comuiñede. Uvas railla riarazona higo railla riaradi jiai comuiñede. Cuere de jinuiamona mare jinuiamona oñedicai. Cai fuiaimona jeacino comuiñellena, cai fuiaina cai namataja.

Ua abi uiñoracino

¹³ Omoimona, ¿bu ua abi uiñote? Naimie ua abi uiñoia, naimie marena illamona, iena uiñoitomo. Abi iedoñeno mare rafuena naimie finoia, naimiemo ua abi uiñoracino illana uiñoitomo; ¹⁴ iadedi naimie abi eo uradoia, dama naimiemo ite ramo comecina facaia, naimie abi uiñoracino diga naimie abina iedoñena. Jai tainona llote. Naimie llua isoi iñede. ¹⁵ Naie isoide uiñoracinodi Jusiñamuimona iñede. Bie enirue ie. Comini ie. Taife ie. ¹⁶ Comini abina uradoia, dani naimacimo ite ramo comeciaina naimaci facaia, comini uri iñedimaci. Diga marañede rafue naimacimo ite. ¹⁷ Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede. ¹⁸ Bu uri ia, jiaie cominina uri itatate. Ie jira naimie marena ite, Jusiñamui jitailla isoi.

4

¿Bue ñellena uri iñedicai?

¹ ¿Bue ñellena fuiriruidomoi? ¿Bue ñellena iciriruidomoi? Omoi comeciaino marañedicino illa muidona. Omoi comeciaino marañeno jitaillacino illa muidona. Naie jitaillacino omoi comeciaino namataacana muidona. ² Rana jitaidomoi. Iena omoi feiñoñena jira, naimaci rana fillena, comena meinetomoi. Eo uraoidomoi. Omoi jitailla rana feiñoñena jira, fuiridomoi. Omoi jitailla rana Jusiñamuimo omoi jicañena jira, iena feiñoñedomoi. ³ Jiaicaño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitailla ra feiñollena, omoi comeci jaisillena, jicadomoi. ⁴ Jusiñamuina birui raise jitañedomoi; ia naimie dibeimo iñedinona jai jitaidomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Ñiese iena uiñoñedomoi? Bu naie rafuena isiruicania, Jusiñamui dibeimo jai iacaiñede. ⁵ Jusiñamui cuetatagafuina raise facañedomoi. Naiedi caimo llote: “Jusiñamui omoimo jai fecaca Joreñodi omoi comecina eo raise

namataacade”. ⁶ Caina eo duenaila jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuia iena llote: “Jusiñamuidi abi iedotimiena canoñede; iadedi abi iedoñedimiena canode”. Naimie dibeimo iacaiñedimiena ñaite. Naimie dibeimo iacadimiena canuana jiai ñaite.

⁷ Ie jira Jusiñamui anamo omoi i. Naimiena raise omoi ñino. Taife uaina jitañenanona, naimie uaina oni caiño. Ie mei omoi mona naimie oni jaite. ⁸ Jusiñamuina nabaillena, naimie dine iaire omoi i. Ie mei naimie omoi dine iaireno iite. Jeacinona finoraini, omoi comeciai uaillaina meido. Naganomo omoi comeciaina facañeno. Omoi comeciaina marena fino. ⁹ Marañede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino facaina omoi mai sunai. ¹⁰ Jusiñamui dibeimo abina iedoñeno omoi i. Ie mei naimie omoi comeciaina iobitaite.

Jiaino jinafomo jeare ñaiñeno

¹¹ Amatiai, marañede rafuena naimaci finoiadedi, jiaino jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise ñinoñede. Jusiñamui uaina naimie ñinoñenamona, Jusiñamui uaina jiai jamañicoaide. ¹² Jusiñamuidi marañede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoñeno.

Ico are caimo suite rafuena uiñoñedica

¹³ Jiaie rafuena lloiacadicue. Nibai llotomoi: “Birui jiaie nairaimo jaiticai. Birui cai jaiñenia, ico are jaiticai. Rana fecajamona ucube cai ollena, nainomo daje año iticai”. ¹⁴ Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticai. Dallu bene iticai. Ie mei jai iñedica. ¹⁵ Ie muidona omoi llua: “Cai Nama jitaia, nia iticai. Cai Nama jitaia, nie isoide rafuena finoitica”. ¹⁶ Iena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduardi marañede. ¹⁷ Mare rafuena finuana uiñotimiedi mare rafuena finoñenia, jeacino jai finode.

5

Ucuberedinomo llucacino

¹ Ucuberedino, daje rafuena omoimo jiai lloiacadicue. Omoimo ramo jirite. Ja eo duere sefuitomoi. Ie jira cuiri-curi ee. ² Omoi raruija ja sabite. Omoi mare iniroi ja sabite, ibuisai guilla jira. ³ Omoi ucube ja ieñeite. Ieñena jira, comini omoi faifillana uiñoitimaci. Abina faifitomoi, iraimo ra boa isoi. ⁴ Ero, ailluena ucube irairuilla iena jai eenotomoi. Naie facaisedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade. ⁵ Omoi illa dinori ailluena raruija omoimo ite. Nana omoi comeciai jitailla rafuena finodomoi. Omoi comeci jitailla isoi itomoi. Naie iba ollirui jai ride. ⁶ Maredinona duere finodomoi. Nie isoide rafuena omoimo finoñedimaci. Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

Cai Nama billemo fecuise omoi ocuiri

⁷ Amatiai, cai Nama billemo fecuise omoi ocuiri. Cominidi imaci illimona riaru feiñuana sedadimaci. Noci deillemo fecuise ocuiridimaci. Ie mei riaru llisillana otimaci. ⁸ Ie isoi cai Nama billemo fecuise ocuiri. Omoi comeciai rucaicueriñeno, cai Nama bille iaie illa jira. ⁹ Duere omoi sefua, Jusiñamui juez isoi omoimo lloi raillano, “Jiaie creyente muidona duere sefuidicue” raiñeno. Jusiñamui omoi illana raise uñote. ¹⁰ Amatiai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuiñedimaci. ¹¹ Naimaci Jusiñamuina fañonocaiñena jira: “Naimaci comeciaidi caimare itimaci” raiticai. Job micorina jia comecitica. Naimie jiaie ite. Naimie eefeno duere sefuide. Duere sefuide; ia Jusiñamuina fañonocaiñede. Ie mei ja muidomo ñe isoide cai Nama naimiena finuana uñotica. Cai Namadi naimiena duenalla jira, naimiena raise canode. Caina jia duenaite. Ie jira caina jia canoite.

¹² Cue amatiai, nanoca rafuena nia lloiacadicue. Omoi lloga uai omoi finollena jiaie comini uñollena, Jusiñamui mamecina llinotomoi. “Iena cai llinoia, cai lloga uaina cai finoñena, Jusiñamui caina duere finoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi ñe isoide rafuena omoi llumona, uanaicinona jaca llono. Iese llono, Jusiñamui omoina duere finoi raillano.

¹³ Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. ¹⁴ Duidimie ia, naimaci naimieri Jusiñamuimo jüllena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena. ¹⁵ Finuano jüia, jilloite. Cai Nama naimiena jillotaite. Naimie finoca jeacinona oni jia dotajite. ¹⁶ Ie jira coninimo omoi marañedicinona llono. Ie mei Jusiñamuimo coniniaina omoi jü, omoi duicomona omoi jilloillena. Jusiñamuimo marebicaidimie jüia, diga rafuena finorede. ¹⁷ Eliana comecitomoi. Jiaie ite; ia naimiedi cai isoide. Jusiñamuimo jüde, noci deiñellena. Ie mei daje amani fiemona abimo atomonado jaca deiñede. ¹⁸ Ie mei dane jüde, noci deillena. Ie jira noci deide. Ie mei riaru dane sicode.

¹⁹ Amatiai, omoimona damiedi Jusiñamui ie uanaicino dibeimona jia, dane Jusiñamui dibeimo naimiena bu itataia, eo mare. ²⁰ Iena bu finoa, naimiena ie uañedicinomona itatate. Faiñillemona jai jillotate. Jusiñamuidi naimie jeacinuaina oni dotajamona, iemona jia jillotate. Mai. Santiagodicue.

PEDRO NANO ORETAGA RABE

Tuude cominimo Pedrodi cartana cuete

¹ ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. ² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi ñnollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

Jesucristo diga jaca cai illemo ocuridicai

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, ñnocana cai jaillemo jiai ocuridicai. ⁴ Omoi ocurillafuedi monamo ite. Faiññeitomoi; ia nainomo caimare marena jaca iitomoi. Jusiñamui iese omoina itataite. ⁵ Jusiñamuina omoi ñnua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. ⁶ Ieri iobidomoi; iadedi dallu diga rafuemonu duere sefuidomoi.

⁷ Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca iñede. Ie isoide. Cristona omoi ua ñnuana facacillena, diga rafuemonu duere sefuidomoi. ñnocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoi ei iobite. ⁸ Jesucristona jaca cioññedomoi; iadedi naimiena jai isiruitomoi. Naimiena jaca cioññedomoi; iadedi naimiena jai ñnotomoi. Ie jira eo iocire itomoi. ⁹ Cristona omoi ñnuamona, jeacinomona jai jillobidomoi. ¹⁰ Jusiñamui facaina lloraini micoriaidi Jusiñamui omoina jai duenaillana jaiie llotimaci. Jusiñamui omoina jilluana jaiie llotimaci. Iena naimaci raise cacaiñenia, naiemo comeciaina facauidimaci. ¹¹ Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo iese ico suillena uiñoiacadimaci. Naie facaise illemo comeciaina jiai facadimaci. ¹² Jusiñamuidi naie rafue naimacimo duiñenana uiñotade. Naimacina naie rafue caimo duillana jiai uiñotade. Jusiñamui ie Joreñona monamona naimacimo oretajanona, ie uaido naimaci lluumona, naimie facaina llorainimona bie mare rafuena birui jai cacadomoi. Jusiñamui jaienisai bie rafuena jiai raise uiñoiacadimaci; ia cai isoi iena uiñoññedimaci.

Naimie jitaillacinona cai ñnollena, Jusiñamui caina fetode

¹³ Ie jira omoi comeciaina raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñoitomoi.

Iemo iocire ocuiri. ¹⁴ Jusiñamuina omoï nia uiñoñena facaise dani omoï comeciai jitaille rafuedo jaisoidomoï. Naimiena omoï jai ñnua jira, naimiena omoï nia uiñoñega facaise finoca rafuedo birui omoï jaiñeno. Mare uruiyai imaci moo uaina ñnotimaci. Jusiñamui uruiaina omoï jai illa jira, naimie uaina ñno. ¹⁵ Jusiñamui ie uruiaina omoï illena, jai omoïna fetode. Naimie mareuilla jira, marena omoï i. ¹⁶ Iena naimiedi jaie cuetatate: “Cue mareuidimiena isoi, marena omoï i”.

¹⁷ Cai Moona Jusiñamui illamona, naimiemo birui jïdomoï; iadedi juez isoi nagamiemo ico Jusiñamui llua jira, nana omoï ille dinori jaciruicana omoï jai. Nagamiena ie marañede finoca rafue diese duere finoite; ia marañede rafuena finoñedimiena duere finoñeite. ¹⁸ Omoï einamaci rafuedo jaie jaisoidomoï. Naie rafue jamaifue. Naifuemona Jusiñamui omoïna jai jillotata. Hbatajamona omoï jeacinomona jillotañede. Ucubedi raire cueruide. Raire cueruide ra diga omoïna jillotañede; ¹⁹ iadedi Cristo diruedo naimie dacaño fiodaillamona, omoïna jaca jillotata. Cai comini imaci jeacino facaina mare toica llaudana fauidimaci; ia Cristomo jeacino iñena jira, cai jeacino facaina birui dacaño fiodaite. ²⁰ Caina jilloitallena, enirue nia iñena facaiseconi Jusiñamui Cristona jaie fetode. Naimiena omoï uiñollena, birui bene eniruemo Jusiñamui naimiena ore-tate. ²¹ Cristo muidona Jusiñamuina ñnotomoï. Cristo fiodaite; ia iemona Jusiñamui naimiena jillotata. Ie mei monamo ie ecimo naimiena dane itatate. Ie jira Jusiñamuina ñnotomoï. Omoï fiodaia, dane jilloillemo jiai jai ocuiritomoï. ²² Uanaicinona omoï ñnuamona, omoï comeciai jai jeanidimaci. Ie muidona jiaie creyentiaïna isiruicana omoï jai. Omoï comeciainomona conini omoï isirui. ²³ Jusiñamui cominina jai jaidomoï. Naimie uaido iese jaidomoï. Comini uaido iese jaiñedomoï. Naimie uai jaca fuiñeite. Jaca iite. Naie uaido naimie cominina jaca iiticaï. ²⁴ Jusiñamui facaina lloraïma micori iena jaie cuete:

Nana cominidi raiticiaï isoidimaci.

Safia dallu ebirede; iadedi raiticiaï ie safia diga are iñede.

Ie isoide. Diga rafuena finuanona, dallu iticaï.

Are iñedicaï; ²⁵ iadedi Jusiñamui uai jaca ite

cuete. Naie uaidi mare rafue. Naie rafuena birui jai cacadomoï.

2

¹ Jusiñamui cominina cai illa jira, jiaie cominina gaññenacinona faïnonocai. Nana jifuiacinona faïnonocai. Abina caitajacinona feita. Nana abi uradoillacinona feita. Jiaie comini joreñona ñaiñeno. ² Ero, raise moonaillena, raise ecairellena, janosa monoï ijina jitaide. Ie isoide. Omoï comeciai raise marena illena, Jusiñamui rafuena jitaidomoï. ³ Cai Nama omoïna duenaïllana jai omoï uiñuamona, naimie uaina ñnocana jai.

Cristodi jofomo ite nanoca nofici isoide

⁴ Ie cominina raise omoï illena, Jusiñamui rafuena finocana jai. Naimie omoïna jai fetode. Naimiemo omoï raise duïllana jitaide. Iena omoï raise uiñollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofo nillana tainede. Cristodi naie nanoca nofici isoide. Cai nairaï Cristona jaie jitaïñedimaci; iadedi Jusiñamuimona naimie maredimiena jira, Jusiñamui naimiena fetode. Caidi jiaie noficiain

isoidicai. Ie jofona nillena isoillena, Jusiñamui caina fetode. ⁵ Naimiena cai jai ñnua jira, naimie cominina jai jaidicai. Naimie diga jai atona ñairedicai. Naimie diga jaiie comini facaina jiai ñaicabiticai. Naimiena cai raise sedallena, Jesucristo caina canuamona, Jusiñamui jitaillacinona finocana jaidicai. ⁶ Jusiñamui facaina lloraima iena jaiie cuega:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiena jai fetodicue. Naimiedi eo mare.

Naimiena ñnuamona, comini iobitimaci

cuega. ⁷ Naimiena omoi ñnoia, Jusiñamui omoina iobitaite. Naimiena omoi ñnoñenia, faifitomoi. Jusiñamui facaina lloraima micori iena jaiie cuega:

Jofona finoraini jitañena noficidi nana naie jofomo ite noficiai baifemo jai faiga

cuega. Ie isoide. Cai nairai Cristona jitañede; iadedi Jusiñamui naimieri eo iobide. ⁸ Dane cuega:

Ñine naimaci macaria, naie noficimona eicaitaillamona, uaitimaci

cuega. Cristona cuete. Cristo uaina naimaci ñnoñena jira, Jusiñamui llua isoi faifitimaci.

Pedro Jusiñamui fetocanona llofue

⁹ Jusiñamui jai fetocanodomoi. Naimiemo omoi jai duillamona, naimie diga atona ñairedomoi. Jusiñamui ua cominidomoi. Naimiena omoi ñia ñnoñenia, jeacino anamo omoi illa jira, jitiredinomo itomoi isoidomoi. Naiemona omoina jai jillobitade. Naimie anamo jai omoi illamona, useredinomo jai itomoi isoidomoi. Eo mare rafue omoimo naimie finua jira, iena llocana omoi jai. ¹⁰ Jaiie Jusiñamui cominiñedomoi; iadedi birui Jusiñamui cominidomoi. Naimie omoina duenaillana jaiie uiñoñedomoi. Birui iena uiñotomoi.

Pedro Jusiñamui jitaillacinona finocana cai jaillana llofue

¹¹ Cue isiruiganodomoi. Jusiñamui illanomo omoi birui jainaiaila jira, eniruemo jaca iñeitomoi. Eniruemo jaca omoi iñena jira, jeacinona finocana jaiñeno. Jeacino omoi começaina namataacana jira, iena ebiruiñeno, naie anamo omoi i raillano. ¹² Jusiñamuina ñnoñedino motomo omoi illamona, mare rafuena finocana jai. Omoina birui jeare ñaitimaci; iadedi omoi marena illana naimaci uiñuamona, Jusiñamuina ico naimaci ñnoia, naimiemo iobillacinona fecaitimaci. ¹³ Cai Namamo omoi duilla jira, illaicomini anamo raise i. Riai diga omoi nanoca illaima uaina ñno. ¹⁴ Naimacina omoi illaicomini fetua jira, omoi gobernadores uaina ñno. Maraiñede rafue omoi finoia, omoina duere finoitimaci; iadedi mare rafuena omoi finoia, omoiri iobitimaci. ¹⁵ Jusiñamuidi mare rafuena omoi finuana jitaide. Iena omoi finua jira, omoina ebena ñaitino uaina llacaitatomoi. ¹⁶ Jusiñamui anamo cai illamona: “Jaiie illaima uaina ñnoñeiticai” raifititicai. Cai enirue illaima uaina cai ñnoñenia, jeacinona finodicai. Jusiñamui dibeimo cai illa jira, naimie jitaillacinona finocana cai jailli. ¹⁷ Nana cominimo marena fino. Nana creyentiaina isirui. Jusiñamuina jaciruiocaida ñno. Riai diga omoi illaima uaina ñno.

Cristo duere sefuilla rafuemona fueoiticai

¹⁸ Patrón anamo damierie itomoi. Omoi patrón ocuica uaina ñnocana omoi jai. Omoi patrón marena fecuise ocuia, naimie uaina ñno. Naimie raire iciria, naimie ocuica uaina jai ñno. ¹⁹ Maraiñede rafuena

omoi finoñenia, omoi patrón omoína duere finoia, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare. ²⁰ Maraiñede rafuena omoi finoia, omoi patrónona duere sefuit-omoi; iadedi maraiñede rafuena omoi finoñenia, omoi patrón omoína duere finoia, ibana omoi oñenia, Jusiñamuimona mare. ²¹ Duere omoi sefua, ibana oñeno. Iese omoi illena, Jusiñamui omoína fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. ²² Naimiedi maraiñede rafuena jaca finoñede. Tainona jaca lloñede. ²³ Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoína ico duere finoiticue” raiñede. Naimiedi Jusiñamui naimacina ico raise duere finollena uiñote. ²⁴ Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodicaí. ²⁵ Sedañega toica llaudaiaí isoi jaie ebena jaisoidicaí. Cai sedaraima anamo jai iticaí. Naimiedi cai comeciaina jai eenote.

3

Pedrodi inirediñaiñuaina, airedino diga llofueté

¹⁻² Inirediñaiñuái, omoimo jai lloiacadicue. Omoi iniñiaí uaina ñno. Nibai birui Cristo rafuena ñnoñedimaci; iadedi omoi marena illamona, Cristo ñibeimo naimacina itataitomoi. Jusiñamui uaina omoi ñnuamona, omoi marena illamona, damierie Cristona ñnoitimaci. ³ Dañaiñorie abina eo finocabidimaci, naiñaiñuaina jaie comini ebinaillena. Naiñaiñuái ifotiena eo finocabidimaci. Eo raifide rana jitacabidimaci. Eo ebirede raifide iniroina jitacabidimaci. Naie isoide ra comecina marena itatañede; ia Jusiñamui jitaillacinodo jaillamona, comeci marena ite. Jaie comini omoína ebinai raillano, iese omoi iñeno; ⁴ iadedi jaie comini omoína ebinaillena, omoi comeciái marena fino. Omoi iniñiaí uaina oñeno. Naimaci jitailla rafuena fino. Omoi comeciái iese ia, Jusiñamuimona eo mare. ⁵ Cai jaiagai facaise Jusiñamuina ñnotiñaiñuái iese itimaci. Cue birui llofuia isoi, naiñaiñuái abina jaie finodimaci. Naiñaiñuái iniñiaí uaina ñnotimaci. ⁶ Iese Sara micori ie iní Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jaia, buena omoi jaciruiñenia, naiñaiño isoi iitomoi. Iemona naiñaiño uruaina jaitomoi isoitomoi.

⁷ Airedino, omoimo jai lloiacadicue. Omoi ainiaimo comeciaina faca. Cai isoi naiñaiñuái mairiñena jira, naiñaiñuaina isiruillamona, naiñaiñuaina marena raise seda. Jusiñamui omoína duenaillamona, naimie cominina jai jaidomoi. Omoína jai jillotate. Omoi ainiaína omoi raise sedañenia, Jusiñamuimo daajena raise jñnidomoiico.

Cristo ñibeimo cai illa rafue

⁸ Daje isoi comeciái lloicana jai. Coninina duenai. Naga creyentena isirui. Jiañona cano. Abina iedoñeno. ⁹ Omoína jaie comini duere finoia, ibana oñeno. Omoína naimaci jeare ñaia, ibana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui ñinena: “Mare” caina raite. ¹⁰ Jusiñamui facaina lloraima micori iena jaie cuela. Marena uri jaca bu iacania, jeare ñaiñeno. Tainona lloñeno.

11 Jearede rafue finuana fainonocai. Mare rafuedo jai.

Omoï ecimo itino diga, uri icana omoï jai.

12 Naimie jitailla rafue omoï finoia, Jusiñamui iena uiñuamona, omoïna raise sedade.

Naimie diga omoï ñaia, iena cacade;

iadedi maraiñede rafue bu finoia, Jusiñamui naimie diga icirite.

13 Mare rafuena omoï finocana jai: “Maraiñede rafuena naimaci finua jira, naimacina duere finoiticaï” rainidimaci; 14 ia mare rafuena omoï finuamona omoï duere sefuia, Jusiñamui omoïna canoite. Omoïna duere finodinona jaciruiñeno. Jarire iñeno; 15 ia omoï comeciã jitaillamona Cristona seda. Naimiedi cai Nama. “¿Bue ñellena Cristona ñnotomoï?” omoïmo bu jicanoia, uaina raise ono. Fecuisse iciriñeno, uaina ono. 16 Mare rafuena finocana jai. Omoïna jiaïno jeare ñaia, mare rafuena omoï finocabillamona meidaitimaci. Omoï marena illamona, tainona naimaci lluana bairenite. 17 Mare rafuena omoï finuamona, Jusiñamui jitaillamona omoï duere sefuia, dama iese duere sefuitomoï; ia maraiñede rafuena omoï finuamona omoï duere sefuia, omoï muidona. 18 Cristomo omoï comeciãina faca. Dacaiño cai jeacino facaina naimie fiodaite. Naimie mareuidimie; iadedi maraiñedino facaina fiodaite. Jusiñamui dibeimo caina itataiacade. Naimiena meinetimaci; iadedi naimie Joreño jaca ite. 19 Ie Joreñodo naimie jaillanona, jaiie fiodaitino imaci joreñuai eenoranomo ie finoca rafuena lluaide. Naimaci nia fiodaiñenia, Jusiñamuina jaca ñnoñedimaci; ia Cristo ie finoca rafuena naimaci joreñuaimo lluaide. 20 Jusiñamui rafuena jaiie ñnoñedimaci. Noé micori facaise Jusiñamuidi naimaci naimiena ñnuamo fecuisse ocuiride. Jñuimona jillobillena, Noé micori ie balsana finode. Ocho digamie jillobidimaci. 21 Ie isoide. Omoï bautizaia: “Jusiñamui dibeimo jai iticai” llotomoï. “Jecinomona jai jillobidicai” llotomoï. Omoï abïmo ite jearenamona jillobiñedomoï; iadedi omoï comeciã jai marena ite. Fiodaillamona Jesucristo jillua muidona, jillobidicai. 22 Naimie jillua mei, monamo abïdo jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisã naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

4

Jusiñamuimona cai feiñoga uai diga, naga jiaie creyentena cai canua

1 Cai isoi naimie illamona, Cristo duere sefuide. Naimie duere sefuide; ia jeacina finoñede. Duere omoï sefuia, naimie illamo omoï comeciãina faca. 2 Nana omoï ille ñnori comini jitaillacinodo jaiñeno; iadedi Jusiñamui jitaillacinodo omoï jai. 3 Jusiñamuina uiñoñedino isoi jaiie bie isoide rafuena finouidomoï: Omoï aiñede riñoniai diga isoidomoï. Omoï ñniñede iñiaia diga isoidomoï. Jearede rafuena ebiruitomoï. Jifairuidomoï. Jiruana ebiruitomoï. Jusiñamui rairuica jiraraina sedauidomoï. 4 Naie isoide rafuena omoï jai finoñenia, Jusiñamuina uiñoñedinodi omoïri rajicaidimaci. Omoïna jeare ñaitimaci. 5 Iese itimaci; iadedi Jusiñamui uicomo ico iitimaci. Naimacina duere finoite. Nia fiodaiñedinona duere finoite. Jai fiodaitinona jiaï duere finoite. 6 Naimaci nia fiodaiñena facaise, Jesucristo rafuena cacadimaci. Jecino muidona nana fiodaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

⁷ Bie enirue raire fuite. Ie jira ebena jaiñeno. Comeciaina raise faca. Jusiñamui raise jillaena, iese omoi jai. ⁸ Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire feítaitomoi. ⁹ Jiaie cominina jafueoicaida feiñoñeno; ia caimare feiño. ¹⁰ Creyentiaina omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano. ¹¹ Cristo rafuena bu llofueia, Jusiñamui naimiemo llua isoi, naimie llofua. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaídícue.

Cristo dibeimo cai illamona, duere sefuiticaí

¹² Cue isiruiganodomoi. Eo duere omoi sefua, rajicaiñeno. Creyentiaina omoi jailla jira, duere sefuitomoi. Jusiñamuidi Cristona raise omoi ñnuana facacite. ¹³ Cristo jai duere sefuide. Naimie isoi omoi duere sefua, ieri iobi. Naimie dane bene bia, naimie bairiari eo iobitomoi. ¹⁴ Creyentiaina omoi illamona, omoína bu jeare ñaia, caimare omoi i. Iemona Jusiñamui Joreño omoimo illana uíñoitomoi. Naimie: “Mare” omoína raite. ¹⁵ Jiaínodi cominina meinetimaci. Rana fiídímaci. Maraiñede rafuena finodímaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoi finoñeno. Naie isoide rafuena omoi finuamona omoi duere sefuillana jitaíñedícue. ¹⁶ Creyentiaina omoi illamona omoi duere sefua, ieri meiruiñeno; iadedí creyentiaina omoi illamona, iobillacinona Jusiñamuimo feca.

¹⁷ Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedí naimie cominiñedinona cai baifemo eo duere finoite. ¹⁸ Jusiñamui facaina lloraíma micori iena jaiie cueda: “Mareuidínodí niadedí jillobiñedímacimo, ¿niese comeciaina jearedínodí jillobitímaci? ¿Niese maraiñedínodí jillobitímaci? Nibai jaca jillobiñeítímaci” cueda. ¹⁹ Iena omoi uíñuamona, mare rafuedo jai. Jusiñamui jitaillamona duere omoi sefua, mare rafuedo jai. Jusiñamui caimo finuana omoi uíñuamona, naimie anamo raise i. Naimie omoína raise eenoite. Ie lloga uaina jaca finoite.

5

Pedro creyentiaina nia llofuate

¹ Creyentiaina llofueraíni, omoimo rafuena lloiacadícue. Cuedí jiaí llofueraímadícue. Cristo fiódallana ciodícue. Naimie ebire abido bia, jiaie creyentiaí diga iena cioítícue. Iese cue illamona, omoimo lloiacadícue. ² Omoi anamo ite creyentiaina raise seda. Naimacina raise llofue. Jiaimie railla jira, llofueñeno; iadedí omoi jitailla jira, llofue. Rana ollena llofueñeno; iadedí iocire llofue. ³ Omoi anamo itinona riire llofueñeno; iadedí mare rafuedo omoi jaillamona, naimacina llofue. ⁴ Cai creyentiaí nanoca sedaraímadi Cristo. Naimie abido bia, naimiemonabana feiñoitomoi. Naimie diga jaca iitomoi.

⁵ Conirueni, omoi llofueraini uaina raise iino. Coninimona abina iedoñeno. Jusiñamui facaina lloraima micori iese jaie cuega: Bu abina iedoia, Jusiñamuimona marañede; iadedi bu abi iedoñenia, Jusiñamuimona mare.

Jusiñamui naimiena duenaite

cuega. ⁶ Iese illa jira, cai Jusiñamui siñona jira, naimie anamo abina iedoñeno mai raise omoi i. Iemona naimie jitailliruido omoina iobitaite.

⁷ Nie isoide rafue ia, Jusiñamui omoina canocabillana omoi uiñuamona, omoi comeciai jarire finoñeno. Naimie omoina eenoite.

⁸ Ebena jaiñeno. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide. ⁹ Naimie ra faia uaina iñoñeno; ia Cristona iñocana jai. Omoi duere sefuilla isoi, nana jiaie creyentiai duere sefuidimaci. Iena omoi uiñuamona, omoi comeciai ocuiñocana jai. ¹⁰ Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iitica. Dallu birui duere cai sefuia, Jusiñamui cai comeciaina raise finoite. Cai comeciaina raise ocuiñotaite. ¹¹ Illaimana naimie illamona, caina jaca sedade. Naimiemo iobillacino cai fecacabillasa. Iena jitaidecue.

Naga creyentiaimo carta oria rafue

¹² Silvanona uiñotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise iñogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uiñuamona, bie rafuena iñocana jai.

¹³ Babiloniamoi ite creyentiai omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jai orede. Cristomo naimie jai duilla jira, naimie cue jitona eruaide. ¹⁴ Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatana uiñocana mai jai. Macaibaite. Pedrodicue.

IE EMODOMO PEDRO ORETAGA RABE

Pedro creyentiaimo carta orede

¹ ¿Nigacino? ¿Nie isoidomoi? Bie carta omoimo oredicue. Simón Pedrodicue. Jesucristo dibeimo maijiamona, ie rafuena lloticue. Cuen a oretajamona, ie lloga uaina finodicue. Cai isoi jai inotomoi. Cai Jusiñamui marena illa jira, Jesucristo marena illa jira, Jesucristo omoina jillotaja jira, jai inotomoi. Jusiñamuimona cai isoi omoi illa jira, bie carta omoi dine oredicue. ² Jusiñamuina omoi uiñuamona, cai Nama Jesús omoi uiñuamona, iaimaiai omoina duenaillana uiñocana jai. Iaimaiai omoi uri itatajana uiñocana jai.

Creyentia marena illa rafue

³ Jesús siñona illamona, bene cai marena illena, naimiedi nana rafue caimo jai iga. Naimiena cai uiñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode. ⁴ Naimie iese illamona, eo mare rafuena caimo jai llote. Jiaie rafue baifemo faite. Bie rafue muidona jeacinomona jillobidicai. Cai comeciai jaie jitailla jira, faificana jaidicai; iadedi naimie rafuena cai inuamona, naimie illa isoi, icana jaidicai. ⁵ Jesucristona jai inotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uiñocana jai. ⁶ Jearede rafue finocana jaiñeno; iadedi omoi comeciaina eeno. Iena ocuiñocana jai. Jusiñamuina sedacana jai. ⁷ Jiaie creyentiaina isiruicana jai. Naia cominina isiruicana jai. ⁸ Naie isoidicinona jitaïdomoi. Iedo omoi raise jaia, cai Nama Jesucristona eo raise uiñocana jaitomoi; ⁹ iadedi iedo omoi jaiñenia, abina nia raise uiñoñedomoi. Omoi jeacinomona jai jilluana jia jai feitatomoi. Mare rafuena finocana jaillena, omoi jeacinomona jillobidomoi. Iena feitaño. ¹⁰ Cue amatiai, naie isoidicinona finocana jai. Iemona Jusiñamui omoina fetuana raise uiñoitomoi. Abido danomo jia jaiñeitomoi. ¹¹ Iese omoi jaia, cai Jilloitaraimana naimie illamona, cai Nama Jesucristo ie illanomo omoina eo marena feiñoite. Nainomo naimie anamo jaca iitomoi.

¹² Ie jira bie isoide rafuena diga icaiño omoimo lloticue. Bie rafuena uiñotomoi. Bie rafue uanaicinona jai raise uiñocaidomoi. ¹³⁻¹⁴ Cai Nama Jesucristo cuemo jai llua jira, raire cue fiodaillena uiñoticue. Nia cue fiodañenia, bie rafuena omoimo diga icaiño lloticue. Iese omoimo cue lloia, cuemona mare. ¹⁵ Bie rafue omoi raise nagarui uiñollena, omoina birui canoiticue. Cue fiodaille mei, nagarui bie rafuena omoi feitañenana jitaïdicue. Ie muidona bie rafuena jai cueticue.

Pedro Cristona ebirenana jaie cïode

¹⁶ Jamai rafue omoimo lloñedicai. Omoina jifueiacaiñedicai. Cai Nama Jesucristo siñonana lloticai. Naimie abido billena jia jai lloticai. Naimiena ebirenana jaie cïodicai. ¹⁷⁻¹⁸ Eniruemo naimie jaie ia, anedu muidomo naimie diga jaidicai. Jusiñamui nainomo jia illa jira, naie illano mare. Naie facaise Jusiñamui llua cacadicai. Jusiñamui naimiena iobitaïacade. Ebire llote: “Bimie cue isiruiga jito. Naimieri iobidicue”. Iena jaie cai ciuanona, birui naimie siñonana lloticai. ¹⁹ Naiemona Jusiñamui

facaina jaie lloraini micoriai lloga rafue suillena jai raise uiñoticaí. Naimaci lloga rafuemo omoi comeciaina faca. Lamparín jítiredinomo lligaiñua isoi, naie rafue cai comeciaina uanaicinona uiñotade. Mon-airaicuduna cai cioia, iairei monaille ua illana uiñoticaí. Ie isoide. Cristo dane baireia, iena raise uiñoticaí. Jusiñamui facaina lloraini micoriai rafuena cai uiñuamona, uanaicinona ua uiñoticaí. ²⁰ Biena uiñoticaí. Dani comeciaimana Jusiñamui facaina lloraini micoriaídi naimaci lloga uaina llofueñedimaci. ²¹ Dani naimaci comeciái jamai facajamona naie rafuena oñedimaci; iadedi Jusiñamui Joreño naimacimo illamona, naimacina iena uiñotajamona, Jusiñamui rafuena jino llotimaci.

2

Pedro tainona llofuerainina llote

¹ Cai jaiagai facaise tainona llofueraini itimaci. Birui ie isoide. Omoi motomo tainona llofueraini iitimaci. Jusiñamui rafuena raise llofueñeitimaci; iadedi naie rafuemonona omoína itataiacanitimaci. Naimaci facaina Jesucristo fiodaite; iadedi: “Jesucristo cai Nama” raiñeitimaci. Naimaci finolle rafue muidona, raire ebena faifitimaci. ² Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci. ³ Ucube ollena, naimaci tainona llofuiacinodo omoína jifueiacanitimaci; iadedi Jusiñamui rícaillafue anamo jai itimaci. Jusiñamui naimacina íco duere finoite.

⁴ Naimie ecimo ite jaienisaímona damierie jeacino jaie finua jira, Jusiñamui naimacina jai oni dotade. Naimie rícaillafue anamo naimaci jai illamona, naimacimo ite uai jai íñede. Jítiredinomo jai itimaci. Naimacina duere finoite, nana comini Jusiñamui dine illírui ia. ⁵ Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo llote; iadedi Jusiñamuina ñnoiacaíñedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorína, ie siete comini diga, jillotate. ⁶ Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua. ⁷ Sodomamona Jusiñamui Lot micorína jillotate. Lot micori maremie. Eo jearede rafuena naie nairai finua jira, Lot micori comeci jarire ite. ⁸ Naimaci motomo naimie illamona, nagarui naimaci marañede rafue naimie ciuamona, naimie comeci uri íñede. ⁹ Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faiamona jilloitajana uiñote. Jusiñamui naimiena ñnoñedino naimie rícaillafue anamo illana jiaí uiñote. Íco naimacina duere finoite.

¹⁰ Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaína jaciruiñeno jeare ññaitimaci. ¹¹ Jusiñamui jaienisaí uai naimaci baífemo faíte; iadedi Jusiñamui illanomo naimaci illamona, bie tainona llofuerainina jeare ññañedimaci. ¹² Ocainaiái abina raise uiñoñena muidona, cai rillena naimacina faticaí. Bie tainona llofueraini ocainaiái isoidimaci. Naimaci raise uiñoñega rafuena jeare ññaitimaci. Ocainaiái faifilla isoi, faifitimaci. ¹³ Jiaie cominina naimaci duere finua dinori

duere sefuitimaci. Birui ite rafuena nagarui eburitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci ebiruilla jira, raise conini diga nabairinidomoi. ¹⁴ Riñona naimaci cioia, naiñaiño diga eo icadimaci. Jeacinona finocana jaicabidimaci. Cristona nia raise iinoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci. ¹⁵ Cristo rafuena fainonocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacañede; iadedi jiaie rafuena lollena, jiaie nairai dine jaide. ¹⁶ Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofuerañi, Balaam isoi, jiaie rafuedo jaidimaci.

¹⁷ Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerañimona buena oñedomoi. Naimaci comeciai daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiñedimaci. ¹⁸ Jamai ñaia diga abina iedotimaci. Uanañede rafuemona, como Cristomo iñotinona ramo faitimaci. “Jearede rafue finuana mare” raitimaci. ¹⁹ “Cai jitailla rafuena finoredicai” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci. ²⁰ Cai Nama Jesucristo. Naimiedi cai Jilloitarañima. Naimiena naimaci jaie iñuamona, marañedicino anamona jai jilloidimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci. ²¹ Cristo rafuena jaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fainonocaillamona, eo jai fodo jaidimaci. ²² Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemona danomo abido jaidinodi daje isoidimaci.

3

Pedro cai Nama Cristo dane billena llofujete

¹ Cue isiruiganodomoi. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue. ² Jusiñamui facaina jaie lloirañi micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai llotica. Naimie muidona jillobidomoi. Bie rafuemo omoi comeciai facajana jitaidicue. ³ Biemo nano omoi comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci. ⁴ Jicanoitimaci: “¿Ñiese Cristo nia abido biñede? Enirue finua facaisemona nana ra daje isoi comucana jaide. Cai mootiai jai fiodaicana jaidimaci. Cristo jaca biñeite”. ⁵ Iese raitimaci; iadedi iese iñede. Jaie suide rafuemo comeciaina facacaiñedimaci. Jusiñamui jaie lluamona, ie uaido mona finode. Enirue jiai finode. Jinuimona iena finuamona, jinuimona eniruedi bairedede. ⁶ Jinui diga Jusiñamuidi Noé micori facaise cominina jaie fuidode. ⁷ Jusiñamui mona, enirue diga, ico

fuidollena jai llote. Mona, enirue diga, bootaite. Ie jitaillirui Jusiñamui naimiëna ñnoñedinona iese duere finoite. Ie uai jai llote; ia nia suiñede.

⁸ Cue isiruiganodomoï. Biena feitañeno. Ie lloga uai jaca suite. Cai Namamona daruidi mil años isoide. Naimiemona mil añodi daruïbicaide isoide. ⁹ Damierie comeciaï facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiëna ñnuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede. ¹⁰ Firiraima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuaï diga, bootajamona, fuite. Enirue, nana benomo ite ra diga, bootaite. ¹¹ Bie rafue suillena uiñoticaï. Naie cai uiñuamona, Jusiñamui jitailla rafue finocana cai jailla. Naimiëna raise cai sedajasa. ¹² Naie facaise billemo iocire cai sedaja. Raie suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuaï diga bootajamona iena fuidoite. ¹³ Naimie jai llua isoi, jiaie mona, jiaie enirue diga illena sedadicaï. Nainomo Jusiñamui jitailla isoi marena jaca iiticaï. Nainomo mare rafue finocana jaiticaï.

¹⁴ Cue isiruiganodomoï. Bie rafue nia suiñena jira, naimie abido nia biñena jira, jeacino finoñeno i. Uri icana omoï i. Iese omoï ia, naimie abido bia, omoïna: “Mare” raite. Omoïri iobite. ¹⁵ Raie abido cai Nama biñena, naimiedi comini naimiëna ñnuamo ocuiride. Iena uiñoticaï. Cai isiruiga ama Pablo, bie isoide rafue omoïmo navui cuete. Cristo naimiëna uiñotaga rafue diese cuete. ¹⁶ Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue irirede. Cristo rafuena raise uiñoñedino, Cristona raise ñnoñedino iena tainonana llofuecabitimaci; iadedi iemona faificana jaidimaci. Jiaie Cristona ciegafuiaina tainonana llofuecabitimaci.

¹⁷ Bie rafue birui uiñotomoï. Iena omoï uiñuamona, jearede rafue finocabidino rafuedo jaiñeno. Abido danomo omoï jaiñellena, iemona abina rairui. ¹⁸ Cai Nama cai duenailana uiñocana jai. Naimiedi cai Jilloitarama. Naimiëna omoï uiñocana jaillamona, naimiëna nabai. Naimiëna birui cai iobitajasa. Naimiëna ua jaca cai iobitajasa. Mai. Macaibaite. Pedrodicue.

JUAN NANO FUEÑE ORETAGA RABE

Jusiñamui diga cai jaca illena, Juan cuete

¹ Cue uruiaina omoi isoilla jira, omoimo cartana oredicue. ¿Nie isoidomoi? Nano dofoconi itimiēna lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicai. Naimiēna ciodicai. Naimiēna jiai jetadicai. Caina Jusiñamuina uñotade. Jusiñamui diga cai jaca illena, jiai caina llofue. ² Jusiñamui dinena billanona, iimana jaide. Naimiēna jaie raise cai cūa jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiēna jai ciodicai. ³ Cai cūa rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jiai jitaidicue. ⁴ Omoi comeciai caimareficaillena, omoimo bie rafuena cueticue.

Jusiñamuidi jaca mareuidimienā jira, useredinomo ite isoide

⁵ Jesucristomona cai cacaja rafuena omoimo ja lloiticue. Jusiñamuidi jaca mareuidimienā jira, useredinomo ite isoide. Naimie comecidi jaca jeanina jira, jitiredinomo iñede isoide. ⁶ “Jusiñamuina nabaidicai” cai raia, iadedi jeacinona finocana cai jaia, tainona lloticai. Uanaicinodo nia jaiñedicai. ⁷ Jusiñamui jeacino jaca finoñede. Naimie isoi jeacino finoñeno cai jaia, coninina nabaidicai. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate. ⁸ “Caimo jeacino jaca iñede” cai raia, dani cai abina jifueticai. Uanaicinodo nia jaiñedicai. ⁹ Naimiemo cai finoca jeacino cai lloia, Jusiñamui cai jeacinona dotaite. Nana cai maraiñedicinona dotaite. Naimie inogamiēna jira, naimie maremiēna jira, iese finoite. ¹⁰ “Omoimo ite jeacino” Jusiñamui llote; iadedi: “Jeacino finocabiñedicai” cai raia, “Jusiñamui tainona llote” raiticai. Iemona naimie uaina jai uaitaticai.

2

Cai facaina riidotimiedi Cristo

¹ Cue uruiā isoi cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitañedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiēna jira, cai facaina caina riidoite. ² Cai jeacino facaina naimie fiodaite. Iemona Jusiñamui riicaillifue anamona jillobidicai. Jesucristo cai facaina fiodaite; ia nana comini facaina jiai fiodaite. ³ Jusiñamui llogacinona cai inuamona, naimiēna cai uñuana jai uñoticai. ⁴ “Naimiēna uñoticue” raitimiedi ie llogacinuai inoñenia, naimiedi tainona lloraīma. Uanaicinona uñoñede; ⁵ ia Jusiñamui llogacinuaina inotimiedi Jusiñamuina eo isiruicana jaite. Naimiēna cai isiruillamona, naimiēna cai nabaillana jai uñoticai. ⁶ “Cristona nabaidicue” raitimiedi, Cristo isoi, mare rafuena finoite.

Cristo rafuedo jaidomoi

⁷ Cue isiruiganodomo. Creyentiaina omoi jailla facaise bie rafuena cacadomoi. Ie jira jiaie rafuena birui omoimo cueñeiticue; ⁸ ia naicinona

abido dane lloiticue. Cristo iedo jaide. Iedo jiai jai jaidomoi. Jeacino anamo omoi jai illamona, jitiredinomo itomoi isoidomoi; ia Cristo rafuena omoi jai uiñuamona, useredinomo jai itomoi isoidomoi. ⁹ “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitiredinomo naimie nia ite isoide. ¹⁰ Jiaie creyentena bu isiruaia, Cristo rafuedo raise jaide. Iedo naimie jaia, jiaimiena jeacinona finotañeite; ¹¹ iadedi jiaie creyentena bu enoia, jitiredinomo nia ite isoide. Jeacino anamo nia ite. Uisinidimie ie jaillinona raise uiñoñena isoi, Jusiñamui dine rillena raise uiñoñede. Ie isoi abina uiñoñede.

¹² Cue uruiaia isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

¹³⁻¹⁴ Einamací, Jusiñamuina are omoi jai ñnuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabillamona, marañedimiena omoi jai anafetitaja jira, omoimo bie cartana cueticue. Naimiedi Taife. Uruiaia, Jusiñamui uaina omoi como ñnuamona, omoimo bie cartana cueticue. ¹⁵ Omoi ecimo marañede rafuena eburuiño. Iena bu eburuaia, cai Moo Jusiñamuina isiruiñede. ¹⁶ Cai comeciaino ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruaia diga, abi ieducinodi Jusiñamui ieñede. ¹⁷ Jusiñamui ieñede rafue jaca fuite. Naie isoide rafuedo jaidinodi jiai faifitimaci; iadedi Jusiñamui jitaillacinona finodimie Jusiñamui illanomo jaca iite.

Cristona abi caitadino rafue

¹⁸ Cue uruiaia isoidomoi. Jesucristo abido billirui iairei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iairei illana jai uiñotomoi. ¹⁹ Cai creyentia motomo nano itimaci; ia Cristo ñbeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caïmona naimaci jailla jira, Cristomo naimaci ñuñenana jai uiñoticaia. ²⁰ Jesucristomona Jusiñamui Joreñona jai omoi feiñua jira, nana omoi Jusiñamui ñbeimo ite rafuena jai uiñotomoi. ²¹ Ie jira uanaicinona bu llofueia, iena uiñotomoi. Uanañedicinona bu llofueia, iena jiai uiñotomoi.

²² Tainona llofuerainina ja cueiticue. “Cristo cai jilloitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini. ²³ Cristona ñnoñedinodi Jusiñamuina jiai ñnoñedimaci. Cristona ñnotino Jusiñamuina jiai ñnotimaci. Jusiñamui Joreño omoimo illamona, iena jai uiñotomoi. ²⁴ Ie jira creyentiana omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jiai raise nabaitomoi. ²⁵ Jusiñamui caïmo jai llua isoi, naimie diga jaca iiticaia. ²⁶ Omoïna damierie jifueiacana jira, bie rafuena jai cueticue. ²⁷ Jusiñamui Joreñona jai feiñotomoi. Omoïna Jusiñamui rafuena naimie uiñotaja jira, jiaie rafuena llofuerainina jai jitañedomoi. Jusiñamui Joreño uanaicinona omoïna uiñotacabide. Naimie omoïna uiñotaja isoi, Cristona nabaicana omoi jai. ²⁸ Cristo ñco abido biite. Omoi jacinañellena, naimiena omoi meiruiñellena, naimiena birui raise

omoi nabai. ²⁹ Jusiñamui maremiēna cai uiñuamona, nana mare rafuena finocabidino naimiemo duillana jiai uiñoticaí.

3

Juandi Jusiñamui cominina llua rafue

¹ Jusiñamui caina isiruillamona, naimie cominina jai jaidicaí. Iemo omoi comeciaina facajana jitaidicue. Naimiēna naimaci uiñoñena jira, Jusiñamuina iñoñedino cai uiñoga rafuena jiai raise uiñoñedimaci. ² Ero, birui Jusiñamui cominidicaí. Cristo dane bia, cai illena nia raise uiñoñedicaí; ia naimie illa isoi cai ico illena jai uiñoticaí. Ico naimiēna cai cioillemona, iena raise uiñoiticaí. ³ Iemo cai ocuirillamona, naimie marena illa isoi, cai comeciai marena itataja. ⁴ Jeacinona finocana bu jaia, Jusiñamui llogacinuaina iñoñede. Jusiñamui llogacinuaina bu iñoñenia, jeacinona jai finode. ⁵ Jusiñamui dinena Cristo billanona, imana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino dibeimo naimie jaca iñede. ⁶ Naimiēna nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiēna nia raise uiñoñede. ⁷ Cue uruiái isoidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoiña jifueñellena, abina rairui. Jescristo jaca maremie. Mare rafuena finocana cai jaia, naimie isoi mareniticaí; ⁸ ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafetitallena. ⁹ Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide. ¹⁰ Iemona Jusiñamui dibeimo itinona raise uiñoticaí. Taife dibeimo itinona jiai raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jiai duiñede.

Coninina cai isiruilla rafue

¹¹ Creyentiaina omoi jailla facaise: “Coninina isirui” raillana cadomoi. Jiaie creyentiaina nia omoi isiruiñenia, Jusiñamuimo nia duiñedomoi. ¹² Caín micorimona cai fueua. Naimie ie amana isiruiñena jira, Taife naimiēna ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finoñede. Uradoillamona ie amana meinete. ¹³ Ie isoide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinaiñeno. ¹⁴ Cristona nia cai iñoñena facaise jeacino anamo cai illa jira, Jusiñamuimona fiодaitino isoidicaí. Jiaie creyentena cai isiruiña, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite. ¹⁵ Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede. ¹⁶ Cristomona cai fueua. Naimie jitailla jira, cai facaina fiодaite. Iemona jiaie creyentiaina cai isiruillana uiñoticaí. Ie jira naimaci facaina naimaci ramo jiriñellena fiодaiacaniticaí. ¹⁷ Jiaie creyentiaina cai isiruillamona, naimacina canoiticaí. Omoimo ra ia, jiaie creyentemo ra iñenia, naimiēna omoi canoñenia, Jusiñamuina raise isiruiñedomoi. ¹⁸ Cue uruiái isoidomoi. “Jamai uaido jiaie creyentiaina isiruiticaí” cai raiñena; iadedi cai finoca rafuemona naimacina cai canua.

Jusiñamuimo jaciruiñeno jiredicai

19 Jiaie creyentiaina isiruicana cai jaiia, Jusiñamui cominina cai illana raise uiñoticaí. Jusiñamui muidona cai comeci uri ite. 20 Cai comecimo iticinona uiñoticaí. Siñonamiëna jira, Jusiñamui iena jiaí uiñote. 21 Cai comecimo jeacino iñenia, Jusiñamuimo jaciruiñeno jüredicaí. 22 Naimie llogacinona cai iñoia, naimie jitaillacinona cai finoia, naimiemo cai jicaca rafuena birui feiñoticaí. 23 Naimie Jito Jesucristo cai iinuana jitaide. Cristo llua isoi, coninina cai isiruillana jiaí jitaide. 24 Naimie llogacinuaina cai iñoia, naimiëna nabaidicaí. Caina jiaí nabaide. Naimie Joreño caimo illamona, naimie caina nabaillana jai uiñoticaí.

4

Juan tainona llofuerainina llua rafue

1 Omoina isiruiticue. Naga llofueraima uaina iñoñeno. Ailluena tainona llofueraini birui illa jira, Jusiñamuimona naimaci feiñoga uaina nica naimacina facaci: 2 “Jusiñamui dinena Jesucristo billanona, imana jaide” naimaci lloia, Jusiñamuimona naimaci uaina otimaci; 3 ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiëmona naimaci uaina otimaci. Naimie billena jai fididomoi. Comini comeciaina feidocana birui jaidimaci. 4 Ero, Jusiñamuimo jai cai duillamona, Jusiñamui caimo ite. Taino llofueraini dibeimo omoi jaiñena jira, naimaci llofuiana oñedomoi. Naie taino llofuerainimo Taiife ite; ia Jusiñamui Taiife baifemo faite. 5 Naie tainona llofueraini Jusiñamuina iñoñedinomo duidimaci. Naimaci ecimo ite rafuena llofuecabitimaci. Jusiñamuina iñoñedino naimaci llofuiana ebiruitimaci. 6 Jusiñamuimo jai duidicaí. Jusiñamuina iñotino cai llofuiana cacaacadimaci; ia Jusiñamuina iñoñedino cai llofuiana cacaacaiñedimaci. Iemona Jusiñamui uaina llofuerainina uiñoticaí. Iemona tainona llofuerainina jiaí uiñoticaí.

Jusiñamui caina isiruilla rafue

7 Omoina isiruiticue. Coninina cai isiruilla. Jusiñamui caina isiruillamona, caina jianona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci. 8 Jusiñamuimo cai duillamona, caina jianona naimie isiruitaja jira, jianona isiruiñedimiedi Jusiñamui rafuena nia uiñoñede. 9 Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticaí. Ie finoca rafuëmona Jusiñamui caina isiruillana jai uiñoticaí. 10 Jusiñamuina cai isiruillana ñaiñedicue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacinona feitate. Iemona isiruillana raise uiñoticaí. 11 Caina Jusiñamui isiruilla isoi, coninina cai isiruilla. 12 Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uiñoticaí. Naimiëna isiruicana jiaí jaidicaí. 13 Naimie Joreño caimo itatajamona, naimiëna cai nabaillana uiñoticaí. Caina naimie nabaillana jiaí uiñoticaí. 14 Bie rafuena jiaí uiñoticaí. Jusiñamui ie Jitona eniruemo jaie oretate. Naimiëna iñoñedinona jilloitallena, naimiëna oretate. Naimie Jitona ciodicaí. Ie jira iena birui lloticaí. 15 “Jusiñamui Jitodi Jesús” llotimiedi Jusiñamuina nabaide. Jusiñamui naimiëna jiaí nabaide. 16 Ie jira Jusiñamui caina isiruillana uiñoticaí. Caina jianona naimie isiruitade. Iedo cai jaillamona, caina nabaide. Naimiëna jiaí nabaidicaí. 17 Iemona

Jusiñamuina isiruicana jaiticai. Naimie uicomo ico nana cai ille facaise naimiena jaciruiñeiticai. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñedicai. ¹⁸ Jusiñamuina cai isirua, naimiena jaciruiñedicai. Eo raise naimiena cai isirua, ¿niese naimiena jaciruiticai? Naimiena cai jacirua, naimie caina duere finuana jaciruiticai. Jusiñamuina jaciruitimiedi Jusiñamuina nia raise isiruiñede. ¹⁹ Nano Jusiñamui caina isiruilla jira, caidi naimiena isiruiticai. ²⁰ “Jusiñamuina isiruiticue” raitimiedi jiaie creyentena enoia, jai taino llote. Creyentena ciode; ia naimiena isiruiñede. Jusiñamuina cioiñede. ¿Niese ie cioiñenamiena isiruite? ²¹ Jusiñamui iena caimo jai llote: “Cuen a isiruitimie jiaie creyentena jiai isiruite”. Ie jira coninina isirui.

5

Taife ie rafuena anafefitaticai

¹ Jusiñamuimona Jesús billana cai inoia, Jesús cai Jilloitaraimana cai inoia, Jusiñamui cominina jaidicai. Jusiñamuina cai isirua, nana naimie cominina jiai isiruiticai. ² Jusiñamuina cai raise isirua, naimie llogacinuaina cai inoia, naimie cominina jiai isiruiticai. ³ Jusiñamuina cai isirua, naimie llogacinuaina jiai jai inotica. Naimie uai raise inuamona, iena finollena sefuiruiñedicai. ⁴ Jusiñamui dibeimo itinodi Taife ie rafuena anafefitatimaci. Cristona cai inuamona, Taife ie rafuena anafefitaticai. ⁵ Jesúsdi Jusiñamui Jitonana cai inuamona, Taife rafuena anafefitaticai.

Jesucristodi Jusiñamui Jito

⁶ Jesucristona dane ñaiticue. Naimiedi Jusiñamui Jitona inotica. Naimie bautizajamona, naimie fiodaillamona naimiedi Jusiñamui Jitonana uifnotica. ⁷ Uanaicinona naimie uifnuamona, Jesucristo bautizaja facaise Jusiñamui Joreño caina iena jiai uifnotade. ⁸ Jusiñamui Joreñomona, Jesús bautizajamona, Jesús fiodaillamona, Jesúsdi Jusiñamui Jitonana raise uifnotica. ⁹ Jesús bautizaja facaise “Jesúdi cue Jito” Jusiñamui caimo llote. Jesúsna comini lloia, iena feifnotica. Comini llua baifemo Jusiñamui llua faia jira, Jusiñamui llua jiai ua feifnotica. ¹⁰ Jesúsdi Jusiñamui Jitonana cai inuamona, cai comeciai daje isoi lloide; ia Jusiñamui ie Jitona llua inoñedinodi: “Jusiñamui taino llote” raitimaci. ¹¹ Biena ñaiticue. Jusiñamui naimie diga caina jaca itataiacade. Naimie Jitona cai inuamona, iese caina jai itatate. ¹² Jusiñamui Jitona inotino Jusiñamui diga jaca itimaci; ia naimiena inoñedino Jusiñamui diga jaca ifneitimaci.

Jusiñamui caina raise uifnote

¹³ Jusiñamui diga ico omoi jaca illena omoi raise uifnollena, bie cartana jai cueticue. ¹⁴ Jusiñamuina cai inuamona, naimiena jai jaciruiñedicai. Naimiemo cai jiaia, naimie jitailla isoide rafuena cai jicaia, naimie caina cacajana raise uifnotica. ¹⁵ Iese cai jiaia, naimie jaca fairuana jiai uifnotica. ¹⁶ Jiaie creyente jeacino finuana omoi cioia, naimie facaina Jusiñamuimo jii. Iemona Jusiñamui dibeimo naimiena dane itataitomo. Jusiñamui rafuena jamaidimie facaina omoi jiaana lloñedicue. Naimie faificana jaiacade. ¹⁷ Jusiñamui llogacinona bu inoñedino, jeacino jai finode; ia naimie facaina omoi jiaia, Jusiñamui iena feitaite. Faificana jaiacadimie facaina omoi jiaana lloñedicue. ¹⁸ Jusiñamui comini jeacinona

finocana jaiñedimaci. Naiemona Cristo caina eenote. Ie jira Taife caina duere finonide. ¹⁹ Jusiñamuimo jai duidicai. Naimie anamo jai iticai; ia naimiena ñnoñedino Taife anamo jai itimaci. ²⁰ Jusiñamui Jito jai eñruemo billana uiñotica. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidicai. Jesucristomo jiai jai duidicai. Ie jira Jusiñamui diga ico jaca iitica. ²¹ Cue uruia isidomoi. Daje rafuena nia lloiticue. Jiraramona abina rairui. Jusiñamui ieñede rafuedo omoi jaiñeno. Mai. Juandicue.

JUAN IE EMO DOMO ORETAGA RABE

Uanaicinona coninina cai isiruilla

¹ Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiaimo cue uaina jiai oredicue. Jusiñamui ona jai fetuamona, Cristo ie uanaicinona cue uñua jira, omoina isiruiticue. Nana naie uanaicinona uñnotinodi omoina isiruitimaci. ² Naie uanaicinona cai uñua jira, omoina isiruiticai. Iena uñocana jaca jaiticai. ³ Cai Moo Jusiñamui ie Jito Jesucristo diga, caina jaca duenaite. Iaimaiai caina jaca uri itataite. Uanaicinona cai uñuamona, iaimaiaina cai isiruillamona, iese iiticai.

⁴ Caimo cai Moo llua isoi, uanaicnodo o uruiaimona dajerie jailla jira, iobidicue. ⁵ Ñoo, daje rafue omo lloiacadicue. Bie rafuena navui uñnotio. Cristo rafuena nano cai ñnoia, bie rafuena uñnoticai. Coninina cai isiruillana ñaiticue. ⁶ Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui llucacinona cacadomoi. Coninina cai isiruillana cacadomoi.

Diga taino lloraini ite

⁷ Diga taino lloraini illa jira, iena ñaiticue. Jesucristo monamona jai billanona, ñmana jaiñenana llofuecabitimaci. Bu iese llofueia, cominina jifue. Naimiedi Cristona abi caitadimie. ⁸ Cristo rafuedo omoi jailla jira, Jusiñamuimona buena omoi faifñellena, omoi abina rairui. Jusiñamuimona ibana feñnotomoi. ⁹ Cristo llogacinona bu fainonocaia, Cristo rafuedo bu jaiñenia, Jusiñamuina ua uñnotede; iadedi Cristo rafuedo bu jaja, cai Moo Jusiñamuina uñnote. Ie Jitona jiai uñnote. ¹⁰ O jofomo Cristo rafuedo jaiñedimie bia, Cristo rafuena cue llofui isoi naimie llofueñenia, naimiena nafueño. “Jusiñamui ona canuamona, marena o jai” lloño. ¹¹ “Marena jai” o lloia, naimie marañede rafue facaina jai itio.

Rafuena nia lloiacade

¹² Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuridicue. Danomo cai rillamona ñaiticai, cai comeciai caimarecaillena. ¹³ O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

JUAN IE EMODOMO JIAIE ORETAGA RABE

Gayo mare rafue finocana jaide

¹ Juandicue. Creyentiaina sedaraimadicue. Gayo, bie carta o dine oredicue. ¿Ñie isoidio? Cristo ie uanaicinona coco uñua jira, ona isiruiticue. ² Cue isiruigamiedio. Nana o finua rafue marena jaillana jitaidicue. O ecairenana jiaí jitaidicue. O comeci marena illana jai uñotícue. ³ Cue dine dajerie creyentiaí bite. Uanaicinodo omoi jaillana llote. Cristo rafuedo omoi jaillana llote. Ie jira iobidicue. ⁴ Uanaicinodo omoi jailla jira, eo iobidicue. Cue muidona Cristona omoi ñnua jira, cue uruiaidomoi isoidomoi. Uanaicinodo omoi jailla jira, eo iobidicue. ⁵ Cue isiruigamiedio. Naga icaiño jiaie creyentiaina o canoia, eo mare. Nia o uññoega creyentiaí o illanomo ria, naimacina o canoia, ua eo mare. ⁶ Naie isoide creyentiaina o isiruillana jiaí fididicue. Rollena creyentiaí ofia, ona marena ñaitimaci. Naimaci jaillinomo naimaci jia, naimacina o canoia, Jusiñamui jitailla isoi, ua eo mare. ⁷ Naimie rafue llua muidona, jai macaritimaci. Jusiñamuina uññoedinomona jaca buena feiñoñedimaci. ⁸ Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

Diótreres marañede

⁹ O dine ite creyentiaimo cartana jai oredicue. Diótreresna janore ñaiacadicue. Naimiedi eo uicoidimie. Naimiedi cue uaina uññoiacañede. ¹⁰ O dine cue ria, naimie finoca rafuena omoimo lloiticue. Cuenajear ñaite. Jiaie illanomona bite creyentiaina feiñoiacañede. Naimaci feiñuana rairuide. Roracomo naimaci bia, naimacina jino dotade.

¹¹ Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uññoñede.

Demetrio marena ite

¹² Nana creyentiaidi Demetriona marena ñaitimaci. Uanaicinodo naimie jaide. Iese naimiena jiaí ñaiticai. Cai llucacinosi uanaicinona uñnotio.

Rafuena nia lloiacade

¹³ Diga rafuena cueiacadicue; iadedi cueñeiticue. ¹⁴ Raire ona cue cioillemo ocuridicue. Ie mei ñaiticoco. ¹⁵ Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

JUDAS ORETAGA RABE

Judadi Jusiñamui fetocanomo cartana orede

¹ Cue nabaiñiai, bie carta omoi dine oredicue. ¿Nie isoidomoi? Judadicue. Ie rafuena lollena, Jesucristo dibeimo jai maijidicue. Jacobo cue ama. Jusiñamui omoina jai fetuana cue uiñuamona, bie cartana oredicue. Cai Moo Jusiñamui omoina isiruite. Jeacinona omoi finoí rail-lano, Jesucristo omoina jai sedade. ² Jusiñamui omoina eo duenaillana omoi uiñocana omoi jaillana jitaidicue. Naimie omoi comeciaina raise uri itatajana omoi uiñocana omoi jaillana jitaidicue. Naimie omoina eo isiruillana omoi uiñocana omoi jaillana jitaidicue.

Tainocinona llofuerañi ite

³ Cue isiruigano, omoimo Jusiñamui caina jai jillotaja rafuena iocire cueiacadicue; iadedi jaie rafue birui illa jira, omoimo cueticue. Jusiñamuimona cai feiñoga rafuena omoi eo riiduana jitaidicue. Naie rafuena Cristo oretaganomona cacadicaí. Naie rafuena meidonidicaí. Ieconi duide. Jusiñamui jaie rafuena lloñeite. ⁴ Caimo ite rafuena omoi eo riiduana jitaidicue. Cai creyentiaí motomo dajerie tainocinona llofuerañi illa jira, iena jitaidicue. Uanaicinona llofuecana naimaci illamo cai comeciaina facadicaí; iadedi Jusiñamui jitaillacinona finoñedimaci. “Jusiñamui caina duenaillamona, jeacino finocana cai jaia, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isodinona duere finoiticue” Jusiñamui jaie llote. Naimie duere sefuillacino anamo jai itimaci.

⁵ Iemona omoi raise fueollena, bie rafuemo omoi comeciaina faca. Bie rafuena navui llofueticaí. Iena raise cacadomoi; iadedi iena dane uibiño. Iena lloiticue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci iñoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaillena llote. Iemona naimaci fiodaitimaci. Ie isoide. Naimiena birui omoi iñoñenia, omoina duere finoite. ⁶ Ero, bie rafuemonona omoi fueua. Jusiñamui ecimo ite jaienisaimona dajerie imaci illanona jaie jitaiñedimaci. Naimie isoi iacadimaci. Naimaci illano naimie ecimo jaie itimaci. Naimaci jitailla rafuena naimaci finollena, naimie ecimo illana fainonocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie ricaillafue anamo jai itimaci. Naimie dine nana comini illirui ia, naimacina duere finoite. Naimacimona omoi fueua. Jeacinona Jusiñamui dibeimo itino finoia, Jusiñamui naimacina duere finoite. ⁷ Ero, bie rafuemonona omoi fueua. Sodoma railla nairai micoriai maraiñedicinona jaie eo finouidimaci. Gomorra railla nairai micoriai daje isoidimaci. Nainomo ianori ite nairai daje isoidimaci. Naimaci aiñede riñoniai diga itimaci. Naiñaiñuai iñide iñiai diga itimaci. Coninina aifiedotimaci. Iemona Jusiñamui naimacina jaie duere finode. Nana naimaci illanona raise jaie jobaitate. Naimacimona omoi fueua. Jusiñamui nana jeacinona finodinona duere finoite.

⁸ Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaia jeare ñaitimaci. ⁹ Miguelna mameciredede jaienici isoi iñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raiacade. Taife diga Moisés micori abina uaitate. Taife Moisés micori abina bairoacade. Miguel iena jiai jitaide. Miguel Taife diga riire ñaite; iadedi Taifena jeare ñaiñede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”. ¹⁰ Naie taino llofueraini iese iñedimaci. Jusiñamui jaienisaia jeare ñaitimaci. Ocainaijai imaci comeciai uifnuacinodo jailla isoi, naie taino llofueraini imaci uifnoga rafuedo jaidimaci. Iemona ja muidomo faifitimaci. ¹¹ Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori diga icirite. Icirillamona Caín micori ie ama micorina jaie meinete. Caín micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judíuai cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori iñoñena jira, Jusiñamui naimie micorina meinete. Jusiñamui uaina naie taino llofueraini iñoiacaiñena jira, jiai faifitimaci. ¹² Dani omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoidie uillie oni ñaitade. Ie mei nomi deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riarra isoidimaci. Llisilla facaise riarra llisiñenia, maraiñede. Riarra llisiñenia, iena oni aiñodicaí. Maraiñena jira, safenaite. Naimaci maraiñena jira, naie taino llofueraini jiai safenaitimaci. ¹³ Naie taino llofueraini jearede rana finocabidimaci. Eo bagode monaillai isoidimaci. Monaiillai eo bagoia, monaillai fuemo jearede rana oni ñaicosite. Ucuaina eruailamona naiona cai macarillana uifnoticaí; iadedi ucudu ana feia, cai macarillana raise uifnoñedicaí. Naie taino llofueraini ana fede ucudu isoidimaci. Comini uanaicinona uifnotañedimaci. Naimaci llofuiacinomona Jusiñamui jitailla rafuedo cai raise jaillana uifnoñedicaí. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

¹⁴ Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisaí diga biite, ¹⁵ nana naimiena iñoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote. ¹⁶ Naie taino llofuerainidi creyentiana sedarainina uaitaside. Jusiñamuina jeare ñaioidimaci. Dani naimaci jitailla rafuena finouidimaci. Eo abina biriuidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai

jicadimaci. Naimaci isoi omoi iñeno.

Cristona ñnotinomo llucino

¹⁷ Cue isiruiga amatiai, cai Nama Jesucristo oretagano jai llogacinona omoi comeci. ¹⁸ Raitimaci: “Jesucristo nia abido biñena facaiseconi naimie uaina ñnoñedino jaca iitimaci. Naimaci jearede jitaillacinodo jaitimaci” raitimaci. ¹⁹ Naie taino llofueraini comini comeciai daje isoi lloillana itatañedimaci. Jusiñamui ðibeimo iñede rafuena gaidimaci. Jusiñamui Joreño naimacimo iñede.

²⁰ Cue isiruigano, naimaci isoi omoi iñeno; iadedi Jusiñamui rafue ñnocana mai omoi jai. Naie rafuedi mare. Jusiñamui Joreño omoina canuacinodo Jusiñamuimo omoi jii. ²¹ Jusiñamui omoina isiruillacinona uñnocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenailla jira, naimie ecimo jaca iitica. ²² Diga comini naie taino llofueraini rafuedo jaidimaci. Iemona dajerie Jusiñamui uaina raise nia ñnoñedimaci. Naimacimo llono: “Mai ñno. ²³ Dajerie cominina Jusiñamui duere sefuillacinomona jillote”. Taino llofueraini rafuedo naimaci jailla jira, niadi faifitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruiocaida duenai.

Jusiñamuimo iobillacinona cai fecacabillasa

²⁴ Jusiñamuidi omoina jeacinona finoñenana itatarede. Naimie uicomo omoina ico itataite. Omoina jeacinona omoi jaca finoñedena nainomo itataite. Nainomo iocire iitomoi. ²⁵ Jusiñamuidi jaca dajede. Cai facaina cai Nama Jesucristo fiodaillamona, caina cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.

JUAN ICO SUILLE RAFUENA CUIAFUE

Jesucristo ico suille rafue lluana cueticue

¹ Jesucristona cueticue. Juandicue. Jesucristo facaina maijicabidicue. Ie díbeimo itinomo iena Jesucristo llollena, Jusiñamui naimiena bie rafuena uifnotade. Jiairuido ico ebena suille rafuena uifnotade. Cuena iena uifnotallena, iena cuemo llollena, ie jaienici cue díne oretate. ² Jusiñamui cuena birui uifnotaga rafuena jai cueticue. Jesucristo cuemo birui lloga rafuena jai cueticue. Nana birui cue cúa rafuena jiai jai cueticue. ³ Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iaiei illa jira, iemo raise cacarei.

Siete creyentiai illanuaimo bie carta oredicue

⁴ Asia railla enruemo ite creyentiai, omoi díne cue uai oredicue. Siete illanomo omoi illamona, bie rafue omoi uifnuana jitaídicue. Iena omoi uifnollena, biena cueticue. Jusiñamui ie Joreño diga, Jesucristo diga, omoína duenaicabide. Omoína uri itatacabite. Iena omoi uifnocana mai omoi jai. Jusiñamui jaie jaca ite. Birui naimie jaca ite. Ico jaca iite. Ie Joreño naimie abimo illamona, omoína bie rafuena raise cacataite. Iena inotaite. ⁵ Ie Moo uaina raise inuamona, enruemo naimie illa facaise Jesucristo ie Moo rafuena raise atona llouide. Naimie fiodaite; iadedi naimemona jillode. Naimie dane fiodaifena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jecinomona jai jillobitade. ⁶ Naimie fiodaillamona naimie cominina jaidicai. Naimie anamo illaíma isoi caina sedallena, caina itatate. Naimie cominina cai illa jira, naimie Moo Jusiñamui diga atona birui fiairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaídicue.

⁷ Ero, enruemo uillie motodo Jesucristo biite. Naimie bia, nana comini naimiena cioitimaci. Naimiena jaie meinete nairaídi naimiena cioitimaci. Duere sefuillana jacinallamona nana comini eecuitimaci. Iese jaca suite.

⁸ Cai Nama Jusiñamui cuemo llote: “Jaca bue nia inenia, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iticue. Siño jitodicue”.

Juan Cristona ciode

⁹ Daajena Cristomo cai duilla jira, omoi amadicue isoidicue. Cristomo cai duillamona, birui duere sefuídicaí. Cominina ico naimie sedaia, nainomo iiticaí. Naimie cai comecina ocuifnotajamona iemo birui ocuiridicaí. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci. ¹⁰ Jusiñamuina cue sedajamona, naimie Joreño cuena namatajamona, inifenamona nicairilla isoi cue jinafo díne damie ado lluana cacadicue. Trompeta isoi ie uaidi ficirede. ¹¹ Cuemo llote:

—O cioacalle rafuena cueno. O cacacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramomo, Sardimo, Filadelfiamo, Laodiceamo. Diese illanuaimo oreta —llote.

¹² Cuemo llotimiena cue cioillena, jinafo dine erodaticue. Siete oromona finoca lamparínai ciodicue. Naga lamparín ie oromona finoca rairacomo raide. ¹³ Naie lamparínai motomo imana eruaidimiena ciodicue. Naimiedi Cristo. Areroina jitade. Oromona finoca cinturóna jitade. ¹⁴ Naimie ifotirai userede iniroi isoi eo userede. Naimie uisi irai boa isoi eruaide. ¹⁵ Naimie eillidi bronce eo dua isoi quenirede. Naimie uai aillue ille tua isoi eo ficirede. ¹⁶ Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiñua isoi.

¹⁷ Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaie jaca iticue. Ico jaca iiticue. ¹⁸ Jaie fiodaiticue; iadedi naiemona jaie jillodicue. Jaca iiticue. Dane fiodaiñeiticue. Cue uai siñona jira, comini fiodailliruina lloticue. Cuena ñnoñedno fiodailla mei, naimaci joreñuai illinona jiai lloticue. ¹⁹ O como ciua rafuena cueno. Omo cue ja llole rafuena cueno. O ciole rafuena jiai cueno. ²⁰ Ailluena rafue omo lloticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofuerañi isoide. Bie siete lamparínaiidi bie siete illanomo ite creyentiai isoide. Bie creyentiaina ja ñaiacadicue —raite.

2

Cristo Efesomo ite creyentiaimo lloga rafue

¹ Cristo cuemo llote:

—Efesomo ite creyentiaimo llollena, nainomo ite llofueraimamo cue llwana cueno: “Cue nabeillimo siete ucuduai ite. Siete oromona finoca lamparínai motomo iticue. Omoina ñaiticue. Omoi llofueraima cue anamo ite. Omoi motomo cue illamona, cuena nabaidomoi. ² Omoi motomo cue illa jira, omoi illana raise uiñoticue. Omoi comeciai ocuiñocana icirñeno itomoi. Marañedicinona finoraini diga nabairñedomoi. Omoi motomo damerie ‘Cristo oretagaca’ raitinona facaciamona, naimaci tainona llorainina uiñotomoi. ³ Omoi comeciai ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena ñnocana nia jaidomoi. ⁴ Iese itomoi; iadedi omoi abi rafue cuemona birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi. ⁵ Iemo omoi comeciaina faca. Cue dibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue dibeimo omoi comeciai dane raise iñenia, omoina duere finoiticue. Iemona omoi lamparín oni uiticue. Omoi creyentiaina ñaiticue. Cue dibeimo raise omoi iñenia, jairuido omoi illanomo creyentiai iñeitimaci. ⁶ Omoina marecinona jiai lloticue. Nicolaítas railla comini finoca rafuena gaiñedomoi. Iena jiai gaiñedicue. Eo marañede rafuena finocana jaidimaci. ⁷ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Cuena raise ñnotinomo Jusiñamui illanomo ite riarana iiticue. Ie llillemona jaca iitimaci” cueno.

Cristo Esmirnamo ite creyentiaimo lloga rafue

⁸ Cristo cuemo llote:

—Esmirnamo ite creyentiaimo llollena, nainomo ite llofueraimamo cue llwana cueno: “Jaie jaca iticue. Eniruemo jaie cue ia, fiodaiticue; iadedi naiemona jai jillodicue. Jaca iiticue. ⁹ Cue cominina omoi illa jira,

duere sefuidomoi. Omoi duerenana uiñoticue. Benomo dueredomoi; iadedi Jusiñamui mona duenidomoi. Naimie dine ico omoi ia, buerenit-omoi. Damierie omoina jeare ñaiana uiñoticue. Naimacidi judíuai comini; iadedi cue dibeimo iñedimaci. Taife anamo itimaci. ¹⁰ Ico omoi duere sefua, jaciruiño. Taife cárcelmo omoimona damieriena itataite. Abido danomo omoi jaillena, iese omoina duere finoite. Diez digarui duere sefuitomoi. Omoi ille dinori cuena ñnocana omoi jai. Duere sefuillamona bu fiodaia, cue diga jaca iite. ¹¹ Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua. Jusiñamuidi cuena raise ñnotinona naimaci jeacino facaina ibana oñeite. Iraimo faifñeitimaci; ia Jusiñamui dine jaca iitimaci” cueno.

Cristo Pérgamomo ite creyentiaimo lloga rafue

¹² Cristo cuemo llote:

—Pérgamomo ite creyentiaimo lllollena, nainomo ite llofueraimomo cue llwana cueno: “Nagafebei eo jairede lloebi cuemo ite. ¹³ Omoi illana uiñoticue. Taife anamo itino motomo itomoi; iadedi cuena ñnocana nia jaidomoi. Omoimona Antipas micorina navui meinetimaci. Naimie micoridi cue rafuena raise llofueuide. Naie facaise cuena fainocaiñedomoi; ¹⁴ iadedi cuemona janore rafue omoi diga birui ite. Omoimona damieriedi Balaam micori llofuacinodo jaidimaci. Balaam micori Balac micorimo jaie llua jira, omoi jaiagai jeacino finodimaci. Balac cominimo omoi jaiagai diga nabairillena llote. Ie jira omoi jaiagai jiraraimo fecaca guillena naimaci diga gutimaci. Iemei naimacimona ainiaina otimaci. Jusiñamuina ñnoñedinomona ainiaina otimaci. Naiemona jearede rafue comuide. Omoimona birui damierie iese isoidimaci. Cuena ñnoñedinomona ainiaina otimaci. ¹⁵ Omoimona damierie nicolaitas railla llofuacinodo jiai jaidimaci. Naimaci llofuacinodi uanañedicino. ¹⁶ Naie llofuacinomona eneno mai omoi i. Iedo jaiño. Naie llofuacinodo jaidinomo: ‘Omoi comeciai iuai dane meido’ llono. Iena naimaci finoñenia, cue dibeimo naimaci raise iacaiñenia, cuemo ite lloebi diga cuena ñnoñedinona duere finoiticue. ¹⁷ Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua. Judíuai jaiagaimo maná railla guille cue illa isoi, cuena raise ñnotinomo monamo jai ite maná isoi iiticue. Biena ñaiticue. Imaci comeciaina ocuiñotajacinona iiticue. Cue cominina naimaci illamona, naimacimo userede noficina jiai iiticue. Nainomo mameci ite. Dani naiena feiñotino naie mamecina uiñoitimaci” cueno.

Cristo Tiatiramo ite creyentiaimo lloga rafue

¹⁸ Cristo cuemo llote:

—Tiatiramo ite creyentiaimo lllollena, nainomo ite llofueraimomo cue llwana cueno: “Jusiñamui Jitona cue illanona, bie rafue omoimo lloiacadicue. Cue uisí irai isoi boode. Cue eillí bronze eo dua isoi quenirede. ¹⁹ Omoi finoca rafuena uiñoticue. Jusiñamuina omoi isiruillana uiñoticue. Jiaie cominina omoi isiruillana uiñoticue. Cuena omoi ñnuana uiñoticue. Jiaie creyentiaina omoi canocabillana uiñoticue. Duere sefuidomoi; iadedi omoi comeciai ocuiñuana uiñoticue. Navui iese icana jaidomoi. Birui bai lliai jaidomoi; ²⁰ iadedi cuemo omoi diga rafue ite. Omoi motomo marañede riño ite. Jezabelna ñaiticue. Naiñaiñona omoi oni dotañena jira, cuemo omoi diga rafue ite. ‘Jusiñamui rafuena jino llua uai cuemo ite’ naiñaiño llote. Uanañedicinona llofuecabilla jira, omoimona damieriena jifueite. Jearede rafuena llofuecabite. Omoi

aiñede riño diga illana llofujete. Omoi iniñede iima diga illana llofujete. Jiraraimo fecaca guille llofujete. Iena guilla jira, omoimona damierie naie jiraraina sedade. Iese naiñaiño llofuecabite. ²¹ Naiñaiño comeci iuai meidollena are sedadicue; iadedi naiñaiño naie jearede rafuena fainonocaiacaiñede. ²² Naiñaiño duere sefuillena, naiñaiño duitaiticue. Naimaci comeciai iuai naimaci meidoñenia, naiñaiño llofuiacinodo jaidinona jiai eo duere finoiticue. ²³ Naiñaiño dibeimo itinona meineiticue. Nana creyentiaidi nana comini comeciai iuailaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi. ²⁴ Jezabel llofuiacinodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeticue; ²⁵ iadedi cue nia abido biñenia, cuemona omoi uiñoga rafuena inocana mai jai. ²⁶ Cue Moomona cue uaina feiñoticue. Cuena raise inuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci. ²⁷ Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llailla isoi. ²⁸ Cuena inotinomo monairaicuduna jiai iiticue. ²⁹ Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai inua” cueno.

3

Cristo Sardimo ite creyentiaimo lloga rafue

¹ Cristo cuemo lote:

—Sardimo ite creyentiaimo lllollena, nainomo ite llofueraimamo cue llwana cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. ‘Cristona raise inotica’ raitomoi; iadedi omoi comeciamona raise iñedomoi. ² Cue dibeimo raise dane i. Cuena dane raise inocana jai. Cuena jai fainonocaiacadomoi. Jusiñamui omoi finoca rafueri iobiñede. ³ Cue rafuena jaie cacajamona, iena inotomoi. Iedo dane jai. Omoi comeciai iuaina dane meido. Cue dibeimo dane raise omoi iacaiñenia, firiraima bainino billa isoi, omoina duere finollena, ebena biiticue. Omoi dne cue billiruina uiñoñeitomoi. ⁴ Omoimona damierie jearede rafuena finocana jaiñedinomoi. Jusiñamuimona naimaci comeciai marena jira, cue dne naimaci illena, userede iniroina jitaitimaci. ⁵ Cuena inocana jaidinodi userede iniroina jitaitimaci. Cuemo ite rabenicomona naimaci mameciaina doñeticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaimo iena jiai lloiticue. ⁶ Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai inua” cueno.

Cristo Filadelfiamo ite creyentiaimo lloga rafue

⁷ Cristo cuemo lote:

—Filadelfiamo ite creyentiaimo lllollena, nainomo ite llofueraimamo cue llwana cueno: “Mareuidimiedicue. Uanaicinona jaca lloticue. David micori jitona cue illamana, illaimana cue illa jira, siño uai cuemo ite. Ie muidona cue jitailla diese cominina feiñoticue. Jusiñamui illanomo naimaci illena, naimacina feiñoticue. Cue jitailla diese cominina

feñoñedicue. ⁸ Omoï finoca rafuena uiñoiticue. Omoïna cue canua jira, jaca buna cue rafuena omoï lluana itatanide. Jamaï bue isidomoi; iadedi cue rafuena ñnocana jaidomoi. Cuenajanoñedomoi. ⁹ Omoï dine damerie Taife anamo itimaci. Naimacidi judíuai; iadedi cue ðibeimo iñedimaci. Tainona llocabitimaci. Ero, omoï dine naimacina cue bitatajamona, omoïna cue isiruillana uiñoitimaci. Cue ðibeimo naimaci jailla mei, cuemo iobillacinona fecaitimaci. ¹⁰ Nana cuenajanoñedinona ico eo duere finoiticue. Iemona cuenajanoñenana uiñoiticue. Omoï duere sefuiñellena, naie facaisemona omoïna jillotaiticue. ¹¹ Eniruemo ebena abido biiticue. Cuemona ibana omoï feñoñeni raillano, cue ðibeimo ñnocana omoï jai. Cue ðibeimo raise omoï jaiñenia, cuemona jaiñie omoï facaina ibana feñoite. ¹² Cuenajanoñenana começiana ocuiñoitaiticue. Cue illanomo jaca iitimaci. Cuemo naimacidi duilla jira, cue jaiñie mamecina naimaci abimo cueititacue. Jusiñamui mamecina naimaci abimo cueititacue. Jusiñamui illano mamecina naimaci abimo cueititacue. Naimie illanodi comue Jerusaléna mameçirede. Naimiemona, monamona ico ana biite. ¹³ Jusiñamui Joreñoñomona cue lloga rafue ite, omoï creyentiaï iena. Bie rafue bu cacajia, iena jiaï ñnuu” cueno.

Cristo Laodiceamo ite creyentiaïmo lloga rafue

¹⁴ Cristo cuemo llote:

—Laodiceamo ite creyentiaïmo llollena, nainomo ite llofueraïmamo cue lluana cueno: “Siño Jitodicue. Cue lloga uaina jaca finocabidicue. Uanaicinona jaca llocabiticue. Cue uaido Jusiñamui nana finode. Nana comuitate. ¹⁵ Omoï finoca rafuena uiñoiticue. Cue rafuedo jaillana ñia fainonocaiñedomoi; ia cue rafuedo eo raise jaiñedomoi. Janore ñnocana jaidomoi. ¹⁶ Omoï finoca rafuena cue gaiñena jira, cuemona omoïna oni dotaiticue. ¹⁷ ‘Ucuberedicai’ raitomoi. ‘Raruaïredicai. Nana cai jitailla ra caïmo ite’ raitomoi. Cuemona iese iñedomoi. Cuemona dueredomoi; ia iena uiñoñedomoi. Cuemona caimare iñedomoi. Cuenajanoñenana raise ñnoñena jira, uisninidino isidomoi. Taimiedomoi isidomoi. ¹⁸ Ie jira omoïna dajerie rafuena llofueititacue. Cuemona omoï eo duerena jira, omoï começiaï raise iñena jira, omoïmo fiebidicinona cuemo jica. Cuemona ono. Omoï duenillena, cuemona eo mare oro isoide rana ono. Omoï taimieñelle isoïñellena, cuemona omoï meiruïñellena, userede ñiroi isoide ra cuemona ono. Omoï uisina cioille isoïllena, cuemona manue ono. Omoï começiana ñaiticue. Cuenajanoñenana raise omoï ñnoia, buena omoï começiaïmo fiebiñeite. ¹⁹ Cue isiruigano cue ðibeimo raise illena, naimacimo riire llocabiticue. Cue uaina naimacidi ñnollena, naimacina jiaï duere finocabidicue. Ie jira cue ðibeimo raise omoï i. Jeacino omoïmo ia, iena fainonocai. ²⁰ Ero, nase tutitacue isoidicue. Bu cuenajanoñenana cacajia, cue fo billena cuenajanoñenana uaidoia, nasena bu econoia, fo jaiticue. Naimieñena nabaïllanona, naimie diga gutitacue. Omoï começiana ñaiticue. Cue rafuena omoï cacaja mei, iena omoï ñnoia, cuenajanoñenana feñoitomoi. Iemona conini nabaiticai. ²¹ Eniruemo cue Moo jitailla rafuena jaiñie cue fluidua mei, naimie ecimo abido jai ititacue. Cueri naimie iobillamona, illaïmana cue illamona, naimie ecimo jai ititacue. Ie isoide. Cuenajanoñenana raise ñnotino monamo cue ecimo itataititacue. Cue cominina naimacidi illa jira, naimacina iobitallena, cue ecimo naimacina nabaiticue. ²² Jusiñamui Joreñoñomona cue lloga rafue ite, omoï creyentiaï iena. Bie rafuena bu cacajia, iena jiaï ñnuu” cueno.

4

Juan Jusiñamui illanomo ciua rafue

¹ Dallu illanona monamo cue eruaia, jiaie rafuena ciodicue. Nainomo Jusiñamui illanomo econoga nasena ciodicue. Ailli cue diga ñaitimiedi cuena uaidote. Naimie uai trompeta isoi ficirede. Llote:

—Monamo bi. Jiairuido sulle rafuena omo acataiticue.

² Jusiñamui Joreño anamo cue illamona, nicairilla isoi Jusiñamui illanona ciodicue. Nainomo naimie ana raillana ciodicue. ³ Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo cide. Cornalina railla noficina eruaide. Cornalina jiairede. Naie illano ecimo ameona ciodicue. Ameo mocorena jira, esmeralde railla noficina eruaide. ⁴ Naie illano ecimo veinticuatro rairabici jiai ite. Nainomo userede iniroina jitajanona veinticuatro einamací ana raidimaci. Naimaci ifogimo oromona finoca nuicirai ite. ⁵ Jusiñamui illanomona boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode. ⁶ Jusiñamui illano uicomo vidriona eruaide joraina ciodicue. Eo quenirede. Naimie illano ecimo cuatro cajedino ite. Diga uisi naimaci uicomo ite. Diga uisi naimaci emodomo ite. ⁷ Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide. ⁸ Nagamiiaimo seis iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jaie jaca ite. Birui ite. Ico jaca iite.

⁹ Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia, ¹⁰ naie veinticuatro einamací Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona, ¹¹ rotimaci:

Cai Nama Jusiñamui, ona eo iobitaiacadicaí.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidicaí.

5

Juan Jusiñamui illanomo ferinoga rabe illana cide

¹ Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illamona, naie rabe raise ibaibide. ² Jusiñamui ie nanoca jaienici ado llua cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

³ Monamo itinomona, enirue itinomona, jai fioidaitinomona, bumio ie uai iñede, naie rabe oni econollena. Naie rabe facanidimaci. ⁴ Jaca bumio naie uai iñena jira, eo eedicue. ⁵ Naie facaise naie veinticuatro einamacimona damie cuemo llote:

—Mai eeñeno. Judá nairai ie Leónna mameciredimiedi iena econorede. Naimiedi David micori comini imie. Ie dibeimo iñedinona jai emodofilla

jira, naimiemo uai ite, naie siete nitaca rana oni suiñollena, naie rabena econollena.

⁶ Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiaí itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreña jai orede. ⁷ Naie facaise Jusiñamui ie nabellimona naie rabena ote. ⁸ Iena naimie ua mei, naie cuatro cajedino, naie veinticuatro einamací diga, naimiena sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamuimo comini jiacino mamecido ite. ⁹ Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaíno jaie ona meinetimaci.

O fiodailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

¹⁰ Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jairuido eniruemo ite cominina sedaitimaci.

Ie jira naie rabena oni suiñooredio.

¹¹ Iemei dane eruaillamona, naimie ecimo eo ailluena Jusiñamui jaienisaina ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide. ¹² Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiena eo abina uifnotajamona, naimiena jai iobitaicadicai.

Naimiena cai ñnuanona, naimiemo iobillacinona feaacadicai.

¹³ Iie facaise nana comini, nana Jusiñamui comuitaga ra diga, lluaana cacadicue. Monamo itino, enirue itino, jai fiodaitino, monaillaimo itino lluaana cacadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca feaacadicai. Caina jaca sedallesa.

¹⁴ Naie cuatro cajedino raitimaci:

—Ie isoi jiaí lloiacadicai.

Ie facaise naie Llauda isoidimiena sedallena, naie veinticuatro einamací ana bitadatimaci.

6

Juan siete nitaca ra oni suiñuana ciodicue

¹ Toica Llauda isoidimie iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi gurua uai isoi lluaana cacadicue. Naimie llote:

—Mai bi.

² Naimie llua mei, userede caballo billana ciodicue. Caballo emodo itimiemo sicuira ite. Illaimana jira, naimie ifogimo nuicirai jiide. Ie bacauai anafefitallena, oni jaide.

³ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁴ Naimie llua mei, jiairede caballo billana ciodicue. Caballo emodo itimie mo are lloebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

⁵ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite. ⁶ Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomenicono finoa, dacaiño guille raifi ite. Tres kilos cebada ie core darui maijia ua ucube diese raifide. Iena damie oia, iemona llomenicono finoa, dacaiño amani guille raifi ite. Illimo riana nia ite; ia iena iballena ucube baiñede. Ie muidona aime guitimaci —llote.

⁷ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁸ Naimie llua mei, liai usereide caballona ciodicue. Ie emodo itimie mamecidi Fiodaitadimie. Jusiñamui uai naimie mo illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiamona fiodaitimaci. Atuedo meinetasiñeite; iadedi eo ailluena meinetasiite. Riai uaimona ie cuarta facaina comini fiodaitimaci.

⁹ Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidica” naimaci llua jira, Jusiñamuina ñnoñedino naimacina meinetimaci. Jai fiodaillamona naimaci joreñuai Jusiñamui illanomo jai itimaci. ¹⁰ Jusiñamuimo ado llotimaci:

—Cai Nama, siño jitodio. Mareuidimedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

¹¹ Jusiñamui cominina illamona, naimacimo Jusiñamuidi userede areroina jitalena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meineitimaci. Naimacina meinia mei, ibana oiticue.

¹² Iemei Llauda isoidimie jiaie nitaca ra oni suiñuana ciodicue. Suiñuanona, aillue ñuisaño suide. Jitoma eo jiti-reficaide. Fivuidi diruena eruaide. Jiairede. ¹³ Riirede aifi riana ana llutaja isoi, monamona eniruemo ucuaí llude. ¹⁴ Ferinoga rabe oni uilla isoi, mona iñebicaide. Naga anedu, naga uiasi diga jiai oni jaide. ¹⁵ Ie jira illaicomini, jamai bue isoñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci. ¹⁶ Anedumo llotimaci. Noficimo llotimaci:

—Caina iballena, cai emodomo ana uai. Jusiñamui riicaillafuemono caina reirita. ¹⁷ Iaimaiai riicaillarui jai ite. Naiemona buna jillobinide —llotimaci.

7

Juan ailluena Israel comini Jusiñamui sello diga nitajana ciodé

¹⁻² Naie facaise jiaie ico sulle rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaiaiaia beicimo itiaiaiaia. Aifi biñellena itimaci. Ie muidona monaillai dine aifi iñede. Aifi iñena jira, amenaia nirairiñede. Eniruenta monaillai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaimo ado llote:

³—Eniruenta aifi diga maraiñeno nia finoñeno. Monaillaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino uiecuai itofiai sello diga nia cai nitañenia, eniruenta maraiñeno finoñeno.

⁴ Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci. ⁵ Judá micori cominimona doce mil ite. Rubén micori cominimona doce mil ite. Gad micori cominimona doce mil ite. ⁶ Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite. ⁷ Simeón micori cominimona doce mil ite. Leví micori cominimona doce mil ite. Isacar micori cominimona doce mil ite. ⁸ Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

Juan ailluena comini userede iniroina jitajana ciodé

⁹ Naie facaise ailluena cominina ciodicue. Ailluena jira, naimacina facadonicue. Naga nairaiaimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite. ¹⁰ Ado llotimaci:

Bie Llauda isoidimie jiaie fiodaillamona, cai jeacinomona Jusiñamui caina jai jillotate.

¹¹ Naie facaise nana Jusiñamui jaienisa naimie ecimo naidaillana ciodicue. Naie veinticuatro einamacimo ecimo, naie cuatro cajedino ecimo jai naidaidimaci. Naie facaise Jusiñamui uicomo ana bitadajanona, naimiena sedadimaci. ¹² Raitimaci:

Bie comini isoi omo iobillacinona jiaie fecaacadicaia.

Odi mareuidimiedio. Abina eo uiñotio. Odi jaca siño jitodio.

Ie jira iese lloticaia.

Ona jaca cai iobitajasa.

¹³ Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

¹⁴ Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina inoñedino meinogano. Naimaci iniroina jai jocoritimaci. Llauda isoidimie jiaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiaie ñaiticue. Llauda isoidimie fiodailla jira, naimaci comeciaina jai jeanide. ¹⁵ Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise enoite. ¹⁶ Dane duere

sefuiñeitimaci. Nana naimaci jitailla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. ¹⁷ Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eeñeitimaci. Dane sunaiñeitimaci.

8

Juan Llauda isoidimie iraiie nitaca ra oni suiñuana ciod

¹ Toica Llauda isoidimie iraiie nitaca ra oni suiñuanona, media hora monamo tii raiñoicaide. ² Iemei siete Jusiñamui jaienici naimie uicomo illana ciodicue. Nagamiemo daje trompetana fecade. ³ Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina ñnotino jiacino Jusiñamuimo jaide. ⁴ Jobaillamona Jusiñamui uicomo a jaide. Nana Jusiñamuimo jiacino diga a jaide. ⁵ Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶ Iemei naie siete jaienici naimaci trompetas fillena llinote. ⁷ Damie ie trompetana fite. Filla jira, monamona janorede hielu, boode ra diga, dirue diga, eniruemo uaide. Atuedo enirue boofede; ia ailluena boode. Riai uaimona ie tercera facaina boode. Nainomo nana amenaiaie boode. Nainomo nana raiticño boode.

⁸ Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. ⁹ Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciaie fiodaite. Nainomo ite botemona ie tercera facaina jiai anabaite.

¹⁰ Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniaie, ie tercera facaina jorainiaie diga erireficaide. ¹¹ Ie muidona naie ucudu Ajenjona mameciredede. Riai uai oni dobaiñuamona “Eriredimie”. Iemona jinui erireficaide. Iena jiruamona, ailluena comini fiodaitimaci.

¹² Jiaie jaienici ie trompeta fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

¹³ Iemei jaienici ado cuirioillana cacadicue. Monamo feianona llote: —Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

9

¹ Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. ² Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma

raise bainide. Mona jitireficaide. ³ Uillie mona fioduaina eruailanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci. ⁴ Raiticifño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci. ⁵ Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite. ⁶ Iese ico suia, eo duere comini sefuilla jira, fiodaillana jitaitimaci. Naimaci abina meineacanitimaci. Fiodaiacanitimaci; ia fiodainitimaci.

⁷ Fioduaidi jobaime dne jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci. ⁸ Naimaci ifotie arena illanona, riño ifotiena eruaide. Naimaci isiduai leones isiduaina eruaide. ⁹ Naimaci abiaimo ico isoi ra ite. Lloemona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci. ¹⁰ Naimaci omacai acaido isoide. Naie diga maillanona, cinco fivui cominina duere finoitimaci. ¹¹ Naimaci illaimadi naie ana ifona sedadime. Juduai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodime. ¹² Daje duere sefuilla rafue jai fuite. Mena nia suiñede.

¹³⁻¹⁴ Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suiño —llote. ¹⁵⁻¹⁶ Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riai uaimona ie tercera facaina meinetimaci. ¹⁷ Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocrede. Daje facaise borarede. Caballos ifogiai leones ifogiaina eruaide. Naimaci fue mona boode radi, uillie diga, azufre boa isoi jino bite. ¹⁸⁻¹⁹ Naimaci fue mona bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

²⁰ Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, bronce mona, noficimona, amenamona finoca jiraraiaina nia sedaacadimaci. Naie isoide radi cajeña jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci. ²¹ Conini meinecabitimaci. Aimaniai dne jaicabidimaci. Naimaci aiñede riño, naimaci iniñede ima diga icabitimaci. Rana ficabidimaci. Jeacinona finocana nia jaidimaci.

10

Juan Jusiñamui jaienici, econoga rabenico diga, billana cide

¹ Ie facaise Jusiñamui illanomona eniruemo jiaie jaienici billana cidicue. Naimie mo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede.

Naimie idai eo boode amena isoi eruaide. ² Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide. ³ León eo irilla isoi, ado llote. Naie facaise siete gurua ñaia isoidino uai cacadicue. ⁴ Naimaci lluana cacaja mei, iena cueiacadicue; iadedi monamona damie cuemo llote:

—Naie lluana lloño. Iena cueño.

⁵ Naie jaienici ie nabei onolli mona dine ñuitajanona, ⁶ Jusiñamui llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monaillai nainomo ite ra diga jiai finodio. Cue baifemo o faia jira, uanaicinona cue lluana uñotio. O lloga uaina jaca suite. ⁷ Iraie jaienici ie trompeta ja fiite. Filla mei, bie facaise Jusiñamui ie facaina lloraini micoriaimo jaie lloga rafue suite. Comini naie rafue jaie raise cacaiñedimaci; ia iena ja raise cacaitimaci —llote.

⁸ Monamona cuemo ailli llotimie dane llote:

—Jaienici onollimo econoga ite rabenicono llinuai.

⁹ Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

¹⁰ Llinua mei, iena guiticue. Ciifo isoi naimerede rana cacadicue; ia guilla mei, erirede ra isoi cue jebemo ite. ¹¹ Cuemo dane llote:

—Omo cue lolle rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

11

Juan menamie Jusiñamui rafuena lluana cacade

¹ Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca. ² Cue jofo ecimo ite taibirina facaño. Naie illano judiuañedinomo jainaiade. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. ³ Naie facaise menamiemo cue uaina iiticue. Iaimai cue lolle rafuena daje amani años abimo atomonado lloitiaimiai. Comini comeci iuai meiduana iaimai jitailla jira, sunaillamona, ebinide iniroina jitaillaimiai —llote.

⁴ Iaimai mena olivos railla riera mamecido itiaimiai. Enirue Namana Jusiñamui illanona, naimie uicomo mena ite lamparin ie rairaco mamecido itiaimiai. ⁵ Iaimai duere bu finoacania, naimiena meineitiaimiai. Iaimai fuemona boode ra billanona, naimiena meinetiaimiai. Iaimai duere finodino iese fioidaitimaci.

⁶ Iaimai Jusiñamui rafue lolle facaiseconi noci deitañellena, iaimaiimo Jusiñamui uai iite. Jinui diruena jaitallena iaimaiimo uai iite. Iaimai jitaicabilla facaise, diga isoide rafue finuamona cominina duere finoitiaimiai; ⁷ iadedi Jusiñamui rafue iaimai llua mei, eo ana ite ifomona ocainana eruaillanona, Taife jino biite. Jino billanona, iaimai diga fuirite. Iaimai anaafetitaja mei, iaimai meinite. ⁸ Raifomo joneñeitimaci; iadedi iaimai abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitailla jira, Sodoma jaie ite nairai isoidimaci. Egipto jaie ite nairai jiai

isoidimaci. Jerusalémo Jesúsna jaie jiai meinetimaci. ⁹ Raiafomo iaímaiaí joniana rairuitimaci. Darui amani abi atomonado ailluena comini, naga nairaíamona iaímaiaína jibuisaíbitimaci. ¹⁰ Nana eniruemo ite comini iaímaiaí fodaillari iobitimaci. Iaímaiaímona comini duere sefuilla jira, iaímaiaí jai fodailla jira, iobitimaci. Rafuena finuanona, dani coninina rana fecaitimaci. ¹¹ Darui amani abi atomonado illanona, fodaillamona iaímaiaína Jusiñamui dane jillotaite. Ie muidona naidaitiaímaiaí. Nana iaímaiaína ciodino eo jacínaitimaci. ¹² Naie facaise monamona damie iaímaiaína uaiduana cacadiaímaiaí. Llote:

—Bene mai bi.

Ieconí iaímaiaína enoidimacidi uillie motomo monamo iaímaiaí jailana ciodimaci. ¹³ Naie facaise aillue ñuisaño suide. Ie jira janore facai Jerusalén goide. Riaí uaimona ie décima facai goide. Naiemona siete mil comini fiodaitimaci. Fiodaiñedino jacinaillamona:

—Jusiñamuidi ua siño jito —lloitimaci. ¹⁴ Mena duere sefuilla facaise jai fuite. Nia daje suiñede; ia raire suite.

Juan iraié trompeta fillana cacade

¹⁵ Naie facaise jaíe jaíenici ie trompetana fite. Monamo itino ado llotimaci:
Jusiñamui, Cristo diga, illaíma isoi, eniruemo ite cominina biruimona jaca sedaite.

Naie comini naimie anamo raise iitimaci.

¹⁶ Naie veinticuatro einamací Jusiñamui ecimo illanona, naimie uicomo ana bitadajanona naimiena sedadimaci. ¹⁷ Llotimaci:

Jusiñamui, cai Nama, omo iobillacinona feaacadicaí.

Siño jitodio. O jitailla rafuena jaca finodio.

O uaido bie cominina jai sedadio.

¹⁸ Ona naimaci ñinoñenamona, o diga iciritimaci; iadedi naimacina emodofidio.

Bie facaise jai fodaitino jillotajamona, ona naimaci ñinoñena jira, naimacimona ja íbana oitio.

Jearede rafuena naimaci finua jira, naie facaise ona ñinoñedinona duere finoitio.

O díbeimo maijidino, o facaina lloraini, nana ona ñinotino omona íbana feiñoitimaci.

Nibai jamai bue isoidimaci.

Nibai jamai bue isoiñedimaci; iadedi omona íbana feiñoitimaci.

¹⁹ Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Ieconí boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

12

Juan daje riñona, eo aillue jaio diga, ciodé

¹ Naie facaise monamo daje riñona ciodicue. Naiñaiñona cue ciuamona, Jusiñamuidi eniruemo itinomo ico suille rafuena cue uíñuana jitaide. Naiñaiño ñiroidi jitoma isoi bairedé. Naiñaiño eilli anamo fivui ite. Naiñaiño ífogimo nuicirai isoi doce ucuduai ite. ² Jai uruesite. Jocoacana jira, como isiredé. ³ Ie facaise monamo jiaimiena ciodicue. Naimiedi Taife. Naimie illamona jaíe rafue suillena uíñoticue. Naimiedi eo aillue jaiona eruaide. Jiairedé. Siete ífogí naimiemo ite. Diez sigai

naimiemo ite. Naga ifogimo nuicirai ite. Riai uaimona naimiedi dragón. ⁴ Naimie omacai diga ailluena ucuaína eniruemo ana butade. Riai uaimona ie tercera facaina butade. Ie uruena gutallena, riño uicomo naidaita naiñaiño jocollena sedade. ⁵ Naiñaiño imana jocode; ia jaio naimiema gutañede. Nana nairaiái naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiema uite. Ie ecimo Jusiñamui naimiema itatate. ⁶ Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñoa sedaite.

⁷ Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jiai fuiridimaci. Jusiñamui jaienisai illaíma mamecidi Miguel. ⁸ Naimaci dinena emodofidimaci. Jaio ie jaienisai anafefilla jira, Jusiñamui illanomo naimaci illano jai iñede. ⁹ Eniruemo jaiona eruaidimie ie jaienisai diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifuede. ¹⁰ Monamo damie ado lluana jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise inoñenia, jeacinona bu finoia, Jusiñamui uicomo birui naimie finocabilla isoi, Taife caina llogidoñeite. ¹¹ Toica Llauda isoidimie naimaciri fodailla jira, naimie rafuena naimaci lluamona, Taifena emodofidimaci. Fiodaitimacina, naie rafuena llocana jaiacadimaci. ¹² Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiema duere sefuitimaci. Naimie eo icirite. Nainomo naimie are iñellena uiñote. Naimie icirillamona eniruemo itino eo duere sefuitimaci —llote.

¹³ Eniruemo jaiona eruaidimie dotajamona, naiñaiñoa duere finollena, naimiedi imana jai jococa riñoa racade. ¹⁴ Naimiema jilloillena, Jusiñamui mena iaico, majaiño iaico isoi, naiñaiñoimo ite. Feianona, jofue iñenanomo daje amani años abimo atomonado illena nainomo jaide. Naiñaiñoa Jusiñamui eenollena, nainomo jaide. ¹⁵ Ie facaise jaiona eruaidimie fuemona eo ailluena jinui bite. Ille isoi tote, naiñaiñoa corobaitallena; ¹⁶ ia enirue bojuamona, nana jinui nainomo ana jaide. Enirue naiñaiñoa canua jira, naiñaiño corobaiñede. ¹⁷⁻¹⁸ Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino inotino diga, nana “Jesúmo duidicai” raitino diga, jobairiacade.

13

Juan mena riirede ocainana cide

¹ Naie facaise monaillai fuemo cue naidailanona, daje riirede ocaina monaillaimona billana cidicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogaiimo Jusiñamuina jeare ñaia mameci ite. ² Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimiedi ie siño uaina fecade. ³ Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicailamona, nana eniruemo ite comini naimie dibeimo jaidimaci. ⁴ Ocainamo ie uaina aillue jaiona eruaidimie fecaja jira,

jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

⁵ Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade. ⁶ Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite. ⁷ Taife uai naimiemo illa jira, Cristona eniruemo ite innotino diga jobairite. Naimacina emodofide. Iemona nana comini naga nairaiaimona naimie anamo itimaci. ⁸ Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena innotino mameciaina naie rabenicomo jai cuete. Naimie illanomo jaca illena, naimaci mameciaina cuete.

⁹ Omoi jeforena jira, raise fueollena, bie rafuemo cacarei. ¹⁰ Duere sefuillena, naie facaise cárcelmo Cristona innotinona joneitimaci. Naimacina meinia mei, naimacina meinetino Jusiñamuimona daje isoi ibana feñoitimaci. Ie muidona Cristona innotino comeciai ocuiñocaida innocana jailla.

¹¹ Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jai isoi ñaite. ¹² Monaillaimona bite ocaina uai eniruemona bite ocainamo jiai ite. Ie uai diga, nana cominina monaillaimona bite ocainana sedate. ¹³ Eo siño rafuena finocabite. Comini cioillena, monamona eniruemo boode ra ana bitatate. ¹⁴ Siño rafuena finuamona, Taife jitailla jira, eniruemo itinona jifuate. Iena naimaci sedallena, cominina monaillaimona bite ocaina joreño finuana ocuide. Monaillaimona bite ocaina lloebi diga navui bofiamona jai jillode. ¹⁵ Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide. ¹⁶ Nana cominimo naimie númerona cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoifedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo inedinomo cuetatate. ¹⁷ Iese bummo inñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate. ¹⁸ Iena raise cacaillena, iemo omoi comeciaina faca. Abina uifotimie bie númerona uifote. Come mamecido iite. Bie númerodi seiscientos sesenta y seis.

14

Juan 144,000 comini ruana cacade

¹ Naie facaise Jerusalémo Sion railla anedu muidomo Toica Llauda isoidimie naidaillana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cueba. ² Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue. ³ Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamacu nainomo itimaci. Dani bie ciento cuarenta y cuatro mil comini bie comue ruana rotimaci. Jiaino

iena fueonidimaci. Bie ciento cuarenta y cuatro mil comini eniruemona naimaci dibeimo inedimona jai jillodimaci. ⁴ Bie ciento cuarenta y cuatro mil comini jearede rafuena ebiruinedimaci. Llauda isoidimie rafuena inocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena. ⁵ Cristo rafuedo jeacinona finocabiñeno raise jaidimaci.

Juan daje amani jaienai rafue lluaana cacade

⁶ Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide. ⁷ Ado llote:

—Jusiñamuina inuanona naimiena seda. Naimiemo iobillacinona fecu. Naimiemo inoñedinona ja duere finoite. Monana, enirue diga, monailla diga, ille diga, naimie finua jira, naimiena seda.

⁸ Jiaie jaienici billanona llote:

—Babilonia railla nairai illano eo aillue; iadedi ja inite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiaie eo finotatimaci. Babiloniamo jiaie itino isoi, Jusiñamuimona duere sefuitimaci.

⁹ Naie facaise jiaie jaienici billanona, ado llote:

—Monaillaimona bite ocainana bu sedaia, ie joreña bu sedaia, ie uieco itofemo, ie onollimo ocaina cuetataga ra bumo ia, ¹⁰ Jusiñamui riicallafuemona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci. ¹¹ Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodañeno jaca duere sefuitimaci —llote.

¹² Bie rafue suille facaise Jusiñamui lloga uaina raise inuanona, Jesús dibeimo raise illanona, comeciái ocuiñocana naimaci jaille.

¹³ Iemei monamona Jusiñamui Joreño llote:

—Biena cueno: “Biruimona Jesúsna inuamona, meineganodi caimare iitimaci. Jesús dibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

Juan Jusiñamui eniruemo itinona duere finua rafuena cacade

¹⁴ Naie facaise monamo cue eruaia, userede uilliena ciodicue. Uillie emodo Cristo raide. fimana eruaide. Naimie ifogimo oromona finoca nuicirai ite. Ie onollimo jairede lloebi ite. ¹⁵ Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite. ¹⁶ Jaienici llua isoi, ie lloebi diga Cristo cotade. Nana iena finode. Cominina duere finode. ¹⁷ Jusiñamuina sedajanomona naie facaise jiaie jaienici bite. Naimie onollimo jairede lloebi jiaie ite. ¹⁸ Ieconí Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimieimo ado llote:

—Jai einailla jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite. ¹⁹⁻²⁰ Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicallafue anamo

eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

15

Juan siete jaienisaí cominina duere finoacana ciode

¹ Naie facaise monamo jiaie rafuena ciodicue. Ieri eo raijicaidicue. Iena cue ciuamona, Jusiñamuidi eniruemo itinomo suille rafuena cue uifnuana jitaide. Siete jaienisaína ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie rícaillifue saite.

² Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona, ³ jai emodofilla jira, Moisés micori ie ruana rotimaci. Moisés micori Jusiñamui facaina jaie maijiuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

⁴ Cai Nama, nana comini ona jaciruillamona, ona inoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

⁵ Jusiñamuina sedajanomo dane eruaidicue. Ie fo iticuartomo ciodicue.

⁶ Naiemona siete jaienisaí billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade. ⁷ Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite. ⁸ Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaímo ite rafue nia suiñena jira, Jusiñamuina sedajanomo buna fo jainide.

16

Juan eniruemo copas oni totajanona ciode

¹ Ie sedajanomona Jusiñamui naie siete jaienisaímo ado llote:

—Cue rícaillafue omoi copamo illa jira, eniruemo itinona duere finollena, omoi copas oni tota.

² Daje jaienici iena finode. Eniruemo ite cominina duere finode. Monaillaimona bite ocaina cuetataganona jiai duere finode. Ocaina joreñona sedadinona duere finode. Naimaci abiaímo jodollaíaina comutate. Iemona duere sefuidimaci.

³ Iemei jiaie jaienici ie copa oni totajamona, monaillaina duere finode. Nana monaillaidi fiodaitino dirue isoi jaide. Eo jearedena eruaide. Nana nainomo ite cajedino fiodaitimaci.

⁴ Iemei jiaie jaienici ie copa oni totajamona, nana illiaí, nana jorainiaí diga, duere finode. Diruena jaide.

⁵⁻⁶ Naie facaise nana jinuina sedacabide jaienici llote:

—Jusiñamui, o jaca mareuidimiedio. Ona ñnotinona eniruemo itino meinia jira, o facaina llorainina naimaci meinia jira, naimacina o raise uñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷ Jusiñamuimo caimare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

⁸ Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci. ⁹ Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uñotimaci; ia naimie dibeimo naimaci comeciái iuaina meidoiacañedimaci. Jeacinona finuana fainonocaiacañedimaci. Naimiemo iobillacinona fecaacañedimaci.

¹⁰ Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitreñicaide. Eo duere sefuillamona, comini imaci ifena ainitimaci.

¹¹ Duere sefuillamona, Jusiñamuina jeare ñaitimaci. Naimaci abiaimo ite jodollaiaí isirede; iadedi naimaci comeciái iuaina meidoñedimaci. Jeacinona finuana fainonocañedimaci.

¹² Naie facaise jiaie jaienici ie copamona ie duere sefuillicinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaiaí illaicomini, imaci soldaduai diga, ruica dine raise birenitimaci.

¹³ Naie facaise aillue jaio fuemona, monaillaimona bite ocaina fuemona, naimie facaina lloraima fuemona, daje amani jananiaí billana ciodicue. Nagamiemona daje janaba bite. Nai jananiaí jerocina eruaide.

¹⁴ Taifemona bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicominina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uñoitimaci.

¹⁵⁻¹⁶ Armagedón railla illanomo ofitimaci. Naie illano mamecidi judúuai uai mameci. Ieconí cai Nama cuemo llote:

—Fíriraíma isoi ebena biiticue. Cue billemo ocuridimie iocire iite. Cue billemo naimie ocuria, cue bia, naimie cue jitaillacinona finuamona, naimie meiruiñeite.

¹⁷ Naie facaise jiaie jaienici jafaici dine ie copamona ie duere sefuillicinona totade. Ieconí ie sedajanomona Jusiñamui llote:

—Bie duere sefuillicino diga, cominina cue duere finoacanacino ja fuite.

¹⁸ Ieconí boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede. ¹⁹ Iemona nanoca nairaí illano daje amani facaina goide. Nana jiaie illanuai jiaí goidimaci. Jusiñamuídi Babilonia railla nairaína raise uñuamona, nana ie riicaillafuemona iena eo duere finode. ²⁰ Naie ñuisañomona naga uiasi jai cioñena. Naga anedu jiaí cioñena. ²¹ Monamona noci deilla isoi, hieló jiaí ana jurude. Naga hieló cuarenta kilos níbaí merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

17

Juan eo marañede riñona duere sefuillana ciode

¹ Naie facaise naie siete copas diga ite jaienisaïmona cue dine damie billanona cuemo llote:

—Cue diga bi. Eo marañede riño duere sefuillana omo acataitïcue. Monaillai emodomo naiñaiño jai raide isoide. Naiñaiñodi nanoca nairai illano mamecido ite. Nana illaïcomini naie nairai anamo itimaci. ² Naiñaiñona sedajamona, naiñaiño diga, illaïcominidi jearede rafuena finocabidimaci. Naiñaiñona nabaillamona, enirue mo ite comini jearede rafuena eo ebiruitimaci —llote.

³ Nïcairilla isoi, jaienici cue joreñona uillanona, jofue iñenanomo cue joreñona uite. Eo jiaïrede riïrede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiai ite. Diez sigai jiai ite. ⁴ Naie riño jiduirede iniroi, jiaïrede iniroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo marañede jearede rafuena finocana uite isoide. ⁵ Jusiñamui naiñaiño finoca rafuena uïñotaiacana jira, naiñaiño uiecomo mameci jai cuetataga: “Nanoca Babilonia raillañaiñodicue. Cuemona eo jearede rafue comucana jaicabide. Cue muidona comini jearede rafuena finocabide”. ⁶ Naiñaiñodi ailluena Jusiñamuimo duidinona, ailluena ua Jesúna inotinona meinetajana eo ebiruite. Naiñaiñona cue cioia, eo rajicaidicue. ⁷ Jaienici cuemo jïcanote:

—¿Bue ñe rajicaidïo? Naiñaiño mo ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue. ⁸ Naie ocaina navui ite; ia birui jai iñede. Ico enirue mona, eo ana ite ifomona, dane biite; iadedi faifite. Ieri Jesucristona inoñena jira, monamo Jusiñamuidi ie rabenicomo enirue nia finoñena facaise naimaci mameciaïna jaca cueñede. Naimie illanomo jaca iñeitimaci. ⁹ Ocaina rafuena omo ja lloiticue. Jusiñamui ona uïñotajanona iena cacaitio. Bie siete ifogidi siete anedu mamecido ite. Riño nainomo raide. ¹⁰ Ie siete ifogidi siete illaïcomini mamecido ite. Naimacimona cinco illaïcomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dallu sedaite.

¹¹ Ifomona bite ocainana dane lloiticue. Cominina jiai sedaite; ia bie siete illaïcomini sedajacinomo duite. Cominina naimie sedaja mei, naimie faifite. ¹² Ie diez sigaidi diez illaïcomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci. ¹³ Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci. ¹⁴ Toïca Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaïcomini baifemo faia jira, nanoca imïena jira, naimacina emodofite. Ie cominina naimie fetode. Naimiena inotimaci. Jai emodofitimaci —llote.

¹⁵ Jaienici nia llote:

—Riño monaillai emodomo raillana ailli ciodio. Monail laidï nana comini mamecido ite. Naga nairai mamecido ite. ¹⁶⁻¹⁷ Naie diez illaïcominidi, ocaina diga riñona enoitimaci. Naiñaiñona duere finoitimaci. Jusiñamui jitailla jira, naimie jitailla rafue fuidollena, naimie

lloga uai suillena, naimaci começina daje isoi lloitaite. Ocaina anamo naimacina itataite. Riñoña iese fuidoitimaci. Naiñaño ñiroina oni dotatajanona, naiñaño taiñañoña iite. Naiñañoña meineitimaci. Ie llicisina riitimaci. Ja muidomo iraimo naiñañoña dotaitimaci. Iese naiñañoña duere finuanona, naiñañoña fuidoitimaci. ¹⁸ Bie riñoði nanoca nairai illano mamecido ite. Naie nairai anamo nana eniruemo ite illacomini iitimaci —llote.

18

Juan Babilonia railla nairai illano goilla rafuena ciode

¹ Ie facaise monamona jiaie jaienici ana billana ciodicue. Naimie uai siño. Naimie uai siñoña jira, eniruena lligaiñote. ² Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai iñedimaci. Nainomo Taife jaienisaí birui itimaci. Jananiaí nainomo birui itimaci. ³ Nia goiñenia, bie nairai jeacinona eo finuamona, nana nairai iena ebiruitimaci. Bie nairaina nabaillamona, nana illacomini jearede rafuena jiai finocabidimaci. Jearede rafuemonona nana rana fecaraini bie nairaimona ailluena ucubena ganacabidimaci —llote.

⁴ Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i. ⁵ Bie nairai jeacino eo finocana jaidimaci; iadedi iena Jusiñamui uifnuamona, naimacina jai duere finoacade. ⁶ Jusiñamui, naimaci finua diese ibana ono. Naimacina ua eo duere fino. ⁷ Jeacino finuamona iobidimaci. Iemonona abi iedotimaci. Jeacino finuana eo ebiruitimaci. “Illaicominiðicai. Nana cai jitailla ra caimo ite. Feciño isoi duere jaca sefuiñeiticai” começina facadimaci; ⁸ iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fiðadaitimaci. Naimaci jofue booite. Jusiñamui siño jitona jira, naimacina raire fuidoite —llote.

⁹ Bouamona uillie naimaci cioia, sunaillamona, naie nairai diga nabairite illacomini eo eetimaci. ¹⁰ Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

¹¹ Naimaci rana naie nairai jai oñena jira, rana fecaraini eo sunaillamona eo eetimaci. ¹² Iese fecacabidimaci: oro, plata, abi finollena raifide ra, diga eo mare raifide ñiroi, diga caimare soride rabiciai, elefante sigainiai, jofona nille ra, bronce, lloeona, mare nofici, ¹³ guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, comina aticabidimaci. ¹⁴ Sure illamona lloitimaci:

—Caímona omoi começiai jitailla rana ja oñeitomoi. Omoi ebiruiga rana ja oñeitomoi.

¹⁵ Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eetimaci. Sunaitimaci.

¹⁶ Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare ñiroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca rana eo ebiruitimaci; ¹⁷ iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijuidino diga, nainomo jaidino diga, bodedo rana fecaraini diga, ¹⁸ aaremona uilliena ciuamona, naie nairai bouana fidiano, lloitimaci:

—Naie nairai nana jiai nairai bai femo navui faite. Jiaie nairai ie isoi ebinide.

¹⁹ Sure illamona, naimaci ifogimo imuicina faianona, eetimaci. Lloitimaci:

—Bie nairai eo duere sefuide. Bie nairaimona boteredinodica navui ailluena ganadica. Bie nairai jai raire fuite.

²⁰ Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹ Naie facaise jiaie jaienicimo siño uai illanona, eo aillue nofici lluanona, monaillaimo iena faite. Llote:

—Bie nofici dane cai cioñena isoi, Babilonia railla nairai dane iñeite. Jusiñamui iena eo riire fuidoite. ²² Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberañeite. Llomeniconna finollena, buna dane maijñeite. ²³ Nainomo naiona lamparina dane booñeite. Rafue dane iñeite. Eo camare iobitaja rafue dane iñeite. Iraisñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaina navui jifuecabidimaci. ²⁴ Naie nairai ailluena Jusiñamuina inotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

19

¹ Ie facaise monamo eo ailluena comini ado lluaana cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi siño jitodio.

² O anamo itinona raise uiñuamona, uanaicinona o uiñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade;

iadedi iba jai otio.

³ Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —lloitimaci.

⁴ Naie veinticuatro einamaci, naie cuatro cagedino diga, Jusiñamui ecimo ana bitadajanona, naimiena sedadimaci. Llotimaci:

—Omoi llucino mare. Ie isoi jiai lloiacadica. Jusiñamuina cai iobitajasa.

⁵ Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiena inotino naimiena iobitajasa.

Jamai bue isoidino naimiena iobitajasa.

Jamai bue isoñedino naimiena iobitajasa.

Juan Toica Llauda isoidimie aina ua rafuena cacade

⁶ Naie facaise monamo eo ailluena comini lluaana cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

⁷ Eo iobidicai. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

⁸ Mare iniroi naiñaiño jai ite. Eo userede. Quenirede. Jeanide llotimaci. Iese iniroina llotimaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie inotino imaci mare finoca rafue isoide.

⁹ Jaienici cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”. —Iemei llote:

—Jusiñamui iena llua jira, uanaicinona omo lloticue.

¹⁰ Jaienici uicomo eillimo ana bitadaticue, naimiena sedallena; ia cuemo llote:

—Dama ite. Cuenas sedaño; ia dama Jusiñamuina seda. Jesús ie dibeimo itinona uanaicinona jai uifnotade. Ie jira naga o diga naimiena inotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

Juan userede caballo emodomo itimienna ciodicue

¹¹ Naie facaise mona ecorillana ciodicue. Nainomo userede caballona ciodicue. Naie emodomo itimiemo mena mameci ite. Inogamienna mameciredede. Uanaicinona Llocabitimienna jiai mameciredede. Naimacina raise uifnuamona, naimie dibeimo inedina duere finollena, naimaci diga jobairite. ¹² Naimie uisidi irai isoide. Illaimana jira, naimie ifogimo ailluena nuicirai ite. Naimiemo cueda mamecina buna uifnotede. Dama naimie iena uifnote. ¹³ Naimie jitaca iniroi ie dibeimo inedino diruemo mutaca. Jusiñamuina naimie uifnotaja jira, Jusiñamui Uairedimienna mameciredede. Naimiedi Jesucristo. ¹⁴ Naimie jinafona soldaduai isoi Jusiñamui facaina itino monamona billana jiai ciodicue. Eo mare userede jeanide iniroina jitadimaci. Userede caballuai emodomo itimaci.

¹⁵ Eniruemo ite nairaiaina emodofillena, naimie fuemo jairedede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riccaillifue anamo itinona eo duere finoite. ¹⁶ Naimie iniroimo, naimie idaimo jai cueda: “Nanoca Illaima. Nanoca Nama”.

¹⁷ Naie facaise jaienici jitoma lligaiñuanomo ciodicue. Nana inoniaina uaidote:

—Llicisina mai riabi. Jusiñamuidi ailluena cominina ja meiniamona rille eo iite. ¹⁸ Naimacina emodofillamona, ailluena llicisina ja iite. Ailluena cominina ja meineite. Illaicomini itimaci. Soldaduai illaicomini itimaci. Caballuai itimaci. Caballuai emodomo jaicabidino itimaci. Diga comini ite. Jamai bue isodino itimaci. Jamai bue isoinedino itimaci. Patrones anamo itino itimaci. Patrones anamo inedino itimaci. Naimaci llicisina mai riabi —llote.

¹⁹ Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo

itímie diga, naimie díbeimo itino diga jobairiacadímaci. ²⁰ Userede caballo emodomo itímie ie díbeimo itino diga naimacina emodofide. Ocainana gaitadímaci. Naimie facaina tainona lloraimana jiaí gaitadímaci. Naie lloraima ocaina uai diga comínina jífuecabite. Siño rafuena finuamona, ocaina cuetataga ra itinona, ie joreñona sedadinona jífuecabite. Naie iaímaiaína gaitaja mei, eo boode iraimo iaímaiaína cajena dotadímaci. Azufre boa isoi irai boode. ²¹ Caballo emodomo itímiedi ie fuemo ite lloebi diga iaímaiaí soldaduaina meinete. Jaienici llua isoi, inoniaí naimaci llicisína ritimaci. Iemona eo monidímaci.

20

Juan mil años Taife maiana cide

¹ Naie facaise monamona jaienici billana ciodicue. Eniruemo eo ana ite ifo llave naimiemo ite. Aillue lloeo ie onollimo ite. ² Aillue jaiona eruaidimiena gaitade. Naimiedi Taife. Riaí uaimona Satanás. Jiaíci dragón. Mil años iese illena lloeo diga naimiena maite. ³ Ana ite ifomo naimiena dotade. Llave diga ifona ibaide. Comínina ramo faiñellena, naimacina jeacínona finotañellena, naimie uaina itatañede. Mil años comínina jífuenide. Mil años fuilla mei, dallu naimiena jino oretate, comínina ramo faillena.

⁴ Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamai duere sefuillicinona lloitímaci. Ie facaise jai meineganona jiaí ciodicue. Eo duere sefuilla facaise “Jesús comínidicaí” naimaci llua jira, Jusiñamui uaina naimaci llua jira, naimaci ifogiaína jaitajanona, naimacina meineganodímaci. Monaillaimona bite ocainana sedañedímaci. Ie joreñona sedañedímaci. Ie cuetataga ra naimaci uiecomo, naimaci onollimo iñede. Navui fi-daitímaci; ia iemona bie facaise jai jillobitímaci. Imaci abiaí diga Jusiñamui naimacina jillotaite. Cristo diga mil años eniruemo itinona sedaitímaci. ⁵ Naimacidi nano jillodino. Naie mil años nia fuiñenia, jiaíe jai fi-daitino nia jilloñeitímaci; ia mil años fuilla mei, jilloitímaci. ⁶ ¡Nano jillodino caimare marena iitimaci! Dane fi-daiñenamona Jusiñamui illanomo jaca iitimaci. Faiññeitímaci. Comínina sedajanona, comini Jusiñamuina raise uñollena, comini Cristona raise uñollena, naimacina canoitímaci. Cristo diga mil años naimacina sedaitímaci.

⁷ Bie mil años fuilla mei, Jusiñamuidi ana ite ifomona Taife jino oretate. ⁸ Nana eniruemo ite nairaiaina jífuaibite. Gog railla illaicomínina, Magog railla nairaiái diga, jífueite. Naimaci nairaiaina ofitaite. Eo ailluena naimaci illa jira, conilliena cai facadonina isoi, naimacina facadonidicue. Jusiñamuina inotino diga jobairillena, ofitímaci. ⁹ Danomo ofillanona, Jusiñamuina inotinona ciribitaitímaci. Jerusaléna, Jusiñamui isiruiga nairaina, ciribitaitímaci. Naie facaise monamona boode ra billanona, jobairiacadinona fuidoite. ¹⁰ Comínina eo jífuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaie dotade. Naimie facaina tainona lloraima jaie dotade. Nainomo ua jaca duere sefuitímaci

Juan aillue rairabicina cide. Nainomona Jusiñamui duere finollicinona llua cacade

¹¹ Naie facaise aillue userede rairabicina ciodicue. Illaimana naimie illamona, nainomo Jusiñamuina jiaí ciodicue. Naimie siño illamona, mona

enirue diga jai iñede. ¹² Naie facaise Jusiñamui uicomo nana fioidaitino naidaillana ciodicue. Jamai bue isoiñedino itimaci. Jamai bue isoidino itimaci. Naimacimo juez isoi Jusiñamui lollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cuega. Iemei Jusiñamui jiaie rabenicono jibuide. Naimie diga jaca ille comini mameciai nainomo jai cuega. Naimaci mameciai nainomo iñenia, naimaci finoca rafue diese Jusiñamui naimacimo duere sefuillena llote. ¹³ Monaillaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite. ¹⁴ Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci. ¹⁵ Monamo ite rabenicomo cueñega comini mameciai diese itinona iraimo dotaite.

21

Juan comue monana, comue enirue diga ciode

¹ Birui ite mona, birui ite enirue diga jai iñede. Monaillai jiai jai iñede. Iemei comue mona ciodicue. Comue eniruena jiai ciodicue. ² Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede. ³ Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci. ⁴ Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiodaiñeitimaci. Sunaiñeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunaiñeitimaci —llote.

⁵ Jusiñamui llote:

—Ero, nana ra comuena birui finoiticue. Cue llucino uanaicinona jira, cue llucinona cue finua jira, bie rafuena cueno.

⁶ Iemei cuemo llote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeciái eo caimare itataiticue. Ibatañeno cue diga illena, naimacina jaca itataiticue. ⁷ Cuena raise inotinona iese itataiticue. Jaca naimaci Jusiñamuniticue. Naimaci jaca cue comininitimaci. ⁸ Jiaino jaca eo boode iraimo jaca iitimaci. Azufre boa isoi irai booite. Naiemona jaca jilloñeitimaci. Cuemona eneno jaca iitimaci. Diese nainomo iitimaci: abido danomo jaidino, cuena raise inoñedino, jearede rafue finocabidino, cominina meinetino, añede riño diga icabitino, iniñede ima diga icabitino, aiñiníai, jiraraina sedacabidino, tainona llocabitino —llote.

Juan comue Jerusaléna llote

⁹ Naie facaise naie siete jaienisaimona damie cue dine bite. Naie jaienisai imaci copamo cominina duere finollicinona navui ite isoide. Naimie cuemo llote:

—Cue diga mai bi. Hima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

¹⁰ Nicaírilla isoi, Jusiñamui Joreño cue joreñoa eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare. ¹¹ Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruailla jira, enefebecodo ciode. ¹² E llaigafo eo a ite. Eo jedaciede. Doce nasiaí ite. Naga nasemo daje jaenici ite. Israel micori uruiaí mameciaí naie nasiaímo cueda. Doce uruiaí illa jira, naga naserie daje mameci cueda. ¹³ Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beici dine eruaide llaigafomo daje amani nase ite. ¹⁴ Naie llaigafo anamo doce nofici ite. Nainomo Toica Llauda isoidimie ie doce llofueoicaigano mameciaí cueda.

¹⁵ Cue diga ñaite jaenicimo oromona ra facara ite. Naie nairai facallena ite. Eo nase, ie llaigafo diga, facallena ite. ¹⁶ Naie nairaina naimie facajamona, nagafebei daje isoi illana uñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. ¹⁷ E llaigafona jiaí facade. Sesenta y cuatro metros a ite. Comini facaja isoi, jaenici iena facade.

¹⁸ E llaigafo jaspe railla noficimona finoca. Bie nairai difai oromona finoca. Enefebecodo ciode. ¹⁹ Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede. ²⁰ Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafo anamo ite noficiái doce diga ite. ²¹ E doce nasiaí difai oro. Userede. Naga nase daje perlamona finoca. Bie nairai naisuaí difai oro. Enefebecodo ciode.

²² Bie illanomo Jusiñamuina sedajanona cioñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaímaiaí uicomo sedaiticaí. ²³ Jusiñamui siñoa jira, nainomo comini jitomana jitaiñeitimaci. Fivuína jitaiñeitimaci. Jusiñamui, Llauda isoidimie diga, iena lligaiñoite. ²⁴ Nana comini iaímaiaína nabaicana jaitimaci. Nana illaicomini iaímaiaí dine billanona, iaímaiaímo iobillacino jaca fecaitimaci. ²⁵ Bie nairai nasiaí jaca ibaíñeite. Nainomo naionadi jaca iñeite. ²⁶ Iaímaiaímo iobillacinona fecallena, nana comini nainomo biitimaci. ²⁷ Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimie ite rabenicomo cueda mameciaí itinodi nainomo biitimaci. Bie rabenicomo Jusiñamui illanomo jaca iitino mameciaí jai cueda.

22

¹ Naie facaise jaenici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. ² Nanoca naiso motodo tote. Nagafabelle dine jaca itataite amenaiaí ite. Naga fivui llisillamona, naga fivui llisilla ite. Eo ibiaí illamona, comini caimare marena itimaci. ³ Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. ⁴ Naimiena marefodo cioitimaci. Naimie naimaci duillamona, naimaci uiecuai itofaímo naimie mameci cueite. ⁵ Nainomo naionadi iñeite. Lamparina

jitañeitimaci. Jitomana jitaiñeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

Juan Jesucristo billirui iairei illana cacade

⁶Jaienici cuemo llote:

—Bie lluacinodi uanaicino. Naimie facaina llorainimo ie rafuena llollena, ie uaina itatate. Naimiena ñnotinona ico suille rafuena ja uñnotaiacade. ⁷“Raire biiticue” Cristo llote.

Bie rabenicomo ite ico suille rafuena ñnotinodi caimare iitimaci.

⁸Juandicue. Bie rafuena cacadicue. Iena ciodicue. Iena cue cacaja mei, iena cue cúa mei, iena cuemo acataga jaienici uicomo ana bitadaticue. Naimiena sedaacadicue; ⁹iadedi cuemo llote:

—Dama ite. Cuená sedaño. O diga, naimie facaina lloraini isoi, bie rabenicomo ite llogacinona ñnotinó isoi, naimie dibeimo jiaí maijidicue. Dama Jusiñamuina seda. ¹⁰Bie rafue suillirui iairei illa jira, iena jino llono. Iena uñnota. ¹¹Bie rafuena bu ñnoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie ñnoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

¹²Jesucristo cuemo llote:

—Ero, raire biiticue. Naimie finoca rafue diese nagamiemo ibana fecaiticue. ¹³Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. ¹⁴Naimaci ñniróina naimaci jocoia, caimare iitimaci. Naimaci comecina ñnaiticue. Ie jeacinona oni dotacame jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; ¹⁵ia naimacina jeacinona naimaci fañonocaiñenia, Jusiñamui illanomo marañede rafuena finocabidino, aima dine jaicabidino, añede riño diga icabitino, iniñede ñma diga icabitino, cominina meinettino, jiraraina sedacabidino, tainona llocabitino duiñeitimaci. ¹⁶Creyantiaina bie rafuena uñnotallena, cue jaienici o dine jai oretaticue. David micori ie jitodicue. Monairaicudu bairia isoi, Jusiñamui jitaillacinona cue finollena, baireiticue —llote.

¹⁷Bie facaise Jusiñamui Joreñodi, Cristo jai oga ai railla comini diga, naimiena nia ñnoñedinona uaidote:

—Bie rafuena mai cacarei. Iena mai ñno. Iena bu ñnoia, jiaimiemo iena lluai: Iena mai cacarei. Iena mai ñno.

Jiroacadimiemo lloticue:

—Mai jiruaibi. Bie jinua raifñede. Biena o jiroacania, jaca iitio. Iese lloticue; ia ie comecina ñnaiticue. Bie rafue ñnuana ñnaiticue. ¹⁸Bie ico suille rafue ite rabenicono bu facajia, naimiemo rafuena lloiacadicue. Bie rafue baifemo bu lloia, bie rafuena bu meidoia, bie rabenicomo ite duere finuacino isoi, Jusiñamui naimiena duere finoite. ¹⁹Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai lloticue.

²⁰Cristo raite:

—Bie rafue jaca suite. Ua raire biiticue.

Iena raire suillena jia jitaidicue. Cai Nama Jesús raire billena eo jitaidicue. ²¹Naimie duenailacina nana Jesucristona inotino uñocana jaillana jitaidicue. Macaibaite. Juandicue.